

宋書

梁 沈 約 撰

中 華 書 局

卷 第

九 至 土卷七二(傳)

五

宋書卷五十九

列傳第十九

殷淳 子字 弟冲 淡 張暢 何偃 江智淵

太祖卽位,爲金紫光祿大夫,領竟陵王師,遷護軍,又遷特進、右光祿大夫,領始興王師。 五兵尚書爲高祖相國左長史。及受禪,轉散騎常侍,國子祭酒,復爲五兵尚書,吳郡太守。 殷淳字粹遠,陳郡長平人也。 會祖融,祖允,並晉太常。父穆,以和謹致稱,歷顯官,自

元

嘉十五年卒官,時年六十,諡曰元子。

居黃門爲淸切,下直應留下省,以父老特聽還家。 在秘書閣撰四部書目凡四十卷,行於世。 淳少好學,有美名。 少帝景平初,爲秘書郎,衡陽王文學,秘書丞,中書黃門侍郎。 元嘉十一年卒,時年三十二,朝廷痛惜之。 高簡寡慾,早有清尚,愛好文義, 未嘗違 淳

子学,有父風。 世祖大明末,爲始興相。 官至尚書吏部郎,順帝撫軍長史。

列 傳 第 + 九 殷 淳 拾。

励弑立,以爲侍中、護軍,遷司隸校尉。 丞,有司直之稱。 淳弟冲字希遠,歷中書黃門郎,坐議事不當免。 出爲吳興太守,入爲度支尙書。元凶妃卽淳女,而沖在東宮爲劭所知遇, 沖有學義文辭,砌使爲尚書符,罪狀世祖 復爲太子中庶子,尚書吏部郎,御史中 ,亦爲劭盡

世祖剋京邑、賜死。 沖弟淡字夷遠,亦歷黃門吏部郎,太子中庶子,領步兵校尉。 大明世,以文章見知,爲

當時才士。

力。

中令。 張暢字少微,吳郡吳人,吳興太守邵兄子也。 從琅邪王至洛。還京都,高祖封藥酒一甖付禕,使密加耽毒。 父禕,少有孝行, 歷官州府, 韓受命,既還,於道 爲琅邪 王國

自飲而卒。

郎

先嘗,牧因此乃食,創亦卽愈。 出奔赴,制服盡哀,爲論者所美。 暢 少與從兄敷、演、敬齊名,自為後進之秀。 州辟從事,衡陽王義季征虜行參軍, 弟牧嘗爲猘犬所傷,醫云宜食蝦蟆膾, 起家爲太守徐佩之主簿,佩之被誅,暢 彭城王義康平北主簿, 牧甚難之, 暢 含笑 馬也

爲 司 義季 徒祭酒,尚書主客郞。 安 西 記室參軍、南義陽太守,臨川王 未拜,又除度支左民郎,江夏王義恭征北記室參軍、晉安太守。 一義慶 衞 軍 從事中郎,揚州治中別駕從事史,太子 又

留非 道。 之。 義恭 尉長史何勗不同,欲席卷奔鬱洲,自海道還京都。 議,欲以車營爲函箱陣,精兵爲外翼,奉二王及妃媛直趨歷城,分兵配護軍蕭思話 軍食不足, 百姓咸有 總統 所敢干。 若此計必用,下官請以頸血汗公馬蹄!」世祖旣聞暢議,謂義恭曰:「阿父旣 衆咸遑擾,莫有異議。 時太祖遣 今軍食雖寡,朝夕猶未窘罄,量其欲盡,臨時 世 祖 期與此 走情,但以關扃嚴固,欲去莫從耳。若一旦動脚,則各自散走, 諸 鎭彭城,暢爲安北長史、沛郡太守。 義恭 軍,出鎭彭、泗。 城共其存沒,張長史言不可異也。」暢言旣堅,世祖 道民忝爲城主,而損威延寇,其爲愧恧,亦已深矣。 員外散騎侍郎徐爰乘驛至彭城取米穀定最,爰旣去,城內遣騎送之。 欲棄彭城南歸, 暢曰:「若歷城、鬱洲 時燾親率大衆, 計議 彌日不 定。 已至蕭城, 元嘉二十七年,索虜托跋燾南侵,太尉江夏王 有可致之理,下官敢不高讚。 時 更爲諸宜,豈有捨萬安之術, 義恭去意已判,唯二議未決,更集羣僚謀 歷城衆少食多,安北 去彭城十數里。 又贊成其議,義恭乃 委鎭奔逃,實無顏復奉朝 中兵參軍沈慶之建 欲至所在, 彭城 今城內乏食, 衆力雖 而就危亡之 爲總統,去 留守。 何由 多 止 燾聞 一, 而 太 FI

城 知 「内食少,[m] 義恭憂懼無計,猶欲奔走。 卽 遣數百騎急追,爱已過淮,僅得免。 初爱去,城內聞虜遣追,慮爱見禽, 爱既免,其日虜大衆亦至彭城 失米最, 虜知

送。 及酒,可見分。」時防城隊主梁法念答曰:「當爲啓聞。」應乃自陳蕭城之敗。又問應:「虜主 念以燾語白世祖,世祖遣人答曰:「知行路多乏,今付酒二器,甘蔗百挺。聞彼有駱駝,可遣 自 爲 [來不?]曰:「來。]問:「今何在?」應舉手指西南。又曰:「士馬多少?」答云:「四十餘萬。」法 房所破,文恭走得免,除主蒯應見執。至小市門曰:「魏主致意安北,遠來疲乏,若有甘蔗 **萧始至,仍登城南亞父冢,於戲馬臺立氈屋。先是,燾未至,世祖遣將馬文恭向蕭城,**

識...? 雜物。」 相見。 問:「何爲忽忽杜門絕橋。」暢答曰:「二王以魏主營壘未立,將士疲勞,此精甲十萬,人思致 不 食,旣至南門,門先閉 可。 虜使答云 明 我亦 又語 暢 旦,燾又自上戲馬臺,復遣使至小市門曰:「魏主致意安北,安北可暫出門,欲與安北 叉問 不攻此城,安北何勞苦將士在城上。又騾、驢、駱駝,是北國所出,今遣送,幷致 小市門隊主曰:「旣有餉物,君可移度南門受之。」燾送駱駝、騾、馬及貂裘、雜飲 君 :「君聲名遠聞,足使我知。」 居 「何任。」答云:「鮮卑官位不同,不可輒道,然亦足與君相敵耳。」 ,請籥未出。 暢於 城上視之,虜使問:「是張長史邪。」暢曰:「君何得見 暢因問虜使姓,答云:「我是鮮卑,無姓。且道亦 虜使復

思因問:「李尚書,若行塗有勞。」孝伯曰:「此事應相與共知。」思答:「緣共知,所以有勞。」孝 之恃馬,猶如君之恃城耳。」城內有具思者,嘗在北國,義恭遣視之,思識是虜尙書李孝伯。 畜養者耳。 法令裁物,何用發橋,復何足以十萬誇人。 土,馬之所生,君復何以逸足見誇邪。」虜使曰:「不爾。 命,恐輕相凌踐,故且閉城耳。待彼休息士馬,然後共治戰場,剋日交戲。」虜使曰:「君當以 曰:「侯王設嶮,何但法令而已邪。我若誇君,當言百萬。所以言十萬者,政二王左右素所 此城內有數州士庶,二徒營伍,[四]猶所未論。 我亦有良馬逸足,若雲騎四集,亦可以相拒。」暢 城守,君之所長;野戰,我之所長。我 我本鬭智,不鬭馬足。 且冀之北

伯曰:「威君至意。」 借。」暢曰:「博具當爲申啓。但向語二王,已非遜辭,且有詔之言,政可施於彼國,何得稱之 故勞而 但受命本朝,過蒙藩任,人臣無境外之交,恨不暫悉。且城守備防,邊鎭之常,但悅以使之, 陶酒雜飲,叔姪共嘗。」燾又乞酒幷甘橘。 暢宣世祖問:「致意魏主,知欲相見,常遲 皮絝褶脫是所須,今致魏主。螺杯、雜粽,南土所珍,鎭軍今以相致。」此信未去,燾復遣使 令孝伯傳語曰:「魏主有詔語太尉、安北,近以騎至,車兩在後,今端坐無爲,有博具可見 旣開門,暢屏却人仗,出對孝伯,幷進餉物。 虜使云:「貂裘與太尉,駱駝、騾與安北,蒲 無怨耳。太尉、鎭軍得所送物,魏主意,知復須甘橘,今並付如別。太尉以北土寒鄉, 面寫。

貴遠?」暢曰:「握髮吐飡,本施中國耳。」孝伯曰:「賓有禮,主則擇之。」暢曰:「昨見衆賓至 邪。」孝伯大笑曰:「今之白賊,亦不異黃巾、赤眉。」暢曰:「黃巾、赤眉,似不在江南。」孝伯 來,不復以此勞魏主。」孝伯曰:「亦知有水路,似爲白賊所斷。」暢曰:「君著白衣,故 邑。若欲遣信者,當爲護送,脫須騎者,亦當以馬送之。」暢曰:「此方問路甚多,使命日夕往 孝伯曰:「隣國之君,何爲不稱詔於隣國之臣。」暢曰:「君之此稱,尚不可聞於中華,況在諸 施,則貴賤有等。向所稱詔,非所敢聞。」孝伯又曰:「太尉、安北是人臣與非。」暢曰:「是也。」 於此。」孝伯曰:「詔之與語,朕之與我,並有何異。」暢曰:「若辭以通,可如來談;旣言有所 「向借博具,何故不出。」暢曰:「二王貴遠,啓聞難徹。」孝伯曰:「周公握髮吐哺,二王何獨 曰:「雖不在江南,亦不在靑、徐也。」暢曰:「今者靑、徐,實爲有賊,但非白賊耳。」 虜使云: 王之貴,而猶曰隣國之君邪。」孝伯曰:「魏主言太尉、鎭軍並皆年少,分闊南信,〔三〕殊當憂 稱白 賊

落在般水,日刊我手牽而出之。凡人骨肉分張,並思集聚,輒已語之,但其弟苦辭。 門,未爲有禮。」俄頃送博具出,因以與之。 領`鹽各九種`幷湖豉:「凡此諸鹽、各有所宜。 白鹽是魏主自所食。[+] 黑鹽治腹脹氣懣, ,使相見。」程天福謂使人曰:「兄受命汝陽,不能死節,各在一國,何煩相見。」燾又送氈各 今令與

但以不

康祖

細

刮取六銖,以酒服之。

胡鹽治目痛。

柔鹽不食,治馬脊創。

赤鹽、駮鹽、

臭鹽、馬

齒鹽

四

若諸佐不可

自銜命,

列

所衂。 畔之民,多是新附,始慕聖化,姦盜未息,亦使崔邪利撫之而已,今沒虜手,何損 故為 退撓 自以十萬師而制一崔邪利,乃復足言邪。三三聞蕭、相百姓,並依 旅,始濟融水,自己魏國君臣奔进,僅得免脫,滑臺之師,無所多愧。 馬 江 率 軍 由 善將愛,冀蕩定有期,相見無遠。君若得還宋朝,今爲相識之始。」孝伯曰:「待此未期。」燾 聖略。 過淮 湖以療渴 衆軍,直造瓜步。南事若辦,彭城不待攻圍,口己若不捷,彭城亦非所須也。 被無道。官不負民,民何怨人。知入境七百,無復相拒,口吾此自上由太尉神算,次在 小亂耳。 遲復 前驅引導耳。[10]大軍未至而 邪。 南,康祖爲 文恭謂前以三隊出,還走後,大營嵇玄敬以百騎至留城,魏軍奔敗。 王境人民,列居河畔,二國交兵,當互加撫養,三四而魏師入境,肆行 |更悉。」暢便回還,孝伯追曰:「長史深自愛敬,相去步武,恨不執手。」暢因復謂 君家民 經國之要,雖不豫聞,然用兵有機,間亦不容相語。」孝伯曰:「魏主當 我家懸瓠斗城、口口陳憲小將, 耳。」暢曰:「去留之事,自適彼懷。 人甚相忿怨,云清平之時,賦我租帛,至有急難,不能相拯。」暢曰:「知永昌 其所破,比 有信使,無此消 河冰向人 合, 魏主傾 息。 玄謨量宜反旆, 若虜馬遂得飲江,便爲無復天道。 王玄謨南土偏 國, 累旬不 未爲 剋。 山險,聊遣 將,不謂 失機, 胡盛之偏裨 鄒山 小 爲才,但以 但因 殘虐,事 馬文恭以十隊示 戍,雖有 輕敵 夜 小 不 我今當南 於 门回師, 圍此城,自 致 帥 國。 、衆無 生意 此, 微險,河 其北人, 各應反 魏主 致戎 鎭

也。 政 叉 、常器,又觀前來諸王贈別,有此琵琶,今以相與。 使 遣 暢 鎭 就 隨宜 府 二王借箜篌、琵琶、筝、笛等器及棊子,義恭答曰:「受任戎行,不齎樂具。 命妓,有弦百條,是江南之美,今以 應答,吐屬 如流,音韻 詳雅,風儀華潤,孝伯及左右 相致。」世祖曰:「任居方岳,初不此經慮,且樂 棊子亦付。」<u>孝伯言辭辯贍,亦北土之美</u> 人並相 視歎 息。 在此燕會,

暢 暢 實 至。 因 言,則 屢有 有 民 日 堡聚,衆論 미 民 城 虜 歡 支 此 尋。」 知 內:「食盡且去,須麥熟更來。」義恭大懼,閉門不敢追。虜期又至,議欲芟麥剪苗,〔一十〕 尋攻彭城南門,幷放火,暢躬自前戰,身先士卒。 正 笑 此 議 論 麥移民,可謂 必死,何可 議 酬答,阿意 鎭 甚嘉 誠 亦 軍 然。」暢斂板白 並不同,復更會議。 不可立。 府典籤董 之。 制邪? 左右,何以事君。」子夏 世 大議,一方安危,事 百姓閉在內城,饑饉 祖猶停 元嗣侍 虜若必來, 芟麥無晚。」四坐默然, 莫之敢對。 世 祖 彭城 1日:「日 世祖 鎭軍錄事參軍 ,召暢 側,進 下官欲命 係於此。 先反,幷使履 大慚,元嗣 曰:「王錄 日久,方春之月,野採自資,一入堡聚,餓死立 孝孫彈子夏。」世祖 王孝孫獨曰:「虜不能復來,既自可保,如 子夏親爲 事議不 亦有慚色。 行盱 及燾自瓜步北走,經彭城下過,造 州端 胎城,欲 可奪,實如 義恭 日「王別駕 曾 立 無 來論。」別駕 大 之議遂 同 暢曰:「孝孫之議, 鎭 . 異, 寢 及聞 有 何 太祖聞 元嗣 事 王子夏 邪 ? 之

列傳第十九 張暢

時

房聲云

當

田

襄陽,故以暢爲南譙王義宣司空長史、南郡太守。

叉

欲暢代劉興祖為青

州及彭城都督,並不果。

當時。 景狀。 得免。 保之。」靈寶知暢不回,勸義宣殺以徇衆。卽遣召暢,止于東齋,彌日不與相見,賴司馬竺超 遺嬖人翟靈寶謂暢:「朝廷簡練舟甲,意在西討,今欲發兵自衞。」暢曰:「必無此理,請以死 民保持,故獲全免。旣而進號撫軍,別立軍部,以收民望。 乃解南蠻校尉以授暢,加冠軍將軍,領丞相長史。 事平,徵爲吏部尚書,夷道縣侯,食邑千戶。 軍王玄謨乘輿出營,暢已得敗衣,排玄謨上擧,玄謨意甚不說,諸將欲殺之,隊主張世營救 文書。隨義宣東下,梁山戰敗,義宣奔走,暢於兵亂自歸,爲軍人所掠,衣服都盡。值右將 三十年,元凶弑逆,義宣發哀之日,卽便舉兵,暢爲元佐,位居僚首,曰曰哀容俯仰,廕映 送京師,下廷尉,削爵土,配左右尚方。尋見原。 舉哀畢,改服,著黃韋絝褶,出射堂簡人,音姿容止,莫不矚目,見之者皆願爲 僧寶有私貨停巴陵,不時下,會義宣起兵,津徑斷絕,僧寶遂不得去。 義宣旣有異圖,蔡超等以暢民望,勸義宣留之, 暢遣門生尚僧實下都,自己因顏竣陳義宣 暢雖署文檄,而飲酒常醉,不省 義宣將爲逆, 盡命。

常懷。」諡曰宣子。 年,卒官,時年五十。 復起爲都官尙書,轉侍中,代子淹領太子右衞率。 暢愛弟子輯,臨終遺命與輯合墳 顏竣表世祖:「張暢遂不救疾。東南之秀,蚤樹風範,聞問悽愴,深切 孝建二年,出爲會稽太守。 大明元

子浩,官至義陽王昶征北諮議參軍。

川內史。 率,東陽太守。 浩弟淹,世祖南中郎主簿。 太宗泰始初,與晉安王子勛同逆,率衆至鄱陽,軍敗見殺。 逼郡吏燒臂照佛,民有罪使禮佛,動至數千拜。 世祖卽位,爲黃門郎,封廣晉縣子,食邑五百戶。太子右衞 免官禁錮。 起爲光祿勳 臨

|休若征西長史、南郡太守。 庶子,仍除巴陵王休若衞軍長史、襄陽太守。 勛建偽號於尋陽,召爲吏部尚書,與鄧琬共輔僞政。 巴郡太守。 暢弟悅,亦有美稱。 未拜,卒。 歷中書東部郎,侍中,臨海王子頭前軍長史、南郡 六年,太宗於巴郡置三巴校尉,以脫補之,加持節、輔師將軍,領 四年,卽代休若爲雍州刺史、寧遠將軍。 事敗、殺斑歸降,事在琬傳。 太守。 晉安王子 復爲太子 復爲

王義慶平西府主簿。 人,中書郎,太子中庶子。 何偃字仲弘,廬江灊人,司空尚之中子也。 召爲太子洗馬,不拜。元嘉十九年,爲丹陽丞,除廬陵王友,太子中舍 時義陽王昶任東官,使偃行義陽國事。 州辟議曹從事,舉秀才,除中軍參軍,臨川

列

歲挫 寡,邊民流散,多未附業。 弊易衂,方來之寇不深,宜含垢藏疾,以齊天道。」遷始興王濬征北長史、南東海 起。 有 殘]傷,〔三〕續以內釁,侮亡取亂,誠爲沛然。 禍,犬羊易 且攻守不等,客主形異,薄之則勢艱,圍 二十九年,太祖欲更北伐,訪之羣臣,偃議曰:「內幹胡法宗宣詔,逮問北伐。 亂,殲 殄非難,誠如天旨。 控引所資,取給根本。 今雖 之則曠 然淮、 廟 算無遺, 虧根本以殉 日,進退之間,姦虞 泗數州, 而 士未精習。 邊患,宜動 實亦彫耗, 耳 流傭未 必不剋。[10] 緣邊鎭戍, 起。 太守。 竊謂當 歸, 伏計賊審 充 創 無 ||今之 慮 痍未 實 往 者

爲寒 吏姦。 領太子 心,而 元凶 責成 中庶子。 弑立,以偃 尚之及偃善攝機宜,曲得時譽。 良守,久於其職。 時責百官讜言,偃以爲:「宜重農卹本,幷官省事,考課以知能否,增俸以除 爲侍中,掌詔 都督刺史,宜別其任 誥。 時尚之爲司空、尚書令,偃居門下,父子並處權 會世祖即位,任遇無改,除大司馬長史,遷侍中, 要,時

以爲 朝 療,名醫上藥,隨所宜須,乃得瘥。 居 、野、偃 重 大,而位次與偃等未殊,意稍不 改 領 不 、驍騎 侍中顏竣至是始貴,與偃俱在門下,以文義賞會,相得甚 自安,遂發心悸病, 將軍,親遇隆密,有加 意慮乖僻,上表解職,告醫不仕。如此祖遇偃旣深,備 舊臣。 悅。 及偃代竣領 轉吏部 尙 書。 選,竣愈憤 尚之去選未五載,偃復 懣,與偃遂有隙。 軟。 竣自謂任 し襲其 遇隆 竣 時 一密,宜 迹,世 加治 勢傾

時 ,上長女山陰公主愛傾一時,配偃子戢。 素好談玄,注莊子消搖篇傳於世。

旋, 故。」諡曰靖子。子戢,昇明末,爲相國左長史。 重以姻媾, 大明二年,卒官,時年四十六。 臨哭傷怨,良不能已。 世祖與顏竣詔曰:「何偃遂成異世,美志長往。 往矣如何 ţ 宜贈散騎常侍、金紫光祿大夫,本官如 與之周

江智淵,濟陽考城人,湘州刺史夷弟子。父僧安,太子中庶子。

節歲,不入湛門。及爲隨王誕佐,在襄陽,誕待之甚厚。時諮議參軍謝莊、府主簿沈懷文並 有盛名,夷子湛又有淸譽,父子並貴達,智淵父少無名問,湛禮敬甚簡,智淵常以爲恨,自非 鄓。 尚 書 庫 部 郎。 與智淵友善。懷文每稱之曰:「人所應有盡有,人所應無盡無者,其江智淵乎。」元嘉末,除 |誕復版爲驃騎參軍,[1]||]轉主簿,隨府轉司空主簿、記室參軍,領南濮陽太守,遷從事中 智淵初爲著作郎,江夏王義恭太尉行參軍,太子太傅主簿,隨王誕後軍參軍。 誕將爲逆,智淵悟其機,請假先反。誕事發,卽除中書侍郞。 時高流官序,不爲臺郎,智淵門孤援寡,獨有此選,意甚不說,固辭不肯拜。竟 世父夷

智淵愛好 文雅,詞采淸贍,世祖深相知待,恩禮冠朝。 上燕私甚數,多命羣臣五三人游

第

幸,與羣僚相隨,見傳詔馳來,知當呼已,聳動愧恧,形於容貌,論者以此多之。 集,智淵常爲其首。同侶未及前,輒獨蒙引進,智淵每以越衆爲慚,未嘗有喜色。 每從游

墓石柱謂智淵曰:「此上不容有懷字」智淵益惶懼。大明七年,以憂卒,時年四十六。 僧安癡人,癡人自相惜。」智淵伏席流涕,由此恩寵大衰。出爲新安王子鸞北中郎長史、南 曰「懷」。上以不盡嘉號,甚銜之。後車駕幸南山,乘馬至殷氏墓,羣臣皆騎從,上以馬鞭指 東海太守,加拜寧朔將軍,行南徐州事。初,上寵姬宣貴妃殷氏卒,使羣臣議諡,智淵上議 方退,漸不會旨。 遷驍騎將軍,尙書吏部郎。上每酣宴,輒詬辱羣臣,幷使自相嘲訐,以爲歡笑。 嘗使以王僧朗嘲戲其子景文,智淵正色曰:「恐不宜有此戲。」上怒曰:「江 智淵素

子季筠,太子洗馬,早卒。後廢帝卽位,以后父,追贈金紫光祿大夫。季筠妻王,平望

鄉君。

守,行南徐州事。 智淵兄子概早孤,養之如子。 後廢帝元徽中卒。 概歷黃門吏部郎,侍中,武陵王北中郎長史、南東海太

史臣曰:夫將帥者,御衆之名;士卒者,一夫之用。 坐談兵機,制勝千里,安在乎蒙楯前

推轂之重。及虜兵深入,徐服恇震,非張暢正言,則彭、汴危矣。 都督。回图王戎把臂入林,亦受專征之寄。 叔子之幹力弱矣。杜預文士儒生,射不能穿札,身未嘗跨馬,一朝統大衆二十餘萬,爲平吳 驅,履腸涉血而已哉。山濤之稱羊祜曰:「大將雖不須筋力, 方足使窮堞假命,危城載安乎。 仁者之有勇,非爲臆說。 何必山西猛士,六郡良家,然後可受脹於朝堂,荷 軍中猶宜强健。」以此爲言,則 **豈其身扞飛鏑,手折雲衝,**

校勘記

[1] 暢少與從兄敷演敬齊名 「敬」各本並作「鏡」,據本書張邵傳兄子暢附傳改正。 李慈銘宋書札

記云:「蓋趙宋避諱,故『敬』改爲『鏡』。」

- 實無顏復奉朝廷 「奉」各本並作「奏」、據通鑑宋元嘉二十七年改。
- 虜知 城內食少 「虜」各本並作「慮」。孫彪朱書考論云:「慮當作虜。」按孫說是,今改正。
- 二徒營伍 「二徒」魏書李孝伯傳、元龜八三四作「工徒」。
- /~ Æ. 魏書李孝伯傳作「久絕」。 分閣南信 三朝本、毛本、元龜八三四作「分閣」、北監本、殿本、局本作「久闊」、南史作「久闕」、 按「分闊」不誤。
- 列傳第十九 楼勘記(水)落在溵水 「溵水」各本並作「殿外」,據魏書李孝伯傳改。

- . . . U 白鹽是魏主自所食 「白鹽」下,據魏書李孝伯傳有「食鹽」二字。按上云「鹽各九種」,數之祇有
- **久爲來往所具** 八種,似脫「食鹽」二字。 「具」北監本、毛本、殿本、局本作「見」,百衲本所據底本原作「具」,涵芬樓影印
- 時,又改從誤本作「見」。 按远龜八三四、通鑑宋远嘉二十七年並作「具」。作「具」是,今改正。
- 自頃常鎭長安 「頃」各本並作「復」,據魏書李孝伯傳改。
- 但以其北人故為前驅引導耳 各本並脫「其北」及「故」三字,義不可通,今據魏書李孝伯傳補。
- 我家懸瓠斗城 懸瓠,汝南郡治,陳憲所守。 「懸瓠」各本並作「玄謨」,據魏書李孝伯傳改。按李孝伯傳作「我家懸瓠小戍」。
- 『翮』爲是。」 始濟融水 「融水」魏書李孝伯傳作「翮水」。孫彰宋書考論云:「案水經,其地唯有隱水,則作
- 乃復足言邪 「乃」各本並作「方」,據魏書李孝伯傳、通鑑宋元嘉二十七年改。
- [12] 當互加撫養 「互」各本作「平」,據魏書李孝伯傳改。
- (伯傳、元龜八三四、通鑑宋元嘉二十七年作「七」,是。 又各本並脱「復」字,據元龜八三四補 知入境七百無復相拒 「七」三朝本作「士」,毛本、殿本、局本作「土」,並誤。 北監本、魏書李孝
- [1六] 彭城不待攻圍 各本並脫「攻」字,據魏書李孝伯傳補。

龜四五三、七一七、通鑑朱元嘉二十八年改。

位居僚首 各本並脫「位」字,據南史、御覽三八九、六九五引補、

二型 暢遣門生荷僧寶下都 「苟僧寶」本書張邵傳兄子暢附傳、南史、元龜七一九作「苟僧寶」。

宜動必不剋 各本並作「宜動必萬剋」,據元龜五二九訂正

[II] 無慮往歲挫傷 「無慮」疑「索虜」之誤。

竟陵王誕復版爲驃騎參軍 驃騎參軍」各本並作「 騎軍」。 孫彪宋書考論 云:「誕時為驃騎大將

軍,當云復版爲驃騎參軍。」按孫說是,今訂補。

爲平吳都督 「平吳」各本並作「平原」, 李慈銘宋書礼記云:「平原當作平吳。」按李說是, 今

據改。

宋書卷六十

列傳第二十

范泰 王准之 王韶之 荀伯子

問「何如殷覬。」、忱曰:「伯通易。」 〔三 忧常有意立功,謂泰曰:「今城池旣立,軍甲亦充,將欲 掃除中原,以申宿昔之志。 弟也,請爲天門太守。忧嗜酒,醉輒累旬,及醒,則嚴然端肅。泰謂忱曰:「酒雖會性,亦所 久之,曰:「見規者衆矣,未有若此者也。」或問**忱曰:「范泰何如謝邈。」忱曰:「茂度慢。」又** 以傷生。 ...「百年逋寇,前賢挫屈者多矣。 范泰字伯倫,順陽山陰人也。[1]祖汪,晉安北將軍、徐亮二州刺史。父甯,豫章太守。 泰 初爲太學博士,衞將軍謝安、驃騎將軍會稽王道子二府參軍。荆州刺史王忱,泰外 游處以來,常欲有以相戒,當卿沈湎,措言莫由,及今之遇,又無假陳說。」忱嗟嘆 伯通意銳,當令擁戈前驅。 功名雖貴,鄙生所不敢謀。」會忱病卒。 以君持重, 欲相 委留事,何 召泰爲驃騎諮議 如 _3 泰

列

傳第

+

范泰

建言 及前司徒左長史王準之、輔國將軍司馬珣之並居喪無禮,泰坐廢徙丹徒。 軍 以爲 遷中書侍 非宜,元顯不納。 鄓。 時會稽 父憂去職, 襲爵陽遂鄉侯。 王世子元顯專權,內外百官請假,不復表聞,唯 桓玄 一輔晉,使御史中丞祖台之奏泰 籤 完 顯 而

賞 規 守。 復 卽 沙 (愛之。 爲 素愛太祖,又令居重。道規追封南郡公,應以先華容縣公賜太祖。 也。」徙爲太常。 相 城 心 **尚書,常侍如故。** 過 時僕射陳郡謝混,後進知名,高祖嘗從容問混:「泰名輩可以比誰。」對曰:「王元太一 盧循之難,泰預發兵千人,開倉給稟,高祖加泰振武將軍。 ,散騎常侍,並不拜。入爲黃門郞,御史中丞。 ,泰有足疾,特命乘轝。 義旗 厚。 然拙 建,國子博士。 禮無二嗣,義隆宜還本屬。」從之。轉大司馬左長史,右衞將軍,加散騎常侍。 於爲治,故不得在政事之官。 初,司徒道規無子,養太祖,及薨,以兄道憐第二子義慶爲嗣。 兼司空,與右僕射袁湛授宋公九錫,隨軍到洛陽。 司馬休之爲冠軍將軍、荆州刺史,以泰爲 泰好酒,不拘小節,通率任心,雖在公坐, [三] 不異私室,高祖甚 遷護軍將軍,以公事免。 坐議殷祠事謬,白衣領職。 明年,遷侍中,尋轉度支尚 長史、南郡太守。 泰議曰:「公之友愛, 高祖還彭城,與共 出為東陽 高祖以道 叉除 流 太 長

祖 受命,拜金紫光祿大夫,加散騎常侍。 明年,議建國學,以泰領國子祭酒。 泰上

表

已。 從。 若 陷 雖 始,盛業初基,天下改觀, 學,易子而 「年降無幾,而深有志尙者,何必限以一格, 或大,故趙盾忠而 制所未達,父兄欲其入學,理合開通,雖 臣以家推 是以明詔 臣聞風化興於哲王,教訓表於至世。 教 一。尋師 國,則知所聚不多,恐不足以宣大宋之風,弘濟濟之美。 **爱發**,已成 無遠, 書弑,許子孝 **渙**汗,學制旣下,遠近遵承。 有志景慕。 負糧忘艱, 而 得罪,以斯爲戒,可不懼哉。 安親光國,莫不由此。 而置生之制,取少停多,開不來之端, 小違晨昏, 所以大弘孝道。 至說莫先講習,甚樂必寄朋來。 而不許其進邪。 臣之愚懷,少有未達。 若能 揚烏豫玄, 十五 出不由 志學,誠有 不知春秋, 臣謂 戶, 實在弱 古人成童入 合選之家, 非一 則 **今惟新告** 斯 齒,五 其文, 塗而 則所 道莫

官領之,門地二品,至宜以朝請領助教,旣可以甄其名品,斯亦敦學之一 弟。[2] 所貴在 昔中朝助教,亦用二品。 l於得才,無繫於定 潁川陳載已辟太保掾, 品品 敎 學不明,獎厲不著,今有職閑 而國子取爲 助 而 教, 學優者 隅。 卽 太 尉准之 可以本 其二品

十學易,乃無大

過

者,殆此之謂。 會今生到有期, 古人重寸陰而賤尺璧,其道然也。 而學校未立。 覆簣 實望其速, 回轍已淹其遲。 事有似賒而宜急

才堪,自依舊從事

列

時學竟不立。

時言事者多以錢貨減少,國用不足,欲悉市民銅,更造五銖錢。。秦又諫曰:

貴賤有章,職分無爽。 無,諸侯不言多少,食祿之家,不與百姓爭利。 富,本不足而末有餘者也。 不寧寢默。 流 聞將禁私銅,以充官銅,民雖失器,終於獲直,國用不足,其利實多。 臣聞治國若烹小鮮,拯敝莫若務本。百姓不足,君孰與足。未有民貧而國 故囊漏貯中,識者不吝,反裘負薪,存毛實難。王者不言有 故拔葵所以明治,織蒲謂之不仁,是以 臣愚意異,

無患不 博矣。 功不 道,賒欲速之情,弘山海之納,擇芻收之說,則嘉謀日陳,聖慮可廣。 其亡存心,然後苞 有要用,則貴賤同資;物有適宜,則家國共急。 夫貨存貿易,不在少多,昔日之貴,今者之賤,彼此共之,其揆一也。但令官民均通,則 勤素成 ·補勞,在用則君民俱困,校之以實,損多益少。 今之所憂,在農民尙寡,倉廩未充,轉運無已,資食者衆,家無私積,難以禦荒耳。 足。 鍾律所通者遠,機衡所揆者大。 風 若使必資貨廣以收國用者,則龜貝之屬,自古所行。 而頌聲不作,版、潤不至者,良由基根未固,意在遠略。 夏鼎負圖,實冠衆瑞,晉鐸呈象,亦啓休徵。器 今毁必資之器,而爲無施之錢,於貨則 陛下勞謙終日,無倦 **蓉銅之爲器,在用也** 伏願思 · 庶務,以身率 可久之

桑可繫。愚誠一至,用忘寢食。

者也。 社稷至計,經世之道。王言如絲,其出如綸,下觀而化,疾於影響。伏願陛下思弘古 民賴之。」 [K] 天高聽卑,無幽不察,興衰在人,成敗易曉,未有政治在於上而人亂於下 道,式遵遺訓,從理無滯,任賢勿疑,如此則天下歸德,宗社惟永。書云「一人有慶,兆 其位者也。陛下踐阼,委政宰臣,實同高宗諒闇之美。而更親狎小人,不免近習,懼非 息,無寇而戒,爲費漸多。河南非復國有,羯虜難以理期,此臣所以用忘寢食,而干非 欲伺國瑕隙,今之吳會,寧過二漢關、河,根本旣搖,于何不有。如水旱成災,役夫不 間,不聞將帥之臣,統御之主,非徒不足以威四夷,祇生遠近之怪。近者東寇紛擾,皆 景平初,加位特進。 伏聞陛下時在後園,頗習武備,鼓鞞在宮,聲聞于外,黷武掖庭之內, 諠譁省闥之 明年致仕,解國子祭酒。 少帝在位,多諸愆失,上封事極諫,曰:

永違聖顏,無復自盡之路,貪及視息,陳其狂瞽。陛下若能哀其所請,留心覽察,則臣 臣蒙先朝過遇,陛下殊私,實欲盡心竭誠,少報萬分,而惛耄已及,百疾互生,便爲

少帝雖不能納,亦不加譴。

列傳

第二

+

范泰

夕殞于地,無恨九泉。

卷六十

徐羨之、傅亮等與泰素不平,及廬陵王義眞、少帝見害,泰謂所親曰:「吾觀古今多矣,

未 有受遺顧託,而嗣君見殺,賢王嬰戮者也。」

元嘉二年,表賀元正,幷陳旱災,曰:

必生疾疫,其爲憂虞,不可備序。 重,賦稅無降,百姓怨咨。臣年過七十,未見此旱。 頃旱魃爲虐,亢陽愆度,通川燥流,異井同竭。 老弱不堪遠汲,貧寡單於負水。 元正 一改律,品物惟新。 陛下藉日新以畜德,仰乾元以履祚,吉祥集室,百福來庭。 陰陽幷隔,則和氣不交,豈惟凶荒, 租輸旣

遂輕舟遊東陽,任心行止,不關朝廷。 疾患 害不消、未之有 式遵遠猷,思隆高構,推忠恕之愛,矜冤枉之獄,遊心下民之瘼,厝思幽冥之紀。 熒惑以修善,斯皆因敗以轉成,往事之昭晰也。循末俗者難爲風 木豎闕,諫鼓鳴朝,察芻牧之言,總統御之要。 婦,亢旱三年,及祭其墓,澍雨立降,歲以有年。 日篤,夕不謀朝,會及歲慶,得一 **雩禜之典,以誠會事,巫祝常耐,罕能有感,上天之譴,不可不察。** 也。 故夏禹引百姓之罪,殷陽甘萬方之過,太戊資桑穀以進德,宋景藉 有司劾奏之,太祖不問也。 聞達,微誠少亮,無恨泉壤,永違聖顏,拜表悲咽。 如此, 是以衞人伐邢, 則苞桑可繫, ,就正路者易爲雅。臣 師興而 危幾無兆。 漢東海枉殺孝 酮。 伏願陛下 斯 令謗 而災

闊戎 雖言不足採,誠不亮時,但猥蒙先朝忘醜之眷,復沾廬陵矜顧之末,息晏委質,有兼常欵,契 陛下孝慈天至,友于過隆,伏揆聖心,已自有在。 陣,顚狽 時太祖雖當陽親覽,而羨之等猶秉重權,復上表曰:「伏承廬陵王已復封爵,猶未加贈。 [艱危,厚德無報,授令路絕,此老臣兼不能自已者也。 但司契以不唱爲高,冕旒以因寄成用。 朽謝越局, 無所逃刑。」 臣

先朝舊臣,恩禮甚重,以有脚疾,起居艱難,宴見之日,特聽乘轝到坐。 三年,羨之等伏誅,進位侍中、左光祿大夫、國子祭酒,領江夏王師,特進如故。 累陳時事,上 上以泰 一每優

泰諸子禁之,表竟不奏。

其年秋旱蝗,又上表曰:

皆自以爲遇其時也。災變雖小,要有以致之。守宰之失,臣所不能究,上天之譴,臣所 斤斧,楚昭仁愛,不禁自瘳,卓茂去無知之蟲,宋均囚有異之虎,蝗生有由,非所宜殺。 不敢誣。有蝗之處,縣官多課民捕之,無益於枯苗,有傷於殺害。 石不能言,星不自隕,春秋之旨,所宜詳察。 陛下昧旦丕顯,求民之瘼,明斷庶獄,無倦政事,理出羣心,澤謠民口,百姓翕然, 臣聞桑穀時亡,無假

禮婦人有三從之義,而無自專之道,周書父子兄弟,罪不相及,女人被宥,由來尙

列

矣。[刊]謝晦婦女,猶在尙方,始貴後賤,物情之所甚苦,匹婦一至,亦能有所感激。 臣

於謝氏,不容有情,蒙國重恩,寢處思報,伏度聖心,已當有在。

夫 不望目靚盛化,竊慕子囊城郢之心,庶免荀偃不瞑之恨。臣比陳愚見,便是都無可採, 食,入年則農功興,農功興則田里闢,入秋治庠序,入冬集遠生,二塗並行,事不相害。 徒 ,事多以淹稽爲戒,不遠爲患,任臣學官,竟無微績,徒墜天施,無情自處。 臣之區區, 煩天聽,愧怍反側。 禮春夏教詩,無一而闕也。臣近侍坐,聞立學當在入年。 陛下經略粗建,意存民

書奏,上乃原謝晦婦女。

時 司徒王弘輔政,泰謂弘曰:「天下務廣,而權要難居,卿兄弟盛滿,當深存降挹。彭城

意 之來,有同影響。 以 王,帝之次弟,宜徵還入朝,共參朝政。」弘納其言。 以爲 爲王澤不流之徵。 生朝 時旱災未已,加以疾疫,泰又上表曰:「頃亢旱歷時,疾疫未已,方之常災,實爲過差,古 上天之於賢君,正自殷懃無已。 而殞,熒惑犯心而退,非唯消災弭患,乃所以大啓聖明,靈雨立降,百姓改瞻,應感 陛下近當仰推天意,俯察人謀,升平之化,尚存舊典,顧思與不思,行與不 陛下昧旦臨朝,無懈治道,躬自菲薄,勞心民庶,以理而言,不應致此。 陛下同規禹、陽引百姓之過,言動于心,道敷自遠。

旣頑且鄙,不達治宜,加之以篤疾,重之以惛耄,言或非言而復不能無言,陛下錄其一毫之 於小成,欲速或未必達。深根固蔕之術,未洽於愚心,是用猖狂妄作而不能緘默者也。 撥亂反正,則宗社非復宋有。 蕃嬰禍,九服徘徊,有心喪氣,佐命託孤之臣,俄爲戎首。 天下蕩蕩,王道已淪,自非神英, 大宋雖揖讓受終,未積有虞之道,先帝登遐之日,便是道消之初。 革命之與隨時,其義尤大。是以古今異用,循方必壅,大道隱 至乃嗣主被殺,哲

師如故。 年事佛甚精,於宅西立祇洹精舍。 五年,卒,時年七十四。 追贈車騎將軍,侍中、特進、王 泰博覽篇籍,好爲文章,愛獎後生,孜孜無倦。撰古今善言二十四篇及文集傳於世。 諡曰宣侯。

誠,則臣不知厝身之所。」

誅,自有傳。少子廣淵,善屬文,世祖撫軍諮議參軍,領記室,坐曄事從誅。 長子昂,早卒。次子暠,宜都太守。次晏,侍中、光祿大夫。次曄,太子詹事,謀反伏

王准之字元曾,四琅邪臨沂人。 彪之博聞多識,練悉朝儀,自是家世相傳,並諳江左舊事,緘之青 高祖彬,尚書僕射。 曾祖彪之,尚書令。 祖臨之。父

箱,世人謂之「王氏青箱學」。

世居 狐。 郡 爲 大中正。 山陰令,有能名。 祠 此職。 部息。 坐世子右衛率謝靈運殺 准之兼明 准之嘗作五言, 快臺建、除御史中丞、爲僚友所憚。 義熙初,又爲尙書中兵郎,遷參高祖車騎中軍軍事,丹陽丞, 禮傳,贍於文辭。起家爲本國右常侍,桓玄大將軍行參軍。 預計盧循功,封都亭侯。又爲高祖鎭西、平北、太尉參軍,尚書左丞,本 范泰翮之曰:「卿唯解彈事耳。」准之正色答:「猶差卿世載雄 人不舉免官。 准之父訥之、祖臨之、曾祖彪之至准之,四 中軍太尉主簿,出 玄篡位,以爲尚

宋開泰,品物遂理。 唯晉朝施用,縉紳之士,多遵玄義。夫先王制禮,以大順羣心。 **今學者多謂得禮之宜。** 高祖受命,拜黃門侍郎。 愚謂宜同卽物情,以玄義爲制,朝野一禮,則家無殊俗。」從之。 晉初用王肅議,祥禪共月,故二十五月而除,遂以爲制。 永初二年,[10]奏曰:「鄭玄注禮,三年之喪,二十七月而吉,古 喪也寧戚,著自前訓。 江左以來,

曰:「何須高論玄虛,正得如王准之兩三人,天下便治矣。」然寡乏風素,不爲時流所重。 一、綏懷 遷司徒左長史,出爲始興太守。 得理,軍民便之。 出爲丹陽尹。 准之究識舊儀,問無不對,時大將軍彭城王義康錄尚書 尋入爲侍中。 元嘉二年,爲江夏王義恭撫軍長史、歷陽太守,行州府 明年,徙爲都官尚書,改領吏部。 性峭急, 事 毎歎 頗失

王韶之学休泰,琅邪臨沂人也。 曾祖廙,晉驃騎將軍。 祖羨之,鎭軍掾。父偉之,本國

帝左右密加耽毒。恭帝即位,遷黃門侍郎,領著作郎,西省如故。凡諸詔黃,曰吾皆其辭也。 祖以韶之博學有文詞,補通直郎,〕領西省事。日即轉中書侍郎。安帝之崩也,高祖使韶之與 省官一人管司詔誥,任在西省,曰己因謂之西省郎。傅亮、羊徽相代「在職,義熙十一年,高 晉安帝陽秋。旣成,時人謂宜居史職,卽除著作佐郎,使續後事,訖義熙九年。 之少有志尚,當世詔命表奏,輒自書寫,太元、隆安時事,自己小大悉撰錄之,韶之因此私撰 郎 道民禽三叛士,依例放遣,韶之啓曰:「尚書金部奏事如右,斯誠檢忘一時權制,口心懼非經 論可觀,爲後代佳史。 中令。 韶之家貧,父爲鳥程令,因居縣境。 高祖受禪,加驍騎將軍,本郡中正,黃門如故,西省職解,復掌宋書。有司奏東冶士朱 遷尙書祠部郎。晉帝自孝武以來,常居內殿,武官主書於中通呈,以 好史籍,博涉多聞。 初爲衞將軍謝琰行參軍。 善敍事,辭

國

弘本之令典。

臣尋舊制,以罪補士,凡有十餘條,雖同異不紊,而輕重實殊。

至於詐列父

難,百日歸休,於事自足。若私理不同,便應自表陳解,豈宜名班朝列,而久淹私門。 臣懼 參議,謂不合開許。或家在河、洛及嶺、沔、漢者,道阻且長,猶宜別有條品,請付尚書詳爲 里外,聽倂請來年限,合爲二百日。此蓋一時之令,非經通之旨。 假事曰:「伏尋舊制、羣臣家有情事,聽倂急六十日。太元中改制,年賜假百日。 塞莫大之罪。 合加贖罪之恩。」侍中褚淡之同韶之三條, 母 此制永行,所虧實大。方今聖化惟新,崇本棄末,一切之令,宜加詳改。 誣罔父母淫亂,破義反逆,此四條,實窮亂抵逆,人理必盡, 旣獲全首領,大造已隆,寧可復遂拔徒隸,緩帶當年,自 却宜仍舊。 詔可。 又駁員外散騎侍郎王寔之請 雖復 會稽雖塗盈千里,未足爲 同 殊刑過 編 戶,列 愚謂 制, , 齒齊 猶不 叉居在千 此四條不 臣等 足以

弘所 弘入爲相,領揚州刺史。弘雖與韶之不絕,諸弟未相識者,皆不復往來。韶之在郡,常慮爲 ||**羨之、||傅亮等。||少帝卽位,遷侍中,驍騎如故。||景平元年,**[1+]||出爲吳興太守。||羨之被誅,王 其制。」從之。 其年卒,時年五十六。 繩,夙夜勤厲,政績甚美,弘亦抑其私憾。 韶之爲晉史,序王珣貨殖,王廞作亂。珣子弘,廞子華,並貴顯,韶之懼爲所陷,深結徐 十年,徵爲祠部尚書,加給事中。 坐璽封謬誤,免黃門,事在謝晦傳。 七廟歌辭、韶之制也。 坐去郡長取送故,免官。十二年,又出爲吳興太 太祖 文集行於世。 兩嘉之。在任積年, 子曄,尚書駕部外兵郎,臨 稱爲良守, 加秩 中

荀伯子,潁川潁陰人也。 祖羨,驃騎將軍。 父猗, 祕 書郞

尉, 奉朝請,員外散騎侍郎。 伯子 少好學, 博覽經傳, 著作郎徐廣重其才學,舉伯子及王韶之並爲佐郎,助撰晉史及 而通率好爲雜戲,遨遊閭里,故以此失淸塗。 解褐 爲駙馬都

著桓玄等傳。遷尙書祠部郎。

百世 廣陵 緣獨受偏 公,自己既被横禍,及進第秩,始贈蘭陵,又轉江夏。 而 後 不泯,濫賞無崇朝宜許。故太傅鉅平侯祜,明德通賢,宗臣莫二,勳參佐命,功成平吳, 公陳准,黨翼孫秀,禍加淮南,竊饗大國,因罪爲利。 嗣 義熙九年,上表曰:「臣聞咎繇亡後,臧文以爲深歎,伯氏奪邑,管仲所以稱仁。 今王道 闕然,烝嘗莫寄。漢以蕭何元功,故絕世輒紹。愚謂鉅平之封, 賞,宜復 惟新, 本封,以正 豈可不 國章 大判臧否, ·。」詔付門下。 謂廣 陵之國, 中朝公輔,多非理終,瓘功德 宜在削除。 值西朝政刑失裁,中興復 故太保衛瓘 宜同 **類國。** 本爵蕭 不殊,亦無 因 故太尉 功高可 陽縣 而

前散 騎 常侍 江 夏公 衞琠 上表 自陳曰「臣乃祖故太保瓘、於魏咸熙之中,太祖文皇帝爲

列傳

第

+

荀

伯子

故 蕭 爵。 嘉 兼 祖 不 忌 元 出 陽。 瓘 乃 應 輔 嗣 也 之中,東海 始 忠節 之日 濫 中宗 臣 蒙 賞。 表 伏 聖 改数 封 明 殊 ,付外參詳。」 趙氏之忠,寵延累葉, 願 元皇帝以曾祖故右衞 陛 御 遇,歷位元、凱。 尋先臣以剪除賈謐,封海陵 楚王 蕭 王越 下 世 陽侯,大晉受禪,進爵爲公,歷位太保,總錄朝政。 了英輔 遠錄舊 食蘭陵,換封江夏,戶邑如 瑋矯詔致禍。 類川 係興,曾無疑議 勳, 特垂 陳茂先亦 後被遠外 將軍崇承襲,逮于臣身。 三矜察。」 漢祖 前朝 以瓘 上表曰:「祠部郎荀伯子表 開封,誓以山河。 一、以爲 ,乃作 公,事在淮南 詔皆付門下 秉 卒州 濫賞 舊。 心忠正, 而 臣高 臣 並不 猶不至除 加以伐蜀之勳, 遇 以微 祖 伏願 禍 伏 散騎侍郎躁,瓘之嫡孫,口也篡承 ·施行 之前。 易,未 聞 陛 祠 國,良以先勳深重,百世不泯 下錄旣往 臣七世祖 部 齒 後 于時賈庶人 郎荀伯子表,欲貶降復 人倫,加始勉視 廣 故追 陵 之勳,垂罔 雖在 太尉 封 蘭 擾攘 及諸 准 陵郡公。 禍 之際, 息,封 王 加 極 之施, 用 淮 臣 爵 封 永

祝 粱 車 百官位 , 帝堯之後於薊, 帝舜之後於陳, 夏後於杞, 殷後於宋。 唯 騎 將軍 伯 使 次 子 君 王 爲 陳留 與 弘 世 下 稱 子 ·官耳。 王 之日 征虜 在 零陵王 沈沈 功 宣明 曹, 重 之徒, 上,臣 不 國 華 子 一,有平 愚竊 博 不 士。 足數 以 陽 爲疑。 妻弟 也。」遷散 侯 之風。」伯子常自矜廕籍之美,謂 謝晦 昔武 薦達之, 騎常侍, 王 剋殷,封 杞、陳並爲列國,而薊、祝、焦無聞 入為: 本邑大 神農 尚書 中正。 之後 左 丞, 於焦,黃帝 叉 出 上 弘 補 表 臨 日]]] 伏 之後 天 內 下 史。 見 於

事 駙馬都尉。 亦有徵。 斯則褒崇所承,優於遠代之顯驗也。是以春秋次序諸侯,宋居杞、陳之上。考之近世, 又泰始三年,太常上博士劉憙等議,稱衞公署於大晉在三恪之數, 晉泰始元年, 詔賜山陽公劉康子弟一人爵關內侯, 衛公姬署、宋侯孔紹子一人 應降稱侯。

臣以零陵王位宜在陳留之上。」從之。

守。 相謗毁,或延及祖禰,示其切直,又頗雜潮戲,故世人以此非之。 元嘉十五年,卒官,時年六十一。 文集傳於世 遷太子僕,御史中丞,莅職懃恪,有匪躬之稱,立朝正色,外內憚之。 出補司徒左長史, 凡所奏劾,莫不深 東陽太

子赤松,爲尚書左丞,曰以徐湛之黨,爲元凶所殺。

亦用才學 伯子族弟昶字茂祖, · 自 顯。 世祖初, 與伯子絕服五世。 爲晉陵太守。 坐於郡立華林閣,置主書、主衣,下獄免。 元嘉初,以文義至中書郎。 昶子萬秋字元寶。 前廢帝

末,爲御史中丞,卒官。

義 自顯,而在朝之譽不弘,蓋由才有餘而智未足也,惜矣哉。 史臣曰:夫令問令望,詩人所以作詠,有禮有法,前謨以之垂美。 荷、范、二王,雖以學

校勘記

- 順陽山陰人也 廿二史考異云:「按州郡志」順陽無山陰縣。 梁書范雲、范鎭傳並云南鄉舞陰
- 人。 南鄉與順陽本一郡,似山陰當爲舞陰之譌。而州郡志舞陰屬南陽,未詳其故。」李慈銘宋書
- {札 {記 云:「山陰字有誤。晉書范晷傳,南陽順陽人。 南史泰傳但作順陽 人。
- 伯通易 「伯通」各本並作「伯道」,據元龜七八八改。 晉書般覬傳, 覬字伯通。 下「伯道意銳」,
- [川] 雖在公坐 「坐」各本並作「言」,據南史改。

亦並改伯通

- 129 |__/ 卽太尉准之弟 「准」各本並作「淮」、據錢氏考異說改正。 廿二史考異云:「淮當作準。 史家避
- 寇萊 順帝諱,改準爲准,因譌爲淮耳。」孫虨宋書考論云:「太尉陳準也。 公作相始。 錢氏謂自宋順帝、皆非也。 魏書長孫肥傳, 中山太守仇儒推羣盗 今世通行准字,說者以爲自 趙准 爲主,造
- 妖言 云:『燕東傾,趙當續。 欲知其名,淮水不足。』時晉安帝隆安間 也 則 知此字俗用已久。」
- △五〕門地二品 「門地」下沅龜六○三有「堪」字。
- ベン 書云一 之」,語見書呂刑。 人有慶兆民賴 Ź 「書云」各本並作「詩云」, 據元龜五四一改。 按「一人有慶,兆民賴

- 由來尙矣 「尙」各本並作「上」,據南史改。
- 證謂「准卽準之減畫,實一字也。.范泰傳前司徒長史王準之,當是一人」。按殿本考證誤,范泰傳 王准之字元曾 「王準之」,殿本南史作「王淮之,字元魯」。 三朝本作「王准之」,北監本、毛本、殿本、局本作「王淮之」。 太平廣記 九九引冥祥記作「王淮之,字元會」。殿本考 元大德本南史作
- 之王準之,爲王雅之子。 晉書王雅傳:「長子準之,散騎侍郎。」與此王准之非一人。
- . الم 名字相應,既字水言,則作「訥之」是,作「衲之」誤。 **父**訥之 之字永言,琅邪人。祖彪之,光祿大夫。父臨之,東陽太守。 「訥之」各本並作「納之」,據世說新語文學篇注改。 |訥之歷尚書左丞,御史中丞。」古人 劉峻世說新語注引王氏譜曰:「訥
- (10) 永初二年 此事禮志繫元年。 晉宋書故謂作元年是。
- 子與之 「興之」南史作「輿之」。
- 太元隆安時事 「太元」各本並作「泰元」,按東晉孝武帝年號太元,今改正。
- 任在 西省 「任」繭史作「住」。
- 傅亮羊徽相代在職義熙十一年高祖以韶之博學有文詞補通直郎領西省事 補 通直郎」二十一字,據南史補。 「高祖」南史作「宋武帝」,今據宋書史例改正 各本並脱「在職 至
- 三 凡諸 列 傳 詔 第 黄 _ + 「韶黄」各本並作「韶奏」,據南史改。按古時帝命不稱奏,作「黄」是。 校 勘 記

- 二 斯誠檢忘一時權制 張森楷校勘記云:「檢忘當作檢亡,猶捕亡也。 正謂上文禽三叛士耳。」
- 己艺 景平元年 「元」各本並作「之」。孫彪宋書考論云:「當爲景平元年。」按孫說是,今改正。
- 故太保衞瓘本爵蕭陽縣公 「蕭陽」南史、晉書衞瓘傳、羊祜傳並作「菑陽」。錢大昕廿二史考異

云:「蕭陽、晉書作菑陽。 考晉書地理志不見此二縣名。」

二型 子赤松爲尚書左丞 瓘之嫡孫 孫說是,今訂補。 各本並脫「瓘」字。孫彪宋書考論云:「璪下當脫瓘字。」按晉書衞瓘傳、璪爲瓘之孫。 宋本作「左丞」、弘治本、北監本、毛本、殿本、局本作「右丞」,本書顏延之

傳亦作「尚書左丞荀赤松」、未知孰是。今姑從宋本及顏延之傳作「左丞」。

宋書卷六十一

列傳第二十一

武 三 王

廬陵孝獻王義眞 江夏文獻王義恭 衡陽文王義季

王義康,袁美人生江夏文獻王義恭,孫美人生南郡王義宣,呂美人生衡陽文王義季。 武帝七男:張夫人生少帝,孫修華生廬陵孝獻王義眞,胡婕妤生文皇帝,王修容生彭城 義康

義宣別有傳。[1]

進長安,留守栢谷塢,除員外散騎常侍,不拜。 廬陵孝獻王義眞,美儀貌,神情秀徹。 初封桂陽縣公、食邑千戶。年十二、從北征大軍 及關中平定,高祖議欲東還,而諸將行役旣

列傳第二十一 武三王

幷 愍然, 關中之任 因 境。」臨還,自執義眞手以授王脩,令脩執其子孝孫手以授高祖。 方仰聖澤。 久,咸有歸 一郡諸 東秦二州、司州之東安定新平二郡諸軍事,領東秦州刺史。〔三〕時隴上流人,多在關中,望 逼 大威,復得歸本。 交至。 慰譬曰:「受命朝廷,不得擅留。 感諸君戀本之意,今留第二兒,令文武賢才共鎭此 軍事 願 ·、安西將軍、領護西戎校尉、雍州刺史。「E」太尉諮議參軍京兆王脩爲長史,委以 長安十陵,是公家墳墓,咸陽宮殿數千間,是公家屋宅,捨此欲何之。」高祖爲之 高祖將還,三秦父老詣門流涕訴曰:「殘民不沾王化,於今百年矣。 始覩衣冠 ,止留偏將,不足鎭固人心,乃以義眞行都督雍涼秦三州司州之河東平陽河北 及置東秦州,父老知無復經略隴右、固關中之意,咸共歎息。 義眞尋除正,加節,又進督 而佛佛虜

旣 等殺脩。 斂 人 也。 財貨, 死 沈 是白義眞 **今多將輜重,一日行不過十里,虜騎追至,何以待之。** 田 情離駭,無 多載 子既殺王鎭惡,王脩又殺田子。 脩字叔治,京兆 子 日:「鎭惡欲反,故田子殺之。脩今殺田子,是又欲反也。」義眞 女, 相統 方軌 徐行。 灞城 0 高祖遣 人也。 虜追騎 將軍朱齡 初南渡見桓玄,玄知之,謂曰:「君 且 至, 義眞年少,賜與左右不節,脩常裁減之,左右並 建威 石替 將軍 義眞 鎭 傅 關 弘之曰:「公處 中,使 宜棄車輕行,乃可以免。」不 義眞 平世 輕兵 分 亟 吏 疾歸。 乃使左 進, 部郎 恐虜追擊 諸 右 將競 劉乞

草中。 從。 甚,剋日北伐,謝晦諫 此。」宏大喜,負之而歸。 王賜 初,高祖聞靑泥敗,未得義眞審問,有前至者訪之, 賊追兵果至,騎數萬匹。 悉被俘虜。 中兵參軍段宏單騎追尋,緣道 義眞 不從。 在前,故得與 義眞 及得宏啓事,知義眞已免,乃 、謂宏曰:「今日之事,誠無算略。 然丈夫不經此, 輔國 、數百 將軍 一叫喚,義眞識其聲,出就之,曰:「君非段 蒯恩斷後不能禁,至青泥,後軍大敗,諸將及府 人奔散, 日暮, 虜不復窮追。 並云「闇夜 止 奔敗, 無以 義眞 知存亡」。 與 左右相失,獨 何以 中兵邪? 知 高 艱 功曹 祖 身 難 在 逃 奴

洛陽,而 高祖伐廣固 議參軍,尋遷宋臺黃門郎,領太子右衞 義眞尋都督司 河南 ,歸降。 蕭條、未及修 雍秦幷涼 太祖 元嘉中, 理,改除揚州 五. 州諸 爲征虜將軍、 軍、建威 率。 刺史,鎭 宏,鮮卑人也,爲慕容超尚 將軍 石頭。 青冀二州 司州刺史, 刺史。 持節 追 如故。 贈左將軍。 書左 僕射 以段宏為義真諮 徐州 時義眞 刺 浴將鎭 史,

節、侍中、都督南豫 蔡茂之問 永初元年 [其故,回義眞曰:「安不忘危,休泰 ,封廬陵王, 豫雍 司 秦幷六州諸軍事、車騎將軍 食邑三千戶,移鎭 何 東城。 可恃。」 高祖始踐阼,義眞意色不 明年, 、開府儀同三司、南豫州刺史,出 遷司 徒。 高祖 不豫, 一悦,侍讀: 以 爲 [鎭歷 使持 博

義眞 聰 明 愛文義,而 輕動無德業。 與陳郡謝靈運、琅邪顏延之、慧琳道人並周旋異常,

列

傅

陽。

未之任

而

高

祖

崩

剔母 因其 性情所得,未能忘言於悟賞,故與之遊耳。」將之鎮,列部伍於東府前,旣有國哀,義眞所乘 舫單素,不及母孫修儀所乘者。「吾義眞與靈運、延之、慧琳等共視部伍,因宴舫內,使左右 過甚,故使范晏從容戒之,義眞曰:「靈運空疎,延之隘薄,魏文帝云鮮能以名節自立者。 云得志之日,以靈運、延之爲宰相,慧琳爲西豫州都督。 政,表求還都。 舫 與少帝不協,乃奏廢之,曰: 函 道以施己舫,而取其勝者。 而少帝失德,羡之等密謀廢立,則次第應在義眞,以義眞輕訬,不任主社稷, 及至歷陽,多所求索, 徐羨之等嫌義眞與靈運、延之暱狎 羡之等每裁量不盡與,深怨執 但

之事,殷鑒無遠,仁厚之主,行之不疑。 前事之不忘,後王之成鑒也。 臣 聞 二叔不 ·咸,難結隆周,淮南悖縱,禍興盛漢,莫不義以斷恩,情爲法屈。 故共叔不斷,幾傾鄭國,劉英容養, 釁廣難深, 二代

縱博 屏,志還京邑,潛懷異圖,希幸非冀,轉聚甲卒,徵召車馬。 綺,冀能改厲,天屬之愛,想聞革心。 臣等,若遂不悛,必加 一酣酒,日夜無輟,肆口縱言,多行 案車騎將軍義眞,凶忍之性,爰自稚弱,咸陽之酷,醜聲遠播。 放黜,至言苦厲,猶在 無禮。 自聖體不 一紙翰。 先帝 ·豫,以及大漸,臣庶憂惶,內外屛氣。 胎 厥 之 謀 。 圖 而自茲迄今,日月增甚,至乃委棄藩 陵墳未乾,情事猶昨, 慮 經固,親敕陛 先朝猶 以年在紈 下,面 **遂**蔑 詔 丽

棄遺旨,顯違成規,整棹浮舟,以示歸志,肆心專己,無復諮承。 屢遣中 ·使, 苦相敦釋。 而親對散騎侍郎邢安泰、廣武將軍茅仲思, 聖恩低徊, 深垂隱忍, 縱其悖駡, 訕主謗

朝,此 人播于遠近,暴於人聽。

晉朝 武 臣 陵舊典,使顧懷之旨,不墜於武廟,全宥之德,獲申於昵親。 聞原火不撲,蔓草難除,青青不伐,終致尋斧,況憂深患著,社稷慮切。 仰尋感慟, 詩一遵 臨啓

悲 咽

乃廢 義眞爲庶人,徙新安郡。 前吉陽令堂邑張約之上疏諫曰:

謀屈 殉 悔誓於及泉,壺關復寃魂於湖邑。 義之風,謂蹈善於朝聞,愈徒生於白首。 一何嘗 臣 聞 仁義之在天下,若中原之有菽,理感之被萬物,故不繫於貴賤。 不願聞善於輿隸,藥石於阿氏哉。〔<ご臣雖草芥,備充黔首,少不量 當斯之時,豈無尊卿賢輔,或以事迫心違,或以 用敢干禁忘戮,披敍 丹愚。 是以考叔反 力,頗高 \道壅

大夏,故虔順天人,享有萬 國。 雖靈 祚修長, 聖躬弗永,陛 下 ·繼明紹統,遐邇一 心,藩王

哲茂,四 維 寧謐,傾耳康哉之詠,企踵 升平之風

伏惟高祖武皇帝

誕茲神

武

撫

運龍興,仰淸天步,則齊德有虞,俯廓

九州,則侔功

竊念廬 陵王 少蒙先皇優慈之遇,長受陛下睦愛之恩。 故在心必言,所懷必亮,容

列

豈可以其一眚,長致淪棄哉。謹昧死詣闕,伏地以聞,惟願丹誠,一經天聽,退就斧钁, 於舊老,求四友於髦俊,引誘情性,導達聰明。凡人在苦,皆能自厲,況王質朗 興亡之由,中存武皇締構之業,下顧蒼生顒顒之望,時開曲宥,「判」反王都邑。 藩戚,敦睦以道,使兄弟之美,比煇魯、衞,龜策告同,祚均七百,豈不善哉!陛下富於 犯臣子之道,致招驕恣之愆。至於天姿夙成,實有卓然之美,宜在容養,錄善掩瑕,訓 無愧地下矣。 加訓範。且中賢之人,未能無過,過貴自改,罪願自新。以武皇之愛子,陛下之懿弟, 春秋,慮未重複,忽安危之遠算,肆不忍於一朝。 特願留神允思,重加詢采。 士庶杜口,人爲身計。臣伏思大宋之興,雖協應符緯,而開基造次,根條未繁,宜廣樹 盡義方,進退以漸。 今猥加剝辱,幽徙遠郡,上傷陛下棠棣之篤,下令遠近恇然失圖, 上考前代 心聰,易 選保傅

書奏,以約之爲梁州府參軍,尋又見殺。

景平二年六月癸未,云羡之等遣使殺義真於徙所,時年十八。

時俱還。言增摧哽。」三年正月誅徐羨之、傅亮等,是日詔曰:「故廬陵王含章履正,英哲自 自至極,地戚屬尊,豈可令情禮永淪,終始無寄。可追復先封,特遣奉迎,幷孫修華、謝妃 元嘉元年八月,詔曰:「前廬陵王靈柩在遠,國封墮替,感惟摧慟,〔云〕情若貫割。王體

宜加 志節 禍 「乃者權 始判,宣昭 然,道心內昭,徽風遐被。 心潛構,釁生不圖。 旌 不 申,威焉 顯,式揚義烈。 臣 陵 國 ·體,於是乎在。 縱,光亂基禍,故吉陽令張約之抗疏矢言,至誠慷慨, 兼至。 朕每永念讎恥,含痛內結,遵養姦慝,情禮未申。 昔關老奏書,見紀漢策,閻纂獻規,荷榮晉代。 可贈以一 遭時多難,志匡權逼,天未悔禍,運鍾屯險,羣凶肆醜,專竊國柄, 可追崇侍中、大將軍,王如故。 郡,賜錢十萬,布百匹。」 爲慰寃魂,少申悲憤。」又 遂 事 考其忠概, 参迹前 屈羣醜, 今王道旣亨, 殞命遐 (部日:

府儀同三司,刺史 其年薨,時年二十一。 遺令斂以時服,素棺周身,太祖從之。 州、豫州之西陽晉熙新蔡三郡諸軍事。 愛之。二十年,出爲 未之鎭,仍遷 義眞無子,太祖以第五子紹字休胤 揚州 如故 刺 史,將軍如故。 南中郎將、江州刺史, 索虜至瓜步,紹從太子鎭石頭。 爲嗣。 在任七年,改授左將軍、南徐州 時年十二。二十二年,入朝, 元嘉九年,襲封廬陵王。 追贈散騎常侍、鎭軍將軍、開 二十九年, 刺 加棨 少 史,給鼓 而寬雅, 戟, 疾患 進都 吹 太祖 解 督江 甚

和一 一年,爲 無子,南平王鑠第三子敬先 前 廢帝 所 害。 追贈中書侍郎、諡曰恭王。 為嗣。 本名敬秀,旣出繼 無子,太宗泰始元年,以世祖第二十一 而紹妃褚秀之孫 女,故改焉。 景

子晉熙王子輿字孝文爲紹嗣,封廬陵王。 爲輔國將軍、南高平臨淮二郡太守,並未拜,爲太

帝元徽二年,與休範俱伏誅。 宗所殺。 三年,更以桂陽王休範第二子德嗣 國復絕。 三年,復以臨澧忠侯襲第三子暠字淵華繼紹。 紹。 爲建威將軍、淮陵南彭城二郡太守。 後 爲給 廢

又無子,國除。

順帝昇明元年,薨,諡曰元王。

離 於側。 夏文獻王義恭,幼而明穎,姿顏美麗,高祖特所鍾愛,諸子莫及也。 高祖 爲性儉約,諸子食不過五酸盤,而義恭愛寵異常,求須菓食, 飲食 日中無算, 寢 臥, 常不

嘗噉,悉以乞與傍人。 廬陵諸王未嘗敢求,求亦不得。

景平二年,監南豫豫司雍秦幷六州諸軍事、冠軍將軍、南豫州刺史,[10] 代廬陵王 義 眞

鎭歷陽,時年十二。元嘉元年,封江夏王,食邑五千戶。加使持節,進號撫軍將軍,給鼓 三年、監南徐兗二州揚州之晉陵諸軍事、徐州刺史、持節、將軍如故。 進監爲都督,未 吹一

之任。太祖征謝晦,義恭還鎭京口。

故。 義恭涉獵文義,而驕奢不節,旣出鎭,太祖與書誠之曰 六年,改授散騎常侍、都督荆湘雍益梁寧南北秦八州諸軍事、荆州刺史, 持節、將軍如

深自砥礪,思而後行。開布誠心,厝懷平當,親禮國士,友接佳流,識別賢愚,鑒察邪 吾曹耳,豈可不處尋王業,大懼負荷。今旣分張,言集無日,[11]無由復得 汝 以弱冠,便親方任。天下艱難,家國事重,雖曰守成,實亦未易。隆替安危,在 動相規誨,宜

正,然後能盡君子之心,收小人之力。

事。 汝別時可省也。 汝性編急,袁太妃亦說 宜 汝 應慨然立志,念自裁抑。 神意爽悟,有日新之美,而進德修業,未有可稱,吾所以恨之而不能已已者也。 遠大者豈可具言,細碎復非筆 如此。 性之所滯,其欲必行,意所不在,自己從物回改,此最弊 何至丈夫方欲贊世成名而無斷者哉。 可 今粗疏十數事

之累。 羽、張飛,任偏 禮 賢 漢書稱衞青云:「大將軍遇士大夫以禮,與小人有恩。」西門、安于,矯性齊美,關 下士,聖人垂訓,驕侈矜尙,先哲所去。豁達大度,漢祖之德,猜忌褊急,魏武 同弊。 行己舉事,深宜鑒此。

自書陳。 若事 若形 異今日,嗣 迹之間,深宜愼護。 子幼蒙,司徒便當周公之事,汝不可不盡祗順之理。 苟有所懷,密 至於爾時安危,天下決汝二人耳,勿忘吾言

大餉致,而當時遇有所乏,汝自可少多供奉耳。 今既進袁太妃供給,計足充諸 用,此外一不須復有求取,近亦具白此 汝一月日自用不可過三十萬, 意。 唯脫應 若能省

列

傳

第

_

+

武

 \equiv

王

.

此,盆美。

西楚殷曠,常宜早起,接對賓侶,勿使留滯。 判急務訖,然後可入問訊,旣覩顏色,

審起居,便應卽出,不須久停,以廢庶事也。 下日及夜,自有餘閑。

府舍住止,園池堂觀,略所諳究,計當無須改作。 司徒亦云爾。 若脫於左右之宜,

須小小回易,當以始至一治爲限,不煩紛紜,日求新異。

獄,君子用心,自不應爾。 取訊簿密與劉湛輩共詳,大不同也。 而從之,美自歸己。 凡訊 一獄多決,當時難可逆慮,此實爲難,汝復不習,殊當未有次第。 不可專意自決,以矜獨斷之明也。 刑獄不可擁滯,一月可再訊。 至訊日,虛懷博盡,愼無以喜怒加人。 萬一如此,必有大吝, 訊前一二日, 能擇善者 非唯訊

言「君不密則失臣,臣不密則失身」。或相讒搆,勿輕信受,每有此事,當善察之。 凡事皆應慎密,亦宜豫敕左右,人有至誠,所陳不可漏泄,以負忠信之款也。

名器深宜慎惜,不可妄以假人。 **昵近**爵賜, 尤應裁量。 吾於左右雖爲少恩, 如聞

外論,不以爲非也。

以貴陵物物不服,以威加人人不厭,此易達事耳。

聲樂嬉游,不宜令過,蒱酒漁獵,曰三一切勿爲。 供用奉身,皆有節度,奇服異器,

不宜興長。 汝嬪侍左右,已有數人,旣始至西,未可忽忽復有所納。

又誠之曰:

宜數引見佐史,CIED非唯臣主自應相見,不數則彼我不親,不親則無因得盡人,人

不盡,自己復何由知其衆事。廣引視聽,旣益開博,於言事者,又差有地也。

九年,徵爲都督南兗徐兗靑冀幽六州豫州之梁郡諸軍事、征北將軍、開府儀同三司、南

兗州刺史,鎭廣陵。時詔內外百官舉才,義恭上表曰:

玉衡旣正,泰階載一,而猶發慮英髦,垂情仄陋,幽谷空同,顯著揚歷。是以潛虬聳鱗, 臣聞雲和備樂,則繁會克諧,驊騮驂服,則致遠斯效。 陛下順簡夤化,文明在躬,

佇利見之期,翔鳳弭翼,應來儀之處。

戎喪旅,天寶北勤河朔,東據營丘,勳勇旣昭,心事兼竭。 雖蒙褒敍,未盡才宜,並可授 忠諒款誠。往年逆臣叛逸,華陽失守,森之全境寧民,績章危棘。前者經略伊、瀍,元 變九官,宣贊百揆。尚書金部郎臣徐森之,臣府中直兵參軍事臣王天寶,並局力允濟, 軒冕屢招,確爾不拔。若以蒲帛之聘,感以大倫之美,庶投竿釋褐,飜然來儀,必能毗 以邊藩,展其 竊見南陽宗炳,操履閑遠,思業貞純,砥節丘園,息賓盛世,貧約而苦,內無改情, 八志力。 交阯遼邈,累喪藩將,政刑每闕,撫莅惟艱。 南中夐遠,風謠逈隔

蠻獠 足威懷荒表,肅清遐服。 狡竊,邊氓茶炭,實須練實,以綏其難。 昔魏戊之賢, 功存薦士, 趙武之明, 事彰管庫。 謂森之可交州刺史,天寶可寧州刺史,庶 臣識愧前良,

理 一謝先哲,率舉所知,仰酬採訪,退懼瞽言,無足甄 獎。

南兗。 別 行文書而已,故太祖安之。相府年給錢二千萬,它物倍此,而義恭性奢,用常不足,太祖又 一州諸軍事、司徒、錄尙書,領太子太傅,持節如故,給班劍二十人,置仗加兵。 《給錢年千萬。二十六年,日為領國子祭酒。時有獻五百里馬者,以賜義恭 十六年,進位司空。 二十一年,進太尉,領司徒,餘如故。義恭旣小心恭愼,且戒義康之失,雖爲總錄,奉 明年,大將軍彭城王義康有罪出藩,徵義恭爲侍中、都督楊南徐克 明年,解督

今追 解 義恭果欲走,日刊賴衆議得停,事在張暢傳。 不 軍 北 能 司 過 國 之, 固 馬 子祭酒。 ,義恭震懼不敢追。 二十七年春,索虜寇豫州,太祖因此欲開定河、洛。 彭城 檀 可悉得。」諸將並請,義恭又禁不許。經宿,太祖遣驛至,使悉力急追。 和之向 備 虜遂深入,徑至<u>瓜步</u>,義恭與世祖閉彭城自守。二十八年春,虜退走,自彭城 加 蕭城。 誡勒,義恭答曰:「臣未能臨瀚 虜先已聞 其日,民有告:「虜驅廣陵民萬餘口,夕應宿安王陂,去城數十里。 知 ,乃盡殺所驅廣陵民,輕騎引去。 降義恭號驃騎將軍、開府儀同三司,餘悉如故。 海 ,濟居延,庶免劉仲奔逃之恥。」及 其秋,以義恭總統羣帥,出鎭彭城。 初虜深入,上慮義恭 義恭 乃遺鎭 演至,

魯郡 冀、同、瘫、秦、幽、幷十一州諸軍事,幷前十三州,移鎭盱眙。 敢 (犯)義恭悉遣人伐取,父老莫不歎息。 孔子舊庭有栢樹二十四株,日日經歷漢、晋,其大連抱。 又以本官領南兗州 刺史,增督南兗、豫、徐、兗、青 有二株先折倒,士人崇敬,莫之 修治館宇,擬制 東 城。

常所遣傳詔,砌遣之而後入。義恭請罷兵,凡府內兵仗,並送還臺。進位太保,進督會州諸 区 州 [肆逆,其日砌召義恭。先是,詔召太子及諸王,各有常人,慮有詐妄致害者。 、諸軍事、南徐州刺史,持節、侍中、錄尙書、太子太傅如故,還鎭 事,服侍中服,又領大宗師。 一十九年冬,還朝,上以御所乘蒼鷹船上迎之。 遭太妃憂,改授大將軍、都督揚南徐二 東府。 辭侍 中未拜。 至是義恭求 値 元

船於東治渚,因單馬南奔。始濟淮,追騎已至北岸,僅然得免。一劭大怒,遣始興王濬就西省 新亭,劭挾義恭出戰,恒錄在左右,故不能自拔。戰敗,使義恭於東堂簡將。義恭先使 世 進說曰:「割棄南岸,栅斷石頭,此先朝舊法,以逸待勞,不憂不破也。」劭從之。 祖 已次近路,欲悉力逆之,決戰中道。 世祖入討,劭疑義恭有異志,使入住尚書下省,分諸子並住神虎門外侍中下省。 義恭慮世祖船乘陋小,劭豕突中流,容能爲患,乃 世祖 前鋒至 人人具 別聞

世祖時在新林浦, 義恭旣至,上表勸世祖即位,曰:「臣聞治亂無兆,倚伏相因,乾靈降

傳

殺

義恭十二子。

位太傅,領大司馬,增班劍爲三十人。 政,待罪 季,實惟樂推,王室之亂,天命有在,故抱拜兆於壓壁,赤龍表於霄徵。 事、太尉 家 親 非 諸 國 惡 所 侯雲赴,數均八百,義奮之旅,其會如林。 以嚴 七廟之靈,近哀黔首茶炭之切,時陟帝祚,永慰羣心。 盈 有司 **釁滿,阻兵安忍,戮善崇姦,履地戴天,畢命俄頃,宜早定尊號,以固社稷。** 、錄尚書六條 重宗社,紹延七百。 `,敢以漏刻視息,披露肝膽。」世祖卽祚,授使持節、侍中、都督楊南徐二州諸 事、南徐徐二州刺史,給鼓吹一部,班劍二十人,又假黃鉞。 昔張武抗辭, 代王順請, 耿純陳欵, 光武 以在藩所服玉環 大綬賜之。 臣負釁嬰罰,偸生人壤,幸及寬 增封二千戶。 伏惟大明無私,遠存 正位。 况今罪逆無 事寧,進 景平之 軍

拜之禮 闡 文 見茲典。 盛 既明,便從 則。 上 。」詔曰:「闇薄纂統,實憑 不 然周 欲致禮太傅,諷有司奏曰:「聖旨謙光,尊師重 故卞量、孫楚並謂 所執。」世祖立太子,東宮文案,使先經 之師保,實稱三吏,晉因於魏,特加其 人君無降尊之義。 師範,思盡虔恭,以承 遠稽 義 聖 禮。 道 一典,近卽羣 恭 道,欲致拜太傅, 帝道 訓 嚴 所奏稽諸往代,謂 極,既有常尊,考之史載,未 心,臣等參議謂不 斯誠 弘茲遠風,敦 無拜禮,據 應有 加

孝建元年,南郡王義宣、臧質、魯爽等反,加黃鉞,白直百人入六門。 事平,以臧質七百

ー六匹

敢不輸 昔典。 體,列 論道 陳平抗辭,匪職罔答。 之風,宣於周載。 .省錄尚書,曰:「臣聞天地設位,三極同序,皇王化則,九官咸事。 '賜義恭,又增封二千戶。 代 使物競 盡。」 相沿,茲仍未革。 上從其議 思存,人懷勤壹,則名實靡愆,庸節必紀。臣謬典國重,虛荷崇位,興替宜知 台輔之設,坐調陰陽,元、凱之置,起釐百揆。 漢承秦後,庶僚稍改。 今皇家中造,事遵前文,宜憲章先代,證文古則,停省條 世祖以義宣亂逆,由於强盛,至是欲削弱王侯。 **爵因時變,任與世移,總錄之制,** 所以欒鍼矢言 時亮之績,昭 義恭 錄,以依 ,侵官是 於虞典 希旨,乃 本非舊

匪 風 法 正 夏,庶! 之首 載 淪 上 落 新 哲之洪謨, 叉 與 請 耗 侯牧 竭 驃 微欵。 弊 以 騎 人典章 爵 未 大將軍竟陵王誕奏曰:「臣聞佾懸有數,等級異儀,珮笏有制, 先 範 充,百用 伏願 稍 ,致貶之端,宜 世之明訓。 與事廣,名實 陛 思約,宜備品式之律,以定損厭之條。 下 聽 覽 而時至彌流,物無不弊,僭侈由俗,軌度非古。 一從戚 之餘,薄 一差,難以卒變,章服崇濫,多歷年所。今樞機更造,皇 始。 垂昭納,則上下相安,表裏和穆矣。」 輒 因暇日,共參愚懷,應加省易,謹陳九事。 臣等地居枝昵,位參台輔,遵 卑高殊序。 晉代東徙,舊 斯

韶付外詳。有司奏曰:

列

傳

第

+

武

Ξ

王

車 服 以 庸,虞書茂典,名器愼假,春秋明誡。 是以尚方所制,漢有嚴律,諸侯竊服,

六四七

辨,民志靡壹。 雖 親 必罪。 降于頃世,下僭滋極。 義恭所陳,實允禮度。 器服裝飾,樂舞音容,通於王公,達于衆庶。 九條之格,猶有未盡,謹共附益,凡二十四條 上下無

悉用 大橦 袿 平 繼 宜 得孔雀白氅。 戟。 銅 體 乘 爲飾。 l衣,不得裝面廠花。Cl♂正冬會不得鐸舞、杯柈舞。CllOJ長蹻、透狹、舒丸劍、博山、緣 止下官而已。Climo諸鎭常行,車前後不得過六隊,白直夾轂,不在其限。 刀不得過銀 公主王妃傳令,不得朱服。轝不得重棡。鄣扇不得雉尾。 絳。 爲 船皆下 、升五案,[三]自非正冬會奏舞曲,不得舞。 諸妃主不得著繉帶。[三]信幡非臺省官 王者,婚葬吉凶,悉依諸國公侯之禮,不得同皇弟皇子。車非軺車,不得油幢。 事不得南向坐,施帳幷帾。藩國官,正冬不得跣登國殿,及夾侍國師傳令及油 郡縣內史相及封內官長,於其封君,旣非在三,罷官則不復追敬,不合稱臣, 諸王女封縣主,諸王子孫襲封之王妃及封侯者夫人行,並不得鹵簿。
諸王子 兩頭作露平形,不得擬象龍舟,悉不得朱油。帳鑄不得作五花及竪筍形。 夾轂隊不得絳襖。平乘誕馬不得過二匹。胡伎不得綵衣。 劍不得鹿盧形。槊毦不 舞伎正冬著

詔可。

入朝不趨,贊拜不名,劍履上殿,固辭殊禮。 是 一歲十一 月,還鎭京口。 二年春,進督東南克二州。其冬,徵爲揚州刺史,餘如故。 又解持節、都督幷侍中。 加

揚州 以避之,乃進位太宰,領司徒。義恭常慮爲世祖所疑,及海陵王休茂於襄陽爲亂,乃上 義 恭撰要記五卷,起前漢訖晉太元,表上之,詔付祕閣。 時西陽王子尚有盛寵,義恭解

表日

致禍 匹庶。 連謀,實由强盛,晉氏列封,正足成永嘉之禍。尾大不掉,終古同疾,不有更張,則其 驕奢,自然而至,自恩聚毛折軸,遂乃危禍。自三漢之諸王,並置傅相,猶不得禁逆,七國 周、漢,上乖顯授之恩,下亡血食之業。夫善積慶深,宜享長久,而歷代侯王,甚乎 古先哲王,莫不廣植周親,以屏帝宇,諸侯受爵,亦願永固邦家。 豈異姓皆賢,宗室悉不賢。 由生於深宮,不覩稼穡,左右近習,未值田蘇,富貴 至有管蔡、梁燕,

源莫救。

意塞, 文學,足充話言,遊梁之徒,一皆勿許。 邊,至於華州優 地 宜鎭御,別差扞城大將。 勝 兵勇,獎成凶惡。前事之不忘,後事之明兆。陛下大明紹祚,垂法萬葉。臣年衰 日者 無所知 庶人恃親,殆傾王業。去歲西寇藉寵,幾敗皇基。不圖寢煙,復生今釁,良以 解,忝皇族耆長,慚慨內深,思表管見,裨崇萬一。竊謂諸王貴重,不應居 地,時可 暫出。 若情樂沖虛, 旣以有州,不須置府。若位登三事,止乎長史掾屬。若 不宜逼以戎事。 文武從鎭,以時休止,妻子室累,不煩自隨。百 若捨文好武, 尤宜禁塞。僚佐

列

傳

第

+

武三

於私 僚修詣,宜遵晉令,悉須宣令齊到,備列賓主之則。 為 用蓋寡,自金銀裝刀劍戰具之服,皆應輸送還本。 衡泌之士,亦無煩干候貴王。 曲突徙薪,防之有素, 器甲

者無懼,惡者止姦。

大悅。 儀。 時世祖 毎 三年,省兵佐,加領中書監,以崇藝、昭武、永化三營合四百三十七戶給府,更增東僮 有符瑞,輙獻上賦頌,陳詠美德。 |大明元年,有三脊茅生石頭西岸,累表 嚴暴,義恭慮不見容,乃卑辭曲意,盡禮祗奉,且便辯善附會,俯仰承接,皆有容 勘封禪,

決, 尙 千七百人,合爲二千九百人。六年,解司徒府太宰府依舊辟召。又年給三千匹布 倚,用 開 道,百揆庶務,允歸尊德。 三司,領兵置佐,一依舊准,領丹陽尹、侍中、領公如故。」又增義恭班劍爲四十人,更申殊禮 「總錄之典,著自前代。 書令, 國公、新除尚書令元景, 若有軍 七年,從巡,兼尙書令,解中書監。八年閏月,又領太尉。其月,世祖崩,遺詔:「義恭 康 加中書 庶績,可錄尚書事,本官監、太宰、王如故。 旅,可爲總統。 一監,柳元景領尚書令,入住城內。 孝建始年,雖暫幷省,而因革有宜,理存濟務。 太宰江夏王義恭新除中書監、太尉,地居宗重,受遺阿衡,實深 同禀顧誓,翼輔皇家,贊業宣風,緊公是賴。可卽本號開府儀 尚書中事委顏師伯。外監所統委王玄謨。」前廢帝卽位,詔曰: 事無巨細,悉關二公。大事與沈慶之參 侍中、驃騎大將軍、南兗州刺史、巴東郡 **股** 榮獨在躬,未涉政 憑 解 同

之命。固辭殊禮。

大 豐厚,而用常不足,賒市百姓物,無錢可還,民有通辭求錢者,輒題後作「原」字。 度,不愛財寶,左右親幸者,一日乞與,或至一二百萬,小有忤意,輙追奪之。 音律,游行或三五百里,世祖恣其所之。東至吳郡,登虎丘山,又登無錫縣烏山以望太湖。 明 中撰國史,世祖自爲義恭作傳。及永光中,雖任宰輔,而承事近臣戴法興等, 性嗜不恒,日時移變,自始至終,屢遷第宅。 與人遊欵,意好亦多不終。 大明 善騎 時, 而奢侈無 馬,解 常若 資 供

好善 莫申,幸賴宗祏之靈,克纂祈天之祚,仰惟勳戚,震慟于厥心。 昔梁王徵庸,警蹕備禮,東平 化。 丞相、領太尉,中 聲 列 四子,至己時年五十三。斷析義恭支體,分裂腸胃,挑取眼精,至也以蜜漬之,以爲鬼目粽。 藩,宜風鉉德,位隆姬輔,任屬負圖,勤勞國家,方熙託付之重,盡心毗導,永融雍穆之 ,黄屋在廷。 太宗定亂,令書曰:「故中書監、太宰、領太尉、錄尚書事江夏王道性淵深,睿鑒通遠,樹 前 叫 凶醜忌威,奄加寃害,夷戮有暴,殯穸無聞,憤達幽明,痛貫朝野。 朕蒙險在難,含哀 廢帝狂悖無道,義恭、元景等謀欲廢立。永光元年八月,廢帝率羽林兵於第害之,幷 書監 況公德猷弘懋,彝典未殊者哉。 、錄尚書事 、王如故。 給九旒鸞輅,虎賁班劍百人,前後部羽葆、鼓吹, 可追崇使持節、侍中、都督中外諸軍事、

列

輼輬車。」

史洮 史巴東郡開國忠烈公元景,故侍中、司空始興郡開國襄公慶之,故持節、征西將軍 監、錄尚書事江夏文獻王義恭,故使持節、侍中、都督南豫江豫三州軍 廟 庭。」 陽 泰 縣開 始三年,又下詔曰:「皇基崇建,屯、剝維難,弘啓熙載,底績忠果, 世祖寧亂定業,實資翼亮。 國肅侯慤,或體道沖玄,變化康世,或盡誠致効,庚難龕逆,宜式遵國典,陪祭 故使持節、侍中、都督中外諸軍 事、 事、 丞相 故從饗世 太尉、南 、領太尉、 一、雍州 ·祀, 豫 中書 勒勳 州 刺 刺

聲校 封。 昇明二年,復以宗室琨子績繼封。 尉。 祗伏誅, 歆還本。 義恭長子朗字元明,出繼少帝,封南豐縣王,食邑千戶。 爲元凶所殺。 泰始三年,更以宗室韞第二子銑繼封。 世祖 即位,追贈前將軍、江州刺史。 三年,薨。 會齊受禪,國除。 爲湘州刺史、持節、侍中,領射 孝建元年,以宗室祗長子歆繼 爲秘書郎,與韞俱死。

江夏王,食邑五千戶。 軍 王。日召以第四皇子子綏字寶孫繼封,食邑二千戶。 事 泛េ 朗 弟 軍 叡字元秀,太子舍人。 一將軍 、野州 刺史。 改叡爲江夏宣王。 進號後軍 爲元凶所害。 將 軍,加持節。 子綏未受命,與晉安王子勛同逆,賜死。 追贈侍中,諡宣世子。 追諡 太宗泰始元年,進號征 叡曰宣王。 以子綏為都督郢州 大明二年, 追封安陸 南將 軍,改封

宗以第八子躋字仲升,繼義恭爲孫,封江夏王,食邑五千戶。 臨 海 水嘉 五郡諸 軍事、東中郞將、會稽太守,進號左將軍。 齊受禪, 後廢帝即位,督會稽東陽新安 降爲沙陽縣公,

千五百戶。謀反,賜死。

度,平都懷侯。 叡弟韶字元和,封新吳縣侯,官至步兵校尉。 坦弟元諒,江安愍侯。 元諒弟元粹,興平悼侯。 追贈中書侍郎、諡曰烈侯。 坦、元諒、元粹並追贈散騎 韶弟坦字元

侍郎。 元胤弟伯禽,孝建三年生。 元粹弟元仁、元方、元旒、元淑、元胤與朗等凡十二人,並爲元凶所殺。 義恭諸子旣遇害,爲朝廷所哀,至是世祖名之曰伯禽,以擬

追贈江夏王,改諡曰愍。

魯公伯禽,周公旦之子也。

官至輔國將軍、湘州刺史。

又爲前廢帝所殺。

諡曰哀世子。

又

侯。 伯禽弟仲容,封永脩縣侯。 叔子弟叔寶,及仲容、叔子,並爲前廢帝所殺。 爲寧朔將軍、 臨淮濟陽二郡太守。 諡仲容、叔子並曰殤侯。 仲容弟叔子,封永陽縣

所愛。 衡陽文王義季,幼而夷簡,無鄙近之累。 元嘉元年,封衡陽王,食邑五千戶。 五年,爲征虜將軍。 太祖爲荆州,高祖使隨往江陵,由是特爲太祖 八年,領石頭戍事。

列

遷 持 節 、都督 南徐州諸軍事、右將軍、南徐州刺 史。

豐 財 節 省 母 如 月 用 故 了給鼓 白 六年,代 數 米二斛,江迅錢一千,幷制豐噉肉。 年 間 吹 臨 ,還復充實。 部。 川王義 先是義慶在 慶都 隊主續豐母 督荆湘 任,值 雍益梁寧南北 老家 凹蜀 義 亂 貧,無以充養, 季 擾,師 素 秦 拙 書, 旅 八州諸軍事、安西將軍、荆州 應接,府庫空虛,義季 上聽 遂 使餘 斷 不 ·食肉。 人書啓事 義 ず、唯 季哀 躬 行 自署 其 刺史,持 節 志, 儉 名 音 給 m

今能· 耳。 旨 紜 不 陳 所 不 能 二,酣 紅 復 諳 謝 飲酒。 立 二十 以 今遣孫道胤就楊佛等令晨夕視汝,幷進止湯食, 義 然後 縦 家 季 近 上 如 長 素 年, 或 此 詔 初 少 汝旣有 沙 自是可 報 嗜酒,自 爲 门 遂 以 止 加散 之日 懷, 兄弟 者。 騎常侍,進 近不 成疾。 美尙 節之物, ,皆緣此致 幸 [彭城 誰 可 復 能 王義康 不至此, 顧 加以吾意 上 無過,改 但嗜者不能立 性 又詔 號征 故。 命 廢 之重, 之日 西大將軍 之爲貴耳。 後,遂爲 將 殷勤 門 軍 :「汝飲積 無 蘇徽 可 此 志 何 歎 一,領南 酣酒 長夜之飲,略少 裁割耳。晉元 至不 可 ,耽酒成疾,旦 此非唯傷 恨, 食 ,[10]汝於何得之? 能慨 蠻 少,而 量 校尉 可開懷虛受, 復 然深 素羸 事 條。 *業,亦 帝 醒 自 夕 待盡 多 勉 日。 人主, 本望 風,常 厲, 自 太祖累加詰責,義季 損 愼勿隱避。 鰏 能 尙 乃 性 書 慮 以 復 能 命,世 歎 禁斷,并 至 理 須 感 塞。」 一此,今果委頓 嚴 自 王 導 萬 相 中 義 吾飽嘗見人 之諫, 割 給 进 未 季 裁 藥 此 欲 雖 膳 皆 奉 相 丛 終 引 縦 至 諸 身 汝 此 愆

斷酒,無它慊吸,蓋是當時甘嗜罔已之意耳。 今者憂怛,政在性命,未暇及美業, 復何爲吾

煎毒至此邪。」義季終不改,以至於終。

怙,倉卒之際,尙以弱甲瑣卒,徼寇作援。 政欲乘際會,拯危急,以申威援,本無驅馳平原方幅爭鋒理。 指趨,故且裝束,兼存觀察耳。少日勢漸可見,便應大 動,義季懲義康 十二年,進督豫州之梁郡。 史,「三」持節、常侍如故。 復逡巡。 若謂: 二十一年,爲都督南兗徐靑冀幽六州諸軍事、征北大將軍、開府儀同三司、南兗州 **豈唯大乖應赴之宜,實孤百姓之望。** 事 理政應如此者,進大鎭,聚甲兵,徒爲煩耳。」 **禍難,不欲以功勤自業,無它經略,唯飲酒而已。** 登舟之日,帷帳器服,諸應隨刺 遷徐州刺史,持節、常侍、都督 彼爲元統,士馬桓桓,旣不懷 且回 奴輕漢, 有經略, 史者,悉留之, 如故。 將自 何合安然, 又山路易憑,何以畏首尾迥 太祖 此 明年, 而 始。 奮發, 叉韶之日:「 荆楚以爲美談。 索虜侵逼,北境擾 遂不 賊初 連被 敢 起逸, 動。 杜驥、 意旨, 遣軍 未 猶 知 申 刺

持節、都督、刺 十三。太尉江夏王義恭表解職迎喪,不許。 二十四年,義季病篤,上遣中書令徐湛之省疾,召還京師。 史如故 上遣東海王禕北迎義季喪。 未及發, 薨於彭城, 追贈侍中、司空, 時年三

子恭王嶷字子岐嗣。 中書侍郎,太子中庶子。 世祖大明七年,薨,追贈冠軍將軍、豫州

列

第

+

武

Ξ

王

刺史。 子伯道 嗣 順帝昇明三年,薨。 其年,齊受禪,國除。

踐冰之慮已除,泰山之安可恃,曾未云幾,而磔體分肌。 暴主,顧無猜色,歷載踰十,以尊戚自保。 上相,大明之世,親典冠朝。 史臣曰:戒懼乎其所不覩,恐畏乎其所不聞,在於愼所忽也。 屈體降情,槃辟於軒檻之上,明其爲卑約亦已至矣。 及在永光,幼主南面,公旦之重,屬有所 古人以隱微致戒,斯爲篤矣。 江夏王, 高祖寵子, 位居 歸。 得使虐朝 自謂

校勘記

義康義宣別有傳 各本並脫「義康」二字,據錢氏考異說補。 錢大昕廿二史考異云:「義宣上,

當有義康二字。」

ヘニン 乃以義眞行都督雍凉秦三州司州之河東平陽河北三郡諸軍事安西將軍領護西戎 史 河北縣本屬河東郡,蓋是時析置爲郡也。『三州』下,當有『司州』二字。 各本並脱「司州」二字,據錢氏考異說補。廿二史考異云:「案晉志,河東、平陽 毛德祖督司州之河東、 校 二郡 尉 屬司州。 雍 州 刺

平陽、河北,見索虜傳。」

又進督幷東秦二州司州之東安定新平二郡諸軍事領東秦 州 刺 史 錢大昕廿二史考異云:「考 北平

晉志,安定、新平,皆雍州屬郡。 而營浦侯遵考傳云,長安平定,以督幷州、 司州之北河東、

陽、北雍州之新平、安定五 郡諸軍事。 則此二郡、當屬雍州 非司 州 矣。」

, , , , 侍讀博士蔡茂之問 侍 讀學士官名,當從南史作侍讀博士。」李慈銘宋書札記云:「海陵王休茂傳 其故 「侍讀博士」各本並作「侍讀學士」, 據南史改。 殿本考證云:「是時無 有侍讀博士荀詵。」

五五 不及 母 孫修 儀所乘者 「孫修儀」上文作「孫修 華

プマ 藥石 於阿氏哉 各本並脱「於」字,據远龜五四 補。

つずい 時開 曲 宥 「時」元龜五四一作「特」。

景平二年六月癸未 通鑑考異云:「按長曆,六月庚寅朔,無癸未,蓋癸丑 也。

ハ 丸 U 感惟 摧慟 「摧」各本並作「拱」。「拱慟」義不可通,今據元龜二九五改

監南豫豫司雍秦幷六州諸軍事冠軍將軍 南豫州刺 史 各本並脫「六」字,據元。二七八補

言集無日 「無」各本並作「未」,據元龜一九六改

意所不在 「在」元龜一九六、通鑑宋元嘉六年作「存」。

蒲酒: 元嘉 漁獵 六年作「蒱酒漁獵」。 三朝本、北監本、毛本脫「酒」字。 今據元龜、通鑑補 殿本、局本作「摴蒱漁獵」。 元龜一九六、通鑑宋

列 傳 第 十 校 勘 記

- 宜數引見佐史 胡三省通鑑注曰:「佐史當作佐吏。晉、宋之間,藩府率謂參佐爲佐吏。」
- 至き 不親則 無因得盡 人人不盡 兩「人」字下,通鑑宋元嘉六年並有「情」字。
- 二十六年 各本並脱「六」字,據元龜二七六補。 按上文云「二十一年,進太尉」,下文又云「二

十七年春」,則此當是二十六年。

- [17] 義恭果欲走 各本並脫「欲」字,據南史補。
- 魯郡孔子舊庭有栢樹二十四株 弘治本、北監本、毛本、殿本、局本作「舊庭」,元龜二九九作

「舊廟」。

- 不得裝面 一蔽花 各本並脫「蔽花」二字、據本書禮志五引此奏補
- 正冬會不得鐸舞杯柈舞 各本並脱「正」字、據禮志五補。 正謂正 旦,冬謂 冬至。
- 長蹻透 狹舒丸劍博山緣大橦升五案 「透狹舒」禮志五作「透舒」。 又各本並脫「丸」字,據禮志

五補。

- (三) 諸妃主不得著緄帶 「緄帶」禮志五作「袞帶」。
- (三) 宜止下官而已 禮志五作「正宜上下官敬而已」。
- (三) 自然而至 「自然」各本作「自往」,據元龜二七三改。
- 〔至〕遂乃危禍 「乃」元龜二七三作「及」。

記

字下脫「兗」字。

三古 挑 取 眼 精 眼 精」南史、御覽 五一引、通鑑作「眼 睛

追封 安陸王 「安陸」各本並作「安隆」,孫彪宋書考論云:「隆當作陸。」 按孫說是,今改正

給豐母 月白 米二斛 「母」各本並作「每」,據南史、御覽 一五一引、元龜四 一二改。

門無 此 酣酒 三朝本、毛本、元龜一九六、九一四並作「酣酒」。 北 監 本、 殿 局 本、南史、御

}覽 八 四 四 引 、元龜二九八作「酣 法」。 張元濟校勘記云:「作酒是,作法 誤。

二 十 使持 郡 祇 年 · 卽 諸 五. 節 軍 州 本 年爲 事、 號都 都 缺 督 征 都督南兗徐青冀幽六州 南 督南 州 北 兗 將 徐克青冀幽六州諸軍 竞徐竞 軍、 據江夏文獻王義恭傳:「元 開 府儀 青冀 幽六州諸軍 同三司、南 諸軍 事、征虜將 事征 兗州 事、 刺 嘉 北大將 南兗州 史。」臨川烈武王道規傳子義慶附 九 年 軍、開府儀 軍 刺 徴 開 史。 爲 府 都督 儀 南平穆王鑠傳:「元凶 同三司、南兗州 同三司 南 **兗徐** 南 克青冀幽六 兗 州 刺 刺 史。」 史 傳:元嘉 弑 州 疑 立 六州 豫州 以 此 數 徐 之梁 十七七 鑠 之 爲

宋書卷六十二

列傳第二十二

羊欣 張敷 王微

羊欣字敬元,泰山南城人也。 曾祖忱,晉徐州刺史。 祖權,黃門郎。 父不疑, 桂陽太

守。

門,不復進仕。會稽王世子元顯每使欣書,常辭不奉命,元顯怒,乃以爲其後軍府舍人。 然後見之。 職本用寒人,欣意貌恬然,不以高卑見色,論者稱焉。 幅而去。欣本工書,因此彌善。 年十二,時王獻之爲吳興太守,甚知愛之。獻之嘗夏月入縣,欣著新絹帬晝寢,獻之書帬數 欣少靖默,無競於人,美言笑,善容止。汎覽經籍,尤長隸書。不疑初爲鳥程令,欣時 時混族子靈運在坐,退告族兄瞻曰:「望蔡見羊欣,遂易衣改席。」 起家輔國參軍,府解還家。 欣嘗詣領軍將軍謝混,混拂席改服, 隆安中, 朝廷漸亂, 欣由此益知 於優游 此 私

列傳第

=

+ =

羊欣

肱,方此爲輕也。」於拜職少日,稱病自免,屏居里巷,十餘年不出。 玄覺其此意,愈重之,以爲楚臺殿中郎。 桓玄輔政,領平西將軍,以欣爲平西參軍,仍轉主簿,參預機要。 謂曰:「尚書政事之本,殿中禮樂所出。 欣欲自疏,時漏密事, 卿昔處股

稱病篤自兔歸。除中散大夫。 重之,以爲新安太守,前後凡十三年,游玩山水,甚得適性。轉在義興,非其好也。頃之,又 在郡四年,簡惠著稱。除臨川王義慶輔國長史,廬陵王義眞車騎諮議參軍,並不就。 恨不識之。」即板欣補右將軍劉藩司馬,轉長史,中軍將軍道憐諮議參軍。 義熙中,弟徽被遇於高祖,高祖謂諮議參軍鄭鮮之曰:「羊徽一時美器,世論猶在兄後, 出爲新安太守。 太祖

六關。 元嘉十九年,卒, 三 時年七十三。子俊,早卒。 堪拜伏,辭不朝覲,高祖、太祖並恨不識之。自非尋省近親,不妄行詣,行必由城外,未嘗入 素好黃老,常手自書章,有病不服藥,飲符水而已。兼善醫術,撰藥方十卷。〔〕〕欣以不

後爲太祖西中郎長史、河東太守。子瞻,元嘉末爲世祖南中郎長史、尋陽太守,卒官。 弟徽字敬猷,世譽多欣。高祖鎭京口,以爲記室參軍掌事。八年,遷中書郎,直西省。

之分,敷雖童蒙,便有思慕之色。年十許歲, 張敷字景胤,吳郡人,吳興太守邵子也。 求母遺物, 生而 母沒。 而散施已盡,唯得一 年數歲,問母所在,家人告以死生 **畫扇,乃緘**

之,每至感思,輒開笥流涕。見從母,常悲感哽咽。

軍,數見接引。 性整貴,風韻甚高,好讀 永初初,遷秘書郎。 玄書,兼屬文論。 嘗在省直,中書令傅亮貴宿權要,聞其好學,過候之,敷 少有盛名。 高祖見而愛之,以爲世子中軍參

臥不卽起,亮怪而

去

見發遣,會敷赴假還江陵,太祖謂沙門曰:「張敷應西,當令相載。」及敷辭,上謂曰:「撫軍須 江夏王義恭鎭江陵,以爲撫軍功曹, 意懷道人,卿可以後騙載之,道中可得言晤。」敷不奉旨,曰:「臣性不耐雜。」上甚不說。 **父邵爲湘州,去官侍從。** 太祖版爲西中郎參軍。 轉記室參軍。時義恭就太祖求 元嘉初,爲員外散騎侍郎,祕書丞 一學義沙門,比沙門求

牀,去壁三四尺,二客就席,酬接甚歡,旣而 遇 相容,便不如不往。 如此。 遷正 善持音儀、盡詳緩之致,與人別、執手曰:「念相聞。」餘響久之不絕。 員 郎。 中書舍人秋當、周赳並管要務,「三以敷同省名家,欲詣之。 詎可輕往邪? | 當曰:「吾等並已員外郎矣,何憂不得共坐。」 敷先設二 :呼左右曰:「移我遠客。」|赳等失色而 赳曰:「彼若不 去。 張氏後進至 其自摽

列

今慕之,其源流起自敷也。

年,奄爲長往,聞問悼心,有兼恒痛。足下門敎敦至,兼實家寶,一旦喪失,何可爲懷。」其見 **耆面以來,便申忘年之好,比雖艱隔成阻,而情問無睽。 薄莫之人,冀其方見慰說,豈謂中** 時年四十一。 譬之,輒更感慟,絕而復續。 茂度曰:「我冀譬汝有益,但更甚耳。」自是不復往。 省,自發都至吳興成服,凡十餘日,始進水漿。葬畢不進鹽菜,遂毁瘠成疾。世父茂度每止 重如此。 遷黃門侍郎,始興王濬後軍長史,司徒左長史。 琅邪顏延之書弔茂度曰:「賢弟子少履貞規,長懷理要,清風素氣,得之天然。 未拜,父在吳興亡,報以疾篤,敷往奔 未朞而卒,

在追甄,於以報美。可追贈侍中。」於是改其所居稱爲孝張里。 世祖卽位,詔曰:「司徒故左長史張敷,貞心簡立,幼樹風規。 無子。 居哀毀滅,孝道淳至,宜

王微字景玄,琅邪臨沂人,太保弘弟子也。父孺,光祿大夫。

衡陽王義季右軍參軍,並不就。起家司徒祭酒,轉主簿,始興王濬後軍功曹記室參軍,太子 少好學,無不通覽,善屬文,能書畫,兼解音律、醫方、陰陽術數。年十六,州舉秀才,

仍除中書侍 中舍人,始興王友。 郎,又擬南琅 **父憂去官。** 邪、義興太守,並固 服闋,除南平王鑠右軍諮議參軍。 辭。吏部尚書江湛 舉微為吏部郎 微素無宦情,稱疾不就。 微 與湛 書日

承明, 珠, 知君何 路,若不憊疾,非性 此。 選,將以靖國,不亦益囂乎。 臣,東都 怪,君多識前世之載籍,至三天植何其易傾。至三弟受海內駭笑,不過如 自可 弟 且弟曠違兄姊,迄將十載,姊時歸來,終不任輿 署乎金馬, 以自解於良史邪。 心病亂度,非但蹇躄而已,此處朝野所共知。 賤 1 士,云上窮範馳之御,下盡詭遇之能,兼鱗雜襲者,必不乏於世 肆 巫祠 皆明察之官,又賢於管庫之末。 之間,馬棧牛口之下, 開而何。 今雖王道鴻鬯,或有激朗於天表,必欲潛淵 比君曰 書云「任官維賢才」。 表裏,無假 賞劇孟於博徒,拔卜式於芻牧。 長目飛耳也。云 而君擢 何爲劫勒通家疾病人, 、曳入閣 騶騎忽扣 士先疹廢,芃芃棫樸,似不 兄守金城,永不堪扶抱就 蓽門,^[四] 閭里咸以爲 探寶,[t] 傾海 燕石禿鶩邪,未 塵穢 矣。 亦有 難堪 西戎 且 廬 祥 如 於 孤

者,豈欲自比衞賜邪? 之常刑。 實,故棄而不齒。 常謂生遭太公,將即華士之戮,幸遇管叔, 彼二三英賢,足為曉治 諸葛 君欲高數山公,而以仲容見處,徒以搥提禮學,本不參選,鄙夫 孔明云「來敏 與否? 亂郡,過於 恐君逢此時, 必蒙解儒之養。[10]光武以馮衍 孔文舉。」況無古人之才 或亦不発高 閣, 乃復假名不 概,敢干周、漢 才浮其 知 己

列

龍, 極,終不能舉其契,爲之辭矣。子將明魂,必靈咍於蒿里,曰曰汝、潁餘彦,將拂衣而不 者,君必居一焉。 賜,舉未以己勞,則商販之事,又連所不忍聞也。 瞻彼,固不任下走,未知新沓何如州陵耳。而作不師古,坐亂官政,誣飾 如復託以眞素者,又不宜居華留名,有害風俗。 浮華一開,風俗或從此而爽。 鬼谷以揣情爲最難,何君忖度之輕謬。 雖假天口於齊駢,藉鬼說於周季,公孫碎毛髮之文,莊生縱 **豈謂不肖易擢,貪者可誘,○□〕凡此數** 君亦不至期人如此, 1 蚯蚓, 若交 以爲 冀招神 漭瀁之

千載知弟不詐諼耳。 舉可陋,其事不經,非獨搢紳者不道,僕妾皆將笑之。忽忽不樂,自知壽不得長,且使 之意,自於此都盡。君平公云:「生我名者殺我身。」天爵且猶滅名,安用吏部郎哉 書虎爪板也。 今有此書,非敢叨擬中散,誠不能顧影負心,純盜虛聲,所以綿絡累紙, 成童便往來居舍,晨省復經周旋,加有諸甥,亦何得頓絕慶吊。 本不營尚 然生平 ! 共

袁淑見之,謂爲訴屈,微因此又與從弟僧綽書曰 微旣爲始興王濬府吏,濬數相存慰,微奉答牋書,輒飾以辭采。 微爲文古甚,頗抑揚,

家門舊風,何爲一旦落漠至此,當局苦迷,將不然邪! 詎容都不先聞,或可不知耳。 吾雖無人鑒,要是早知弟,每共宴語,前言何嘗不以止足爲貴。 且持盈畏滿,自是

難可 爲和 視日 舊恩 爾尸居,無方待化。 冠冑胤,如吾者甚多,才能固不足道,唯不傾側溢詐,士頗以此容之。 無所因,反覆思之,了不能解。 羹, 所及 詳 偷存,口三盡於大布糲栗,半夕安寢,便以自度,血氣盈虛,不復稍道,
口三長以大散 料。 弟爲不見之邪?疾廢居然,且事一己,上不足敗俗傷化,下不至毁辱家門,泊 ,每蒙寬假。 疹疾日滋、縱恣益甚,人道所貴,廢不復修。 凡此二三,皆是事實。 吾亦自揆疾疹重侵,難復支振,民生安樂之事,心死久矣。 豈見吾近者諸牋邪,良可怪笑。 吾與弟書,不得家中相欺也。 幸値 !聖明兼容,置之敎外, 至於規矩細行, 州陵此舉,為 所以 且

居非 來盈 以 論 且 相 |文詞不怨思抑揚,則流澹無味。 何 水志, 門,亦不煩獨舉吉也。 非,然魯器齊虛,實宜書紳。 如 吾 哉。 少學作文,又晚節如小 清論 則吾長阨 所排, !不死,終誤盛壯也 便是通辭訴 此輩乃云語勢所至,非其要也。 進,使君公欲民不偸,每加存飾,酬對尊貴,不厭敬恭。 今三署六府之人,誰表裏此內, 儻疑弟豫有 屈邪。 文好古,貴能連類 爾者眞可謂眞素寡矣。 可悲,一往視之,如似多意。 弟無懷居今地,萬物初 其數旦見客小防,自 分, 當見 於素 不

干 ·飾廉隅,秩秩見於面目,所惜者大耳。 江 ·過强 吹拂吾,云是巖穴 人。 巖穴人情所高,吾得當此,則 諸舍闔門皆蒙時私,此旣未易陳道,故常因含 雞鶩變作鳳皇,何爲

列

傳

第

悉怒此言自爾家任兄故能也。 源輩當平此不?飾詐之與直獨,兩不關吾心,又何所耿介。弟自宜以解塞羣賢矣,兼 區區飾吾,何辯致而下英俊。夫奇士必龍居深藏,與蛙蝦爲伍,放勳其猶難之,林宗輩 亦不能兩展其足,妄意珍藏也。 行,自不得出戶,頭不耐風,故不可扶曳。 循檢校迹,不爲虛飾也。作人不阿諛,無緣頭髮見白,稍學諂詐。 不足識也。似不肯睠睠奉牋記,彫琢獻文章,居家近市廛,親戚滿城府,吾猶自知袁陽 此足以闔棺矣。 人之多言也。管子晉賢,乃關人主之輕重,此何容易哉。 又前年優旨,自弟所宣,雖夏后撫辜人,周宣及鰥寡,不足過也。 。正令選官設作此舉,於吾亦無劍戟之傷,所以懃懃畏 家本貧餒,至於惡衣蔬食,設使盜跖居此, 州陵亦自言視明聽聰,而返 且吾何以爲,足不能 語皆

書便覺成,本以當半日相見,吾旣惡勞,不得多語,樞機幸非所長,相見亦不勝讀此書 日日望弟來,屬病終不起,何意向與江書,粗布胸心,無人可寫,比面乃具與弟。

也。 親屬欲見自可示,無急付手。

時論者或云微之見舉,廬江何偃亦豫其議,慮爲微所咎,與書自陳。微報之曰: 卿昔稱吾於義興,吾常謂之見知,然復自怪鄙野,不參風流,未有一介熟悉於事,

何 用 獨 識之也。 近日何見綽送卿書,雖知如戲, 知卿固不能相哀。 苟相哀之未知,何

相期之可論。

復持 諸 兒 二十左右 文賦 人亦 時 尤 此 卿 當 粗 書 擬 少 尤以 笨無 論 議 陶 方復就 ,無所是非,不解 人邪。 玄 此 好,常從博士讀 風,淹雅修暢,自是正始中人。 見議。 觀小說,往來者見牀頭 尙獨 ,愧笑<u>揚子之褒贍,猶恥辭賦</u> 或謂 處卽 言深博,作一段意 小小章句,竟無可得,口吃不能劇讀,遂絕意於尋 日借問,此其本 有數帙書,便言學問,試就 吾眞庸性人耳,自然志操不倍王、樂。 氣 心 鄙薄 也 爲君子,若吾篆刻, 人世,初不敢然。 檢, 菲 當 是以 亦 何 甚 有 毎 哉。 矣。 見世 小 卿 至 乃

也。 養 來 必 於 知 有 春 畫 行,是以 有 此 不 繢 秋 徴 至 數 好詣 令節 蓋 ,故門冬昌朮,隨 於 條,二三 生平好服 躬 亦 朝 人,能忘 親,意 鵙 鵠 自將兩 一諸賢,因復架累,致之高塵,詠之淸壑。 識 在取 上藥,起年十二時病虛耳。 夜 一榮以避權右,宜自 之機,盤紆 三門生,入草采之。 精。 時參進。 世 人 寒溫 糾 便言希仙 紛, 密 相 或記 補,欲 應對 好 吾實倦 心目, 舉 異,矯慕 所撰服 以扶 止,因卷 遊醫部, 護 故 食 兼 不 危 慚 羈 嬴, 方中,粗言之矣。 Щ 瓦礫有 不不 水之愛, 自保,不 頗 見冀白首。 曉 同 和 資,不 家 藥, 頗 能 有罵 勉 往 尤信 敢 其 家 跡 輕 所 之者。 自此 求, 厠 本草 貧乏役 短 金銀也。 皆仿 耳。 始信攝 叉 欲 了,至 性 像 其 由

列

卿旣不可解,立欲便別,且當笑。 復苦心痛,引喉狀如胸中悉腫,甚自憂。 綽大駭歎,便是闔朝見病者。吾本儜人,加疹意惛,一旦聞此,便惶怖矣。 賢,共相哀體,而卿首唱誕言,布之翰墨,萬石之愼,或未然邪。 常人不得作常自處疾苦,正亦臥思已熟,謂有記自論。 而 頃年嬰疾,沉淪無已,區區之情,惕於生存,自恐難復,而先命猥加, 力作此答,無復條貫,貴布所懷,落漠不舉。 既仰天光,不夭庶類,兼望諸 好盡之累,豈其如此。 五六日來, 魂氣褰薾,

治,哀痛僧謙不能已,口思以書告靈曰: 才譽,爲太子舍人,遇疾,微躬自處治,而僧謙服藥失度,遂卒。微深自咎恨,發病不復自 微常住門屋一間,尋書玩古,如此者十餘年。 太祖以其善筮,賜以名蓍。 弟僧謙,亦有

學。自爾日就月將,著名邦黨,方隆夙志,嗣美前賢,何圖一旦冥然長往,酷痛煩寃,心 討測文典,斟酌傳記,寒暑未交,便卓然可述。 吾長病,或有小間,輒稱引前載,不異舊 弟年十五,始居宿於外,不爲察慧之譽,獨沉浮好書,聆琴聞操,輒有過目之能。

不研賞,濁酒忘愁,圖籍相慰,吾所以窮而不憂,實賴此耳。奈何罪酷,榮然獨坐。 尋念平生,裁十年中耳,然非公事,無不相對,一字之書,必共詠讀,**一句之文**,無 憶

如焚裂。

復 戾,見此夭酷,沒於吾手,觸事痛恨。 過,誤云今日何意不來,鍾念懸心,無物能譬。 方欲共營林澤,以送餘年,念茲有 往年散發,極目流涕,吾不舍日夜,又恒慮吾羸病,豈圖奄忽,先歸冥冥。 期,音顏髣髴,觸事歷然,弟今何在, 吾素好醫術,不使弟子得全,又尋思不精,致有枉 **令吾悲窮。** 昔仕京師, 分張六旬耳,其中三 反覆萬慮,無 何 罪

過,念此一條,特復痛酷。

痛酷奈何!吾罪奈何!

然,至於思戀不可懷。 爲 沖和淹通,內有阜白,舉動尺寸,吾每咨之。 人人矯 弟爲 介欲過, (志)奉親孝,事兄順,雖僮僕無所叱咄,可謂君子不失色於人,不失口於人。 宜毎 中和。」道此猶在耳,萬世不復一見,奈何 及聞吾病,肝心寸絕,謂當以幅巾薄葬之事累汝, 常云:「兄文骨氣,可推英麗以自許。 ! 唯十紙手 奈何反相殯 迹, 封拆儼 叉兄

范夫人知禮,求得左率第五兒,○日之廬位有主。 亦其大要。 弟 由來意,謂「婦人雖無子,不宜踐二庭。此風若行,便可家有孝婦」。 劉新婦以刑傷自誓,必留供養,殷太妃感栢舟之節,不奪其志。 此亦何益冥然之痛,爲是存者意耳。 僕射 仲長昌言, 7篤順,

自愒望,今云何得立,自省惛毒,無復人理。比煩冤困憊,不能作刻石文,若靈響有識, 吾窮疾之人,平生意志,弟實知之,端坐向窗,有何慰適,正賴弟耳。 過中 未來,已

列

割嗜好以祈年,今也唯速化耳。吾豈復支,冥冥中竟復云何。 詞理,略道阡陌,萬不寫一。 不得吾文,豈不爲恨。 諸文章,欲收作一集,不知忽忽當辦此不?今已成服,吾臨靈,取常共飮杯,酌自釀酒, 爣意慮不遂謝能思之如狂,Cl+J不知所告訴,明書此數紙, 阿謙!何圖至此!誰復視我,誰復憂我。 弟懷隨、和之寶、未及光 他日寶惜三光, 無復

身安隱素,足以賁茲丘園,惇是薄俗。不幸蚤世,朕甚悼之。可追贈祕書監。」 子。家人遵之。所著文集,傳於世。世祖卽位,詔曰:「微棲志貞深,文行惇洽,生自華宗, 元嘉三十年,卒,時年三十九。日日僧謙卒後四旬而微終。 五尺牀,爲靈二宿便毁。以嘗所彈琴置牀上,何長史來,以琴與之。 遺令薄葬,不設轜族鼓挽之屬,施 何長史者,偃也。

寧有仿像不?寃痛!寃痛

!

耿介,峻節不可輕干。袁淑笑謔之間,而王微弔詞連牘,斯蓋好名之士,欲以身爲珪璋,皦 史臣曰:燕太子吐一言,田先生吞舌而死,安邑令戒屠者,閔仲叔去而之沛。 良由內懷

皦然使塵玷之累,不能加也。

- 撰藥方十卷 海覽七二二作三十卷。隋書經籍志著錄羊中散藥方三十卷。 南史作數十卷。
- 元嘉十九年卒 各本並作「元嘉九年卒」、脱「十」字,據南史補。 建康實錄:「元嘉十九年正月

乙未,中散大夫羊欣卒。」

中書舍人秋當周赳並管要務 「秋當」各本並作「狄當」,據南齊書陸慧曉傳、南齊書倖臣傳改。

- $\overline{}$ 29 __/ 翳騎忽扣蓽門 「騎」各本並作「會」,據远龜八一三改。
- **八六 二** 万五 天植 君多識前世之載籍 何其易傾 「天植」各本並作「天値」,據元龜八一三改。孫彪宋書考論云:「當作天植。管子 各本並脱「籍」字、據元龜八一三補。

曰:天植者,心也。

天植正

`,則不私近親。]

ヘゼリ 必欲潛淵探寶 各本 並作 「探援潛寶」,元龜八一三作「潛淵探寶」。 按「潛淵探寶」與下句「傾

海 求 珠」相對成文,元龜是,今據改。

- 東都 賤 士 賤 士」各本並作「戒士」,據元龜八一三改。
- 比君 日 表裏無假長目飛耳也 「目」各本並作 「因」,據远龜八一三、九〇五改。「比」远龜作

「此」。

列 傳 第 _ + 校 勘 記

- 幸遇管叔必蒙僻儒之養 元龜八一三作「幸遇鮑叔,必蒙管仲之養」。
- 貪者可誘 「可」永樂大典六八三一、元龜八一三、九〇五作「易」。
- 必靈咍於蒿里 「蒿里」各本並作「萬里」,據元龜九〇五改。
- 〔□〕 所以視日偸存 「視」各本並作「解」,據元龜九○五改。
- 不復稍道 三朝本、北監本、殿本「不」字空白、毛本、局本作「冀」。今據远龜九〇五作「不」。道

謂導引。

- 哀痛僧謙不能已 各本並脱「僧」字、據御覽五五五引補。
- **論說補。** 僕射篤順范夫人知禮求得左率第五兒 左衞率。 孫彪朱書考論謂僕射卽王僧達。元嘉三十年,爲尚書左僕射。左率爲王錫,時官太子 錫妻范,見蔡興宗傳。「范夫」疑卽范夫人,脫「人」字。 「范夫人」各本並作「范夫」,脫「人」字,據孫虨宋書考
- [1七] 儻意慮不遂謝能思之如狂 句有脫譌,不可解。
- 元嘉三十年卒時年三十九 朱書考論云:「以江湛爲尚書及下文何偃稱長史參勘之,蓋元嘉三十年卒也。王僧綽二十八年 爲侍中,年二十九,亦三十年卒,年三十一。微爲其兄,年二十九當作年三十九」。按孫說是,今 「三十年」各本並作「二十年」、「三十九」各本並作「二十九」。 孫彪

改正。

宋書卷六十三

列傳第二十三

王華 王曇首 殷景仁 沈演之

華數十,衆乃不疑,由此得免。 急,臺永使華提衣幞隨後,津邏咸疑焉。 泰爲恭所殺。 <u></u>
歐即聚衆應之,以女爲貞烈將軍,以女人爲官屬。 國寶旣死,恭檄廞罷兵。[1] 麼起兵之際, 庶子,司徒左長史。居在吳,晉隆安初,王恭起兵討王國寶,時歐丁母憂在家,恭檄令起兵, 多所誅戮,至是不復得已,因舉兵以討恭爲名。|恭遣劉牢之擊廢,廢敗走,不知所在。長子 王華字子陵,琅邪臨沂人,太保弘從祖弟也。祖薈,衞將軍,會稽內史。父廞,太子中 華時年十三,三五軍中,與歐相失,隨沙門釋曇永逃竄。時牢之搜檢覔華甚 華行遲,永呵駡云:「奴子怠懈,行不及我」」以杖捶

遇赦還吳。 少有志行,以父存亡不測,布衣蔬食不交游,如此十餘年,爲時人所稱美。

列

高祖欲收其才用,乃發廞喪問,使華制服。

被徵 引 復 事史,歷職著稱。 鹵 隨 簿 夾 》,華代 府轉。 甚盛, 轂 服 ,華出入乘牽車,從者不過二三以矯之。 闋,高祖北伐長安,領鎭西將軍、北徐州刺史,辟華爲州主簿,仍轉鎭西主簿,治中從 爲司馬、南郡太守,行府州事。 必是殿下出行。」乃下牽車,立於道側,及邵至乃驚。邵白服登城,為華所糾,坐 太祖 未親政,政事悉委司馬張邵。 太祖鎭江陵,回以爲西中郎主簿,遷諮議參軍,領錄事。 華性尚物,不欲人在己前,邵性豪,每行來常 嘗於城內相逢,華陽不知是邵,謂左右一此 太祖進號鎭西,

均,莫 後任。 廢 主若 太祖 相推伏,不過欲握權自固,以少主仰待耳。 存, 上 即位,以華爲侍中,領驍 入奉大統,以少帝見害,疑不敢下。華建議曰:「羨之等受寄崇重,未容便敢背德, 慮 其將來受禍,致此 殺害。 騎將軍,未拜,轉右 蓋由 毎生情多,回 今日就徵,萬無所慮。」太祖從之,留華總 语將軍 一,侍 寧敢一朝頓懷逆志。 中 如 故 且三人勢

著於幽實之爻。 舉。 甯子先爲 雖 先是,會稽孔甯子爲太祖鎭 復 因 高 革 祖 朩 太尉主簿, 晉師有成,瓜衍作賞,楚乘無入,為賈不賀。 同,損益 有物,求賢審官,未之或 陳損 益 西諮議參軍,以文義見賞, 曰:「隆化之道, 莫先於官得其才; 改。 師 錫僉曰,煥乎欽明 至是爲黃門侍郎, 領步兵校尉。 今舊命惟新, 幽人引領, 枚卜之方,莫若 之誥,拔茅 人愼其 征吉, 韶之

資秩。 賢闢 足而 則隱厚之求,急於刀筆,能事之功,接於德心,以此論才,行之年歲,豈惟政無秕蠹,民庇手 盡美,已備於振綱,武之未盡,或存於理目。雖九官之職,未可備舉,親民之選,尤宜在先。 見,執咎在己,豈容徇物之私。今非以選曹所銓,果於乖謬,衆職所舉,必也惟良,蓋宜使求 賞,失舉任罰。 愚欲使天朝四品官,外及守牧,各舉一人堪為二千石長吏者,以付選官,隨缺敍用,得賢受 已,將使公路日淸,私請漸塞。 其廣塗,考績取其少殿。 自此 ,以還,故當才均以資,資均以地。 宰莅之官,誠曰吏職,然監觀民瘼,翼化宣風, 夫惟帝之難,豈庸識所易,然舉爾所知,非求多人,因百官之明,孰與一識之 若才實拔羣,進宜尙德,治阿之宰,不必計年,免徒之守,豈限 士多心競, 仁必由己, 處士砥自求之節, 仕子藏交馳之

右欲 年,甯子病卒。 王道 甯子 之一平,假高衢 泊船,甯子命去之,曰:「此弑君亭,不可泊也。」華每閑居諷 與華並有富貴之願,自羨之等秉權,日夜構之於太祖。 甯子嘗東歸,至金昌亭,左 三年,誅羡之等,華遷護軍,侍中如 而騁力。」出入逢羨之等,每切齒憤咤,歎曰:「當見太平時不。」元嘉二 故。 詠,常誦 王粲登樓賦 日:「冀

情。

甯子庸微,不識治體,冒昧陳愚,退懼違謬。」

身不飲酒,有燕不之詣。 宋 世 催華 與南陽劉湛不爲飾讓,得官卽拜,以 若宜有論事者,乘車造門,主人出車就之。 此爲常。 華以情事異人,未嘗預宴集,終 及王弘輔政,而弟曇首

爲太祖所任,與華相埓,華嘗謂己力用不盡,每歎息曰「宰相頓有數人,天下何由得治」四 年,卒,時年四十三。追贈散騎常侍、衞將軍。 九年,上思誅羡之之功,追封新建縣侯,食邑

千戶,諡曰宣侯。世祖卽位,配饗太祖廟庭。

封。CKJ後廢帝元徽三年,終上表乞以封還長,許之。齊受禪,國除 子定侯嗣,至官至左衞將軍,卒。子長嗣,太宗泰始二年,坐駡母奪爵,以長弟終紹

華從父弟鴻,五兵尚書,會稽太守。

王曇首、琅邪臨沂人、太保弘少弟也。

內,雍雍如也。 弘答曰:「若但如民,「引門戶何寄。」高祖大笑。」曇首有識局智度,喜慍不見於色,閨門之 彭城,高祖大會戲馬臺,豫坐者皆賦詩,曇首文先成,高祖覽讀,因問弘曰:「卿弟何如卿。」 戎旅。」曇首答曰:「旣從神武之師,自使懦夫有立志。」晦曰:「仁者果有勇。」高祖悅。 公修復洛陽園陵。 幼有業尙,除著作郎,不就。兄弟分財,曇首唯取圖書而已。辟琅邪王大司馬屬,從府 手不執金玉,婦女不得為飾玩,自非祿賜所及,一毫不受於人。 與從弟球俱詣高祖,時謝晦在坐,高祖曰:「此君並膏粱盛德,乃能屈志 行至

太祖 爲冠軍、徐州 刺史,留鎭彭城,以曇首爲府功曹。 太祖鎭江陵,自功曹爲長史,隨

祖入奉 景平 等,平謝晦,曇首及華之力也。 府轉 以致此。」以曇首爲侍中,尋領右衞將軍,領驍騎將軍。以朱容子爲右軍將軍。誅徐羨之 曇首曰:「此乃夏禹所以受天命,我何德以堪之。」 <<!>○ 及卽位,又謂曇首曰:「非宋昌獨見,無 容子抱刀在平乘戶外,不解帶者數旬。旣下在道,有黃龍出負上所乘舟,左右皆失色,上謂 **幷言天人符應,上乃下。** 中, 鎭 西 大統,上及議者皆疑不敢下,曇首與到彦之、從兄華固勸,上猶 有龍見西方,半天騰上,廕五綵雲,京都遠近聚觀,太史奏曰:「西方有天子氣。」太 [長史。 高祖甚知之,謂太祖曰:「王曇首,沈毅有器度, 率府州文武嚴兵自衞,臺所遣百官衆力,不得近部伍 宰相才 未許。 也。 汝 一,中兵參軍朱 曇首又固 毎 事咨之。」

旨,不異單刺。 由 但旣據舊史,日日應有疑却本末,曾無此狀,猶宜反咎其不請白虎幡、銀字棨,致門不時開, .尙書相承之失,亦合糾正。」上特無所問,更立科條。 尚書左丞羊玄保奏免御史中丞傅隆以下,曇首繼啓曰:「旣無墨敕,又闕幡棨,雖稱上 元嘉四年,車駕出北堂,嘗使三更竟開廣莫門,南臺云:「應須白虎幡,銀字棨。」不肯開 元嘉元年、二年,雖有再開門例, 至此乃前事之違。今之守舊,未爲 遷太子詹事,侍中如故 非禮

晦平後,上欲封曇首等,會讌集,舉酒勸之,因拊御牀曰:「此坐非卿兄弟,無復今日。」

列

第二十

Ξ

王

首

公久 相 首固乞吳郡,太祖曰:「豈有欲建大厦而遺其棟梁者哉。賢兄比屢稱疾,固辭州任,將來若 不能奪,故封事遂寢。時兄弘錄尚書事,又爲揚州刺史,曇首爲上所親委,任兼兩宮。 臣等雖得仰憑天光,効其毫露,豈可因國之災,以爲身幸。 時封詔已成,出以示曇首,曇首曰:「近日之事,釁難將成,賴陛下英明速斷,故罪人斯戮。 王 申許者,此處非卿而誰?亦何吳郡之有。」時弘久疾,屢遜位,不許。 義康與弘並錄,意常怏怏,又欲得揚州,形於辭旨。以曇首居中,分其權任,愈不悅。 疾不起,神州詎合臥治。」曇首勸弘減府兵力之半以配義康,自己義康乃悅。 陛下雖欲私臣,當如直史何。」上 義康謂賓客曰「王 彭城

縣侯,邑千戶,諡曰文侯。 是我家衰耳。」追贈左光祿大夫,加散騎常侍,詹事如故。九年,以預誅羨之等謀,追封豫寧 七年,卒。 太祖爲之慟,中書舍人周赳侍側,自己曰:「王家欲衰,賢者先殞。」上曰:「直 世祖卽位,配饗太祖廟庭。子僧綽嗣,別有傳。 少子僧虔,昇明

殷景仁,陳郡長平人也。 曾祖融,晉太常。祖茂,自己散騎常侍、特進、左光祿大夫。父

道裕,蚤亡。

末,爲尙書令。

將軍 議 口不 道燐主簿。 宜令百官舉才,以所薦能否爲黜陟。 景仁少有大成之量,司徒王謐見而以女妻之。 ·談義,深達理體,至於國典朝儀,舊章記注,莫不撰錄,識者知其有當世之志也。 出補衡陽太守,入爲宋世子洗馬,仍轉中書侍郎。 遷宋臺秘書郎,世子中軍參軍,轉主簿,又爲驃騎 初爲劉毅後軍參軍,高祖太尉行參軍 景仁學不爲文,敏有思

祖甚知之,遷太子中庶子

迕違 寵,必 仰 朝 荷 周 舉 !恩榮,階牒推遷,日月頻積,失在饕餮,患不自量。 而奉聞今授,固守愚心者,竊惟殊次之 有不可 了 下 貽 (煌,無 之愆,旣已屢積,寧當徒尙浮采,塵黷天聽。丹情悾款,仰希照察。」詔曰:「景仁退挹之 少帝 歸器望,喉脣之任,非才莫居。三省諸躬,無以克荷,豈可苟順甘榮,不知進退, 即位,入補侍中,累表辭讓,又固陳曰:「臣志幹短弱,歷著出處。 身咎,求之公私,未見其可。顧涯審分,誠難庶幾,踰方越序,易以誠懼。所以俯 改,除黃門侍郞,以申君子之請。」 地寧處。 若惠澤廣流,蘭艾同潤,回改前旨,賜以降階,雖實不敏,敢忘循命。 尋領 射聲。頃之,轉左衞將軍 值皇塗隆泰,身 Ŀ

曇首 八侍中 元嘉三年, 太祖 即位,委遇 劉湛 車 四 人,並時爲 駕 彌 征 厚,俄遷侍 謝 晦 ,司徒 侍中,俱居門下,皆以風力局 中,左 王弘入居中書下省,景仁長直,共掌留任。 衞 如 故。 畤 與侍 中右 幹,冠冕 衞 將 一時,同 軍王華、侍中驍騎 升之美,近代莫 晦平,代到彦 將軍王

列

傳

第

+

Ξ

殷

景

仁

之爲中領軍,侍中如故。

曰:「朕] 所 政 恩 此。 「至德之處,靈啓厥祥,文母俔天,實熙皇祚。 而深。 監之前 之後昆,稱 之所 加 以作孚萬國,貽則後昆。 蘇夫人 太祖 夙 因 代,用否又殊,故惟疑累年,在心未遂。 日月有 , 君 罹偏罰 所 時承秦之弊,儒 心 階緣戚屬,情以事深,寒泉之思,實感聖懷,明詔 生章太后早亡,上奉太后所生蘇氏甚謹。六年, 舉 而行,或容未允。 期,將卜窀穸,便欲粗依春秋以貴之義,式遵二漢推恩之典。 一必書, ,

情事兼常,

每思有以光隆懿戚,

少申罔極之懷。 哲王之所慎。 術蔑如,自君作故,罔或前典,懼 臣豫蒙博逮,謹露庸短。」上 可時共詳論, 體至公者,懸爵賞於無私, 以求其中。 主上聿遵先典,號極徽崇, 蘇夫人奄至傾殂,情禮莫寄,追思遠恨,與事 一從之。 執筆永懷,益增感塞。」景仁議曰: 非盛明所宜軌蹈。晉監二代,朝 **爱發**,詢求 蘇氏卒,車駕親往臨哭,下詔 奉天統者,每屈情 而禮文遺逸,取正無所, 厥中。 以貴之義, 但動: 謹尋漢氏推 藉 以 史筆,傳 禮盡 申制。 於

踰 湛 服 倘 闋 居 ,遷尙書 外任,會王弘 母 憂, 旦居前,意甚憤憤。 僕射。 葬竟, 起爲領軍將軍,固辭。上使綱 、華、曇首 太子詹事 相係亡,景仁引湛還朝,共參政事。 劉湛代爲 知太祖信仗景仁,不可移奪,乃深結司徒彭城王義康,欲倚 領軍,與景仁 紀 代 素善, 7拜,遣 中書舍人周赳輿載還府。 皆被遇於 湛旣 高 入,以景仁位遇本不 祖 俱 以 宰相 許之。 九年,

故。 遣人若劫盜者於外殺之,以爲太祖雖知,當有以,終不能傷至親之愛。 入,入便噬人。」乃稱疾解職,表疏累上,不見許,使停家養病。 宰相之重以傾之。十二年,景仁復遷中書令,護軍、僕射如故。 湛愈忿怒。義康納湛言,毀景仁於太祖 。太祖遇之益隆。 發詔遣黃門侍郞省疾。 尋復以僕射領吏部,護 景仁對親舊歎曰:「引之令 上微聞之,遷景仁於 湛 軍如 議

密,莫有窺其際者。收湛之日,景仁使拂拭衣冠,寢疾旣久, 華林園延賢堂召景仁,猶稱脚疾,小牀輿以就坐,誅討處分,一皆委之。 景仁臥疾者五年,雖不見上,而密表去來,日中以十數, 左右皆不曉其意。其夜,上出 朝政大小,必以問焉,影迹周 西掖門外晉鄱陽主第,以爲護軍府,密邇宮禁,故其計不行。

住 一僕射 日 觀望,忽驚曰:「當閤何得有大樹。」旣而曰:「我誤邪。」疾轉篤。 文成公。 性本寬厚,而忽更苛暴,問左右曰:「今年男婚多?女嫁多?」是冬大雪,景仁乘輿出 代 一義康爲揚州刺史,僕射領吏部如故。 下省,爲州凡月餘卒。 或云見劉湛爲祟。時年五十一,追贈侍中、司空,本官如故。 遣使者授印綬,主簿代拜,拜畢,便覺其情理乖 太祖謂不利在州司,使還 聽

£ 游繾綣, 與 荆 州 刺史衡陽王義季書曰:「殷僕射疾患少日,奄忽不救。 情兼 常痛。 民望國器,遇之爲難,惋歎之深,不能已已。 其識 汝亦同不? 具經遠,奉國竭 往矣如

列

審 卷 六十三 六八四

謨,夙達先照,惠政茂譽,實留民屬。 何」世祖大明五年,行幸經景仁墓,詔曰:「司空文成公景仁德量淹正,風識明允,徽績忠 近瞻丘墳,威往興悼,可遣使致祭。」

久,爲有司所奏。 子道矜, 幼而不慧, 詔曰:「道矜生便有病,無更横疾。 官至太中大夫。 道矜子恒,太宗世爲侍中,度支尚書,屬父疾積 恒因愚習惰,久妨淸序,可降爲散騎

來會。 東軍旣反,二郡强宗侯勱、羅奧聚衆作亂,四面雲合,遂至萬餘人,攻城急。叔任東兵不滿 史,成金墉城,爲鮮卑慕容恪所陷,不屈節見殺,追贈東陽太守。 府司馬,加建威將軍。平蜀之功,亞於元帥,卽本號爲西夷校尉、巴西梓潼郡太守,戍涪城。 少有幹質,初爲揚州主簿,高祖太尉參軍,吳、山陰令,治皆有聲。朱齡石伐蜀,爲齡石建威 五百,推布腹心,衆莫不爲用,出擊大破之,逆黨皆平。高祖討司馬休之,齡石遣叔任率軍 沈演之字臺眞,吳興武康人也。 時高祖領鎭西將軍,命爲司馬。及軍還,以爲揚州別駕從事史。以平濁全涪之功, 高祖元,晉車騎將軍,吳國內史。曾祖勁,冠軍陳祜長 。祖赤黔,廷尉卿。父叔任,

封寧新縣男,食邑四百四十戶。出爲建威將軍、益州刺史,以疾還都。義熙十四年,卒,時

年五十。長子融之,蚤卒。

績。 曹主簿,舉秀才,嘉興令, 學,讀老子日百遍,以義理業尙知名。 倉廩以賑饑民,民有生子者,口賜米一斗,刑獄有疑枉,悉制遣之,百姓蒙賴 升米三百。 徒左西掾,〇四州治中從事史。 復爲司徒主簿。 演之年十一,尚書僕射劉柳見而知之,曰:「此童終爲令器。」家世爲將,而演之折節好 以演之及尚書祠部郎江邃並兼散騎常侍,巡行拯卹,許以便宜從事。 丁母憂。 有能名。 元嘉 起爲武康令,固辭不免,到縣百許日,稱疾去官。 入爲司徒祭酒,南譙王義宣左軍主簿,錢唐令,復有 十二年,東諸郡大水,民人饑饉,吳義興及吳郡之錢唐, 襲父別爵吉陽縣五等侯。 郡命主簿,州辟從事史,西 服闋,除司 演之乃開 政

之,以爲尙書吏部郎。 事不合旨,義康變色曰:「自今而後,我不復相信!」演之與景仁素善,盡心於朝庭,太祖甚嘉 黨,自己欲排廢尚書僕射殷景仁,演之雅仗正義, 轉別駕從事史,領本郡中正,深爲義康所待,故在府州前後十餘年。 與湛等不同,湛因此讒之於義康。 後劉湛、劉斌等結 嘗因 論

衞,望實優顯,此蓋宰相 將軍,與演之對掌禁旅,同參機密。 十七年,義康 出藩,誅湛等,以演之爲右衞將軍。 便坐,卿其勉之。」上欲伐林邑,朝臣不同,唯廣州刺史陸徽與演之 二十年,遷侍中,右衞將軍 景仁尋卒,乃以後軍長史范曄爲 ·如故。 太祖謂 之曰:「侍 左 中 領 衞

列

第

= +

 \equiv

沈

莅。演之可中領軍,曄可太子詹事。」曄懷逆謀,演之覺其有異,言之太祖,曄尋事發伏誅。 遷領國子祭酒,本州大中正,轉吏部尚書,領太子右衞率。雖未爲宰相,任寄不異也。 年,詔曰:「總司戎政,翼贊東朝,惟允之舉,匪賢莫授。侍中領右衞將軍演之,清業貞審,器 參其力,平此遠夷,未足多建茅土。俟廓清京都,自己鳴鸞東岱,不憂河山不開也。」二十一 **贙成上意。及平,賜羣臣黃金、生口、銅器等物,演之所得偏多。上謂之曰:「廟堂之謀,卿** 思沈濟。 右衞將軍曄,才應通敏,理懷淸要。並美彰出內,誠亮在公,能克懋厥猷,樹績所

卒,時年五十三。太祖痛惜之,追贈散騎常侍、金紫光祿大夫,諡曰貞侯。 二十六年,車駕拜京陵,演之以疾不從。上還宮,召見,自勉到坐,出至尚書下省,暴 素有心氣,疾病歷年,上使臥疾治事。性好舉才,申濟屈滯,而謙約自持,上賜女伎,不

演之昔與同使江邃字玄遠,濟陽考城人。頗有文義。官至司徒記室參軍,撰文釋,傳

於世。

,又與弟西陽王文學勃忿閱不睦,坐徙始興郡,勃発官禁錮。 演之子睦,至黃門郎,通直散騎常侍。世祖大明初,坐要引上左右兪欣之訪評殿省內

率,加給事中。時欲北討,使勃還鄉里募人,多受貨賄。上怒,下詔曰:「沈勃琴書藝業,口 勃 好爲文章,善彈琴,能圍棊,而輕薄逐利。 歷尙書殿中郎。 太宗泰始中,爲太子右衞

徙付梁州 門生,競受財貨,少者至萬,多者千金,考計贓物,二百餘萬,便宜明罰敕法, 光 土豪,比 有美稱,而輕躁耽酒,幼多罪愆。 禄 大夫演之昔受深遇,忠績在朝,尋遠矜懷,能無弘律,可徙 門義故,脅說士庶,告索無已。 廢帝 元徽 初,以例 得還。 比奢淫過度,妓女數十,聲酣放縱,無復劑限。 結事阮佃夫、王道隆等,復爲司徒左長史。 又輒聽募將,委役還私,託注病叛,遂有數 勃西垂,令一 以正 思愆悔。」於是 一典刑 百。 自恃吳 爲廢帝所 周 故 旋 興

得行 前 後 勃弟 幹杖,自此始也。 百人。日刊統輕役過差,有司 統,大明 中爲著作佐郎。 奏発。 先是,五省官所給幹僮,不得雜役,太祖世,坐以觅官者, 世祖韶曰:「自頃幹僮,多不祗給,主 可量 聽行杖。」

誅。

順帝卽位,追贈本官

追贈黃門郎。 演之兄融之子暢之,襲寧新 子曄嗣,齊受禪 縣男。 國際。 大明 中,爲海陵王休茂北中郎諮議參軍,爲休茂所

即囊 權 史臣曰 意意 非 元嘉 昔主,居 初,誅滅宰相,蓋 上六之窮爻,當來寵之要轍,顚覆所基,非待他釁, 王華、孔甯子之力也。 彼羣公義雖往 結,恩實 况於廢殺之重,其 今 疎,而任

列

傳

隙易乘乎。 亦未知來禍所止也。 夫殺人而取其璧,不知在己興累,傾物而移其寵,不忌自我難持。 有能戒彼而悟此,則所望於來哲。 若二子永年,

校勘記

- [1] 恭檄廞罷兵 各本並脫「廢罷兵」三字,義不可通,今據南史補,又參校晉書王導傳孫廢附傳。
- (三) 年十三 「十三」各本並作「十二」,據南史改。張森楷校勘記云:「華以元嘉四年卒,年四十三,

逆數至隆安元年,凡三十年。作年十三是。」

- **2** 蓋由 太祖鎭江陵 毎生情多 「鎭」各本並作「征」,按文帝未卽位前,未嘗征江陵,「征」當是「鎭」之譌,今改正。 「每」通鑑宋元嘉元年作「貪」。、元龜七一七此句下注云:「每,貪也。」按漢書賈
- 說傳所載鵬鳥賦有「品庶每生」語。<u>孟康云:「每,</u>貪也。」
- 五五 子定侯嗣 子之名。 錢大昕廿二史考異云:「汪僧綽傳云,王華子新建侯嗣,才劣,位遇亦輕。 「定侯」各本並作「宣侯」,據預史改。 按王華諡宣侯,子不當復諡宣侯。「嗣」,王華 則嗣 乃華子

之名。」

- [《] 以長弟終紹封 「終」南史作「佟」。
- 若但如民 「民」宋本殘葉作「民」,弘治本、北監本、毛本、殿本、局本作「臣」,南史、元龜九一七

作「下官」。涵芬樓影印百衲本朱書時,以各本並作「臣」,謂朱本殘葉作「民」爲誤,謬改爲「臣」。

按時劉裕尚未稱帝、王弘不當稱臣、宋書殘葉稱「民」、南史稱下官,並不誤。 今改回。

- 我何德以堪 之 各本並脫「德以」二字,據藝文類聚九八引、建康實錄補
- ヘルレ 元嘉元年二年雖有再開門例 宋本殘葉脫「元」字,弘治本、北監本、毛本、殿本、 局本脱「元年」
- 二字,據南史、远龜四六〇、御覽三四一引訂補
- 〔10〕但旣據舊史 「史」各本並作「使」,據元龜四六○改。
- 曇首勸弘減府兵力之半以配義康 各本並脱「力」字,據南史補
- 中書舍人周赳侍側 「周赳」各本並作「周起」,據南史、元龜二〇四、四六一改。 按本書般景仁
- 傳、張敷傳均作「周赳」。
- 祖茂 「茂」南史作「茂之」,東晉南北朝人名後之「之」字,有時可省去。
- 除司徒左西掾 「西」字,三朝本空白,北監本、毛本、殿本、局本作「司」,元魏二一三、六六二作

西一。

今據元龜補

口吾 後劉湛劉斌等結黨 「劉斌」各本並作 「劉威」,據南史改。 張森楷校勘記、孫彪宋書考論 並云

劉威當作劉斌。」 按彭城王義康傳有南陽劉斌, 劉湛之族人, 時以爲吳郡太守, 以黨附義康

被殺。

[1七] 坐以発官者前後百人 「百人」上,元龜一九一有「數」字。 二〇 俟廓清京都 各本並脫「俟」字,據元龜四六一補。

宋書卷六十四

列傳第二十四

鄭鮮之 裴松之 何承天

鄭鮮之字道子,滎陽開封人也。 高祖渾、三魏將作大匠。祖襲、三大司農。 **父遵**,倘

書郎。襲初爲江乘令,因居縣境。

沒,屍喪不反,恬子羨仕宦不廢,議者嫌之。桓玄在荆州,使羣僚博議,鮮之議曰: 鮮之下帷讀書,絕交游之務。初爲桓偉輔國主簿。先是,兗州刺史滕恬爲丁零翟遼所

阡陌,皆可略言矣。天可逃乎。而伊尹廢君,君可脅乎。而鬻權見善,忠可愚乎。而 之所乘,遭遇或異。故聖人或就跡以助教,或因跡以成罪,屈申與奪,難可等齊,舉其 名敎大極,忠孝而已,至乎變通抑引,每事輒殊,本而尋之,皆是求心而遺跡。跡 自此以還,殊實而齊聲,異譽而等美者,不可勝言。而欲令百代之下,聖典

所闕,正斯事於一朝,豈可易哉。

或昇 非 晉 證。 異同 教,何所復明 此,孝子已不自同於人倫,有識已審 賢,非滕之諭。 居,終爲社稷 國 丞 可守一故耳。 之大計 爲 則 中朝及 哀之主,無所復言矣。 終 譏者兼在於人,不但獨證其事。 漢、魏以來,記闕其典,尋而得者無幾人。 之情可見矣。 ,朝理務,無譏前哲。 然立言明理,以古證今,當使理厭人情。 身 ,非謂訓範 中興之後,楊臻則七年不除喪,三十餘年不關人事,溫公則見逼於王命,庾左 不著給,高世遠則爲王右軍、何驃騎所勸割,無有如滕之易者也。 制 之臣,非爲榮也。 **若滕以此二賢爲證,則恐人人自賢矣。若不可人人自賢,何可獨許其** 於其間哉。 夫聖人立教,猶云「有禮無時,君子不行」。有禮無時,政以事有變通,不 然無譏前哲者,厭情之謂也。 人倫,盡於此 通滕者則以無譏爲證,塞滕者則以隱處爲美。折其 及至永嘉大亂之後,王敦復申康關之制於 文皇帝以東關之役,尸骸不反者,制其子弟,不廢 鮑勛蹇諤魏朝,亡身爲效,觀其志非貪爵也。 也。 其可否矣。 如滕羨情事者,或終身隱處,不關人事。 若其不爾,居宗輔物者,但當 若王陵之母,見烹於楚,陵不退身窮 中 興,原 若 婚宣。 卽 兩中,則 至乎大 聖 凡此二 此是爲 以線麻 人之 明

何以言之?

父讎明不同戴天日,而爲國不可許復讎,此自以法奪情,卽是東關、永

不可仕之理 嘉之喻也。 復讎矣。 文皇帝無所立制於東關,王敦無所明之於中興。 ,而雜以情譏,謂宜在貶裁耳。 何妨綜理王務者, 布衣以處之。 若多引前事以爲通證, 則孝子可顧法而不 明教者自謂世非橫流,凡士君子之徒,無 每至斯會,輒發之於宰物,

是心可不喻乎。

平。 乎。若其不然,則工進無欣,何足貴於千載之上邪。 然,天下之才,將無所理。滕但當盡陟岵之哀,擬不仕者之心,何爲證喻前人,以自通 疑以自居乎。所謂柳下惠則可,我則不可也。 餘力,則國可至乎亡,家可至乎滅。當斯時也,匹婦猶亡其身,況大丈夫哉。 且名為大才之所假,而小才之所榮,榮與假乘常,已有慚德,無欣工進,何有情事 且 |夫求理當先以遠大,若滄海橫流,家國同其淪溺,若不仕也,則人有餘力。 人有 苟許小才榮其位,則滕不當顧常 旣其不

亡身致命之仕,以此而不盡。何斯言之過與。夫忠烈之情,初無計而後動。若計而後 况滕賴前人,而當必通乎。若人皆仕,未知斯事可俟後聖與不。況仕與不仕,各有其 秦以郡縣治天下,莫之能變,漢文除肉刑,莫之能復。彼聖人之爲法,猶見改於後王, 人,而不仕之所引,每感三年之下。見議者弘通情紀,每傍中庸,又云若許譏滕,則恐 且有生之所宗者聖人,聖人之爲敎者禮法,即心而言,則聖人之法,不可改也。而

動,則 自內 或 親,是家國之罪人耳,何所而 名教翼其子弟, 憲無負 ,或懼法於外,復有 懼 法 於滕恬,則羨之通塞,自是名教之所及,豈是勸沮之本乎。 不 ·盡命。 而子弟不致力於所天。不致力於所天,則 若有不盡, 踟蹰顧望之地邪!若有功不賞,有罪不誅,可致斯喩耳。 稱乎。 則國有常法。 夫恩宥十世,非不隆也。 故古人軍敗於外, 王經忠不能救主,孝不 功高賞 而家誅 厚,非不報 於內。 也。 苟忠發 顧 無有 其

謂數 忠孝之所爲,便可許殺兒葬母後園乎。不可明矣。 藥,見責鄉間;阮咸居哀,騎驢偸婢,身處 則 此 園,言而 且 是 |賢聖抑引,皆是究其始終,定其才行。 (衞生発害, 非爲榮也。 《夷齊於奭、望,子房於四人,亦無所復措其言矣。 而推,天下之正義,終自傳而不沒,何爲發斯歎哉。若以時非上皇,便不足復 公之力。 議 者又 身登宦,所以免責,以其孝 以唐虞邈矣,孰知所歸,尋言求意,將所負者多乎。 魏國將建,荀令君正色異議,董昭不得枕蘇則之膝,賈充受辱 滕今生 無所衞, 也。 王朝。 日 故雖事有驚 鞭塞已冥, 義安在乎。 磾 殺兒 豈可以阮獲通於前世,便無疑於後乎。 至於陳平默順避 無譏,以其 既其不可,便當究定滕之才行,無 俗, 而 理 忠也。 後漢亂而不亡,前史猶 必 昔陳壽在 獲 禍, 今豊 申。 以權濟屈,皆 郤詵 可以二事是 喪, 於庾純。以 言多者, 葬 使婢丸 母後

所多辯也。

古人,非議所及。 滕 非下官鄉 親,又不周旋,才能非所能悉。 若是士流,故謂宜如子夏受曾參之詞,可謂善矣,而子夏無不孝之稱 若以滕謀能決敵,才能周用,此自追蹤

也。 意之所懷,都盡於此,自非名理,何緣多其往復;如其折中,裁之居宗。

美,居以端右,四雖未足舒其采章,升庸以漸,差可以位擬人。 以上請,然自退之志,未獲暫申,夙夜懷冰,敢忘其懼。 能 讓,晉國以之獲寧。 桓偉進號安西,轉補功曹,舉陳郡謝絢自代,曰:「蓋聞知賢弗推,臧文所以竊位, 鮮之猥承人乏,謬蒙過眷,旣恩以義隆,遂再叨 伏見行 參軍謝絢,清悟審 請乞愚短,甘充下列,授爲 非服。 知進之難, 正,理懷 宣子 屢 通

賢牧,實副羣望。」 任居次相,旣殺之非己,無緣生之自由。又奏之於先,而弗請於後,閩外出疆,非此之謂。 開牋,遂盜發密事,依法藥市,奏報行刑,而毅以道盛身有侯爵,輒復停宥。 不屈意於毅,毅甚恨焉。義熙六年,鮮之使治書侍御史丘洹奏彈毅曰:「上言傳 阿 强貴,明憲直繩,甚得司直之體。外甥劉毅,權重當時,朝野莫不 ·鮮之於||毅舅甥,制不相糾,臣請免||毅官。」 詔無所問 入爲員外散騎侍郎,司徒左西屬,大司馬琅邪王錄事參軍,仍遷御史中丞。 歸附,鮮之盡 核毅 詔 勳德光重, 性剛直,不 心高 羅道盛 旭 獨 輒

時 新制 長 更以父母疾去官,禁錮三年。 山陰令沈叔任父疾去職,鮮之因此上議曰 「夫

以上父母沒者,墳墓崩毁及疾病族屬輒去,並不禁錮。 母之疾,至而加以罪名,悖義疾理,莫此爲大。 事有 非所防,所以爲其制者,莅官不久,則奔競互生,故杜其欲速之情,以申考績之實。 當以去官之人,或容詭託之事。詭託之事,誠或有之,豈可虧天下之大敎,以末傷本者乎。 且設法蓋以衆苞寡,而不以寡違衆,況防杜去官而塞孝愛之實。且人情趨於榮利,辭官本 相權,故制有與奪,此有所屈,而彼有所申。 謂宜從舊,於義爲允。」從之。於是自二品 未有理無所明,事無所獲,而爲永制者也。 今省父

比時言論、諸賢多見寬容、唯鄭不爾、獨能盡人之意、甚以此感之。」時人謂爲「格佞」。 辭窮理屈,然後置之。 高祖或有時慚恧,變色動容,旣而謂人曰:「我本無術學,言義尤淺。 爲宰相,頗慕風流,時或言論,人皆依違之,不敢難也。鮮之難必切至,未嘗寬假,要須高祖 相續。毅甚不平,謂之曰:「此鄭君何爲者」」無復甥舅之禮。高祖少事戎旅,不經涉學,及 五子盡黑,毅意色大惡,謂高祖曰:「知公不以大坐席與人」」鮮之大喜,徒跣繞牀大叫,聲聲 得其半,積錢隱人,殼呼高祖倂之。先擲得雉,高祖甚不說,良久乃答之。四坐傾矚,旣擲, 劉毅當鎭江陵,高祖會於江寧,朝士畢集。毅素好摴蒱,於是會戲。 高祖與毅斂局,各

伐,以爲右長史。鮮之曾祖墓在開封,相去三百里,乞求拜省,高祖以騎送之。宋國初建, 自中丞轉司徒左長史,太尉諮議參軍,俄而補侍中,復爲太尉諮議。十二年,高祖北

轉奉常。

斯。 是 致。 將 威 無 況 往 顒 不 有 無賴 禍 年西 傾傾 來 所 偏 敢 長 事 驅 措 漢 故 師 叉 乘 佛 注 永 聞 ,致外 反 失 高 区 征 勝過陝,遠懾 更 其 佛 . 輿駕,忽聞遠伐 不 律, 身 慝 意 覆 處處大水, **廣陷關中,高祖復欲北討,行意甚盛。** 劉 ·敢動。 實 困 思惟,愚謂 鍾 有 無虧 見其未易 平城 然臣 凡 敗 危殆,前 順 傷。 於 若 而 愚見,竊 呂后 廟堂 大威 **」興駕** 加遠師 撫之, 房聞 不 若 年 不不 之上 受匈 造洛 故也。 煩殿 劫盜破 1興駕 測 民 殿 有 則 者 奴 敝 下親 師之深淺, 所 下 而 百 頓洛,則 反,凶 邪。 之辱 今盡 懷。 親 姓思安,違 ,敗散,自然之理 廣州 御 征 魏武 卽 小 用 六軍,必謂 虜凶狡情狀可見,自關 醜 之事 劫。 人士 兵之算,事從屈 不足上勞聖躬。 更生揣量之心,必啓邊戎之患, 必以殿下 軍敗 其所 實, 都 西 I虜或 盡 非敗 赤 願 鮮之上表諫曰:「伏思聖略深遠, 見伐, 壁。宣 大 為河、洛之患,今正 三吳 必 殿下 之謂 申 為 當重兵守潼關,「以」其勢然 申,遣師撲討, 威靈, 心腹 武 亂 在彭城, 如 唯 此, 喪師 矣。 中再敗,皆是帥師違律,非是 龄 之內,諸縣屢敗, 未還, 則進退之機,宜 古人 石 枋 劫 等 頭 盗破 所以救其煩 可 神 人情恐懼,事 念耳。 一宜通 而南夏淸晏, 武 諸縣,事 此旣必 之功,一 好 若行 北 皆由 然。 在熟慮 虜 非 穢,正在 也。 臣之愚管 也 無 偶爾、皆 叉可推 則 勞役所 賊方 江 所損 河 或 速 於 懼 陵 內 頣 賊

安。

河南安,

則濟

泗

靜。

伏

願

聖鑑察臣

愚懷。」

殿 隱 家飲 厚篤 高 實 祖 朝 人,贈卹 踐 貴畢至,唯不召鮮之。 阼 ,遷太常,都官尙書。鮮之爲人通率,在高祖坐,言無所隱,時人甚憚焉。 親故。 性好游行,命駕或不 坐定,謂羣臣曰:「鄭鮮之必當自來。」俄而外啓:「尚書鮮 知 所適,隨御者所之。 此。 尤爲 高祖所狎,上嘗於 內 而

年六十四。 出 爲 豫章 永初 太守,秩中二千石。 二年,出爲丹陽 追贈散騎常侍、金紫光 尹, 復入爲都官尚書,加散騎常侍。 元嘉三年,王弘入爲相,舉鮮之爲尚書右僕射。 祿大夫。 文集傳於世。 以從征功,封龍陽縣五等子。 四年,卒,時

之詣

神虎門求

啓事。」「も

高祖大笑引入,其被親

遇 如

子膾,位至尚書郎,始興太守。「公」

裴松 之字世期, 河東聞喜 人也。 祖昧,光祿大夫。 父珪,正 員 外郎

博覽墳

籍,立身簡

素。

年二

十,拜殿中

·將軍。

此 官

直

松之年八

在江 左右 陵, ,晉孝武 欲得 松之 太元 歲,學通論語、毛詩。 西上,除新野太守,以事難 中革選名家以參顧問,始用 不 琅邪 行。 王茂之、 拜員外散騎侍郎。 會稽 謝賴 皆南 義熙初 北之望。 爲吳興故 舅 庾 鄣 楷

令,在縣

有績。

入爲尚書祠部郎

華煩 吏,必 以允 之。 用 費,又不 顯 著 庶 已久,是以孔 應茲典。 松之以世立私碑,有乖事實,上表陳之曰:「碑銘之作,以明示後昆, 爲 ,敷化所莅,惠訓融遠,述詠所寄,有賴鐫勒, 可 建立 口 以 稱。不加禁裁,其敞無已。」以爲「諸欲立碑者,宜悉令言上,爲朝議所許 防 大者 遏 勒銘 無 悝之銘,行是人非,蔡邕制文,每有愧色。 道 一徵,顯彰茂實,使百世之下,知其不虛,則義信於仰止,道字於來葉」。由 寡取信之實, **「勳光遠,**[4] 世所宗推,其次節行高妙, 刊石成虚偽之常, 眞假相蒙, 殆使合美者不貴, 但論 非斯族也, 而自時厥後,其流彌 遺烈可紀。 則幾乎僭黷矣。 自非殊功異德, 若乃亮 「采登庸, 多 俗 一,預 敝 然後 偽 其功 有 聽 臣 無

宋國 ||陵 洗 內 馬 史 初 高 與 建,毛德祖 祖 、殷景 徵 北 爲 伐,領 國 仁 子博 . 同, 使 司州刺史,以松之爲州主簿,轉治中從事史。 洛陽 可令知之。」于時議立五廟樂, 土 。」高 祖 敕之曰:「三」「裴松之廊廟之才,不宜久尸邊務,今召爲世子 松之以妃臧氏廟樂亦宜與四廟同。 既克洛陽、「松之居州行事 除零

是並

斷。[10]

掾 徒 主 孔 簿 邈 太 龎 使 祖 遵使 揚州、三尚書三公郎 元 嘉三年,誅司 南兗州,前 徒徐羨之等,分遣 尚書右丞 陸子眞 孔默使南北二豫州、二三無軍 く二言 起部 大使,巡行天下。 甄 法崇使 荆州 通直散騎常侍袁渝、司 ·參軍 員 外 王歆 散騎 之使徐 常侍范 州 , 冗從僕 徒左 司 西

哉勗 有存省之禮,聘覜之規。所以觀民立政,命事考績,上下偕通,遐邇咸被,故能 無惰 俗得失,一依周典,每各爲書,還具條奏,俾朕昭然,若親覽焉。大夫君子,其各悉心敬事, 親 征之禮,廢而未修,眷彼氓庶,自己無忘攸恤。自己今使兼散騎常侍渝等申令四方,周行郡邑, 謬 風 都尉、奉朝請潘思先使寧州、並兼散騎常侍。 外散騎常侍李耽之使廣州,郎中殷斌使梁州 射 歷遠年。),未獲具聞。豈誠素弗孚,使羣心莫盡,納隍之愧,在予一人。以歲時多難,王道未壹,卜 車宗使靑、兗州、松之使湘州、尚書殿中郎阮長之使雍州、前竟陵太守殷道鸞使益州,員 周偽, 告厲違和,水旱傷業。 雖躬勤庶事,[lk]思弘攸宜,而機務惟殷,顧循多闕, 見刺史二千石官長,申述至誠,廣詢治要,觀察吏政,訪求民隱,旌舉操行,存問所疾。 乃力。 之,稱朕意焉。」 **朕以寡闇,屬承洪業,夤畏在位,昧于治道,夕惕惟憂,如臨淵谷。** 其有咨謀遠圖,謹言中誠,陳之使者,無或隱遺。 方將敬納良規,以補其闕。 勉 、南秦州、前員外散騎侍郎阮 班宣詔書曰:「昔王者巡功、羣后述 園客使交州,駙馬 懼 功昭 國俗 職,不然則 長 陵頹,民 政刑乖 世 一,道

陛下 文思 ·神叡玄通,道契曠代,冕旒華堂,垂心八表。咨敬敷之未純,慮明揚之靡暢。 在躬 松之反使奏曰:「臣聞天道以下濟光明,君德以廣運爲極。古先哲后,因心溥被, 則 時雍自洽,禮行江漢,而美化斯遠。故能垂大哉之休詠,廓造周之盛則。 清問下 是以 伏惟

化, 載 禮俗得失, 民,哀此鰥寡,渙焉大號,周爰四達。 者美之。 咸說,莫不 黜陟無序,搜揚寡聞,慚懼屛營,不知所措。 時,於是乎在。 謳吟踊躍,式銘皇風。 依周典,每各爲書,還具條奏。 臣謬蒙銓任,忝 或有扶老攜幼, 厠顯列, 猥以短乏, 思純八表, 無以宣暢聖旨, 遠猷形於雅、誥,惠訓播乎遐陬。 謹依事爲書以繫之後。」松之甚得奉使之義,論 奉二十四條,謹隨事爲牒。 稱歡路左,誠由亭毒旣流,故忘其自至,千 是故率土仰詠,重譯 伏見癸卯詔書 肅 明 風

松之所著文論及晉紀,駰注司馬遷史記,並行於世 大夫,博士 復領二州大中正。 上。上善之,曰:「此爲不朽矣。」出爲永嘉太守,勤恤百姓,吏民便之。入補通直爲常侍,曰之 轉中 ·書侍郎、司冀二州大中正。 如 故。 續 尋出爲南琅邪太守。 何承 天國史,未及撰述,二十八年, 上使注陳壽三國志,松之鳩集傳記,增廣異聞,旣 十四年致仕,拜中散大 卒, 時年八十。 夫, 尋領國子博士, 子駰,南中 郎參軍 進 成奏 太中

博學,故承天 何承天,東海 幼 漸 郯 訓 人也。 義,儒史百家,莫不該覽。 從祖倫,晉右 衞將軍。 叔父脟爲益陽令,隨肹之官。 承天五歲失父,母徐氏,廣之姊也, 聰明

列

未已, 滿 誤 令,尋去職還都。 張 公中直帥 淡 釋 意 之劾 隆安 在 爲寧蠻校尉、尋陽太守、請爲司馬。 解職還益陽。 射鳥,非有 四 以 ,雖不傷人,處法棄市。 年,南蠻 犯蹕,罪止罰金。 心於中人。 撫軍將軍劉毅鎭姑孰 校尉桓偉命爲參軍。 義旗 初, 何者? 長沙公陶延壽 按律過誤傷人、三歲刑、況不傷乎。 承天議曰:「獄貴情斷,疑則從輕。 明其無心於驚馬 ,版爲行 尋去職。 時殷仲堪、 以爲其輔 2參軍。 桓玄等互舉 國府 也。 毅嘗出行,而 參軍, 故不以乘輿之重,加以 兵以 遣 微罰可也。」出補宛陵令。 通敬於高 鄢陵縣史陳滿 昔驚漢文帝乘輿馬者, 向 朝 廷, 祖 承天懼 、異制。 因 射 除 鳥 瀏 詞解難 箭 陽

也。」除 陽, 入石 問 承 宋臺 頭 天 高 祖 曰:「公今行濟否云何。」承天曰:「不憂西不時判,〔三〕別有一慮耳。 太學博士。 建、召 甚脫爾,今還,宜加重複。」穆之曰:「非君不聞此言。頃日 以 爲 太尉行參軍。 爲 尙 書祠部郎,與傅亮 義熙十一年,爲世子征虜參軍,轉西中郎 高祖討劉毅,留諸葛長民爲監軍。 共撰朝儀。 永初 末,補南臺治書侍御史。 中軍參軍, 長民密懷異志,劉穆之屛人 願丹徒劉郎,恐不 錢唐令。 ' 公昔年自左里 高 復可 祖 在 得 還

當 法云 死 ,謂違犯敎令,敬恭有虧,父母欲殺,皆許之。 謝 承 晦 鎭 議 江 陵 日 :「被府宣令,普議 ,請爲南蠻長 史。 時有 尹嘉 尹嘉 大辟 事,稱法 者,家貧,母熊自以 其所告惟取信於所求而許之。 吏葛滕籤,母告子不孝,欲殺者許之。 身貼錢,爲嘉償責。 謹尋事原

條。 判,值赦並免。 赦熊之愆,以明子隱之宜。 恭之節,於飢寒之隸,誠非罰疑從輕,寧失有罪之謂 死,中学所以垂化。 之,非隨所求之謂。 嘉所存者大,理在難申, 母辭自求質錢,爲子還責。 始以不 言情則 [母爲子隱,語敬則禮所不及。 孝爲刻,終於和 則蕭亭雖陋,可比德於盛明, 但明教爱發, 嘉雖 **虧犯教義,**而熊無請殺之辭。 賣結 矜其愚蔽。 刑,倚旁雨端,母子俱罪,滕籤 也。 夫明德愼罰,文王所以恤 今捨乞宥之評,依請殺之條,賣敬 愚以謂降嘉之死,以普春澤之恩。 豚魚微物,不獨遺於今化。」事未 熊求所以生之而 法文,爲 一下,議 今殺 非 獄 其 緩

至馬 便討。 順 道產去職還江陵,晦將殺之,承天盡力營救,皆得全免。 養陽以出北境,其次也。」晦良久曰:「荆楚用武之國,兵力有餘,且當決戰,走不晚也。」使承 晦問承天曰:「若果爾,卿令我云何。」承天曰:「以王者之重,舉天下以攻一州,大小旣殊,逆 天造立表檄。 又異,境外求全,上計也。其次以腹心領兵戍於義陽,將軍 頭,承天自詣歸罪,彥之以其有誠,宥之,使行南蠻府事 晦進號衞將軍,轉諮議參軍,領記室。一元嘉三年,晦將見討,其弟黃門郎瞻密信 時邵兄茂度爲益州,與晦素善,故晦止不遣兵。 晦以湘州刺史張邵必不同己,欲遣千人襲之,承天以爲邵意趨未 前益州刺史蕭摹之、前巴西太守劉 晦既下,承天留府不從。及到意之 ·率衆於夏口一戰,若敗,即 可知,不宜 報之, 趨

存,制 見官奏之。 謂代公等母子 道。 親,不合補讁。 大 殿 經歲時,盛明之世,事從簡易,曲嫌細忌,皆應蕩除。」 同籍春親補兵,大功不在此例。回回婦人三從,旣嫁從夫,夫死從子。 八功親 中郎,兼 由於主者守朞親之文,不辨男女之異,遠嫌畏負,以生此疑,回回懼非 七年,彦之北伐,請爲右軍錄事。 應補 ,非應在 讁,妻子營居,固其宜也。 左 承天又議曰:「旣沒之名不合奏者,非有它義,正嫌於近不祥耳。 丞。 並宜見原。」故司徒掾孔邈奏事未御, 補謫之例,法以代公等母存爲春親,則子宜隨母補兵。 今若以叔母為春親,令代公隨母補兵,既違大功不謫之制,又失婦人三從之 吳興餘杭民薄道舉爲劫。 但為劫之時,叔父已沒,代公、道生並是從弟,大功之 及彥之敗退,承天以才非軍旅,得免刑責。 制同籍春親 邈已喪殯,議者謂不宜仍用 補 兵。 道舉從弟代公、道生等並爲 今道舉為劫,若其叔尚 承天議曰「尋劫制, 聖 朝 奏事 恤 邈 以補尙 名,更以 刑之旨。 郤 書 動

作佐 承天日:「卿當云 史。 郞 昔在西與士人多不協,在郡又不公清,爲州司所糾,被收繫獄,值赦免。 承天爲性剛愎,不能屈意朝 ,撰國史。 鳳凰將九子,嬭母 承天年已老,而諸佐郎並名家 治右,頗以所長侮同列,不爲僕射殷景仁所平, ·何言邪!]尋轉太子率更令,著作 年少,三三額 ĴΠ 荀伯子潮之, 如故 十六年, 常呼爲嬭母。 出爲 衡陽 内

時丹陽丁況等久喪不葬,承天議曰:「禮所云還葬,當謂荒儉一時,故許其稱財而不求

備。 懼 相 讁 同 伍 糾 此三人,殆無整肅。 虧 言,三年除服之後,不得追相告列,於事爲宜。」 積 聖明烹鮮之美。 丁況三家,數十年中,回到葬輒無棺櫬,實由淺情薄恩,同於禽獸者耳。 或 年,未嘗勸之以義,繩之以法。 由 鄰曲分爭,以興此言。如聞在東諸處,此例旣多,曰三江西淮北尤爲不少。 臣愚謂況等三家,且可勿問,因此附定制旨,若民人葬不如法,同伍當 開其一端,則互相恐動,里伍縣司,競爲姦利。 十六年冬,旣無新科,又未申明舊制,有何嚴切 財賂旣逞,獄訟 竊以爲丁寶等 必繁, **分数然** 若但

頃之,遷御史中丞。 九年,立 |國子學,以本官領國子博士。皇太子講孝經,承天與中庶子顏延之同爲執 時索虜侵邊,太祖訪羣臣威戎御遠之略,承天上表日

刨

糾

戎狄 受弱 飲馬 遂生 陛 預 下 聞 猜 訪 侵擾 臨 瀚 伏 得 海 懼 及。 御 見 失 揚游 一百餘 北 背背 以來 報復 竊 蕃上事,虜犯靑、克,天慈降鑑,矜此黎元,博逮羣策,經綸戎政,臣以愚陋, 違 講 尋獫狁 信 一裁不 年間,未暇 祁連,事難役繁,天下騷動、委輸負海, GEO 貲及舟車。 凶狡倔强, 未肯 縻 約,深構 遵養,十餘 相 告難,爰自上古,有周之盛,南仲出車,漢氏方隆,衞、霍宣力。 補。 騰隙。 以 北 宣帝末年,值其乖 虜爲 年中,貢 貪禍恣毒,無因自反,恐烽燧之警,必自此始。 念。 譯不絕。 大宋啓祚,兩燿靈武,而懷德畏威,用 ·亂,推亡固存,始獲稽服。 去歲三王 出鎭,思 振 遠圖 自晉 · 、 獣 رآد 自款納。 喪 中原, 臣素

列

庸

懦 經武,率其管窺,謹撰安邊論。 意及淺末,回引懼無可採。 若得詢之朝列,辨

同 異,庶或 開引羣慮,研盡衆謀,短長畢陳,當否可見。其論曰

鎭靜 若遺 不能 精卒 利,且自矜侈,外示 化者衆, 有遠 破 撫 安,非皆恥 (軍,苟陵患未盡,則困獸思鬭,報復之役,將遂無已。斯屪、漢之末策,輪臺之所悔也。 亦 其 等, 志。 校 邊境。 歸 軍 自 漢 附、伐 -萬,使一舉盪夷,則不足稍 追 世 勝 非 致 二州臨境,三王出藩,經略旣 討 循 一言備匈奴之策,不過二科,武夫盡征伐之謀,儒生講和親之約,課其所言,互 大田 加塞漠之外,胡敵掣肘,必未能 . 爲左衽,遠慕冠冕,徒以殘害剝辱 功亦殊。 然和 ,報其侵暴,大翦幽 理,攻城略 罪 准、泗,內實青、徐,使民有贏 弔 親 民,則駿馬奔走,不肯來 事 餘力,內堅僞衆。 寇雖習戰來 重, 地,而輕兵掩襲,急在驅殘, 當盡 |廟算,誠非愚短, 所能究言。 冀 久, [云]又全據燕、趙, 跨帶秦、魏, :勤王師,以勞天下。 屠城破邑,則 ·張,宏圖將舉,士女延望,華、夷慕義。 今若務存遵養,許其自新,雖未可羈致北闕,猶 摧鋒引日,規自開張。 征 儲,野有 ,,視息無寄,故繦負歸 ,徒興巨費, 聖朝愛育黎元,方濟之以 是其所以速怨 積穀,然後分命方、 何以言之。今遺黎習 無損於彼。 若追蹤衞、霍瀚海之志,時 當由往年冀土之民,附 召禍,滅亡之日。 國,先後 Щ 復奇兵深 |召, 河之險,終古如 道。 相 亂 總率虎旅 故昧於 尋。 志在 入, 殺敵 岩 虜旣 但 令 欲 偷 小 足

義方。 令,

俎豆訓其廉恥。

縣爵以縻之,

設禁以威之。

徭稅有程,

寬猛相濟。

此及十載,

民知 畜牧之所,轉戰之地,非耕桑之邑。[三]故堅壁清野,以俟其來,整甲繕兵,以乘其敝。 徙沔南,以實水北,〔三〕曹爽不許,果亡柤中,此皆前代之殷鑒也。 復城隍,三曰纂偶車牛,四曰計丁課仗。良守疆其土田,驍帥振其風略。 蒐獵宣其號 雖時有古今,勢有强弱,保民全境,不出此塗。要而歸之有四:一曰移遠就近,二曰浚 江陵,行己移民南涘,濡須之戍,家停羡溪。及襄陽之屯,行己民夷散雜,晉宣王以爲宜 安邊固守,於計爲長。 然後簡將授奇,揚旌雲朔,風卷河冀,電掃嵩恒,燕弧折卻,代馬摧足,秦首斬其 曹、孫之霸,才均智敵,江、淮之間,不居各數百里。 臣以安邊之計,備在史策,李牧言其端,嚴尤申其要,大略 魏捨合肥,退保新城,吳城 何者。斥候之郊,非

安,宮室之衞,櫛風沐雨,不以爲勞,露宿草寢,維其常性,勝則競利,敗不羞走,彼來或 驅率,易在振蕩。又狡虜之性,食肉衣皮,以馳騁爲儀容,以游獵爲南畝,非有車輿之 未增,星居布野,勤惰異教,貧富殊資,疆場之民,多懷彼此,虜在去就,不根本業,難可 寇雖亂亡有徵,昧弱易取,若天時人事,或未盡符,抑銳俟機,宜審其算。 若邊戍 已奔疲。 且今春踰濟,旣獲其利,乘勝忸伏,未虞天誅,比及秋末,容更送死。

右臂,吳蹄絕其左肩,銘功於燕然之阿,饗徒於金微之曲。

列

猋騎! 廢農必衆,馳車奔馹,起役必遲,散金行賞,損費必大,換土客戍,怨曠必繁。 蟻聚,輕兵鳥集,並踐禾稼,焚爇閭井,雖邊將多略,未審何以禦之。 若盛師連屯, 孰若因民

所居,並修農戰,無動衆之勞,有扞衞之實,其爲利害,優劣相縣也。

抃就路,視遷如歸。 於圖始,無虜之時,喜生咨怨。今新被鈔掠,餘懼未息,若曉示安危,居以樂土,宜其歌 **資也。今悉可內徙,青州民移東萊、平昌、北海諸郡,兗州、冀州移泰山以南,** 日移遠就近,以實內地。 今靑、「凫舊民,冀州新附,在界首者二萬家,「三」此寇之 民性重遷,誾 南至下

夏佃牧,秋冬入保。日园寇至之時,一城千室,堪戰之士,不下二千,其餘羸弱,猶能登陴 也。古之城池、處處皆有,今雖頹毀,猶可修治。粗計戶數,量其所容,新徙之家,悉著 城內,假其經用,爲之閭伍,納稼築場,還在一處。婦子守家,長吏爲師,丁夫匹婦,春 鼓譟。十則圍之,兵家舊說,戰士二千,足抗羣虜三萬矣。 二曰浚復城隍,以增阻防。 舊秋冬收斂,民人入保,所以警備暴客,使防衞有素

以衞其衆。設使城不可固,平行趨險,賊所不能干。旣已族居,易可檢括。 三曰纂偶車牛,以飾戎械。計千家之資,不下五百耦牛,爲車伍伯兩。 號令先明, **參合鉤連**,

民知夙戒。有急徵發,信宿可聚。

之內,軍用粗備矣。 銘 (刻由己,還保輸之於庫, 出行請以自衞。 弓簳利鐵,民不辦得者,官以漸充之,數年 四曰計丁課仗,勿使有闕。千家之邑,戰士二千,隨其便能,各自有仗,素所服習,

弱,外通宦塗,「量」朋曹素定,同憂等樂,情由習親,蓺因事著,晝戰見貌足相識,夜戰聞 不,甲科上第,漸就優別,明其勳才,表言州郡。如此則屯部有常,不遷其業,內護老 之害,不教之失也。今移民實內,浚治城隍,族居聚處,課其騎射,長東簡試,差品能 厚秩,發遽奔救,天下騷然。方伯刺史,拱手坐聽,自無經略,唯望朝廷遣軍,此皆忘戰 絕,蒐田非復先王之禮,治兵徒逞耳目之欲,有急之日,民不知戰,至乃廣延賞募,奉以 苟任强,實由有數。梁用走卒,其邦自滅;齊用技擊,厥衆亦離。漢、魏以來,茲制漸 彼衆之易也。管子治齊,寄令在民,商居爲秦,設以耕戰。終申威定覇,行其志業,非 起及瓜,今若以荆、吳銳〕師遠屯淸濟,至弘功費旣重,嗟怨亦深。以臣料之,未若卽用 任 足相 其怯勇。 臣聞軍國異容,施於封畿之內,兵農並修,在於疆場之表。攻守之宜,皆因其習, 救,斯教戰之一隅,先哲之遺術。 山陵川陸之形,寒暑溫凉之氣,各由本性,易則害生。 是故戍申作〔刺,怨 論者必以古城荒毀,難可修復。 **今不謂頓便**

列傳

棚 所資,軍國之要,今因民所利,導而率之。耕農之器,爲府庫之寶,田蠶之氓,兼捍城之 用,「四〇千家總倍旅之兵,萬戶具全軍之衆,兵强而敵不戒,國富而民不勞,比於優復隊 加 斷。 功,整麗如舊,但欲先定民居,任己營其閭術,墉壑存者,因而卽之,其有毀缺,權時 足以禦彼 .輕兵,防遏游騎,假以方將,漸就完立。[雲]車牛之賦,課仗之宜,攻守

伍、坐食廩糧者、不可同年而校矣。

隨宜應接,據其師津,毀其航漕。此以利制車,運我所長,亦禦敵之要也。回回 城,正在澤內。宜立式修復舊堵,利其埭遏,給輕艦百艘。寇若入境,引艦出戰,左右 私爲竊盜者,皆可立驗,於事爲長。又與野湖澤廣大,南通洙、泗,北連靑、齊,有舊縣 嚴立關候,杜廢間蹊。城保之境,諸所課仗,並加雕鐫,別造程式。若有遺鏃亡刃,及 應消壞。謂宜申明舊科,嚴加禁塞,諸商賈往來,幢隊挾藏者,皆以軍法治之。又界上 今承平來久,邊令弛縱,弓簳利鐵,旣不都斷,往歲棄甲,垂二十年,課其所住,理

武之金邪。」承天又能彈筝,上又賜銀裝筝一面。承天與尚書左丞謝元素不相善,二人競伺 奢侈,用常不充,二十一年,逆就尚書換明年資費。而舊制出錢二十萬,布五百匹以上,並 二臺之違,累相糾奏。太尉江夏王義恭歲給資費錢三千萬,布五萬匹,米七萬斛。 承天素好弈棊,頗用廢事。太祖賜以局子,承天奉表陳謝,上答:「局子之賜,何必非張

諮議參軍 應奏聞,元輒命議以錢二百萬給太尉。 七十束與官屬,求貴價,承天坐白衣領職。元字有宗,陳郡陽夏人,臨川內史靈運從祖弟 ,未拜,爲承天所糾。 上大怒,遣元長歸田里,禁錮終身。元 事發覺,元乃使令史取僕射孟顗命。 時又舉 承天賣菱四 元時新除太尉 百

也。

以才學見知,卒於禁錮

文、論並傳於世。四四又改定元嘉歷,語在律歷志。 年七十八。先是,禮論有八百卷,承天删減幷合,以類相從,凡爲三百卷,幷前傳、雜語、纂 二十四年,承天遷廷尉,未拜,上欲以爲吏部,已受密旨,承天宣漏之,坐觅官,卒於家,

外, 魏 使 未遠 交 來 漢二策,在 以至 、戰,亦以江、淮爲疆 逕可 史臣 雖 於 '防,去塗易梗,然後乃能禁暴止姦,養威攘寇。 日:治邊之術,前世言之詳矣。 綿 此 河作守,而兵孤 乎。 宋 頓亡,遂 自茲 以降, 場,莫不先憑地險,却保民 致胡馬橫行,曾無藩落之固,使士民跼蒼天,蹐厚 援闊、盛衰旣 分青置 境, 夫戎夷狡黠,飄迅難虞,必宜完其障塞,謹其烽析, 無 兆,用啓戎 圍守之宜,闕 和,且守且耕,伺隙 ۱Ļ) 漢世案秦舊迹、嚴塞 蓋 耕 戦 由 王 之略,恃寇 業 始基,經 乘 釁。 不 地 創 來 以限 ,繋房俘囚,而 高 多闕 遂 祖 外夷,吳、 受命,王 ,先內後 無 其 備

列

傅

第

+

四

何

承天

無所控告,哀哉 ! 承天安邊論,博而篤矣,載之云爾。

校勘記

- 高租渾 張森楷校勘記云: 「鮮之去鄭渾且二百年,以尋常世數計之,當在六世之外。 此云高
- 祖、於事不合。」
- ベニン 祖襲 各本「祖」上並有「曾」字,據南史、元龜九九八删。 孫彪宋書考論云:「南史無會字。
- 文求省會阻墓,南史云會祖江州長史哲墓
- 無車。 郤詵葬 及亡,不欲車載柩,家貧無以市馬,乃於所住堂北假葬。」 母 後 園 「郤詵」各本並作「郗詵」,據孫彪宋書考論說改。 按晉書郤詵傳: 「詵母病,

苦

下

- . 1229 _/ 居以端 右 「端右」各本並作「端石」,據元龜八二八改。 張森楷校勘記云:「端石當作端右, 各
- 五五 今省父母 之疾 各本並脫「今」字、據通典職官典補

本

並

誤。」

- ハベン 當 重 兵 、守潼關 各本 並脫「守」字、據通鑑晉安帝義熙 十四年補。 通鑑原文作「必併力守潼關」。
- フセン 尙 書鮮 之詣 神 虎門 求 啓 事 「神虎門」各本並作「神獸門」,係唐人所諱改,今改回
- 始興太守 南史作始安太守。

- 一 丸 ∪ 大者道勳光遠 「勳」各本並作「動」,據元龜四七一改。
- 由是並斷 並 |斷」南史作「普斷」。
- 既克洛陽松之居州行事宋國初建毛德祖使洛陽高祖敕之曰 「松之居州至使洛陽」十六字各本

並脫,據南史補。

司徒左西掾孔邈使揚州 「左西掾」各本並作「左司掾」,張森楷校勘記云:「司當作西。」按張校

是,今改正。

尚書三公郎陸子眞 孫彪宋書考論云:「所使諸州無江州、南徐州、蓋陸子眞使江州、范雍使南

徐州,而史文脱去。 建康實錄,元嘉四年,散騎常侍陸子眞薦豫章雷次宗、尋陽陶潛。二郡並江

州屬,可證也。」

員外散騎常侍范雍 孫獻宋書考論云范雍使南徐州、說見前條。

二吾 前尚書右丞孔默使南 北二豫州 孔默即文帝紀及范曄傳之孔默之。 東晉南北朝人名後之「之」

字,有時可省去。

雖躬勤庶事 「躬勤」各本並作「勤躬」,據元龜二一三乙正。

眷彼 氓庶 彼」各本並作「被」。 張元濟、張森楷校勘記云:「被當作彼。」按二張校是,今改正。

無忘 攸 恤 攸」各本並作「欽」,據远龜二一三改。 校 記

列

傅

第

+

四

勘

二
立 入補 通直爲常侍 張森楷校勘記云:「為字為散騎二字之譌。」

不憂西不 時 判 各本 並 脱「判」字, 義不可 通。 通鑑晉安帝義熙八年作「荆州不憂不時判」。 胡

三省注:「判,決也。」今據補

大功不在 此例 各本並脫「此」字,據通典刑典補。

以生 此 疑 各本 並脫「此」字、據通典刑典補。

而 諸 佐 郎並 名家年少 各本並脫「郞」字,據南史、藝文類聚二五引、御覽二三四引

數十年中 北監本、毛本、殿本、局本脱「十」字,三朝本作「一」字,今據南史、元龜五七六補

王鳴盛十七史商権謂「十」字衍文。

呈

此例旣多

「此」各本並作「比」,據远龜五七六改。

王鳴盛十七史商権云「比例當作此例。」

云 委輸 負海 「輸」各本並作「興」,據元龜四七一改。

子出 意及淺末 「及」元龜四七一作「乃」。

寇雖習戰來久 「來」弘治本、北監本、 毛本、殿本、局本作「未」,百衲本所據宋本殘葉本作

「來」。 涵芬樓影印百衲本時,誤改成「未」,今改回

三岩 吳城江陵 各本並脱「吳城」二字,據通典邊防典補

及襄陽之屯 「襄陽」各本並作「表陵」,據通典邊防典改。

- 晉宣 王以爲宜徙沔南以實水北 各本並作「晉宜王以爲宜從江南以北岸」, 句譌奪不可通。今
- 據 通典邊防典訂 正
- 斥候之郊 非畜牧之所轉戰之地非耕桑之邑 各本並脫「所轉戰之」四字,據通典邊防典補
- 在界首者二萬家 「二萬家」元龜四七一作「三萬家」,通典邊防典作「二三萬家」。
- 兗州冀州移泰山以南南至下邳 各本並脱「兗州冀州移」五字、據通典邊防典補。
- **二**壹 春夏佃牧秋冬入保 各本並脫「秋冬入保」四字,據通鑑宋文帝元嘉二十三年補
- 是故戍申作刺怨起及瓜今若以荆吳銳師遠屯淸濟 各本並脫「刺怨起及瓜今若以荆吳銳」十一
- 字,據通典邊防典補。 按「成申作刺,怨起及瓜」,用詩王風揚之水「彼己之子,不與我戍申」及

左傳莊公八年「及瓜而代」事。

外通宦塗

- 但欲先定民居 「宦塗」,三朝本、北監本、毛本、殿本、局本並作「官塗」,據通典邊防典改。
- 各本並脱「居」字、據通典邊防典補
- 漸就完立 「完」各本並作「只」,據通典邊防典改。
- 兼捍城之用 各本並脫「捍」字〕據通典職官典、元龜四七一補。「捍」字元龜作「扞」字〉扞捍

通 用

列 亦禦敵之要也 傅 第 + 四 「禦」各本並作「微徹」二字,據通典邊防典改。 校 勘 記

幷前傳雜語纂文論並傳於世 「雜語」各本並作「雜論」,據南史改。按隋書經籍志著錄何承天

所撰春秋前傳、春秋前傳雜語、纂文。 ' 南史無「纂文」下之「論」字,有「及文集 」三字。 此無文集,

而云論、或卽謂安邊論。

宋書卷六十五

列傳第二十五

劉道產 杜驥 恬

十餘年,淸謹剛正,甚爲高祖所知賞。 騎侍郎。 吉翰字休文,馮翊池陽 隨道憐北征廣固,賜爵建城縣五等男。 人也。 初爲龍驤將軍道憐參軍,隨府轉征虜左軍參軍, 永初三年,轉道憐太尉司 轉道憐驃騎中兵參軍,從事中郎。 馬 爲將佐 員外散

著美績,甚得方伯之體,論者稱之。 州之巴西梓潼宕渠南漢中秦州之安固懷寧六郡諸軍事、益州刺史, 難當率衆拒諮,又遣將强鹿皮向白水。 年,仇池氐楊興平遣使歸順,幷兒弟爲質,翰遣始平太守龐諮據武興。 太祖元嘉元年,出督梁南秦二州諸軍事、龍驤將軍、西戎校尉、梁南秦二州刺史。 諮擊破,[1] 難當等並退走。 (三)將軍如 其年,徙督益 仇池 大帥楊玄遣弟 故。 寧二 在益 一州梁

州

列 傳

第 _ 十

ìí.

吉 翰

旦, 節、監司雍幷三州諸軍事、司州刺史,將軍 征 籤 見 時 司 廣將軍,持節、監、刺史如故。 付獄殺之,原此囚生命。其刑政如此,其下畏服,莫敢犯禁。 其 有死罪囚, 徒司馬,將 典籤不敢復入,呼之乃來,取昨所呈事視訖,謂之曰:「卿意當欲宥此囚 事,亦有心活之。 六年,以老疾徵還,除彭城王義康司 軍如故。 典籤意欲活之,因翰八關齋呈其事 但此囚罪重,不可全貸,旣欲加恩,卿便當代任其罪。」 其年,又假節、監除一院二州豫州之梁郡諸軍事 徒司馬,加輔 如故。[三] 。回翰省訖,語「今且去, 會前鋒諸軍到彥之等敗 國將軍。 時太祖 明年卒官,時年六十。 、徐州 經略 死命。 刺史, 明可 退, 河南 因命 明 ",以翰 將 便呈」。 昨於 左右 軍 如 追贈 齋坐 復爲 收 爲 明 持 典

劉道產,彭城呂人,太尉諮議參軍簡之子也。 簡之事在弟子康祖傳。

軍 襲父爵晉安縣 南 道產 討 會始興 初 爲 輔 五等侯。 相 國參軍 劉謙之已平廣州,公 ,無錫令,在縣 廣州羣盜 因 刺 有能 史謝道欣 道產未至 名。 高 死爲寇, 而 祖 反。 版爲 二 中軍行參軍,又爲道憐驃騎參軍, 攻沒州城,道隣加道產振武將

元年,日別除寧遠將軍、巴西梓潼二郡太守。郡人黃公生、任肅之、張石之等並譙縱餘

彭城 二州刺 燼, 與姻親侯攬、羅奧等招引白水氐,規 王 史。 義康驃騎中兵參軍。 在州有惠化。關中流民,前後出漢川歸之者甚多。 元嘉三年,督梁南秦二州諸 欲 爲亂。 道產誅公生等二十一家,宥其餘黨。 軍事 、寧遠將軍、西戎校尉、梁 六年,道產表置隴 西、 宋 還爲 康二 南 秦

郡

以領之。

荆州 樂業、民戶豐贍、由此有襄陽樂歌,自道產始也。十三年,進號輔國將軍。 州 接凶 征虜將軍,諡曰襄侯。道產惠澤被於西土,及喪還,諸蠻皆備衰絰,號哭追送,至于沔口 至 荆 寇 刺 善於臨民,在壓部政績尤著,蠻夷前後叛戾不受化者,並皆順服,悉出緣沔爲居。 州之南陽竟陵順陽襄陽新野隨六郡諸軍事、寧遠將軍、寧蠻校尉、 七年,徵爲後軍將軍。 史衡陽王義季啓太祖曰:「故輔國將軍劉道產患背癱,疾遂不救。 政績旣著,威懷兼舉。年時猶可,方宣其用,奄至殞沒,傷怨特深。 明年,遷竟陵王義宣左將軍諮議 參軍,仍爲持節 雍州刺史、 道產自鎭漢南,境 十九 伏惟聖懷,愍情 、督雍梁南秦三 年卒, 襄陽太 追贈 Ħ 姓

義興太守。 長子延孫,別有傳。 泰始 初,與四方同反,伏誅 延孫弟延熙,因延孫之廕,大明中,爲司徒右長史,黃門郎,

戰便走,聽依 守。」初,氐寇至,城內衆寡,道錫募吏民守城,復租布二十年。及賊退,朝議:「賊雖攻城,一 明年散徵,又以赦後餘贓,收下廷尉,被宥病卒。 十七年,坐貪縱過度,自杖治中荀齊文垂死,乘轝出城行,與阿尼同載,爲有司所糾。 功勞裁量,不可全用本誓,多者不得過十年。」從之。二十一年,遷揚烈將軍、廣州刺史。二 衆,厲志致果,死傷參半,壯氣不衰,雖力屈陷沒,在誠宜甄。 盡心固守,保全之績,厥效可書。可冠軍。 之,下詔曰:「前者兵寇攻逼,邊情波駭,廣威將軍、巴西梓潼二郡太守劉道錫,獎率文武,行 道產弟道錫, .本要,於事爲優。」右衞將軍沈演之、丹陽尹羊玄保、後軍長史范曄並謂:「宜隨 巴西、梓潼二郡太守。元嘉十八年,爲氐寇所攻,道錫保城退敵,太祖嘉 諮議參軍、前建威將軍、晉壽太守申坦,孤城 可建威將軍、巴西梓潼 二郡太 **値**赦, 弱

杜驥字度世,京兆杜陵人也。 高祖預,晉征南將軍。 曾祖耽,避難河西,因仕張氏。 持

堅平凉州,父祖始還關中。

龍驤將軍,靑、冀二州刺史,南平王鑠右將軍司馬。 兄坦,頗涉史傳。高祖征長安,席卷隨從南還。 晚渡北人,朝廷常以傖荒遇之,雖復人 太祖元嘉中,任遇甚厚,歷後 軍將軍,

及, 亂,播遷涼土,世葉相承,不殞其舊。 知。」上變色日 可 恨今世 施 一每爲 無復 清塗所隔,坦以此慨 「卿何量朝廷之薄 如 此輩 人。」坦曰:「日磾之美,誠 然。 也。」坦曰:「請以臣言之。 直以南度不早,便以荒 嘗與太祖 如 言及史籍,上曰:「金日磾忠孝淳深,漢朝莫 聖 詔。 假使生乎今世,養馬 傖 臣本 賜 隔。 中華高 日 磾胡 族,亡曾祖 人,身爲牧圉 不暇 ,豈辨見 晉氏喪

恭撫軍刑獄參軍,尚書都官郎,長沙王義欣後軍 女妻焉。 北 土舊法,問疾必遣子弟。 桂陽公義眞鎭長安,辟爲州主簿,後爲 驥年十三,父使候 中錄事 義眞 同郡 參 車騎行參軍,員外散騎侍郎,江夏王 韋華。 軍 華子玄有高名,見而異之,以

便超入內侍,齒列名賢。

聖朝雖復拔才,臣恐未

必能

也。」上默

然

洛陽 城不 所領 便 致 走, 鍾 可 入耳。 牽鍾於洛水,驥乃誑之曰:「虜旣南渡,洛城勢弱,今修理城池,並已堅固,軍糧又足,所 虞 城不治旣久,又無糧食,及彦之敗退,驥欲棄城走,慮爲 元嘉 人情 '守,又無糧食,於是引衆去。 **舊器南還,一大鍾墜洛水。** 七年,隨到彥之入河南,加建武將軍。 沮 君率衆見就,共守此城,大功旣立,取鍾無晚。」聲夫信之,率所領就驥。 敗, 不可復禁。」上大怒,使建威將軍鄭順之殺聳夫於壽陽。 驥亦委城南奔,白太祖曰:「本欲以死固守,姚聳夫及城 至是太祖遣將姚聳夫領千五百人迎致之。 索虜撤 河南 太祖所誅。 戍悉歸河北,彦之使驥守洛陽 初,高 聳夫,吳興武康 祖平關洛。 時聳夫政率 旣至見

列傅

勇果有氣力,宋世偏裨小將莫及。 始隨到彥之北伐,與廣遇,聳夫手斬託跋燾叔父英

文特勤首,[10]燾以馬百匹贖之。

相推 坦長 史唯羊穆之及驥,為東民所稱詠。二十四年,徵左軍將軍,兄坦代為刺史,北土以爲榮焉。 安二郡諸軍事、寧遠將軍、靑冀二州刺史。在任八年,惠化著於齊土。自義熙至于宋末,刺 坐。」上特原不問。 二十七年,卒,時年六十四。 檢。 子琬爲員外散騎侍郎,太祖嘗有函詔敕坦,琬輒開視。 以驥爲通直郎,射聲校尉,世祖征虜諮議參軍。十七年,出督靑冀二州徐州之東莞 丞都答云:「諸郎開視。」上遣主書詰責,驥答曰:「開函是臣第四子]季文,伏待刑 信未發又追取之,敕函已發,大 東

長子長文,早卒。

帝元徽 佞奪爵。 超之居 第五子幼文,薄於行。太宗初,以軍功爲驍騎將軍,封邵陽縣男,食邑三百戶。尋坐巧 止接近,常相從,又並與阮佃夫厚善。 中,爲散騎常侍。 後以發太尉廬江王韓謀反事,拜黃門侍郎。出爲輔國將軍、梁南秦二州刺史。廢 幼文所莅貪橫,家累千金,女伎數十人,絲竹晝夜不絕,與沈勃、孫 佃夫死,廢帝深疾之。 帝微行夜出,輒在幼文

門牆之間,聽其弦管,積久轉不能平,於是自率宿衞兵誅幼文、勃、超之等。

幼文兄叔文為

得歸 亦歷兗、 國,並以幹用 申恬字公休,魏郡魏 青二州刺史。 見知 恬兄謨, 人也。 永歷青、克二州 與朱脩之守滑臺, 曾祖鍾,爲石虎司徒。 刺 史。 高 祖 爲虜所沒, 踐作, 高祖平廣固,恬父宣、宣從父兄永皆 拜 太中大夫。 後得叛還 宣, 元嘉中, 太祖 元嘉初, 爲竟陵

政績。 伏兵要害,出其不意,悉皆禽殄。 代義慶,又度安西府,加寧朔將軍。 如故,威惠兼著,吏民便之。 請休息。 恬初 又爲北譙、梁二郡太守,將軍如故。 爲驃騎道憐長兼行參軍。[11]高祖踐阼,拜東宮殿中將軍,度還臺。 轉員外散騎侍郎, 出爲綏遠將軍、下邳太守。 臨川 王義慶鎭江陵,爲平西中兵參軍 元嘉十二年,遷督魯東平濟北三郡 召拜太子屯騎校尉,母憂去職 郡境邊接任榛,屢被寇 轉在 北海, 抄。 、河東太守。 加寧遠將軍。 軍事、 恬到, 泰 密知 直省十載, Щ 衡陽王 太守,將軍 所至皆有 賊來, 義 不 仍 季

州 刺史,明年,加濟南太守。 二十一年,冀州移鎭歷下,以恬督冀州青州之濟南樂安太原三郡諸 時又遷換諸郡守,恬上表曰:「伏聞朝恩當加臣濟南太守,仰惟 軍 事、揚烈 將軍 、冀

列

傳

第

帶 深同 疆 是 優旨 諸 至 臣, 屯 除 埸 要所 . 臣意,百姓聞者,咸皆附說,急有同異,二三未宜。 威 授 荒心散越。 卽 有乖 刑 可 ,宜移太原,委以邊事。 履 悉停。 患不開廣,若得依先處分,公私允緝。」上從之。詔有司曰:「恬所陳當是事宜,近 舊事 行 :所統,究其形宜。 ,。[]三遠牽太原,於民爲苦。 臣 |殃咎之餘,遭蒙踰忝,寵私罔已,復兼今授,豈其愚迷,所能上答。 緣山諸邏,並得除省,防衛綏懷,利 河、濟之間,應置戍扞,其中四處, 而瓮口之計,復成交互, 但房紹之莅郡經年,軍民粗狎,改以 便非一。 急須 人情非樂, 修立, 呂綽誠效益著, 瓮口故城,又 容有 不安。 臣近

門外一 善於 崇 寇 皆優實。 軍 州 別駕 出 事 其武昌王 治 下邳。 北 環塹為 虜 民 解榮之率垣護 明 年,又督冀州 入寇,恬摧擊之,爲虜所破,被徵還都。 性清約,頻處州郡,妻子不免飢寒,世以此稱之。 所莅 下邳 營 向 青州。 有 太守 欲挑戰,賊不 績 之還援恬等,仍傍南 垣閬閉城距守, 世祖 遣恬援東陽,因與輔 齊 踐作,遷 地 敢逼。 連歲興 青州 停五 保全二千餘家。 兵,百姓凋 刺 日,東過 山得入。 史, 國司馬、齊郡太守龐秀之保城固 將軍 弊,恬初防 二十七年,起爲 抄略清河郡 賊朝來脅城,日 如 故。 **虜退**, 進號輔國將軍 衞 尋 邊境 以恬為 加督 及驛道 通直常侍。 徐州 晚 勸課農桑,二三年間,遂 寧朔將 南 輒 数千 退。 之東莞東安 軍、 守。 家 城 是歲,索虜南 內 從 Щ 蕭 乃出 陽 東安、東 斌 太守。 郡 遣 車 諸 北

九。 死之日,家無遺財。 建 二年,遷督豫州軍事、寧朔將軍、 子寔,南譙郡太守,早卒。日司 豫州刺史。 明年,疾病徵還,於道卒,時年六十

謨 子 元嗣 海陵 、廣陵太守。 元嗣弟謙, 泰始初,以軍功歷軍校,官至輔國將軍、 臨川

內史。

市。 誅,我入市亦當不久。」市官以白上,乃原 城。 軍,與王玄謨 軍 率薛安都 出 敗退, 孝建 羣 無 永子坦,自巴西、梓潼太守遷梁、南秦二州刺史。[18]元嘉二十六年,爲世祖鎭 臣爲之請, 功,宜因 、新除 初,爲太子 下 歷城。 圍滑臺不剋,発官。 此 東陽 翦撲。」上從之。 莫能得。 ·右衞· 太守沈法系北討,日三至兗州,虜已去。 蕭思話起義討元凶 率,寧朔將軍、徐州刺史。 將行刑,始興公沈慶之入市抱坦慟哭曰「卿無罪,爲朝廷 。亡命先已聞知,舉村逃走,安都與法系坐白衣領 青州刺史蕭斌板行建威 一般坦 生 命,繫尙方。 輔 國將 軍,爲前鋒。 大明元年,虜寇兗州 尋被宥,復爲驍騎將軍,病 粉軍 坦建議 、濟南平原二郡太守,復 世祖 「任榛亡命,屢犯邊民, 至新亭,坦 ?,世祖 遣太子 亦 軍諮議 職, 進 所枉 剋京 坦棄 攻 多 福

刺 史,討薛安都。 子令孫,前廢帝景和 行至淮陽,即與安都合。 中,爲永嘉 王子仁左軍司馬、廣陵 弟闡,時爲濟陰太守,戍睢陵城,奉順不同安都, 太守。 太宗以爲寧朔 將 軍

ー七二六

安都攻圍不能克。會令孫至,遣往睢陵令說闡降,闡旣降,殺之,令孫亦見殺。

馬靈期、司馬順之千餘人圍東萊,諲擊之,斬靈期等三十級。 先是,清河崔諲亦以將吏見知高祖,永初末,爲振威將軍、東萊太守。 太祖元嘉中,至青州刺史。 少帝初,亡命司

和、興讓以存簡久。及晚代風烈漸衰、非才有起伏、蓋所遭之時異也。 年踰十,惠化流於樊沔,頗有前世遺風,故能樹績垂名,斯爲美矣。 史臣曰:漢之良吏,居官者或長子孫,孫、曹之世,善職者亦二三十載,皆敷政以盡民 劉道產之在漢南,歷

校勘記

- [1] 諮擊破 張森楷校勘記云:「破下當有之字」誤脫文。」
- 徙督益寧二州梁州之巴西梓潼宕渠南漢中秦州之安固懷寧六郡諸軍 一事益州 刺 史 各本 並脱
- 之「州」字。 孫彪宋書考論云:「梁下脫州字。」按孫說是,今訂補
- = 將軍 如故 「將軍」上各本並有「持節」二字,按上文已云持節,此持節二字當是衍文,今删 去。
- 23 因翰八關齋呈其事 「八關齋」各本作「入關齋」,按歲時記:「二月八日,釋氏下生之日,迦文成

道之時,信拾之家,建八關齋。」本書袁粲傳:「孝建元年,世祖率羣臣並於中興寺八關齋。」是

「入關齋」當作「八關齋」。今據改。

 \neg 五 廣州羣盜因刺史謝道欣死爲寇 「謝道欣」劉康祖傳作「謝欣」。

 $\overline{ }$ 會始 興相劉謙之已平廣州 各本並脫「相劉」二字。 據通鑑晉安帝義熙十三年訂補。

〔七〕元年 下有元嘉三年、疑此是景平元年。

[八] 獎率文武 「獎」各本並作「將」,據元龜三七九改。

[f] 初高祖平關洛 「關洛」各本並作「西洛」,據南史改。

特勤 聳夫手斬託跋燾叔父英文特勤首 碑 可 證。 索虜傳 作「直熟」,近年出土北魏司馬金龍妻源氏墓 「特勤」各本並作「特勒」。 按「特勒」當作「特勤」,唐突厥闕 誌亦作 直熟 رت 卽 特 :勤之異

譯。勤勒形似而譌,今改正。

恬初 爲 驃 騎 道憐長兼 行參軍 各本並脫「行」字、據南史補。

〔1三〕有乖舊事 「舊」各本並作「永」、據远龜六九一改。

早卒 早 卒」上 各本 並有 「子謨」二字。 殿本考證云:「此子字當是兄字之誤。」 孫彪宋書考論

云:「早卒謂恬子寔也。」按申謨事已見前,不當復云兄謨。「子謨」二字蓋涉下文 謨子元嗣 而

行,今删去。

列傳第二十五 校勘

記

[18] 永子坦自巴西梓潼太守遷梁南秦二州刺史 各本脱「太守」二字。 孫彪朱書考論云:「梓潼下

當脫太守二字。」按孫說是,今補正。

世祖遣太子左衞率薛安都新除東陽太守沈法系北討

各本並無「左」字,據南史補。

按本書辭

二

安都傳、安都時爲太子左衞率。

宋書卷六十六

列傳第二十六

王敬弘 何尚之

王敬弘、琅邪臨沂人也。 與高祖諱同,日故稱字。曾祖廙,晉驃騎將軍。 祖胡之,司州

刺史。父茂之,晉陵太守。

事,恣其遊適,累日不回,意甚好之。轉桓偉安西長史、南平太守。去官,居作唐縣界。 與其姊集聚耳,我不能爲桓氏贅壻。」乃遣別船送妻往江陵。妻在桓氏,爾年不迎。 桓玄姊也。 敬弘少有清尚,起家本國左常侍,衞軍參軍。 敬弘之郡,玄時爲荆州,遣信要令過。 敬弘至巴陵,謂人曰「靈寶見要,正當欲 性恬靜,樂山水。 爲天門太守。 敬弘妻。 山郡無 玄

輔政及篡位,屢召不下。

高祖以爲車騎從事中郎,徐州治中從事史,征西將軍道規諮議參軍。時府主簿宗協亦

列傳第二十六 王敬弘

弘奉 及釋朝服,值赦復官。宋國 從事中郎,出爲吳興太守。 重 有 市初讌。 高 ·使慰勞,通事令史潘尚於道疾病,敬弘單船送還都,存亡不測,有司奏觅官,詔可。 趣,道規並以事外相期。 召爲中書侍郎,始攜家累自作唐還京邑。 舊居餘杭縣,悅是舉也。 初建,爲度支尚書,遷太常。 嘗共酣飲致醉,敬弘因醉失禮,爲外司所白,道規 **人之,轉黃門侍郎,不拜。** 尋徵爲侍中。 高祖西討司馬休之, 即更引還, 仍除太尉 敬

自 召, 叉不就。 「陳無德,不可師範令王,固讓不拜。 卽 高祖 便祗 太祖 受命,補宣訓衞尉,加散騎常侍。永初三年,轉吏部尚書,常侍如故。 奉,旣到宜退,旋復解官,高祖嘉其志,不苟違也。 即位,又以爲散騎常侍、金紫光祿大夫,領江夏王師。 又除秘書監,金紫光祿大夫,加散騎常侍,本州中正, 復除廬陵王師, 加散騎常侍。 敬弘每被除

變色, 六年,遷尙書令,敬弘固讓,表求還東,上不 元嘉 問左右:「何故不以訊牒副僕射。」敬弘曰:「臣乃得訊牒讀 讓侍 三年,爲尙書僕射。 中、特進,求減親信之半,不許。 關署文案,初 不省讀。 ·能奪。 及 東 歸,車駕幸冶亭餞送。 改授侍中、特進、左光祿大夫,給親信二 嘗豫聽訟,上問以疑獄,敬弘不對。上 Ź, 政自不解。」上甚不悅。

喜懼交悸。 二年,徵爲太子 臣抱疾東荒,志絕榮觀,不悟聖恩,猥復加寵。 少 何。 敬弘詣京師上表 曰:「伏見詔 東宮之重,四海瞻望,非臣薄德, 書,以臣爲太子少傅,承 命震惶, 列傳第二十六 王敬弘

激,委質聖朝。雖懷犬馬之誠,遂無塵露之益。年向九十,生理殆盡,永絕天光,淪沒丘壑。 謹冒奉表,傷心久之。」 躬耕南澧,不求聞達。先帝拔臣於蠻荆之域,賜以國士之遇。 聖恩,賜反其所,則天道下濟,愚心盡矣。」竟不拜東歸。二十三年,重申前命,又表曰"「 微臣,永非復大之一 與願違。 在宥,不敢宴處,牽曳載馳。 夫、開府儀同三司,侍中如故,又詣京師上表曰:「臣比自啓聞,謂誠心已達,天鑒玄邈,未蒙 無恨。」詔不許,表疏屢上,終以不拜。 所可居之。 禮年七十,老而傳家,家道猶然,況於在國。 今內外英秀,應選者多,且版築之下,豈無高逸,而近私愚朽,汚辱淸朝。 物矣。 所以牽曳闕下者,實瞻望聖顏,貪繫表之旨。 臣聞君子行道,忘其爲身,三復斯言,若可庶勉,顧惜惽耄,志 東歸,上時不豫,自力見焉。十六年,以爲 **伏願陛下矜臣西夕,愍臣一至,** 陛下嗣徽,特蒙眷齒,由 臣 如此 而歸, 左光 特迴 嗚呼 禄 夕死 臣

幽,貞芳載越,徽猷沈遠,懋禮彌昭。故侍中、左光祿大夫、開府儀同三司敬弘,神韻沖簡, 識宇標峻,德敷象魏,道藹丘園。 高挹榮冕,凝心塵外,清光粹範,振俗淳風。 典。」於是諡爲文貞公。 聲華在詠,而嘉篆闕文,猷策韜采,〔三尚想遙芬,興懷寢寤。 明年,薨於餘杭之舍亭山,時年八十八。〔三〕追贈本官。順帝昇明二年詔曰:「夫塗祕蘭 便可詳定輝諡, 式旌追 兼以累朝延

而去。 之。敬弘見兒孫歲中不過一再相見,見輒克日。恢之嘗請假還東定省,敬弘克日見之,至 恢之書曰:「秘書有限,故有競。朝請無限,故無競。吾欲使汝處於不競之地。」太祖嘉而許 嘗往何氏看女,值尚之不在,寄齋中臥。俄頃尚之還,敬弘使二婢守閤不聽尚之入,云「正 熱,不堪相見,君可且去」。倘之於是移於它室。子恢之被召爲祕書郎,敬弘爲求奉朝請,與 左右常使二老婢,戴五絛五辮,著青紋袴襦,飾以朱粉。女適尚書僕射何尚之弟述之,敬弘 美,時人謂之王東山。 日輒不果,假日將盡,恢之乞求奉辭,敬弘呼前,旣至閤,復不見。恢之於閤外拜辭,流涕 敬弘 形狀短 小,而坐起端方,桓玄謂之「彈棊八勢」。所居舍亭山,林澗環周,備登臨之 太祖嘗問爲政得失,敬弘對曰:「天下有道,庶人不議。」上高其言。

貞子。 瓚之弟昇之,都官尚書。 昇之子延之,昇明末,爲尚書左僕射,江州刺史。 恢之至新安太守,中大夫。恢之弟瓚之,世祖大明中,吏部尚書,金紫光祿大夫,諡曰

謹 有行業,姨適沛郡劉璩,與叔度母情愛甚篤,叔度母蚤卒,奉姨有若所生。姨亡,朔望必 何尙之字彥德,廬江灊人也。 曾祖準,高尚不應徵辟。祖恢,[四]南康太守。父叔度,恭

從原。」從之。「於」後爲金紫光祿大夫,吳郡太守, 身。 理亦宜宥。 法 睦 對之,公事 往致哀,幷殼祭奠,食並珍新,躬自臨視。 !止姦,本於情理,非謂一人爲劫, [至] 闔門應刑。 以告官。 睦父子之至,容可悉共逃亡,而割其天屬,還相 畢,卽往致哀,以此爲常,至三年服竟。 使凶人不容於家,逃刑無所,乃大絕根 新制,凡劫身斬刑,家人棄市。 若朔望應有公事,則先遣送祭,皆手自料 睦旣自告,於法有疑。 加秩中二千石。 源 義熙五年,吳興武康縣 所以罪 . 縛送, 也。 螫毒在手, 解腕 及同產,欲開其 睦旣糾送, 太保王弘稱其清身潔己。 時叔度爲尚書,議 則餘 民王 人無 相告,以出 求 全, 延 應 於情 祖 復 告,並合 簡,流涕 爲 日三設 爲惡之 可愍, 劫

去職。 年,遷侍中,中庶子 廢,入爲中書侍郎。 疾積年,飲婦人乳,乃得差。 家貧,起爲臨津令。 元嘉 八年,卒。 尚之少時頗輕薄,好摴蒲,旣長折節 義眞 服闋,復爲 與司徒徐羨之、尚書令傅亮等不協,每有不平之言,尚之諫戒, 如故。 左衞,領太子中庶子。 太祖 高祖領征西將軍,引補府 即位,出爲臨川 尋改領游擊將軍。 以從征之勞,賜爵都鄉侯。 內史,入爲黃門侍郎,尚書吏部郎,左衞 尚之雅好文義,從容賞會,甚爲太祖所知。 蹈道,以操立見稱。 主簿。 從征長安,以公 少帝卽位,爲廬陵王 為陳郡謝混所 事 趸, 不納。 還都。 義眞車 知,與之遊處。 將軍 騎 義眞 因患勞 一,父憂 諮

被

容才,以我爲信受讒說。但使共知如此,不憂致大變也。」曄後謀反伏誅,上嘉其先見。國 皇化。上曰:「始誅劉湛等,方欲超昇後進。」曄事跡未彰,便豫相黜斥,萬方將謂卿等不能 尚之爲祠部尚書,領國子祭酒。尚之甚不平。湛誅,遷吏部尚書。時左衞將軍范曄任參機 孔惠宣,並慕道來遊,謂之南學。 郭外,置玄學,聚生徒。東海徐秀、廬江何曇、黄回、潁川荀子華、太原孫宗昌、王延秀、魯郡 密,尚之察其意趣異常,白太祖宜出爲廣州,若在內釁成,不得不加以鈇鉞,屢誅大臣,有虧 子學建,領國子祭酒。又領建平王師,乃徙中書令,「八」中護軍。 十三年,彭城王義康欲以司徒左長史劉斌爲丹陽尹,上不許。乃以尚之爲尹,立宅南 女適劉湛子黯,而湛與尚之意好不篤。 湛欲領丹陽,乃徙

少 則,古今深誠,安不忘危。 輕,此聖心所鑒,豈假臣啓。 曰:「小人常自暴背,此不足爲勞。」時上行幸,還多侵夕,尚之又表諫曰:「萬乘宜重,尊不可 瀛洲三神山,尚之固諫乃止。時又造華林園,並盛暑役人工,尚之又諫,宜加休息,上不許, ,採愚誠,思垂省察,不以人廢,適可以慰四海之望。」亦優詔納之。 先是患貨重,鑄四銖錢,民間頗盜鑄,多翦鑿古錢以取銅,上患之。二十四年,錄尚書 二十二年,遷尙書右僕射,日加散騎常侍。是歲造玄武湖,上欲於湖中立方丈、蓬萊、 若値 輿駕比出,還多冒夜,羣情傾側,實有未寧。清道而動,帝王成 汲黯、辛毗,必將犯顏切諫,但臣等碌碌,每存順默耳。 伏願

其格 貲貨 使富 必 非急病權時,宜守久長之業。煩政曲雜,致遠常泥。且貨偏則民病,故先王立井田以一之, 容驟議,自己前代赤仄白金,俄而罷息,六貨憒亂,民泣於市。 以一當兩,徒崇虛價者邪。凡創制改法,宜從民情,未有違衆矯物而可久也。 估貨為本,事存交易,豈假數多。 數少則幣重,[10]數多則物重,多少雖異,濟用不殊。 江 不勞採鑄,其利自倍,實救弊之弘算,增貨之良術。 有蹤 者擇焉,猥參訪逮,敢不輸盡 有 起,此最是其深疑者也。 夏王義恭建議,以一大錢當兩,以防翦鑿,議者多同。 (自倍,貧者彌增其困,懼非所以欲均之意。 懸金之名,竟無酬與之實,若申明舊科,禽獲卽報,畏法希賞,不日自定矣。 不淫侈,貧不過匱。雖茲法久廢,不可頓施,要宜而近,粗相放擬。若今制遂行,富人 、跡,且 若止於四銖五銖,則文皆古篆,旣非下走所識,加或漫滅,尤難分明,公私交亂,爭訟 一用錢貨銅,事可尋檢,直由屬所怠縱,糾察不精,致使立制以來,發覺者寡。 命旨兼慮翦鑿日多,以至消盡,鄙意復謂殆無此嫌。民巧雖密, 又錢之形式,大小多品,直云大錢,則未知 求之管淺,猶有未譬。夫泉貝之興,以 尚之議曰:「伏覽明命,欲改錢制, 良由事不畫一,難用遵行,自 泉布廢興,未 況復 令

叔並 同 吏 尙之議。 部 尙 書 庾炳之、侍中太子左衞率蕭思話、中護軍趙伯符、御史中丞何承天、太常郗敬 中領 軍沈演之以爲:「龜具行於上古,泉刀興自有周,皆所以阜財通利,實

無興造之費,莫盛於茲矣。」上從演之議,遂以一錢當兩,行之經時,公私非便,乃罷。 謂若以大錢當兩,則國傳難朽之寶,家贏一倍之利,不俟加憲,巧源自絕,施一令而衆美兼, 贈。[12]誠由貨貴物賤,常調未革,弗思釐改,爲弊轉深,斯實親教之良時,通變之嘉會。 愚 滋繁,刑禁雖重,姦避方密,遂使歲月增貴,貧室日虚,ClinnB作肆力之氓,徒勤不足以供 錣所布,爱逮荒服,昔所不及,悉已流行之矣。用彌廣而貨愈狹,曰己加復競竊翦鑿,銷毁 江南,疆境未廓,或土習其風,錢不普用,其數本少,爲患尚輕。 國富民者也。 歷代雖遠,資用彌便,但採鑄久廢,兼喪亂累仍,糜散湮滅,何 今王略開廣, 聲教遐 可勝計。

譽業方籍,儻能屈事康道,降節殉務,舍南瀕之操,淑此行永決矣。[15] 望眷有積,約日無 但淑逸操偏迥,江北野性曹滯,果茲沖寂,必沈樂忘歸。然而已議塗聞者,謂丈人徽明未耗, 美於前策,龔、貢、山、衞,淪慚乎曩篇。規迨休告,雪滌素懷,冀尋幽之歡,畢棲玄之適。[18] 尚之書曰:「昨遣修問,承丈人已晦志山田,雖曰年禮宜遵,亦事難斯貴,俾疎、班、邴、魏,通 誤。」尚之宅在南澗寺側,故書云「南瀕」,毛詩所謂「于以採蘋,南澗之瀕」也。詔書敦勸,上 又與江夏王義恭詔曰:「今朝賢無多,且洋、孟尙不得告謝,尚之任遇有殊,便未宜申許邪。」 二十九年,致仕,於方山著退居賦以明所守,而議者咸謂尚之不能固志,太子左衞率袁淑與 二十五年,江三遷左僕射,領汝陰王師,常侍如故。二十八年,轉尚書令,領太子詹事

官,贈左光祿大夫。 後,起家爲東陽太守,遂歷吳郡、會稽、丹陽三郡,侍中,僕射,太子詹事,復爲會稽太守,卒 義恭答曰:「尙之淸忠貞固,歷事唯允,雖年在懸車,而體獨充壯,未相申許,下情所同。」尙 羊卽羊玄保,孟卽孟顗,字彥重,平昌安丘人。日む兄昶貴盛,顗不就徵辟。 子劭,尚太祖第十六女南郡公主,女適彭城王義康、巴陵哀王休若。 昶死

復成何異。陸展盡質復灼然,便同之巨逆,於事爲重。臣豫蒙顧待,自殊凡隸,苟有所懷, 意,微足觀過知仁。且爲官保全城府,謹守庫藏,端坐待縛。今戮及兄弟,與向始末無論者 贼旣遁走,一夫可禽,若反覆昧利,即當取之,非唯**免愆,亦可要不義之賞**,而超民曾無此 應從誅,尚之上言曰:「刑罰得失,治亂所由,聖賢留心,不可不慎。 竺超民爲義宜司馬,[110] 官領尙書令。丞相南郡王義宣、車騎將軍臧質反,義宣司馬竺超民、臧質長史陸展兄弟並 卽位,復爲尙書令,領吏部,遷侍中、左光祿大夫,領護軍將軍。 不敢自默。」超民坐者由此得原。 司空,領尙書令。時三方興義,將佐家在都邑,砌悉欲誅之,尚之誘說百端,並得免。 尚之旣還任事,上待之愈隆。是時復遣軍北伐,資給戎旅,悉以委之。元凶弑立,進位 尋辭護軍,加特進。 復以本

之中,正對沔口,通接瘫、梁,實爲津要,由來舊鎭,根基不易。今分取江夏、武陵、天門、竟 時欲分荆州置郢州,議其所居。江夏王義恭以爲宜在巴陵,尚之議曰:「夏口在荆、江

第

= +

何尚之

復合二州,上不許。 以來,揚州根本,委削以閩外,至是並分,欲以削臣下之權,而荆、揚並因此虛耗。 湘中,乃更成大,亦可割巴陵屬新州,於事爲允。」上從其議。 荆、揚二州,戶口半天下,江左 異,諸郡至夏口皆從流,並爲利便。 陵、隨五郡爲一州,鎭在夏口,旣有見城,浦大容舫。 竟陵出道取荆州,雖水路,與去江夏不 。 湘州所領十一郡,其巴陵邊帶長江,去夏口密邇,旣分 尚 之 建 言

復以本官領中書令。四年,疾篤,詔遣侍中沈懷文、黃門侍郎王釗問疾。薨于位,時年七十 妻亡不娶,又無姬妾。秉衡當朝,畏遠權柄,親戚故舊,一無薦舉,旣以致怨,亦以此見稱。 之有愧色。愛尚文義,老而不休,與太常顏延之論議往反,傳於世。立身簡約,車服率素, 勸甚篤,尚之謂曰:「主上虛懷側席, 詎宜固辭。」慶之曰:「沈公不効何公, 去而復還也。」尚 九。追贈司空,侍中、中書令如故。諡曰簡穆公。子偃,別有傳。 天子臨軒,百僚陪位,沈慶之於殿廷戲之曰:「今日何不著鹿皮冠。」慶之累辭爵命,朝廷敦 大明二年,以爲左光祿、開府儀同三司,侍中如故。尚之在家常著鹿皮帽,及拜開府,

新安太守。愉之弟翌之,都官尚書。悠之子願之,尚太祖第四女臨海惠公主。太宗世,官 義興,直恨相知之晚,每惟君子知我。若夫嘉我小善,矜余不能,唯賢叔耳。」悠之弟愉之, 尚之弟悠之,義興太守,侍中,太常。 與琅邪王微相善,悠之卒,微與偃書曰:〔三〕 [吾與

寄,於斯而盡。 荆、揚司牧、事同二陝。 荆部則包括湖、沅,跨巫山 因十載之基,嫌隙旣樹,遂規問鼎。 臣懷禍, 史臣曰:江左以來,樹根本於揚越,任推轂於荆楚。 止 有外憚,呂宗不競,實由齊、楚, 若長君南面,威刑自出,至親在外,事不 宋室受命,權不能移,二州之重,咸歸密戚。 而掩鄧塞。 而建郢分揚, 民戶境域,過半於天下。 興喪之源,於斯尤著。 矯枉過直, 患强。 揚土自廬、蠡以北,臨海而極 藩城旣剖, 若運經盛衰,時艱主弱, 晉世幼主在位, 政 尚之言幷合,可謂 是以義宣藉西楚强富 **盗實人單,閫** 歸 大江 輔臣, 雖近 識治 外之

校勘記

也矣。

與高 祖 諱 同 百衲本作「與高祖 兩字空白。 毛本、 殿本作 「同高 祖 諱 今據南史、 元龜

四 補

列 時年八十八 傅 第 + 六 「八十八」各本並作「八十」,據南史訂正。 校 勘 記 張森楷校勘記云:「按敬弘表自云年向

九十,當以南史爲正。」

猷策韜采 「采」三朝本、北監本、毛本作「裏」、殿本作「裹」、今據元龜五九五改。

祖惔 「惔」各本並作「恢」,據晉書何準傳改。洪頤煊諸史考異云:「案晉書何準傳,準三子放、

惔、燈。 惔官至南康太守。 『恢』乃『惔』字之譌。」

[五] 非謂一人爲劫 各本並脫「謂」字,據南史補。

C * 〕 並合從原從之 各本作「並全之」三字、據南史訂正。

により 高祖領征西將軍 「征西」各本並作「征南」,據南史改。 按時在義熙九年,劉裕兼領荆州。

[K] 乃徙中書令 張森楷校勘記云:「乃係仍字之譌。」

[f] 二十二年遷尚書右僕射 「二十二年」各本並作「二十三年」,據文帝紀改正。

數少則幣重 「重」各本並作「輕」,據通鑑宋元嘉二十四年改。

未容驟議 各本並脱「未容」二字、據通志一三四何尚之傳補

用彌廣而貨愈狹 「廣」各本並作「曠」,據通典食貨典、元龜五〇〇改。

貧室日虚 「虛」三朝本、北監本、毛本作「處」,殿本、局本作「劇」,今據泛龜五〇〇改。

〔12〕徒勤不足以供贍 各本並脱「供」字,據元龜五○○補

二十五年 各本並脱「二十」二字。孫彪朱書考論云:「上已見二十四年,此當是二十五年。」按 記

- 畢棲玄之適 「棲」三朝本、殿本空白、毛本作「談」、今據元龜九〇五補。
- 〔1七〕但淑逸操偏迥 「迥」各本並作「廻」,據远龜九〇五改。
- 〔1<○ 淑此行永決矣 「永」各本並作「求」、據元龜九○五改。</p>
- 平昌安丘人 各本並作「本昌安人」、據錢氏考異說改。 廿二史考異云:「按武帝紀稱平昌孟昶。

昶族弟懷玉傳云平昌安丘人。南史謝靈運傳附見孟顗事,亦云平昌安丘人。此『本』字,當爲

『平』之譌)『安』下又脫『丘』字。」

- 竺超民爲義宣司馬 各本並脱「義宣司馬」四字,據元龜六一五補。
- 與琅邪王微相善悠之卒微與偃書曰 **考論云:「按卽王微也。徽字誤。」** 兩「微」字各本並作「徽」字,據本書王微傳改。 孫彪宋書

宋書卷六十七

列傳第二十七

謝靈運

謝靈運,陳郡陽夏人也。 祖玄,晉車騎將軍。 父 爽, 生而不慧, 為祕書郎, 蚤亡。

幼便穎悟,」玄甚異之,謂親知曰:「我乃生晦,喚那得生靈運 ! _

千月。 靈運少好學,博覽羣書,文章之美,江左莫逮。從叔混特知愛之。 以國公例,除員外散騎侍郎,不就。 爲琅邪王大司馬行參軍。 性奢豪,車服鮮麗,衣 襲封康樂公,食邑二

裳器物,多改舊制,世共宗之,咸稱謝康樂也。 撫軍將軍劉毅鎭姑孰,以爲記室參軍。 毅鎭

江陵,又以爲衞軍從事中郎。 毅伏誅,高祖版爲太尉參軍,入爲祕書丞,坐事免。

門侍郎。 高祖伐長安,驃騎將軍道憐居守,版爲諮議參軍,轉中書侍郎,又爲世子中軍諮議,黃 奉使慰勞高祖於彭城,作撰征賦。 其序曰:

列傳第二十七 謝靈運

横流。 邑,周覽丘墳,眷言古迹,其懷已多。昔皇祖作蕃,受命淮、徐,道固苞桑,勳由仁積。 **滑臺。曾不踰月,二方獻捷。宏功懋德,獨絕古今。天子處東山之劬勞,慶格天之光** 惠策,法奇於三略,義祕於六韜。所以鉤棘未曜,殞前禽於金墉,威弧始彀,走鈒隼於 兵于京畿,次師于返上。靈檣千艘,雷輜萬乘,羽騎盈塗,飛旍蔽日。別命羣帥,誨謨 從兆,興止戈之師,躬暫勞之討。以義熙十有二年五月丁酉,敬戒九伐,申命六軍,治 未統,側席盈慮。 慶靈將升,時來不爽,相國宋公,得一居貞,回乾運軸,內匡寰表,外淸遐陬。 每以區宇 辱之憤,可謂積禍纏釁,固以久矣。況迺陵塋幽翳,情敬莫遂,日月推薄,帝心彌遠。 年月多歷,市朝已改,永爲洪業,纏懷淸曆。於是采訪故老,尋履往迹,而遠感深慨,痛 征人。以仲冬就行,分春反命。塗經九守,路踰千里。沿江亂淮,遡薄泗、汳,詳觀城 大,明發興於鑒寐,使臣遵于原隰。余攝官承乏,謬充殊役,皇華愧於先雅,靡盬顇於 心殞涕。遂寫集聞見,作賦撰征,俾事運遷謝,託此不朽。 蓋 皇晉厂 聞昏明殊位,貞晦異道,雖景度回革,亂多治寡,是故升平難於恒運,剝喪易以 □□河汾,□ 水遷吳楚,數歷九世,年踰十紀,西秦無一援之望,東周有三 值天祚攸興,昧弱授機,龜筮元謀,符瑞景徵。 其詞曰: 於是仰祗俯協,順天

系烈山之洪緒,承火正之明光。

立熙載於唐后,自申讚事於周王。疇庸命而順

列傳第二十七 謝靈運

位,錫寶珪以徹疆。 歷尙代而平顯,降中葉以繁昌。 業服道而德徽,風行世而化揚。投

前蹤以永冀,省輯質以遠傷。 睽謀始于蓍蔡,違用舍於行 藏。

仰青春之葳蕤。引蔓穎於松上,擢纖枝於蘭逵。 庇常善之罔棄, 憑曲成之不遺。昭在幽而 僧煦,賞彌久而愈私。 施隆貸而有渥,報涓塵而無期。歡太階 顧晚草之薄弱,

之休明,穆皇道之緝熙。

當草 是誅。 明。 援於生民。 以制險,據繞霤而作局。 昧而 坤寄通於四瀆,乾假照於三辰。 惟王建國,辨方定隅,內外旣正,華夷有殊。惟昔小雅,逮于班書,戎蠻孔熾,是殛 □ □ 豆 慕攜王之矯虔, 階喪亂之未寧。 所以宣王用棘於獫狁,高帝方事於匈奴。 經綸。 龜筮允臧,人鬼同情。 總九流以貞觀,協五 家永懷於故壤, 順天行誅,司典詳刑。 水潤土以顯比,火炎天而同 才而平分。 國願言於先塋。 竊强秦之三輔,陷隆周之兩京。 時來之機,悟先於介石,納隍之誠,一 然侵鎬至涇,自塞及平。 俟太平之曠期,屬應運之聖 樹牙選徒, 秉鉞抗旍。 人。 惟上相之叡哲, 闚 雄崤、澠 郊伺鄙, 弧矢

被 和 風於洛汭。 迅三翼以魚麗,襄兩服 就終古以比猷,考墳册而莫契。 以雁 逝。 陣未列於都 昔西怨於東徂,今北伐而 甸,威已振於秦、薊。 灑嚴霜於渭城, 南悲。 豈朝

罄楚孝之心智,戈棘單吳子之精靈。

遷時。 末而難懷。 冒沈雲之晻藹,迎素雪之紛霏。 裝,旦出宿而言辭。 野之恒 情, **佇千里而** 感遠, 涉弦望 動萬乘之幽思。歌零雨於豳風,興採薇於周詩。 眷余勤以就路,苦憂來其城 歲旣晏而繁慮,日將邁而戀乖。 而懷期。 凌結湍 頹 而凝清, 風矜籟以揚哀。 詔微臣以勞問,奉王命於河湄。 闕敬恭於桑梓,謝履長於庭階。四 慶金墉之凱定,眷戎車之 情在本而易阜,物雖 夕飲餞以俶

普邦 沖用 Щ, 安之致寇,傷龜玉之毁碎。 景,鼎祚傾基。 百里。 元 神器,外侮戎狄。 而 誕德以膺緯,肇回光於陽宅。 國 覊巢處於西木,引鼻飲於源淵。 勸,每勞賞而忠甄。 而 爾乃經雉門,啓浮梁,眺鍾巖,越查塘。 刑廢。 而 賴英謨之經營,弘兼濟以忘己。 同歸。盪積霾之穢氛,啓披陰之光暉。反平陵之杳藹,復七廟之依稀。 孝武捨已以杖賢,亦寧外而治內。 黍離有歎,鴻雁無期。 君子橫流,庶萌分析。 變時雍於祖宗,□□□ 漏妖凶於滄洲,纏釁難而盈紀。 明思服於下武, 惠要襋而思韙,援冠弁而來虔。 瞻天命之貞符,秉順 主寰內而緩虞,澄海外以漬滓。 主晉有祀,福祿來格。 覽永嘉之紊維,尋建武之緝綱。 興繼代以消逆。 觀日化而就損,庶雍熙之可對。 [三 掃逋醜於漢渚,滌僭逆於岷 動 時焉依於晉、鄭,國有蹙於 而履機。 明兩降覽, 簡文因心以秉道,故 率駿民之思効, 至 三七辭厄。 于時內慢 如昏祲蔽 務役簡 関隆

視冶城而北屬,懷文獻之收揚。 匪元首之康哉,孰股肱之惟良。 譬觀曲 而識節,

似綴組以成章。業彌纏而彌微,事愈有而莫傷。

作藩。 果鯨躍 二而謂 次石頭 紀 拾建業其如遺, 於川湄。 ,豈蜀滅而吳安。 之雙岸,究孫氏之初基。 匝三世而 沿萬里而 國盛,歷五 衆咸昧於謀兆,羊獨悟於理端。 誰難 偽而 宗夷。 幸漢庶之漏網,憑江介以抗維。 疾魯荒之詖辭,惡京陵之譖言。 察成敗之相仍,猶脣亡而齒寒。 請廣武以海情, 初鵲起於富春, 責當朝之憚 樹襄陽 載十 以

節 雖殊塗 犯逆,抱正情而 敦怙寵而判違, 而 歸美。 或卷舒以愚智,或治亂其如矢。 喪已。 敵旣勍而國圮。 彼問鼎而何階,必先賊於君子。 謝昧迹而託規,卒安身以全里。 原性分之異託, 周顯

貶,對曩籍而

興歎

師旅 擬凶 威 痛 薄 於 四 於 州野。 望 **外勤,城墉闕於素備。** 而尤眄, 隱雷 歎王路之中鯁。 屋於帝坐, 安危勢在不侔,衆寡形 飛芒鏃於宮省。 蠢于越之妖燼, 敢凌蹈於五嶺。 于時朝有遷都 於見事。 之議, 於赫淵謀,研其 人無守死 崩雙嶽於中流, 之志。 神策。

緩轡待機,追奔躡 造 白石之祠 壇,懟二豎之無君。 迹。 遇雷池 而振曜,次彭蠡而 踐掖庭以幽辱,凌祧社而 殲滌。 穆京 甸 以清晏,撤多 火焚。 愍文康之罪己, 壨 而 寧役。

列

傳

一七四八

嘉忠武之立勳。道有屈於災蝕,功無謝於如仁。

訊落星之饗旅,索舊棲於吳餘。 迹階戺而不見,橫榛卉以荒除。 彼生成之樂辰,

亦猶今之在余。慨齊吟於爽鳩,悲唐歌於山樞。

紐,乏東南以振綱。 弔偽孫於除首, [K] 率君臣以奉疆。 誠鉅平之先覺,實中興之後祥。據左史之攸徵,胡影迹之可量。 時運師以伐罪,偏投書於武王。 **迄西北之落**

泝。臨浙河而 東浮。 彀連弩於川上,候蛟龍於中流。

過江乘而責始,日知遇雄之無謀。

厭紫微之宏凱,甘陵波而遠遊。

越雲夢而南

湯湯。 羨輕**魵之涵泳,觀翔**鷗之落啄。 迤, 石參差, 山盤曲。 爱薄方與,迺届歐陽。 游赤圻以經復,越二門而起漲。 水激瀬而駿奔, 入夫江都之域, 次乎廣陵之鄉。 易千里之曼曼, 泝江流之 在飛沈其順從,顧微躬而 日映石而 眷北路以興思, 看東山而怡目。 知旭。 審兼照之無偏,怨歸流之難濯。 緬 邈。 林叢薄, 路逶

吳濞 霸於琅邪,夫差爭長於黃川。 而弭心,怒抵局而遂爭。忿爰盎之扶禍,惜徒傷於家令。 之衰盛。 於是抑懷蕩慮,揚摧易難。 戒東南之逆氣,成劉后 葛相發歎而 利涉以吉,天險 之駴聖。 思正,曹后愧心於千魂。 **藉鹽鐵之殷阜,臨淮楚之剽輕。** 以艱。 于敵伊阻,在國斯便。 匪條侯之忠毅,將七國之陵 登高堞以詳覽, 盛几杖 勾踐行 知

義說 之睟容,遵縫掖於前躅。 丐。 於梁庭。 褒漢藩之治民,並訪賢以招明。 敷高才於冤園,雖正言而冤刑。 對園囿而不闚,下帷幙而論屬。 侯文辯其誰在,日鄒陽與枚生。據忠辭於吳朝,執 闕里旣已千載,深儒流於末學。 相端、非之兩驕,遭弘、偃之 欽仲舒

聞 :宣武之大閱,反師旅於此廛。 恨有道之無時,步險塗以側足。 自皇運之都東,始昌業以濟難。 抗素旄於秦嶺,

揚朱旗於巴川。 懼帝系之墜緒,故黜昏而崇賢。嘉收功以垂世,嗟在嗣而覆旃。

陟而繼宰,釁踰禹其必顚。

九流 税, 國屯難而 以潔四維,復先陵而淸舊字。 造步丘而長想,公欽太傅之遺武。思嘉遁之餘風,紹素履之落緒。 思撫。 譬乘舟之待楫,象提釣之假縷。 總出入於和就,兼仁用於默語。弘 却西州之成功,指東山之歸予。 惜圖南之啓運,恨 民志應而願

鵬

翼之未

舉。

谷 准驚波,平原遠兮路交過。 樂土,實 而 有居。 發 (津潭而 長歎於荒 被宿莽以迷徑,覩生煙而知墟。 迎邁,逗白馬以**憇**舲。 餘。 面艽野兮悲橋梓,遡急流兮苦磧沙。 貫射陽而望邗溝,濟通淮而薄角城。[九]城坡陁兮]謂信美其可娛。 **夐千里而無山,緬百** 身少長於

列傳第二十七 謝靈運

於雨雪。豈初征之懼對,冀鸛鳴之在垤。 微物而疚情,此思心其可說。問徭役其幾時,駭閱景於興沒。 感曰歸於采薇,予來思 淫,怨凝陰之方結。望新晴於落日,起明光於躋月。眷轉蓬之辭根,悼朔雁之赴越。披]具瘁,[10]值歲寒之窮節。 視層雲之崔巍,聆悲飇之掩屑。 爾畫夜以滯

邑,厠踐土之一匡。嗟仲幾之寵侮,遂捨存以徵亡。喜薜宰之善對,美士彌之能綱。 升曲垣之逶迤,訪淮陰之所都。原入跨之達恥,俟遭時以遠圖。捨西楚以擇木, 溪車正以事夏, 虺左相以輔湯。綿三代而享

迨南漢以定謨。亂孟津而魏滅,攀井脛而趙徂。播靈威於齊橫,振餘猛於龍且。

通而告稀,曷始智而終愚。

險以解挫,弘憂虞以時順。矜若華之翳晷,哀飛驂之落駿。傷粒食而興念,眷逸翮而 要王子於雲仞。豈無累於淸霄,直有槪於貞吝。始熙績於武關,卒敷功於皇胤。處夷 迄

沂上而停枻,登高

形而不進。

石幽期

而知賢,

張揣景而

示信。

本文成之素

ふ,

暴鰥孤於泗澨。託末命□□雲,□□冀靈武之北閱。惟授首之在晨,當盛暑而選徒。肅 戾 臣山而東顧,美相公之前代。嗟殘虜之將糜,熾餘猋於海濟。驅鮐稚於淮曲,

思

嚴 威 以振響,漸溫澤而沾腴。 既雲撤於朐城,遂席卷於齊都。 囊四關其奚阻,道 變

而是学。

傷炎季之崩弛,長逆布以滔天。 假父子以詐愛,借兄弟以僞恩。 相魏武以譎狂,

究謨奮於東藩。 桴未譟於東郭,身已馘於樓門。

審 貢牧於前 說,證所作於舊徐。 聆泗川之浮磬,翫夷水之嬪珠。 草漸苞於熾壤,

桐 孤 榦 於峄 隅。 慨禹迹於尙世,惠遺文於夏書。

投呂縣 紛 之迅梁。想蹈水之行歌,雖齊汩其何傷。啓仲尼之嘉問,告性命以依方。 征邁之淹留,彌懷古於舊章。商伯文於故服,咸徵名於彭、殤。 眺靈壁之曾峯, 豈苟

然 於迂論,聆寓言於達莊。

俊明 驛,慨舟壑之遞遷。 崇,取園 於渥恩。 以鏡 於是濫石橋,登戲臺。 . 陵 棄採芑之致美,協漢廣之發言。 鑒,迴風猷以昭宣。 而 湮沈。 謂徂歲之悠闊,結幽思之方根。感皇祖之徽德,爰識沖而量淵。降 錫殘落於河西,序淪胥於漢陰。 策馬釣渚,息轡城隅。 道旣底於國難,惠有覃於黎元。士頌歌於政教,民謠詠 强虎氏之搏翼, 灟雲網於所禁。 永感四山,零淚雙渠。 攻方城而 折局,擾譙潁其誰任。世 體飛書之遠情,悟犒師 驅黔萌以蘊 怨物華之推

闕才而

貽

亂

時得

賢而

興治。

救祖考之邦壤,在幽人而枉志。

列

傳

第

+

七

之通識 之興廢。心無忝於樂生,事有像於燕惠。 皇塗於國內,震天威於河外。掃東齊而已寧,指西崤而將泰。 靡,蹙坑谷而鳥竄。中華免夫左衽,江表此焉緩帶。 迨明達之高覽,契古今而同事。 抱明哲之不伐,奉宏勳而是稅。 既剋黜於肥六,又作鎭於彭沛。晏 **值秉均而代謝,實大業** 捐七州以爱 風

來,歸五湖以投袂。屈盛績於平生,申遠期於暮歲。

將以塞於夷庚。納五叛以長寇,伐三邑以侵彭。美西鉏之忠辭,快韓厥之奇兵。 訪曩載於宋鄙,採陽秋於魯經。晉申好於東吳,鄭憑威於南荆。

故反師於曹門,

力拔 屈 而莫照,思反鄉而有歎。且夫殺義害嬰,而優豐疑,口思樂賢不策,失位誰持。 而 愈閉,方怨天而懷悲。 山而傾湍。始飇起於勾越,中電激於衡關。興偏慮於攸吝,忘卽易於所難。 追項王之故臺,迹霸楚之遺端。挺宏志於總角,奮英勢於弱冠。氣蓋天而 對駿雕以發憤,傷虞姝於末詞。 倒日, 迨理 忌陳

猶謬覺於然諾。視一人於三傑,豈在己之庸弱。置豐沛而不舉,故自同於俎鑊。 陟亞父之故營,諒謀始之非託。遭衰嬴之崩綱,值威炎之結絡。 迄皓首於 阜陵,

方恬 心於道肆。 發下口而游歷,迄西山而弭轡。觀終古之幽憤,懷元王之沖粹。丁戰國之權爭, 學浮丘以就德,友三儒以成類。潔流始於初源,累仁基於前美。撥楚

列傳第二十七 謝靈運

不仕。 族之休烈,傳芳素於來祀。 政直言以安身, 駿絕才以喪己。 **僵見譽於淸虛,德致稱於千里。** 驅信道之成終,表昧世之虧始。悟介焉之已 或避寵以辭姻,或遺榮而

差,則不俟於終日。旣防萌於未著,雖念德其何益。

相雎鳩 於大 修檣 痊。 荷慶雲之優渥,周雙七於此年。 瀾,訴愁衿兮鑑戚顏。 小,順規矩於方圓。 長守朴 而 爾 流連。 `之集河,觀鳴鹿之食萃。 乃孟陬發節,雷隱蟄驚。 以終稔,亦拙者之政焉。 顧關鄴之遄淸,遲華鑾之凱旋。 愁盈根而 固四民之獲所, **薀際,戚發條而成端。** 散葉荑柯,芳蘤飾萌。 陶逸豫於京甸,違險難於行川。 沂泗遠兮淸川急, 秋冬近兮緒風襲。 宜稅稷於萊田。苦邯鄲之難步,庶行迷之易 穆淳風於六合,溥洪澤於八埏。頒賢愚 嗟我行之彌日,待征邁而言旋。 麥萋萋於旄丘,柳依依於高城。 轉歸舷而眷戀,口巴望 風流蕙兮水增

之,出爲永嘉太守。 文籍,與靈運情款異常。 以文義處之,不以應實 公餌 7爲侯,食邑五百戶。 宋國黃門侍郎,遷相 郡有名山水,靈運素所愛好,出守旣不得志,遂肆意游遨,徧歷諸縣,動 和許。 少帝即位,權在大臣,靈運 起爲散騎常侍,轉太子左 國從事中郎,世子 自謂才能宜參權要,旣不見知, 左衞率。 一衞率。 構 扇 異同 坐輙殺門生,発官。 靈運爲性褊激,多愆 常懷憤憤。 非毁 執 政, 司徒徐羨之等患 廬陵王義眞 禮度,朝廷唯 高祖受命,降 少好

踰 旬朔,民 間 聽訟,不 復關懷。 所至輙爲詩詠,以致其意焉。 在郡一周,稱疾去職,從弟晦、

、弘微等並與書止之,不從。

與隱士王弘之、孔淳之等縱放爲娛,有終焉之志。 靈運 父祖並葬始寧縣,幷有故宅及墅,遂移籍會稽,修營別業,傍山帶江,盡幽居之美。 每有一詩至都邑,貴賤莫不競寫,宿昔之

目。

間,士庶皆徧,遠近欽慕,名動京師。 從性情,敢率所樂,而以作賦。揚子雲云:「詩人之賦麗以則。」文體宜兼,以 素,儻值其心耳。意實言表,而書不盡,遺迹索意,託之有賞。 詠於文則可勉而就之,求麗,邈以遠矣。覽者廢脹、左之艷辭,尋臺、皓之深意,去飾取 所賦旣非京都宮觀遊獵聲色之盛,而敍山野草木水石穀稼之事,才乏昔人,心放俗外, 可以理推。言心也,黃屋實不殊於汾陽。 古巢居穴處曰巖棲,棟宇居山曰山居,在林野曰丘園,在郊郭曰城傍,四者不同, 作山居賦幷自注,以言其事。 即事也,山居良有異乎市廛。 其辭 抱疾就閑,順 成 其美。今

存,故事斯忘。古今不能革,質文咸其常。 **免憂。判身名之有辨,權榮素其無留。** 心於鼎湖,送高情於汾陽。嗟文成之却粒,願追松以遠遊。 謝子臥疾山頂,覽古人遺書,與其意合,悠然而笑曰:夫道可重,故物爲輕;理宜 孰如牽犬之路旣寡,聽鶴之塗何由哉。 合宮非縉雲之館, 嘉陶朱之鼓棹,迺語 衢室豈放勛之堂。 理以相得 種以 邁深

良,却粒棄 可謂不同,而此處不異。 爲適,古人遺書,與其意合,所以爲笑。 人間事,從赤松子遊。 縉雲、放勛不以天居爲所樂,故合宮、衢室,皆非淹留,鼎湖、汾陽,乃是所居。 □文成、張 陶朱、范蠡,臨去之際,亦語文種云云。 孫權亦謂周瑜「公瑾與孤意合」。夫能重道則輕物,存理則忘事,古今質文 謂二賢旣權榮素,故身名有判也。牽犬,

李斯之歎。聽鶴,陸機領成都衆大敗後,云「思聞華亭鶴唳,不可復得」。

堂世異矣。 惟上託於巖壑,自思幸兼善而罔滯。 上古穴居野處,後世聖人易之以宮室,上棟下宇,以蔽風雨,蓋取諸大壯。 若 夫巢穴以風露貽患,則大壯以棟宇袪弊,宮室以瑤琁致美,則白賁以丘園殊世。 謂巖壑道深於丘園,而不爲巢穴,斯免□□得寒暑之適,○□○雖是築構,無妨非朝市云云 雖非市朝而寒暑均也,雖是築構而飾 琁堂自是素,故曰白賁最是上爻也。 朴 兩 逝 。易云 此

卓氏充釽摫之端,江北金谷之麗,石子致音徽之觀。 林以爲蔭。」謂二家山居,不得周員之美。揚雄獨都賦云:「銅陵衍。」卓王孫採 場囿在前,果園在後。」應璩與程文信書云:「八」「故求道田,在關之西,南臨洛水,北據邙山 山川之未備,亦何議於兼求。 若鳳、叢二臺,雲夢、靑丘,漳渠、淇園,橘林、長洲,雖千乘之珍苑,孰嘉遁之所遊。 臨邛,公擅山川。」揚雄 昔仲長願言,流水高山;應璩作書,邙阜洛川。 方言:「梁、益之間裁木爲器曰釽,裂帛爲衣曰摫。」金谷, 仲長子云:「欲使居有良田 廣宅,在高山流川之畔。 徒形域之薈蔚,惜事異 勢有偏側,地闕周員。 山鑄銅, 石季倫 之別廬, 故漢書貨殖傳云「卓氏之 溝池 託崇岫以爲宅, 在河南界,有山川 自環,竹木周布 於栖盤。 銅陵之奥, 因茂 且 至

所。 千乘讌嬉之所,非幽人憩止之鄉,〔三〕且山川亦不能兼茂,隨地勢所遇耳。 長洲 諸史。 林木池沼水碓。 靈王遊雲夢之中,息於荆臺之上。 所居,以 洪園,衛之竹園,在洪水之澳,詩人所載。 ,吳之苑囿, 淮南青丘,齊之海外,皆獵所。 致簫史。 其鎮下邳時、過遊賦詩,一代盛集。謂二地雖珍麗,然制作非栖盤之意也。 左亦謂長洲之茂苑, 叢臺,趙之崇館。 前方淮之水,左洞庭之波,右顧彭蠡之濤,南望巫山之阿, 張衡謂趙築叢臺於前,楚建章華於後。 司馬相如云:「秋田乎青丘,徬徨乎海外。」漳渠,史起爲魏文侯所起, 因江海洲渚以爲苑囿□。 橘林、蜀之園林、揚子雲蜀都賦亦云橘林。 楚之雲夢, □□□[三0]故□表此園之珍靜。[三] 大中□居長飲賦: 左太沖謂戶有橘柚之園。 鳳臺, 遂造章華之臺。 秦穆公時秦女 漑水之 亦見 楚

之禍。 江,三三科望諸之去 覽 明 後及太傅旣薨,遠圖已輟,〔三〕於是便求解駕東歸, 達之撫運, 經始山川,實基於此。 國。 乘機緘 選自然之神麗,盡高棲之意得。 而理默。 指歲暮 以避君側之亂。 而 歸休,詠宏徽於刊勒。 余祖車騎建大功淮、肥,<u>江</u>左 廢興隱顯,當是賢達之心,故選神麗 狹三閭之喪 得免横流 之

所,以

申高棲之意。

始此 慚尚子之晚研。 班嗣本不染世,故曰夙悟; 山、遺訓 仰 前 哲之遺訓 於後也。 年與疾 性情各有所便,山居是其宜也。 尚平未能去累,故曰晚研。 俯性情之所便。 而 偕來, 志乘 拙 奉微軀以宴息,保自事以乘閑。 而 易 想遲二人, 更以年衰疾至。 俱 云:「向晦入宴 旋。 謝平生於知 息。」莊周 云:「自事其 遊, 志寡求拙曰乘, 棲清 曠 愧班生之夙悟。 心。」此二是其所處。 於
弁可山居。 Щ إال 謂經 月

與知遊別,故曰謝平生;就山川,故曰棲淸曠。

之裏也。 巖,此憶江湖左右與之同,而山嶽形勢,池城所無也。 往渚還汀,謂四面有水; 面山背阜,亦謂東西有山,便是四水 邪亘,側直齊平。 其居也,左湖右江,往渚還汀。面山背阜,東阻西傾。抱含吸吐,款跨紆縈。 抱含吸吐,謂中央復有川。款跨紆榮,謂邊背相連帶。迂回處謂之邪亘;平正處謂之側直。 枚乘曰:「左江右湖,其樂無有。」此吳客說楚公子之詞。當謂江都之野,彼雖有江湖而乏山 緜聯

至外谿、 山川。 千麓。 入西谿之裏,得石缘,以石爲阻,故謂爲缘。石滂在西谿之東,從縣南入九里,兩面峻峭數十丈,水自上飛下。比 西谿、南谷分流,谷鄣水畎入田口。西谿水出始寧縣西谷鄣,是近山之最高峯者,西溪便是□之背。〔三五〕 近東則上田、下湖,西谿、南谷,石掾、石滂,閔硎、黄竹。決飛泉於百仞,森高薄於 ,封璒十數里,皆飛流迅激,左右巖壁綠竹。閔硎,在石滂之東谿,逶迤下注良田。黃竹與其連,南界莆中 寫長源於遠江,派深毖於近瀆。 上田在下湖之水口,名爲田口。下湖在田之下下處,並有名

阡。 江 二水之口 [中,行者莫不駭慄。 近南 拂青林 ,排沙積岸,成此洲漲。 則會以雙流,縈以三洲。 而激波,揮白沙而生漣。 槃者是縣故治之所,在江之□□用槃石竟渚,〔□ヤ〕 表裏離合、「三六」是其貌狀也。 表裏回游,離合山川。崿崩飛於東峭,槃傍薄於西 雙流,謂剡江及小江,此二水同會於山南, **崿者謂回江岑,在其山居之南界,** 並帶青林而連白沙也。 便合流注下。三洲 有石跳出,將崩 在

也。

列傳第二十七 謝靈運

映紅。 南,王子所經始,並臨江,皆被以綠竹。山高月隱,便謂爲陰;鳥集柯鳴,便謂爲風也 石室,在小江口南岸。壁,小江北岸。並在楊中之下。壁高四十丈,色赤,故曰照澗而映紅。 近西則楊、賓接峯,唐皇連縱。 月隱 山而成陰,木鳴柯以起風。楊中、元賓,並小江之近處,與山相接也。 室、壁帶谿,曾、孤臨江。 竹緣浦以被綠,石照澗而 唐皇便從北出。室, 曾山之西, 孤山之

慶靈。 氏、郗氏、謝氏、陳氏各有一奧,皆相掎角,並是奇地。三菁,太平之北。太平,天台之始。 接,奇地所無,高於五嶽,便是海中三山之流。」韭以菜爲名。四明、方石,四面自然開窗也。 出新塚。 浩溔。三己 故曰山峨下而回澤。〔三〕裏耆漫石數里,水從上過,故曰瀨石上而開道。 出江,並是美處。義熙中,王穆之居大巫湖,經始處所猶在。兩型皆長溪,外習出山之後四五里許,裏督亦隔 遠東則天台、桐栢,方石、太平,二韭、四明,五奧、三菁。 近北則二巫結湖,兩種通沼。至之横、石判盡,休、周分表。引修隄之逶迤,吐泉流之 凌石橋之莓苔,越楢谿之紆縈。 横山,野舍之北面。 山巉下而回澤, 常石,野舍之西北。 瀨石上而開道。 巫湖舊唐,故曰修隄。 天台、桐柏、七縣餘地、南帶海。 大小巫湖,中隔一山。 休山東北,周里山在休之南,並是北邊。 長谿甚遠,故日 表神異於緯牒,驗感應於 二韭 方石,直上萬丈,下有長 一泉流。 五奥者, 四明、 在圻西北。[三0]邊浦 常石幔□□□□ 五奥, 曇濟道人、蔡 皆相連 <u>—</u>

遠南則松箴、棲雞、唐嵫、漫石。 崪、嵊對嶺,嶉、孟分隔。 入極浦而邅回,迷不知

谿,亦是縉雲之流云。

此諸山並見圖緯,神仙所居。

往來要徑石橋,過楢谿,人跡之艱,不復過此

嵊與分界,去山八十里,故曰遠南。 箴在棲雞之上,緣江。 謂白燥尖者最高,下有良田,王敬弘經始精舍。 其所適。 上欽崎而蒙籠,下深沈而澆激。 唐嵫入太平水路,上有瀑布數百丈。 前嶺鳥道,正當五十里高,左右所無,就下地形高, 曇濟道人住孟山,名曰孟埭,芋薯之疁田。 棲雞,在保口之上,別浦入其中, 漫石在唐嵫下,都景興經始精舍, 乃當 周回 清溪秀竹, 不 【甚深, 稱。 亦是名山之流。 遠望 四山之裏。 能 廻開 巨石, Щ . 甚奇, 峰、 松

遠西則下闕。〔言〕

有趣之極。

此中多諸浦澗,傍依茂林,迷不知所通,嶔崎深沈,處處皆然,不但一處。

浥。信荒極之綿眇,究風波之睽合。江從山北流,窮上虞界,謂之三江口,便是大海。 廻沈 王,以其善處下也。 相縈擾也。 遠北則長江永歸,互海延納。 大荒東極,故爲荒極。 海人謂孤山爲崐。 薄洲有山,謂之島嶼,即洲也。 風波不恒,爲睽合也。 崐漲緬曠,島嶼綢沓。 漲者,沙始起將欲成嶼, 山縱橫以布護, 縱橫無常, 老子謂海爲百谷 水迴沈而縈 於一 處

瀾減則沈沙顯。 此楚貳心醉於吳客,河靈懷慚於海若。 面常石。 電激雷崩,飛流灑漾。 徒觀其南術之口 此二山之間,西南角岸孤山,此二山皆是狹處,故曰生蟣。 及風興濤作,水勢奔壯。于歲春秋,在月朔望。湯湯驚波,滔滔駭浪。 凌絕壁而起岑,橫中流而連薄。始迅轉而騰天,終倒底而 南術是其臨江舊宅,門前對江,三轉會山,]岸測深,相渚知淺。[三]洪濤滿則曾石沒,淸 **勇門以南上便大閬,故曰成衍。** 路窮四江,對岸西 岸高測深,渚 見壑。

列

以瘳病。太子,國之儲貳,故曰楚貳。河靈,河伯居河,所謂河靈。懼於海若,事見莊周秋水篇 下知淺也。江中有孤石沈沙,隨水增減,春秋朔望,是其盛時。故枚乘云,楚太子有疾,吳客問之, 舉秋濤之美,得

在宅裏山之東麓。 棟於江源。 伊臨谿而傍沼,迺抱阜而帶山。 一館屬望,殆無優劣也的 爾其舊居,曩宅今園,枌槿尙援,基井具存。〔一一]曲術周乎前後,直陌矗其東西。 敞南戶以對遠嶺,關東窗以矚近田。 東窗矚田,兼見江山之美。三間故謂之駢梁。 考封域之靈異,實茲境之最然。 門前一棟,枕蟣上,存江之嶺,南對江上遠嶺。此 田連岡而盈疇,嶺枕水而通阡。 **喜駢梁於巖麓**, 棲孤 葺室 豊

牧。 迎秋晚成。 須邪。工商衡牧,似多須者,若少私寡欲,充命則足。 生何待於多資,理取足於滿腹。 阡陌縱橫,塍埓交經。導渠引流,脉散溝幷。 **兼有陵陸,麻麥粟菽。候時覘節,遞藝遞熟。** 許由云:「偃鼠飲河,不過滿腹。」謂人生食足,則歡有餘,何待多 但非田無以立耳。 蔚蔚豐秫, 苾苾香秔。[三]送夏蚤秀, 供粒食與漿飲,謝工商與衡

泉於春流,馳寒波而秋徂。 言不盡意,萬不寫一耳。 諸澗出源入湖,故曰濬潭澗。澗長是以窈窕。除菰以作洲,言所以紆餘也。 旦延陰而物淸,夕棲芬而氣敷。顧情交之永絕,覬雲客之暫如。 自園之田,自田之湖。泛濫川上,緬邈水區。濬潭澗而窈窕,除菰洲之紆餘。歩溫 風生浪於蘭渚,日倒景於椒塗。飛漸榭於中沚,取水月之歡 此皆湖中之美,但患

豊蕙草之空殘。卷**敂**弦之逸曲,處江南之哀歎。秦筝倡而溯游往,唐<u>上</u>奏而 鮮。 零出離騷。檢弦是采菱歌。江南是相和曲,云江南采蓮。

秦筝倡兼茄篇,唐上奏蒲生詩,皆感物致賦。 播綠葉之鬱茂,含紅敷之繽翻。怨淸香之難留,矜盛容之易闌。必充給 水草則萍藻薀莢,雚蒲芹蓀,蒹菰蘋蘩,蕝荇菱蓮。 雖備物之偕美,獨扶渠之華 舊愛還。 而後搴, 魚藻蘋蘩

荇亦有詩人之詠,不復具敍。

也。 雙核桃杏人也。六根者,苟七根、五茄根、葛根、野葛根、□□根也。〔爲〈〕五華者,菫華、芫華、 所出藥處,於今不復依,隨土所生耳。此境出藥甚多,雷公、桐君,古之采藥。醫緩,古之良工,故曰別悉。 苓千歲而方知。 建者,附子、天雄、烏頭。水香,蘭草。林蘭,支子。卷栢、伏苓,並皆仙物。 而殊性,三建異形而同出。水香送秋而擢蒨,林蘭近雪而揚猗。 九實者,連前實、槐實、栢實、兔絲實、女貞實、蛇床實、臺荆實、蓼實、□□也。〔□+〕二冬者,天門、 本草所載,山澤不一。 映紅葩於綠蔕,茂素蕤於紫枝。旣住年而增靈,亦驅妖而斥疵。 雷、桐是別,和、緩是悉。參核六根,五華九實。二冬並稱 凡此衆藥,事悉見於神農。 卷栢萬代而不殞,伏 檖華、 菊華、 麥門冬。 參核者, 旋覆華 本草

驗東南之所遺。 露夕沾而悽陰,風朝振而淸氣。捎玄雲以拂杪,臨碧潭而挺翠。蔑上林與淇澳, 其竹則二箭殊葉,四苦齊味。水石別谷,巨細各彙。旣修竦而便娟,亦蕭森而蓊 企山陽之游踐,遲鸞鷖之棲託。憶崑園之悲調,慨伶倫之哀籥。衞女

列

行而 陽,竹林之游;鸞鷺,棲食之所。 蕭森、蓊蔚,皆竹貌也。 水竹,依水生,甚細密,吳中以爲宅援。石竹,本科叢大,以充屋榱, 思歸詠,楚客放而防露作。 上林,關中之禁苑,淇澳,衞地之竹園,方此皆不如。 崑山之竹任爲笛,黃帝時, 二箭,一者苦箭,大葉;一者笄箭,細葉。 伶倫斬其厚均者吹之, **巨者竿挺之屬,細者無箐之流也。** 東南會稽之竹箭,唯此地最富焉。 爲黃鍾之宮。 四苦,青苦、白苦、紫苦、黄苦。 衛女思歸,作竹 修竦、便娟。 |Щ

学之詩,楚人放逐,東方朔感江潭而作七諫

長谷以傾柯,攢積石以插衢。 高沃塉,各隨所如。 石,各隨其方。 而芬腴。 其木則松栢檀櫟,□□ 送墜葉於秋晏,遲含萼於春初。 **灘騷云:「青春受謝,白日昭只。」詩云「萼不韓韓」也。** 榦合抱以隱岑, 杪千仞而排虛。 桐楡。〔三〕檿柘穀棟,楸梓檉樗。 華映水而增光,氣結風 皆木之類, 選其美者載之。 凌岡上而喬竦,蔭澗下 而 回 敷。 剛柔性異,貞脆質殊。 當嚴勁而葱倩, 山脊日岡。 岡上澗下,長谷積 而 扶疏 承和煦 沿沿

宜匪敦。 根源,但觀其貌狀,相其音聲 植物旣載,動類亦繁。 草、木、竹、植物。 ,則知山川之好。 魚、鳥、獸、動物。 飛泳騁透,胡可根源。 興節隨宜,自然之數,非可敦戒也 獸有數種,有騰者,有走者。 觀貌相音,備列山 走者騁,騰者透。 إال 謂種類旣繁, 寒燠順節 不可 隨

浪,汎苻流淵。 魚則纋鱧鮒鱮, 或鼓鰓而湍躍,或掉尾而波旋。 **鱒鯇鰱鰛,魴鮪炒鱖,鱨鯉鯔鱣。** 鱸鮆乘時以入浦,鱤鯢沿瀨以出泉。 輯采雜色,錦爛雲鮮。 唼藻戲

音優。 音居綴反。 鱧音禮。 鱨音上羊反。 鮒音附。 鯔音比之反。 鱮音敍。 鱒音寸袞反。 鱣音竹仚反。 鯇音晥。 皆說文、字林音。 鰱音連。 騙音毖仙反。 詩云:「錦衾有爛。」故云錦 魴音房。 鮪香痏。 爛。 魦音沙。 鱸鮆 時 鱖

魚。鱤音感。鯅音迅。皆出谿中石上,恒以爲翫。

博物志。 上參。 霜始降,雁來賓。 **香下竺反。鵝晉秋。鷺晉路。鴇晉保。** 云:「山梁雌雉、時哉時哉。」海鳥爱居,臧文仲不知其鳥,以爲神也。事見左傳。 風,朔禽避涼。 鳥 薄回涉以弁翰,映明壑而自耽。 則 鸐音翟,亦雉之美者,此四鳥並美采質。 鵑鴻鵙鵠, 歲莫云,雁北向。政是陽初生時,荑生歸北,霜降客南。山雞映水自翫其羽儀者。 夷生歸北,霜降客南。 鵝鷺鴇橢。 鵝 音相。 雞鵲 繡質, 唐公之馬,與此鳥色同,故謂爲鵬, 鳧音符,野鴨也,常待晨而飛。 接響雲漢,侶宿江潭。 **鵾音昆。鳰音洪。** 鶷鸐綬章。 鶂音溢。 晨鳧朝集,時鶴山梁。 朔禽、雁也、寒月轉往衡陽。 聆清哇以下聽,載 左傳云:「六鴉退飛」,字如此。 鷮音已消反,長尾雉也。 香相。 鷄鵲鸛鸐, 見張茂先 王子而 海鳥違 **}論 語** 鵠

懸反。 絕 音元,野羊大角。 於深硎。 Щ 獌音曼,似獾 上則 猨 蹲谷底而 屬音鬼珉反。 揮貍獾, 犴獌猰盔。 而長,狼之屬,一曰貙。 長嘯,攀木 麝香京,能踔擲。 杪 猰音安黠反。 山下則熊羆豺虎,羱鹿屬麖。 而哀鳴。 虎長嘯,猨哀鳴,鳴聲可 **独音弋生反, 貍之黄黑者, 一曰似扮。 猨音袁。 獅音魂**。 翫 **貍音力之反。獾音火丸反。** 擲飛枝於窮崖, **豺音在皆**反。 犴音五 踔空 羱

緡 綸 不 ·投,置 羅 不披。 磻弋靡用, 蹄筌誰施。 鑑虎狼之有仁,傷遂欲之無崖。 顧

列

傳

第

法,故得免殺生之事。 親。 易齡 鷗鳥舞而不下。 於林池。 世云虎狼暴虐者,政以其如禽獸,而人物不自悟其毒害,而言虎狼可疾之甚,苟其遂欲, 而涉道,悟好生之咸宜。 八種皆是魚獵之具。 今無害彼之心,各說豫於林池也。 苟此悟萬物好生之理。[易云:「不遠復, 自少不殺,至乎白首,故在山中,而此歡永廢。 率所由以及物,諒不遠之在斯。 無祗悔。」庶乘此得以入道。莊周云,海人有機心, 莊周云,虎狼仁獸,豈不父子相 撫鷗鮍而悅豫, **豈復崖限。** 自弱齡奉 杜機心

<u>鐵王、香積,事出維靡經。論語云:「溫故知新。」理旣不絕,更宜復溫,則可待爲己之日用也。〔景〕</u> 林巍園制苑,仿佛在昔,依然託想,雖綷容緬邈,哀音若存也。招提,謂僧不能常住者,可持作坐處也。 成。」此道惠物也。鹿苑,說四眞諦處。靈鷺山,說般若法華處。堅固林,說泥洹處。 聚落是墟邑,謂歌哭諍訟,有諸諠譁,不及山野爲僧居止也。經敎欲令在山中,皆有成文。老子云:「善貸且善 席,想香積之惠餐。 之芳園。雖綷容之緬邈,謂哀音之恒存。 寓 治市空言,必有貸以善成。欽應野之華苑,羨靈鷲之名山。企堅固之貞林,希菴羅 敬承聖誥,恭窺前經。山野昭曠,聚落羶腥。故大慈之弘誓,拯羣物之淪傾。豈 事在微而思通,理匪絕而可溫。賈誼是屈云:「恭承嘉惠。」敬承,亦此之流。 建招提於幽峯,冀振錫之息肩。庶鐙王之贈 菴羅園,說不思議處。 所謂 息肩。 今旁

露乘星。 爱初 研其淺思,罄其短規。 經略,杖策孤征。 入澗水涉,登嶺山行。 非龜非筮,擇良選奇。 陵頂 不息,窮泉不停。 翦榛開逕,尋石覓崖。 櫛風 沐雨,犯 四山周

百年之高木、「四〕納萬代之芬芳。 龜筮,貧者旣不以麗爲美,所以卽安茅茨而已。 間於城傍。 回 ,雙流逶迤。 欣見素以抱樸,果甘露於道場。 面南嶺,建經臺,倚北阜,築講堂。 抱終古之泉源,美膏液之清長。 是以謝郊郭而殊城傍。 云初經略,躬自履行,備諸苦辛也。 傍危峯,立禪室,臨浚流,列僧房。對 然清虛寂漠,實是得道之所也。 謝麗塔於郊郭 罄其淺短, ",殊世 無假於

性 仙 松桂之苦味,夷皮褐以頹 如 者雖未及佛道之高 而 妻子,輕舉入山 期,實西方之潛兆。 業莫矯。 此。 者 披情。 且 亦 獲 賤 苦節之僧,明發懷抱。 明 往石門瀑 長 物重 師以 生。 觀三世以其夢,撫六度以 雖未階於至道, 自發悟 ,外緣都絕,魚肉不入口,粪掃必在體,物見之絕歎,而 己,棄世 方之松 布中路高棲之游,昔告離之始,期生東山,沒存西方。 ,然出於世 ,故不辭 菌 殤彭 一希靈。 雖一 苦味類形 表矣。 遊然 形。 日以千載,猶恨相遇之不早。 且. 事紹 有 浮丘公 駭彼促年, 愛是長生。 緬絕於世 間 也。」莊周云「 羨蟬蛻之匪 也 人徒,心通世表。 是王子喬師,安期先生 取道。 纓。 和以天倪。」倪者,崖也。 百, 乘恬知以寂泊, 指松菌 撫雲蜺其若驚。 而 是 是遊是憇,倚石構草。 冀浮丘之誘接, :興言, 馬明生 法師處之夷然。 相遇之欣,實以一 謂曇隆、 師, 含和理之窈窕。 良未齊於殤彭 數經歷 二事出列仙傳。 法 陵名山 流二法師也。 名山, 詩 日爲千載, 人西發不勝造道者, 望安期 遇余巖室, 而 屢 寒暑有移,至 洞眞經 之招 指東山 二公辭恩愛,棄 想, 猶 此 慨 云 章敍 迎。 披露其情 過巖室 恨不早。 以冥 其亦 今學 仙 廿

壆

爲渫。 木子。 以療病。 備 菰 成,甘以播 簃于谷。 物 翦蒲,以薦以茭。 爲繁,略載靡悉。 山 **階音覆,字出字林。** 作 播治瘫核,术治痰冷。 楊勝 水役,不以一牧。 熟。 所拮,秋冬腐獲。 慕椹高林 詩人云:「六月食鬱及薁。」獵涉字出爾雅。 旣坭旣埏,品收不一。其灰其炭,咸各有律。 此一章謂是山作及水役採拾諸事也。 椹晉甚,味似菰菜而勝,刊木而作之,謂之慕。 芨音及, 採以爲紙。 ,剝芨巖椒。 資待各徒,隨節競逐。 野有蔓草,獵涉蘡薁。 掘蒨陽崖,擿鮮陰摽。 陟嶺刊木,除榛伐竹。 然漁獵之事皆不載。 术,术酒,味苦。 亦醞 山清, 晝見搴茅, 宵見索綯。 六月採蜜,八月樸栗。 播,播酒,味甘, 介爾景福。 楊, 楊桃也。 抽笋自篁,擿 **蒨音倩,採以** 並至美,兼 苦以 Щ 闧 間記 芟 术

翠椽 以葺 流開 出,潺湲於東檐,桀壁對時,碎確於西霤。 **峯参差出其間** 水道通耳。 湍 T館,瞰南峯以啓軒。[B1]羅會崖於戶裏, 若 辦 迺南 音尠,採以爲飲。 視奔星之俯馳, 觀 凌阜泛波,水往步還。 風 北兩居,水通陸阻。 瞻雲,然後方知其處所。 1、連岫: 複陸成其坂。 採蜜撲栗,各隨其月也。 顧]之未牽。[晉] 鷃鴻翻翥而莫及,何但灩雀 還回往 南 觀風瞻雲,方知厥所。 衆流 山則夾 匝, 漑灌 渠 修竹葳蕤以翳薈,灌木森沈以蒙茂。 枉渚 列鏡瀾於窗前。 以環 二田,周嶺三苑。 員巒。 近, 諸堤擁 兩居謂南北兩處,各有居止。 呈美表 抑以 因 九泉別澗,五谷 趣, 一丹霞 接遠。 胡可 以 頳 之翮 勝單。 楣, 遠堤兼 翾 附 異巘 。沈泉傍 峯崿阻 抗北 蘿曼延 碧雲以 陌 近 頂

之好, 清川 三口。 階基回互、橑櫺乘隔。 渠,展轉幽奇,異處同美。 浮齡之如借。 南,悉是竹園。 曾峯,俯鏡濬壑。 至所居之處,自西山開道,迄于東山,二里有餘。南悉連嶺疊郡,青翠相接,雲煙霄路, **冝田野,或升或降,當三里許。 塗路所經見也,則喬木茂竹,緣畛彌阜,橫波疎石,側道飛流,** 以攀援,花芬薰而媚秀。 如鏡,傾柯盤石,被隩映渚。 備盡之矣。 方壁西南石門世□南□池東南、〔≌〕皆別載其事。緣路初入,行於竹逕,半路闊,以竹渠澗。 東西百丈,南北百五十五丈。 刊剪開築,此焉居處,細趣密翫, 去巖半嶺,復有一樓。 眇遁逸於人羣,長寄心於雲霓。 路北東西路,因山爲鄣。 此焉卜寢,翫水弄石。 西巖帶林,去潭可二十丈許,葺基構宇,在巖林之中,水衞石階,開窗對 日月投光於柯間, 迥望周眺,旣得遠趣,還顧西館,望對窗戶。緣崖下者,密竹蒙逕, 北倚近峯,南眺遠嶺,四山周回,溪澗交過,水石林竹之美, 正北狹處, 非可具記,故較言大勢耳。越山列其表側傍緬□ 風露披淸於喂岫。 **邇卽回眺,終歲問斁。** 南山是開創卜居之處也。 踐湖爲池。 南山相對, 夏涼寒燠,隨時取適 殆無倪際。 皆有崖巖。 從江樓步路,跨越山嶺,綿 傷美物之遂化,怨 以爲寓目之美觀。 從逕入谷,凡 東北枕壑,下則 旣入東南傍山 巖岫隈 □爲異觀 山,仰眺 從北直 及 曲 有

邈 緬 歸。 因以小湖,鄰於其隈。 **氿濫、肥毖,皆是泉名,事見於詩。 云此萬泉所湊,各有形勢。** 衆流所湊,萬泉所回。氿濫異形,首毖終肥。別有山水,路 也。[四]

求 歸 其路,迺界北山。 棧道傾虧,蹬閣連卷。復有水逕,繚繞回圓。 瀰瀰平湖,弘

隘入險,俱會山首。 泓澄 南漘以橫前,轉北崖而掩後。 淵。 孤岸竦秀,長洲芊綿。 瀬排沙以積丘,峯倚渚以起阜。 隱叢灌故悉晨暮,託星宿以知左右。 旣瞻旣眺,曠矣悠然。及其二川合流,異源 一石傾瀾而捎巖,木映波而結藪。逕 往反經過,自非巖澗,便 同口。 赴

是水逕,洲島相對,皆有趣也。

樹凌 羣竦以嶻嶭。 濁。 土山載石曰砠。 霜而 石傍林而插巖,泉協澗而下谷。淵轉渚而散芳,岸靡沙而映竹。 山 川澗石,州岸草木。旣標異於前章,亦列同於後牘。山匪砠而是岵,川有淸而無 振綠。 山有林曰岵。此章謂山川衆美,亦不必有,故總敍其最。居山之後事,亦皆有尋求也。 浮泉飛流以寫空,沈波潛溢於洞穴。凡此皆異所而咸善,殊節而俱悅。 向陽則在寒而納煦,面陰則當暑而含雪。連岡則積嶺以隱嶙,舉峯則 草迎冬而結葩,

不得不然。 右揚較而陳之。」 言,誠特比推。〔55〕謂寒待綿纊,暑待締絡,朝夕飡飲,設此諸業以待之。 藥以療疾,又在其外,事之相推,自 春秋有待,朝夕須資。旣耕以飯,亦桑貿衣。藝菜當肴,採藥救頹。自外何事,順 至於聽講放生,研書敷文,皆其所好。韓非有揚較,班固亦云「揚較古今」,其義一也。」左思曰:「爲左 法音晨聽,放生夕歸。研書賞理,敷文奏懷。凡厥意謂,揚較以揮。且列于

北山二園,南山三苑。百果備列,乍近乍遠。羅行布株,迎早候晚。猗蔚溪澗,森

林。 流芬於回巒,椑柿被實於長浦。 疎崖巘。杏壇、捺園,橘林、栗圃。 左太沖亦云:「戶有橘柚之園。」桃李所殖甚多,棗棃事出北河、濟之間,淮、潁諸處,故云殊所也 莊周云:「漁父見孔子杏壇之上。」維摩詰經榛樹園。 桃李多品,棃棗殊所。 枇杷林檎,帶谷映渚。 揚雄蜀都 賦云橋 椹梅

畦町所藝,含藥藉芳,蓼蕺葼薺,葑菲蘇薑。 綠葵眷節以懷露,白薤感時而負霜。

園。 寒葱摽倩以陵陰,春藿吐苕以近陽。 灌蔬自供,不待外求者也 葑菲見詩栢舟中。管子曰:「北伐山戎,得寒葱。」庾闡云,寒葱挺

之溪蓀。訪鍾乳於洞穴,訊丹陽於紅泉。此皆住年之藥,卽近山之所出,有采拾,欲以消病也。 名山之奇藥,越靈波而憩轅。採石上之地黃,摘竹下之天門。摭曾嶺之細辛,拔幽澗 弱質難恒,頹齡易喪。 撫鬢生悲,視顏自傷。承淸府之有術,冀在衰之可壯。

兮陟雲根,坐澗下兮越風穴。在茲城而諧賞,傳古今之不滅。 衆僧冬夏二時坐,謂之安居,輒 倡、歸淸暢於北机。非獨愜於予情,諒僉感於君子。山中兮淸寂,羣紛兮自絕。 九十日。衆遠近聚萃,法鼓、頌偈、華、香四種,是齋講之事。析說是齋講之議。乘此之心,可濟彼之生。南倡者都 兮匪多,得理兮俱悦。寒風兮搔屑,面陽兮常熱。炎光兮隆熾,對陰兮霜雪。惕曾臺 香飛越。析曠劫之微言,說像法之遺旨。乘此心之一豪,濟彼生之萬理。啓善趣於南 安居二時,冬夏三月。遠僧有來,近衆無闕。法鼓朗響,頌偈清發。散華霏蕤,流 周聽

傅

第二十

七

講,北 机者法師。 山中靜寂,實是講說之處。無有林木,可隨寒暑,恒得淸和,以爲適也

之往還。 驚魂於殆化,收危形於將闌。 漾水性於江流,吸雲物於天端。 覩騰翰之頏頡, 視鼓鰓 人心發狂。猜害者恒以忍害爲心,見放生之理,或可得悟也。 命,是好生事也。能放生者,但有一往之仁心,便可拔萬族之險難。 好生之篤,以我而觀。 馳騁者儻能狂愈,猜害者或可理攀。 懼命之盡,吝景之歡。分一往之仁心,拔萬族之險難。 云物皆好生,但以我而觀,便可知彼之情。 水性雲物,各尋其生。老子云,馳騁田獵,令 **吝景懼** 招

律曆之書。 以申世模。篇章以陳美刺,論難以覈有無。兵技醫日,龜筴筮夢之法,風角冢宅,算數 散之全樸,救已頹於道術。嗟夫!六蓺以宣聖教,九流以判賢徒。國史以載前紀,家傳 二書,最有理,過此以往,皆是聖人之敎,獨往者所棄。 輪扁語齊桓公,公之所讀書,聖人之糟粕」。縢者,金縢之流也。柱下,老子。豫上,莊子。二、七,是篇數也。云此 哲人不存,懷抱誰質。糟粕猶在,啓縢剖袠。見柱下之經二,覩濠上之篇七。承未 或平生之所流覽,並於今而棄諸。 驗前識之喪道,抱一德而不渝。莊周云

章,含笑奏理。 各有倫。 伊昔齠齓,實愛斯文。 爱 暨 山棲,彌歷年紀。 謂少好文章,及山棲以來,別緣旣闌,尋慮文詠,以盡暇日之適。便可得通神會性,以永終朝。 **援紙握管,會性通神。詩以言志,賦以敷陳。 箴銘誄頌,咸** 幸多暇日,自求諸己。 研精靜慮,貞觀厥美。 懷秋成

子眞耕 爲業。 皓棲商 公逐鹿入山 人。」無鬼問:「君絀嗜欲,屛好惡,則耳目察矣。」常采芋栗。 楚王聞其賢,使使者聘之,於是遂游諸名山,在蜀峨眉山上。 名,義亦皆出莊周。 以表谷,涓隱巖以搴芳。□ 下衰之在旃。 云:「善攝生者。」莊子云,謂之不善持生。 Щ 四 隱谷口,大將軍 1 皓避秦 而頤志,卿寢茂而敷詞。 迺乘攝持之告,評養達之篇。 畏絕迹之不遠,懼行地之多艱。均上皇之自昔,忌 臺孝威 ,見之。

涓子隱於

宕山,好餌术,告伯陽琴心三篇。 一。原心高居唐 亂,入商洛深山,漢祖召不能出。 投吾心於高人,落賓名於聖賢。 居武安山下,依崖爲土室,采藥自給。 廣成子在崆峒之上,黃帝之師也。 王鳳禮聘不屈,〕[吾0]遂與弟子別於山阿,終身不反。 而胥宇, 又云,養生有無崖,達生者不務生之所無 臺依崖而穴墀。咸自得以窮年,眇貞思於所遺。 司馬長卿高才,而處世不樂預公卿大事,〔病免, 許由隱於箕山,堯以天下讓 高文通 徐無鬼嚴棲,魏侯勞之,問一先生苦山林矣,乃肯見寡 老菜子耕於蒙山之陽,著書十五篇,言道家之事,織备 廣滅景於崆峒,許遁音於箕山。]「[gh]鄭別谷而永逝。 庚桑楚得老子之道,「四八」居眼礨之山。 居西唐山、從容自娛也。 梁伯鸞隱霸陵 :: 柰何。 而不取。]萊庇蒙以織畚。[景] 梁去霸而之會, 絕迹, 山中,耕織以 愚公居于駒阜, 上皇,下衰,賓 家居茂陵。 楚狂 自娛,後復 愚假駒 接奥, 齊桓 老子 顩

薀終古於三季, 曁 其 窈 窕 幽深,寂漠虚遠。 俟通 明於五眼。 事 權近慮以停筆, 與情乖,理 與 、形反。 抑淺知而絕簡。 既耳目之靡端,豈足跡 謂此 旣 非 人跡 所 之所踐 求 更待

列 傳

第

+

七

謝

靈 運

三明 五 通、然 後可踐履耳。 故停筆絕簡,不復多云,冀夫賞音悟夫此旨也。

行,或一日百六七十里,經旬不歸,旣無表聞,又不請急,上不欲傷大臣,諷旨令自解。 任遇,「三」靈運意不平,多稱疾不朝直。穿池植援,種竹樹菫,驅課公役,無復期度。出郭游 文帝唯以文義見接,每侍上宴,談賞而已。王曇首、王華、殷景仁等,名位素不踰之,並〕見 文竟,手自寫之,文帝稱爲二寶。旣自以名輩,才能應參時政,初被召,便以此自許,旣至, 撰晉書,粗立條流。書「竟不就。尋遷侍中,日夕引見,賞遇甚厚。 乃出就職。 太祖 登祚,誅徐羨之等,徵爲祕書監,再召不起,上使光祿大夫范泰與靈運書敦獎之, 使整理 祕閣書,補足遺闕。「哥」又以晉氏一代,自始至終,竟無一家之史,令靈運 靈運詩書皆兼獨絕,每 靈運

乃上表陳疾,上賜假東歸。將行,上書勸伐<u>河北曰</u>: 定趙魏,大同文軌,使久凋反於正化,偏俗歸於華風。運謝事乖,理違願絕,仰德抱悲, 逆虜,窮苦備罹,徵調賦斂,靡有止已,所求不獲,輒致誅殞,身禍家破,闔門比屋,此亦 遘紛京師,豈慮託付。遂使孤城窮陷,莫肯拯赴。[mē]忠烈囚朔漠,縣河三千,翻爲寇 恨 !存生盡。況陵塋未幾,凶虜伺隙,預在有識,誰不憤歎。 而景平執事,並 晚遣鎭戍,皆先朝之所開拓,一旦淪亡,此國恥宜雪,被於近事者也。 自中原喪亂,百有餘年,流離寇戎,湮沒殊類。先帝聰明神武,哀濟羣生,將欲盪 又北境自染 非 其才,且

仁者所爲傷心者也。

茲日。 倍多 載,是謂一紀,曩有前言。 聖明,此而弗乘,後則未兆。 前世成事,著於史策者也。 昔魏氏之强,平定荆、冀,乃乘袁、劉之弱,晉世之盛,拓開吳、蜀,亦因葛、陸之衰。此皆 還路已絕,雖遣救援,停住河東,遂乃遠討大城,欲爲首尾。而西寇深 會,於我爲易,貴在得時。器械旣充,衆力粗足,方於前後,乃當 困,下莊之形,驗之今役。仰望聖澤,有若渴飢,注心南雲,爲日已久。 氣喪魄,指日就盡。 人事,理數相得,興亡之度,定期居然。 固,徒棄巢窟,未足相拯。 一,則萬全無必矣。 咸云 口 數,百萬有餘,田賦之沃,著自貢典,先才經創,基趾猶存,澄流引源,桑麻蔽野, 若相持未已,或生事變,忽值新起之衆,則異於今,苟乖其時,難爲經略,雖兵食 西廣舍末,遠師隴外,東廣乘虛,呼可掩襲。 但長安達律,潼關失守,用緩天誅,假延歲月,日來至今, 又歷觀前代,類以兼弱爲本,古今聖德,未之或殊。 况五胡代數齊世,虜期餘命,盡於來年。 師老於外,國虛於內,時來之會,莫復過此。觀兵燿威,實在 自羌平之後,天下亦謂虜當俱滅,長驅滑臺,席卷下城,奪 即日府藏,誠無兼儲,然凡造大事,待國 故古人云:「既見天殃,又見人災,乃可以謀。」 西軍旣反,得據關中,長圍咸陽, 1有優。 自 相攻伐, 富兵强,不必乘 山重阻,根本自 來蘇之冀,實歸 常議損益,久證 豈不以天時 兩取 其

强富之實,昭然可知。 爲國長久之計,孰若一往之費邪。

前漢 宣烈,虎臣盈朝,而天威遠命,亦何敵不滅,〔邑〕矧伊頑虜,假日而已哉。 筆,庶免史談之憤,以此謝病京師,萬無恨矣。 久欲上陳,懼在觸罝,[晉]蒙賜恩假,暫 明聖哲,天下歸仁,文德與武功並震,霜威共素風俱舉,協以宰輔賢明,諸王美令,岳牧 時虐亂,天祚其德,亦由鉅平奉策,荷、賈折謀,故能業崇當年,區宇 隴西傷破,鼂錯興言,匈奴慢侮,賈誼憤歎。 務,久定神謨。臣卑賤側陋,竄景巖穴,實仰希太平之道,傾覩岱宗之封, 無雜人,連嶺判阻,三關作隘。 達禁省,消渴十年,常慮朝露,抱此愚志,**昧死以**聞。 ,屯軍霸上,通火甘泉。 或懲關西之敗,而謂河北難守。 况乃遠戍之軍,值新故交代之際者乎。 若遊騎長驅,則沙漠風靡,若嚴兵守塞,則冀方山 二境形勢,表裏不同,關西雜居,種類不一,昔在 方於今日,皆爲賖矣。 一統。 晉武 河北悉是舊戶,差 中主耳,值 雖乏相如之 伏惟深機 況今陛 是歲, .固。昔 下聰 志 孫

元嘉 五年。

運

以疾東歸,而遊娛宴集,以夜續畫,復爲御史中丞傅隆所奏,

坐以発官。

之游,時人謂之四友。 靈 運 旣東還,與族弟惠連、東海何長瑜、潁川荀雍、泰山羊璿之,以文章賞會,共爲 惠連幼有才悟,而輕薄不爲父方明所知。靈運去永嘉還始寧,時方 山澤

列傳第二十七 謝靈運

明爲 在郡 南 行復 而飴 文流 寄書與宗 惠連,雍、 外散騎 曰:「長瑜 中郎行參軍,掌書記之任。「長己行至板橋,遇暴風 出。 會稽郡。 内, 行 以 郎。 下客之食。 靈 如 義慶 便可還也。」激 人何勗,以韻語 璿之不及也。 運叉以 **璿之字** 此者五六句,而輕薄少年遂演 大怒,白太祖除爲廣州 靈運嘗自始寧至會稽造方明,過視惠連, 爲絕倫 尊旣不能禮賢,宜以長瑜還靈運。」靈運載之而 曜璠,臨川 日:「國: 臨川王 序義慶州府僚佐云 ,謂方明 內史,爲司空竟陵王誕 「新喪宗英,未宜便以流 義慶招集文士, 日「阿連 所統曾城令。 而 才悟如此,而尊作常兒遇之。 廣之,凡厥人士,並爲題目, 陸展染鬢髮,欲 長瑜自國侍郎至平西記室參軍。 溺 及義慶薨, 死 所遇,誕敗坐誅。 人爲念。」廬陵王紹鎭尋陽,以長 大相知賞。 以媚 朝士詣第敍哀, 去。 側室。青青不解久,星星 時長瑜教惠連讀書, 荀雍字道雍,官至員 長瑜文才之美,亞於 皆加劇言苦句,其 何 長瑜當今仲宣 何勗謂 嘗於江 瑜 袁 陵 淑 爲

乃安。 鷩 嶺,必造幽峻,巖嶂千重,莫不 自始寧南 動縣邑。 運 又要琇更進,琇不肯, 山伐 因父祖之資,生業甚厚。 太守孟顗事佛精懇,而爲靈運所輕,嘗謂顗曰:「得道應須慧業文人,〔長〕生天當 木開逕,直至 臨海,從者數百人。 靈運贈琇詩曰:「邦君難 備盡 奴僮 登躡常著木履,〔至〕上山 |旣衆,義故門生數 臨海 太守王琇驚駭, 地嶮,旅客易山 百,鑿山浚湖,功役 則 去前 行。」在會稽亦 謂 齒 一下山 爲 山 賊 無已。 去 徐 其 知 後 多 是靈運 尋山陟 崗 徒衆 嘗

在靈運前,成佛必在靈運後。」顗深恨此言。

發兵自防,露板上言。 民,正慮決湖多害生命,言論毀傷之,與躓遂構讎隙。 惜之, 顗堅執 是以牽曳疾病,束骸歸款。 或勇冠鄉邦,劍客馳逐。 道。 無端,假謗空設,終古之酷,未之或有。 爲罪,何酷 恩,若其罪迹炳明,文字有證,非但顯戮 由,便星言奔馳,歸骨陛下。 事 二十七日 乖 不知微臣罪爲 人間,幽棲窮巖,外緣兩絕,守分養命,庶畢餘年。 會稽 ;疏云:『比日異論噂喈,此雖相了,百姓不許寂默,今微爲其防。』披疏駭惋,不解 東郭有回踵湖、靈運求決以爲田、太祖令州郡履行。 ii 如之。 不與。 夫自古讒謗,聖賢不免,然致謗之來,要有由趣。 何 靈運旣不得回踵,又求始寧岯崲湖爲田,顗又固執。 事。 靈運馳出京都,詣闕上表曰:「臣自抱疾歸山,于今三載,居非郊郭, 未聞俎豆之學,欲爲逆節之罪,山棲之士,而構陵 及見躓,雖曰見亮,而裝防如 仰憑陛下天鑒曲臨,則死之日,猶生之年也。 及經山陰,防衞彰赫,彭排馬槍,斷截衢巷, 匪吝其生,實悲其痛。 司敗,以正 |國典,普天之下,自無容身之地。 因靈運橫恋,百姓驚擾,乃表其異志, 此,唯有罔懼。 忽以去月二十八日得會稽太守臣顗 此湖去郭近、水物所出、百姓 誠復內省不 或輕 臣昔忝 死 偵邏縱橫, 戈甲竟 臣憂怖彌日,嬴疾 ·灰,而 上之釁。 重氣 靈運謂顗非存利 近侍,豫蒙天 結結 抱 理 黨聚羣, 今影迹 今虚聲 莫申 所

發動,尸存恍惚,不知所陳。」

異永嘉,爲有司所糾。 太祖知其見誣,不罪也。 司徒遣 不欲使東歸,以爲臨川內史,加秩中二千石,至五在郡遊放,不 使隨州從 事 鄭望生收靈運、靈運執錄望生、興兵叛逸,遂有逆

罪。 志,爲詩曰:「韓亡子房奮,秦帝魯連恥。 廷尉奏靈運率部衆反叛,論正斬刑,上愛其才,欲免官而已,彭城王義康堅執謂 本自江海人,忠義感君子。」追討禽之,送廷尉治 不宜

| 廣州。|

恕,乃詔曰:「靈運罪釁累仍,誠合盡法。

但謝玄勳參微管,宜宥及後嗣,可降死一等,徙付

先與謝康樂共事,以去九月初,道雙因同村成國報欽云『先作臨川郡、犯事徙送廣州謝,給 巖上泯。」詩所稱襲勝、李業,猶前詩子房、魯連之意也。 錢令買弓箭刀楯等物,使道雙要合鄉里健兒,於三江 縣,遺兵隨齊受掩討,遂共格戰,悉禽付獄。其一人姓趙名欽,山陽縣人,云:「同村薛道 葉,網網 同。』遂合部黨要謝,不及。 棄市刑。 其後秦郡府將宗齊受至涂口,〔60〕行達桃墟村,見有七人下路亂語,疑非常人,還告郡 衝風菌 臨死作詩曰:「龔勝無餘生,李業有終盡。 邂逅竟幾何,修短非所愍。 旣還飢饉,緣路爲劫盜。」有司又奏依法收治,太祖詔於廣州 送心自覺前 口篡取謝。 **嵆公理旣迫**, 時元嘉十年,年四十九。 ",斯痛 久已忍。 若得者,如意之後,功勞是 霍生 一命亦殞。 恨我君 子志 悽悽凌 所著文章 不不 雙 行

傳於世。

子鳳蚤卒。

徒,異軌同奔,遞相師祖。雖清辭麗曲,時發乎篇,而蕪音累氣,固亦多矣。若夫平子艷發, 然則歌咏所興,宜自生民始也。 仲文始革孫、許之風,叔源大變太元之氣。爰逮宋氏,顏、謝騰聲。靈運之興會標舉,延年 乎義熙,歷載將百,雖綴響聯辭,波屬雲委,莫不寄言上德,託意玄珠,遒麗之辭,無聞焉爾。 班、賈,體變曹、王,縟旨星稠,繁文綺合。綴平臺之逸響,採南皮之高韻,遺風餘烈,事極江 其飇流所始,莫不同祖風、騷。徒以賞好異情,故意製相詭。降及元康,潘、陸特秀,律異 於情理之說,子建、仲宣以氣質爲體,並標能擅美,獨映當時。是以一世之士,各相慕習,原 緯文,以文被質。自漢至魏,四百餘年,辭人才子,文體三變。 文以情變,絕唱高蹤,久無嗣響。至于建安,曹氏基命,二祖陳王,「於」成蓄盛藻,甫乃以情 振芳塵於後,英辭潤金石,高義薄雲天。 六義所因,四始攸繫,升降謳謠,紛披風什。雖<u>虞</u>夏以前,遺文不覩,稟氣懷靈,理無或異。 有晋中興,玄風獨振,爲學窮於柱下,博物止乎七篇,馳騁文辭,義單乎此。 史臣曰:民稟天地之靈,含五常之德,剛柔迭用,喜慍分情。 夫志動於中,則歌詠外發。 周室旣衰,風流彌著,屈平、宋玉,導淸源於前,賈誼、相如, 。自茲以降,情志愈廣。 相如巧爲形似之言,班固長 王襃、劉向、揚、班、催、蔡之 自建武暨

謝、顏,去之彌遠。 覩。[kē]至於高言妙句,音韻天成,皆闇與理合,匪由思至。 張、蔡、曹、王,曾無先覺,潘、陸、 胸情,非傍詩史,正以音律調韻,取高前式。 先士茂製,諷高歷賞,子建函京之作,仲宣霸岸之篇,子荆零雨之章,正長朔風之句,並直 聲,則後須切響。 五色相宣,八音協暢,由乎玄黃律呂,各適物宜。欲使宮羽相變,低昂互節,Ckill若前有浮 之體裁明密,並方軌前秀,垂範後昆。若夫敷衽論心,商権前藻,工拙之數,如有可言。夫 一簡之內,音韻盡殊,兩句之中,輕重悉異。妙達此旨,始可言文。至於 世之知音者,有以得之,知此言之非謬。如曰不然,請待來哲。 自騷人以來,多歷年代,雖文體稍精,而此祕未 學

校勘記

皇晉□□河汾 (百三家集本謝康樂集作「受命」二字,一本作「鼎移」二字。 三朝本、北監本、毛本、殿本、局本及明萬曆十一年焦竑刻謝康樂集並闕二字,

立熙載於唐后 孫彪宋書考論云:經傳皆言申祖四岳。 立字疑岳字之譌。」

張溥漢魏六朝一

= 闚 郊伺 鄙 三朝本、北監本、毛本、殿本、局本及謝康樂集並闕四字,一本作「圍郭攻

城 四四 字。

24 謝履長於 庭階 孫彪宋書考論云:「履長疑履綦之誤。」

列

傳 第

+

七

校

勘 記

「布乂安於海甸」六字。	〔至〕 變時雍於祖宗□□□□□□□□□□□□□□□□□□□□□□□□□□□□□□□□□□□□
	三朝本、北監本、毛本、殿本、
	、局本及謝康樂集並闕六字,一本作
	本作

- **弔僞孫於涂首** 武,他證也。 時伷軍向涂中,徐首當作涂首。」按孫說是,今改正。 「涂首」各本並作「徐首」,孫彪宋書考論云:「按吳志,晧致印綬於琅邪王伷。
- フセン 過江乘而責始 孫彪宋書考論云:「始謂秦始皇。始皇三十七年,登會稽,還過吳,從江乘渡。」
- 造步丘而長想 「步丘」各本並作「步兵」。錢大昕廿二史考異云:「步兵當作步丘。」按步丘在廣

陵,見晉書謝安傳。今改正。

- へたし 書地形志、魏書高閭傳改作角城,說見本書卷三十五州郡志一校勘記第三十一條。 濟通淮而薄角城 「角城」各本並作「甬城」、史書中「角城」、「甬城」互見、今據水經淮水注及魏
- 」具瘁 三朝本、北監本、毛本、殿本、局本及謝康樂集並闕四字。一本作「哀神形之具

| 踰宿 三朝本、北監本、毛本、殿本、局本及謝康樂集並闕四字。一本作「停驂騑于

瘁

踰宿

本及謝康樂集並闕二字,一本作「託未命于風雲」。 託末命□□雲 「末命」各本並作「未命」、據謝康樂集改正。 又三朝本、北監本、毛本、殿本、局

[三] 故□表此園之珍靜 三朝本、北監本、毛本、殿本、局本及謝康樂集並闕一字。 一本作「特」字。
局本八字空白,一本補「也長洲亦珍靈之所產」九字。
〔□0〕因江海洲渚以爲苑囿□□□□□□□□□□□□□□□□□□□□□□□□□□□□□□□□□□□□
「山」字。孫彪宋書考論云:「居長飮賦有脫誤。此蓋引邊文禮章華臺賦也。」
□□□楚之雲夢大中□居長飮賦 三朝本、北監本、毛本、殿本、局本及謝康樂集並闕一字。一本作
璩。」
「1く」應璩與程文信書云 「應璩」各本並作「應據」。據謝康樂集改。張元濟校勘記云:「應據當作應
錣巨萬,釽摫兼呈。」揚雄方言:「梁、益之間,裁木爲器曰釽,裂帛爲衣曰摫。」
[1七] 卓氏充釽摫之端 「釽摫」各本並作「釽槻」,據文選左思蜀都賦改,下注文同改。 蜀都賦云:「藏
一字。
□□□□□□□□□□□□□□□□□□□□□□□□□□□□□□□□□□□□□
本是託字。」錢氏所指一本者即謝康樂集。今據補。按又一本空白處作「棲」字。
[1吾] 惟上託於巖壑 「託」字,三朝本、北監本、毛本、殿本、局本空白。 錢大昕諸史拾遺云:「闕處一
[18] 轉歸舷而眷戀 「舷」各本並作「弦」,孫彪宋書考論云:「弦蓋舷誤文。」按孫說是,今改正。
[1] 而優豐疑 疑句有奪誤。

列

傳第二十七

校勘

記

一七八一

- 非幽 據漢魏六朝一百三家集本謝康樂集、嚴輯全宋文補。 人憇 止 之鄉 三朝本、北監本、毛本、殿本、局本及萬曆本謝康樂集作「非□□憇止之□」。 本作「非隱逸憇止之地
- [三] 狹三閭之喪江 藝文類聚六四作「悼三閭之浮江。」
- 遠圖已輟 「遠圖」各本並作「建圖」,據文選一九謝靈運述祖德詩注引改。 靈運述祖德詩亦云

「遠圖因事止」。

- 呈 西溪便是□之背 三朝本、北監本、毛本、局本及謝康樂集並闕一字。 本作「山」字。
- 表裏離合 各本及萬曆本謝康樂集並脫「 離」字,據漢魏六朝一 百三家集本謝康樂集 按

居賦正文有「表裏回游」離合山川」。

- 在江之□□用槃石竟渚 西」二字。 按原注句有譌奪,一本補「東西」二字,文義亦不可 三朝本、北監本、毛本、 殿本、 局本及謝康樂集並闕二字,一本作 通 東東
- 兩種通沼 錢大昕廿二史考異云:「智字不見字書、訪之通人、亦無知者。」 李慈銘宋書札記云:

「槢,必非誤字。蓋當時吾越方言也。」

- **全** 吐泉流之浩溔 「浩溔」漢魏六朝一百三家集本謝康樂集作「浩漾」。
- 在圻西北 各本及萬曆本謝康樂集並作「在西圻北」,據漢魏六朝一百三家集本謝康樂集

輯全宋文改。

- 常石機□□ □□□故日山幟下而回澤 三朝本、北監本、毛本、殿本、局本及謝康樂集並闕四字,
- 作「低而水曲」四字。 又「山磯下而回澤」,各本並作「下磯而回澤」,據正文改正。
- 遠西則下闕 三朝本闕四十字,殿本及謝康樂集闕四十四字,全宋文闕四十三字。 一本補「邛州綠嶺,菌桂 上臨巖。 旁挺龍目, 側生荔枝。 以上字數,各 布綠葉之

萋萋,結朱實之離離。 本皆據山居賦正文行數計算。 匝隆冬而不凋,常蔚鬱以依依」。 本注云:「本左太沖蜀都賦 也。」按龍目、

荔枝 一越中所不植,此正文及注文四十八字,顯係後人所補,非靈運 原 作

徒觀其 □□□□岸測深相渚知淺 三朝 本、北監本、毛本、殿本、局本及

※樂集作 「徒觀其南術之□□□]生嵕□□成衍□岸測深相 渚 知淺」。蓋 注 文 中有 故

謝康

巉

日

一、「故 作 徒 成 觀 行」語 :其南術之臨池生曦望遠成衍窺岸測深相渚知淺」,亦不足據。 ,後人採之以補正文,中空二、三字以示其間 有奪文,非靈運 今十字並空白,以

原

赋

句

法

如

北

日

生

示 其愼

本

- 爾 其舊 居 曩宅今園枌槿尙援基井具存 三朝 本、北監本、毛本、殿本、局本「枌」字下空白二字,
- 本 補 以 楡 木」二字。 {謝 康樂集 無闕 字。 孫彪宋書考論亦 云: 此 處無闕 字。」 李慈銘 宋書札
- 是 蔚 記 蔚 云 豐 秫 此 處所 苾 苾 香 闕二字,當在曩宅之下。 秔 「秫」各本及謝康樂集並作「秋」,孫彪宋書考論云:「秋疑秫字誤。」 園 與 存 爲 韻。」今從本集,「粉」字下 ·不空白 卽 接「 按孫說 槿

列 傅 第 + 七 校 勘 記

是,今改正。

□弋〕九實者連前實槐實栢實冤絲實女貞實蛇床實蔓荆實黎實□□也 三朝本、北監本、毛本、殿	本、北監本、毛本、殿本、局本及謝康樂集並闕二字。一本作「白芽」二字。	⑸⑸ 六根者苟七根五笳根葛根野葛根□□根也,按六根今數之止五根,疑有脫誤。□□根,三朝
---	------------------------------------	---

「楩楠」二字。 其木則松栢檀櫟□ □桐楡 三朝本、北監本、毛本、殿本、局本及謝康樂集並闕二字。 一本作

本、局本及謝康樂集並闕二字。一本作「黃實」二字。

- [11元] 則可待為己之日用也 「待」萬曆本謝康樂集作「恃」。
- [80] 對百年之高木 「高木」萬曆本謝康樂集作「喬木」。
- 瞰南峯以啓軒 「瞰」各本並作「殷」,據藝文類聚六四引、萬曆本謝康樂集改。
- 顧□□之未牽 三朝本、北監本、毛本、殿本、局本及謝康樂集並闕二字。一本作「飛埃」二字。
- 方壁西南石門世□南□池東南 字、「南」下亦闕一字。一本世下有「稱」字、「南」下有「有」字。 三朝本、北監本、毛本、殿本、局本及謝康樂集「世」下並闕一
- 越山列其表側傍緬□□爲異觀也 本作「雲霓」二字。 三朝本、北監本、毛本、殿本、局本及謝康樂集並闕二字。

	[0]	八四九山					「中国)				口心	八四五八
本、局本並空白。據謝康樂集補。又一本作「嘗著子虛賦。阮籍嗜酒」能嘯,聲若鳳音。鄭生好	病免家居茂陵鄭子眞耕隱谷口大將軍王鳳禮聘不屈 此二十二字,三朝本、北監本、毛本、殿	庚桑楚得老子之道 「楚」各本作「偏」,據謝康樂集改。 按庚桑楚見莊子。	云有闕文。錢大町諸史拾遺云:「一本連寫,不云有闕,然以韻求之,亦不甚叶。」	梁去	酒以長嘯」。亦後人所補,非靈運原文。	云有闕文。錢大町諸史拾遺云:「一本連寫,不云有闕,然以韻求之,亦不甚叶。」又一本作「籍嗜	卿寢茂而敷詞□□□□□□□□□□□□□□□□□□□□□□□□□□□□□□□□□□□□	狂」十二字,一本又作「庚依幔以入道,輿却聘以徜徉」。疑皆後人據注文補入者,非靈運原文。	而善狂」十二字,又「萊庇蒙以織畚」下,有「徐韜魏而採芋」六字。「庚作壘以葆和,輿涉莪而善	及萬曆本謝康樂集並闕十八字。漢魏六朝一百三家集本謝康樂集有「庚作壘以葆和,輿涉莪	□□□□□□□□□□□□□□□□□□□□□□□□□□□□□□□□□□□□□□	且列于言誠特此推一李慈銘朱書札記云「誠特疑試待之誤。」

列

呈

補足遺闕

各本並脫「遺」字、據元龜六四八補。

隱居,入山中」二十三字,蓋後人旣妄補正文於前,又妄補注文於後,皆非靈運原文。

書竟不就尋遷侍中至名位素不踰之並見任遇 「竟不就至名位素不踰之並」八十九字,三朝本、

北監本、毛本並脫、今從殿本補、並參校南史、元龜八三八、御覽六三四引朱書。 按殿本實據南

宋書之明證。

皇 莫肯拯赴 「拯赴」各本並作「極」一字,萬曆本謝靈運集作「拯」一字,元龜四七七作「拯赴」二

字。 今從元龜補正。

「田田」 而天威遠命亦何敵不滅 「威」各本並作「或」,據元龜四七七、萬曆本謝康樂集改。

懼在觸置 「置」各本並作「置」,按觸置無義,當是「觸置」之誤。詩周南兔置,肅肅兔置。置,罟

至色

也 網也。 蓋借罝罟以喻法網,今改正。

呈合 掌書記之任 各本並脱「書」字,據齊史、元龜七二七、八九五補。

宝艺 登躡常著木履 「履」南史、元龜八五五、御覽三八引、六九八引作「屐」。疑作「屐」是。

金公 得道應須慧業文人 御覽六六引同朱書、南史、御覽四九八、六五四引「文人」作「丈人」。 蓋南

史慧業 句絕,丈人以稱孟顓,文義自較朱書爲勝。 然慧業文人之語,已多見古人引用,故今因仍

不改。

金む 加秩中二千石 「加」字三朝本空白、北監本、毛本、殿本、局本作「賜」、元魏一九〇、九三二作 記

「加」。今據元龜補。

其後秦郡府將宗齊受至涂口 「涂口」各本並作「除口」,據南史改。按涂口,今江蘇六合縣瓜埠

口。「宗齊受」南史作「宋齊受」。

公二 二祖陳王 「二祖」文選所載作「三祖」。 二祖謂操、丕、三祖謂操、丕、叡。

〔六〕 低昂互節 文選所載作「低昂舛節」。

公言 自騷人以來多歷年代雖文體稍精而此祕未覩 各本並脫「多歷年代雖文體稍精而」十字,

據 |文

}選補。

宋書卷六十八

列傳第二十八

武三王

彭城王義康 南郡王義宣

開府儀同三司。元嘉三年,改授都督荆湘雍梁益寧南北秦八州諸軍事、荆州刺史,三給班 史,日將軍如故。 豫州刺史,將軍如故。三年,遷使持節、 永初元年,封彭城王,食邑三千戶,進號右將軍。二年,徙監南豫豫司雍幷五州諸軍事、南 壽陽被徵入輔, 劍三十人,持節、常侍、將軍如故。 彭城王義康,年十二,宋臺除督豫司雍幷四州諸軍事、冠軍將軍、豫州刺史。 留義康代鎭壽陽。 太祖卽位,增邑二千戶,進號驃騎將軍,加散騎常侍,給鼓吹一部。 義康少而聰察,及居方任,職事修理 又領司州刺史,進督徐州之鍾離、荆州之義陽諸軍 都督南徐兗二州揚州之晉陵諸軍事、南徐州刺 時高祖自 尋加

傳第二十八 武二王

列

遠近 旣 事 領 素 推 經 所 謙, 北 六 復 稱。 情款,至是意委特隆,人物雅俗,舉動 將 加 自是 軍 司 侍 一、南 九年,弘薨,又領揚州 徒 中、班劍。 內 徐 王弘 外 ア衆務、 州 刺史,持節如故。 表義康宜還入輔,徵侍中、都督揚南徐兗三州諸軍事、司 一斷之義康。 刺史。 二府並置佐領兵,與王弘 太子詹事劉湛有經國才,義康昔在豫州,湛 其年太妃薨,解侍中,辭班劍。 事宜,莫不咨訪之,故前後在藩, 共 輔朝政。 十二年,又領太子 弘旣 徒、錄尚書事 多有善政,爲 多疾, 為長 且每 史, ,

樂爲 惜官 康 外 係。 錄 衆 亦 命 事,皆 一貫,未 斷之。 義康 竭 自 義 聞 强 力 康 必 不不 不 性 入侍醫藥, 1專決 嘗 記,常所暫遇,終生不忘,稠 凡所 息,無有 好 敢 以 吏 施行。 階級 欺 職,銳 陳奏,入無 負 懈倦。 私 太祖 意文案,糾剔是非,莫不精盡。 十六年,進位 人,凡朝士 盡 心衞 府 不 有虚勞疾,寢 菛 可,方伯以下,並委義康授用, 奉,湯藥飲食,非 毎 一有才 旦常有數百 大 、將軍 用者 人廣 頓 一。皆引 (席, 毎 領 積 年,每 司 乘 口 徒, 入己府、 標 車 所 所憶 意 辟 嘗 雖復位 有 旣專總朝權,事決自己,生殺 召掾 不 所 以示 ·進; 想,言 無 屬 卑 由 施 聰 或 人微, 是 及 明,人物 連 个件旨, 朝 便覺 夕 野 不 皆被引 輻 心中 寐, 益 卽 湊, 度 以 彌 痛 勢傾 爲 接。 此 日 裂,屬纊者 臺 推 不 天下。 官。 服 叉 解衣 大事,以 聰識 之。 自 相 内 愛 過 義

義康素無術學,闇於大體,自謂兄弟至親,不復存君臣形迹, 率心逕行, 曾無猜防。 私

歎 置 國,不與己同志者,必構造愆釁,加以罪黜。 所寵,又威權盡在宰相,常欲傾移朝廷,使神器 書儀曹索晉咸康末立康帝舊事,至 以告湛及殷景仁,湛曰:「天下艱難,詎是幼主所御。」義康、景仁並不答。 以傾側自入,見太祖疾篤,皆謂宜立 知,自司徒右長史擢爲左長史。 仁爲太祖所保持,義康屢言不見用,湛愈憤。 射殷景仁爲太祖 其 一僮部六千餘人,不以言臺。 形 味 並劣,義康在坐曰:「今年甘殊有佳者。」遣人還東府取甘,大供御者三寸。 所寵,與太子詹事劉湛素善,而意好晚衰。湛常欲因宰輔之權以傾之,景 四方獻饋,皆以上品薦義康,而 從事中郎琅邪王履、主簿沛郡劉敬文、祭酒魯郡 長君。 義康不知也。及太祖疾豫,微聞之。 。上疾嘗危殆,使義康具顧命 每採拾景仁短長,或虛造異同以告湛。 南陽劉斌,湛之宗也, 有 歸。 遂結爲朋黨,伺察省禁, 以次者供御。 有涉俗才用, 認。 而斌等既為義康 而胤秀等輒就 上嘗冬月噉甘, 義康還省,流涕 若有 孔胤秀,並 爲義康 :盡忠奉 尙書僕 自是主 所 尙

郡。」後會稽太守羊玄保求還,義康又欲以斌代之,又啓太祖曰:「羊玄保欲還,不審以誰 成,將致大禍。十七年十月,乃收劉湛付廷尉,伏誅。又誅斌及大將軍錄事參軍劉敬文、賊 會稽。」上時未有所擬,「尽」倉卒曰:「我已用王鴻。」自十六年秋,不復幸東府。 相之勢分,內外之難結矣。 義康欲以斌爲丹陽尹,言次啓太祖,陳其家貧。 上覺其旨,義康言未卒,上曰「以爲吳 上以嫌隙旣

列傳

令盛曇· 給事中溫於廣州,王履廢於家。 馬亮,孔氏中表,並由胤秀而進。 曹參軍孔邵秀、中兵參軍邢懷明、主簿孔胤秀、丹陽丞孔文秀、司空從事中郎司馬亮、烏程 |泰等。徙尙書庫部郎何默子、餘姚令韓景之、永興令顏遙之、湛弟黃門侍郎素、斌弟 胤秀始以書記見任,漸預機密,文秀、邵秀,皆其兄也。 懷明、曇泰爲義康所遇。默子、景之、遙之,劉湛黨 也。 司

棠棣,愛忘其鄙,寵授遂崇,任總內外,位兼台輔。不能正身率下,以肅庶僚,暱近失所,漸 新喻侯義宗、祕書監徐湛之往來慰視。 都督江州諸軍事、江州刺史,持節、侍中、將軍如故,出鎭豫章。停省十餘日,桂陽侯義融、 **釁貽垢,實由於臣。鞠躬慄悚,若墮谿壑,有何心顏,而安斯寵,輒解所職,待罪私第。」改授** 遣人宣旨告以湛等罪釁,義康上表遜位曰:「臣幼荷國靈,爵遇踰等。 辭州,見許,增督廣交二州湘州之始興諸軍事。資奉優厚,信賜相係,朝廷大事,皆報示之。 皆以委之。 蕭斌,昔爲義康所暱,劉斌等害其寵,讒斥之。乃以斌爲諮議參軍,領豫章太守,事無大小, 又遣沙門釋慧琳視之,義康曰:「弟子有還理不。」慧琳曰:「恨公不讀數百卷書。」征虜司馬 不自覺,致令毀譽違實,賞罰謬加,由臣才弱任重,以及傾撓。今雖罪人卽戮,王猷載靜,養 其日刺義康入宿,「智」留止中書省,其夕分收湛等,青州刺史杜驥勒兵殿內,以備非常。 司徒主簿謝綜,素爲義康所狎,以爲記室參軍,左右愛念者,並聽隨從至 於省奉辭,便下渚。上唯對之慟哭,餘無所言。上 陛下推恩睦親,以隆 一豫章。

龍驤參軍巴東扶令育詣闕上表曰:「公」

之志,故不遠六千里,願言命侶,謹貢丹愚,希垂察納。 顏達色者哉。又爱盎之諫孝文曰:「淮南王若道遇疾死, 5元] 昌極諫,馮唐面折,孝惠所以克固儲嗣,魏尙所以復任雲中。彼二臣豈好逆主干時,犯 何。」文帝不用,追悔無及。臣草莽微臣,竊不自揆,敢抱葵藿傾陽之心,仰慕周易匪躬 蓋聞哲王不逆切旨之諫,以博聞爲道,人臣不忌殲夷之罰,以盡言爲忠。是故周 則陛下有殺弟之名。奈

宗社 門,搜殊逸于巖穴,招奇英於側陋,窮谷無白駒之倡,喬岳無遺寶之嗟,豈特羅飛翮于 窺窬於上流,或苞惡而窺國,自己或顯逆而陵主,有生之所惴恐,神祇之所忿忌也。賴 景平、元嘉之釁,幾於危殆,三公託以興廢之宜,密懷不臣之計,台輔伺隙於京甸,强楚 預參皇謀,均此休否哉。 南垂,恩絕于內,形隔於遠,躬離明主,身放聖世,草萊黔首,皆爲陛下痛之。臣追惟 垂天,網沈鱗於溟海。 況於彭城王義康,先朝之愛子,陛下之次弟哉。 一旦黜削,遠送 、靈長,廟算流遠,灑滌塵埃,殲馘醜類,氛霧時靖,四門載清。當爾之時,義康豈不 伏惟陛下躬執大象,首出萬物,王化咸通,三才必理,闢天人之路,[10]開大道之 且陛下舊楚形勝,非親勿居,遂以驃騎之號,任以藩夏之重,

列

今,此乃陛下前車之殷鑒,後乘之靈龜也。夫會子之不殺, 忠臣之篤譬, 二告而猶織, 乎。若有迷謬之愆,可責之罪,正可數之以善惡,導之以義方。且廬陵王往事,足以知 同抃。莫不言陛下授之爲得,義康受之爲是也。今如何信疑似之嫌,曰三闕兄弟之恩 渥 撫政南郢,綏民遏寇,播皇宋之澤,以洽幽荒。陛下之潤,被之九有,豈直南荆之民沾 仁王之令範。故誤云「無信人之言,人實不信」。又云兄弟雖閱,不廢親也。微書曰: **「克明俊德,以親九族。」九族旣睦,可以親百姓。 兄弟安可棄乎。** 而已焉。遂召之以宰輔,又寄之以和味,旣居三事,又牧徐、楊,所以幽顯齊歡,人神

陛 間 每服斯言,以爲警戒。矧今覩王室大事,豈得韜筆默爾而已哉。臣將恐天下風靡,離 臣以頑昧,獨獻微管,所以勤勤懇懇,必訴丹誠者,實恐義康年窮命盡,奄忽于南,遂令 易黷,福始禍先,古人所畏。故愛身之士,自爲己計,莫不結舌杜口,孰肯冒忌干主哉。 城王亦弭疑愆於宋京,豈徒皇代當今之計,蓋乃良史萬代之美也。 如 .是懼,遂令宇內遷觀,民庶革心,欲致康哉,實爲難也。 陛下徒云惡枝之宜伐, 豊悟 下有棄弟之責。臣雖微賤,竊爲陛下羞之。況書言記事,史豈能屈典謨而諱哉。脫 臣慮,陛下恨之何益。 臣伏願陛下上尋往代黜廢之禍,下惟近者讒言之釁。廬陵王旣申寃魂於后土,彭 揚子雲曰:「獲福之大,莫先於和穆,遘禍之深,莫過於內難。」 且諂諛難辨,是非

緝穆,息宇內之譏,絕多言之路,如是則四海之望塞,讒說之道消矣。 州牧,然後可以安彭城王哉。若臣所啓違憲,於國爲非,請卽伏誅,以謝陛下。 謀,曲察狂瞽之計,一發非意之詔,逮訪博古之士,速召義康返于京甸,兄弟協 伐柯之傷樹 `,乃往古之所悲,當今所宜改也。 陛下若蕩以平聽,屛此猜情,垂訊芻蕘之 何必司徒公、楊 和 雖復分 君臣

表奏,即收付建康獄,賜死。

形

赴鑊,煑體烹屍,始願所甘,豈不幸甚。

請其生命。」 即封所飲酒賜義康,幷書曰:「會稽姊飲宴憶弟,所餘酒今封送。」車子,義康小字也 起 再拜稽顙,悲不自勝。上不曉其意,自起扶之。主曰:「車子歲暮,必不爲陛下所容,今特 會稽長公主,於兄弟爲長,太祖至所親敬。 因慟哭。上流涕,舉手指蔣山曰:「必無此慮。若違今誓,便是負初寧陵。」「一己 義康南上後,久之,上嘗就主宴集甚歡,主

舊,矜 德,自 不削,爵寵 心 |凌上,結朋樹黨,苞納凶邪。 重釁彰著,事合明罰。 特遭陛下仁愛深至,敦惜||周親,封社 二十二年,太子詹事范曄等謀反,事逮義康,事在曄傳。有司上曰:「義康昔擅國權,恣 田 釋屢加 南服、詭飾情貌,外示知懼,內實不悛。窮好極欲,干請無度。 無貶。四海之心,朝野之議,咸謂皇德雖厚,實燒典刑。而義康曾不思此大造之 ,恩疇已往。 而陰敦行李,方啓交通之謀,潛資左右,以要死士之命。 聖慈含弘,每不折 崎嶇伺

將 免義康及子泉陵侯允、女始寧豐城益陽興平四縣主為庶人, 絕屬籍, 徙付安成郡。 道,自棄天地。 有 周公上聖,不辭同氣之刑,漢文仁明,無隱從兄之惡。 醜,千里相 隙,不忘窺 軍 此,我得罪爲宜也。」 沈邵爲安成公相,領兵防守。 結,再議宗社,重闚鼎祚。 時猶隱忍,罰止僕侍。 臣等參議,請下有司削養康王爵,收付廷尉法獄治罪。」詔特宥大辟。於是 義康在安成讀書,見淮南厲王長事,廢書歎曰:「前代乃 賴陛下至誠感神、宋曆方永、故姦事昭露,罪人斯得。 狂疾之性,永不懲革,兇心遂成, 況義康釁深二叔,謀過淮南,背親反 悖謀仍構。 以寧朔 遠投羣

遷近 亂 公 況 家 流 之,口以聚衆據郡,復欲奉戴義康。 一世祖時鎭彭城,累啓宜爲之所,太子及尙書左僕射何尙之並以爲言。 相 洞 極之教,事在書典。 人,外動民 沈邵 機 甸,斯 二十四年, 驟發,庸 爲廣州事。 乃至愛發天,超邈終古。 /聽,不逞之族,因以生 可忽乎。 豫章胡誕世、前吳平令袁惲等謀反, 未行,值 庶人養康負釁深重,罪不容戮。 臣等參議,宜徙廣州遠郡,放之邊表,庶有防絕。」 邵病卒,索虜來寇瓜步, 心。 曾不遇愆甘引,而 太尉錄尚書江夏王義恭等奏曰:「投畀之言,義著雅篇, 胡誕世假竊名號,構成凶 議言同衆,很悖徼幸,每形 天下 襲殺豫章太守桓隆、南昌令諸葛智 聖仁不忍,屢加遲回,宥其大辟,賜 擾動。 逆。 上慮 杜 異志者或奉 漸除微,古今所務, 二十八年正月,遣 奏可,仍 辭 色,內宣 義 以安成 康 爲

王

中 書 舍人嚴龍齎藥賜死。自己義康不肯服藥,曰:「佛敎自殺不復得人身,便隨宜見處分。」乃

以被揜殺之,時年四十三,以侯禮葬安成。

六子:允、肱、珣、昭、方、曇辯。 允初封泉陵縣侯,食邑七百戶。昭、方並早夭。 允等留

安成,元凶得志,遣殺之。

朽壤。 前 妻息 禮,明罰 以 緣 魂漏 故 泉陵侯允橫罹凶虐,可特爲置後。」太宗泰始四年,復絕屬籍,還爲庶人。 一殿道 唑 曾 廢帝永光元年,太宰江夏王義恭表曰:「臣聞忝祖遠支,猶或慮親,降霍省序, 惬。 一漂沒,早違盛化,衆女孤弱,永淪黔首。 籍,垂誡來典。 下 世 聖化 疾終,嗣啓方宇,阜陵愆屏,身逕晚恩。 祖大明四年,義康女玉秀等露板辭曰:「父凶滅無狀,孤負天明,存荷優養, 臣 羽山 昔 淮 特 憑 融泰,春澤覃被,慈育羣生,仁被泉草。 ,未足勑法。 、楚推恩,胙流支胤 國私,冒 運革三朝,歲盈三紀,天地改朔,日 以誠表,塵觸靈威,伏紙悲 烏鳥微心,昧死上訴,乞反葬舊塋,糜骨鄉 ,抑法弘 親,古今成準。 刨 竊惟故庶人劉義康昔昧姦 情 悸。」詔曰:「太宰表如此, 原釁,本非己招,感事哀榮,俯 實希洗宥,還齒帝宗,則施 月再升,陶形賦氣,咸蒙 使以公表 付外,公公依旨奉行。 壤。」詔聽,幷 回, 公緣情追遠, 自 及陳荄、榮施 增傷 更始。 貽 義 非 重 加 沒蒙加 咽。 一令戚。 資給。 義康 故 覽 敢 沈

軍, 十三年,出都督江州豫州之西陽晉熙新蔡三郡諸軍事、鎭南將軍 猶 左 成石頭。八年,又改都督南克、兗州刺史,當鎭 將軍、口也鎭石頭。 加散騎常侍,給鼓吹一部。 南 郡 王義宣,生而舌短,澀於言論。 七年,遷使持節、都督徐兗青冀幽五州諸軍事、徐州 時竟陵羣蠻充斥,役刻民散,改封南譙王,又領 元嘉元年,年十二,封竟陵王, 山陽,未行。 明年 ·、江州刺史。CIS - , 遷中書監, 進號中軍將 食邑五千戶。 刺史, 將軍 石頭戍事。 ·如故,

己節 諸軍 侍。 義慶, 康。 爲士庶所安,論者乃謂未議遷之,今之回換,更在欲爲汝耳。 內左右, 義慶叉居之。 事 義康 初, 用,通懷期物,不恣羣下。 而 而以義宣代義季爲南徐州 、車騎將軍、荆州 會稽公主每以爲言,上遲回久之,二十一年,乃以義宣都督荆雍益 高祖 自是經 入相 其後 以荆州 次江 國常理, |應在義宣。上以義宣人才素短,不堪居上流。 上流 夏王義恭。 刺史,持節 亦何 形勝, 必其應於一 此信未易, 地廣兵强, 刺 又以臨川王義慶宗室令望, 、常侍如故。 史,都督南徐州 往。 非唯聲著西土, 遺詔諸子次第居之。 今欲聽許,以汝代之。 先賜中詔 軍事、征北將軍, 日 朝野以爲美談。 且臨川武烈王有大功於社稷, 汝與師護年時一輩,三〇各有 師護以在 謝晦平後,以授彭城王義 十六年,以衡陽王 持節 師護 西久,比表 如 雖無殊績,口也潔 梁寧南 在彼已有次第, 故。 北秦 加散騎常 求還,出 義季代 七州

其美,物議 耳,無爲使 復當 爲師護怨,至 亦互有少劣。 人動 生評論也。」師護,義季 非但 若今向事 誚而 脫 已也。 滅之者,旣於西夏交有巨礙,遷代之譏,必歸責 如 此 則 公私 俱損, 爲不 可不先共善詳。 此 /於吾 事 亦

小字

也

勉

逃計 房千餘, 二十七年 也。」 義 宣至鎭 尼媼 索虜 數 了動自 南侵, 百, 男女三十人。 課 義宣慮寇至, 厲 ,政事 修 理。 崇飾綺麗,費 欲奔上明。 白皙 ,美鬚眉,長七尺五寸,腰帶十圍, 及虜退,太祖 用殷廣。 進位司空, 韶之曰:「善修民務,不須營潛 改侍中, 多畜嬪媵, 領 南 蠻 校 後

議參 書監 侍 辭 郡 相,錄尙 義宣遣參軍徐遺 中 內 王 軍蔡超 任 ,食邑萬 丞 、太尉,領司 三十年,遷司徒、中軍將軍 乃及 相 書六條 愷 如 專掌 故。 王 戶 0 爵。 事 書記 寶 徒 降愷 進諡 , 揚州」刺史, [三] (率衆) 、侍中 於是改授都督荆湘 幷 爲 義宣所 一參謀, 三千, 宜 如 陽 故。 生爲 縣 助爲 除尚書吏部郎, 、揚州刺史,侍中 義宣 王 獻 前 加羽葆、鼓吹, 太妃。 義宣 聞之,卽 鋒 雍 將佐 益 世 封次 梁 祖 時 寧南 仍爲丞相諮議參軍、南郡內史,封汝南縣侯, 以 卽 如故。 起 子宜 下 位,以義宣爲 給 兵, ', 並 北秦 班 陽 徵聚甲卒, 未及就 劍四十人,持節 加賞 侯愷 八 州 秩。 諸 爲 徴,値 中 軍 南 長史 書監, 傳 事 譙 荊 元凶 檄 王 張暢, ,食邑千 近遠。 、侍 都 湘 弑 督 中 立,以 州 事 揚 如 會世 在 卢。 故。 刺 豫二州 義宣 史 本 祖 · 傳。 行持 改 義宣固 封南 爲

列

傳

第

食邑千戶。 司馬竺超民爲黃門侍郎,仍除丞相司馬、南平內史。 其餘 各有差。

者,宜在人前,蚤有處分。 克孝建元年秋冬舉兵。報豫州刺史魯爽、兗州刺史徐遺寶使同。爽狂酒失旨,其年正月便 悔無所及。」義宣陰納質言,而世祖閨庭無禮,與義宣諸女淫亂,義宣因此發怒,密治舟甲, 禮,事在質傳。及至江州,每密信說義宣,以爲「有大才,負大功,挾震主之威,自古尠有全 **|質陰有異志,以養宣凡弱,易可傾移,欲假手爲亂,以成其姦。** 制度,意所不同者,一不遵承。嘗獻世祖酒,先自酌飲,封送所餘,其不識大體如 反。 遣府戶曹送版,以義宣補天子,幷送天子羽儀。遺寶亦勒兵向彭城。義宣及質狼狽起 樹,竭誠盡愚,貫之幽顯。而微疑莫監,積毁日聞,投杼之聲,紛紜溢聽。 義宣在鎭十年,兵强財富,旣首創大義,威名著天下,凡所求欲,無不必從。 **偽朝,皆纓冕之所棄,投畀之所取。 至乃位超昔寵,任參大政,惡直醜勳,妄生邪說,疑** 亂,成是貝錦。 淳戚,昭亮可期。 二月二十六日,加都督中外諸軍事,置左右長史、司馬,使僚佐悉稱名。 遣傳奉表曰: 臣聞博陸毗漢,獲疑宣后,昌國翼燕,見猜惠王。 夫澆俗之季,少貞節之臣,冰霜競至,靡後彫之木。 臣雖庸懦,少希忠謹。 且萬姓莫不係心於公,整衆入朝,內外孰不欣戴。不爾一旦受禍, 值巨逆滔天, 忘家殉國, 雖曆算有歸, 微績不 常謂異姓震主,嫌隙易構,葭芩 自襄陽往江陵見義宣,便盡 並寢處凶世,甘榮 諒緣姦 此。 朝廷所下 初,臧 臣交

醫尙存,劉安寢志,孔父旣逝,華督縱逆。 臣雖不武,績著艱難,復肆讒狡,規見誘召。 祉 惑明主,誣罔視聽。 臧質去歲忠節,勳高古賢,魯爽協同大義,志契金石, 又南從郡僚,勞不足紀,橫叨天功,以爲己力,同弊相扇,圖傾宗 此等猜毁,必欲禍陷。 昔汲

宗祀之危,綴旒非所

徴 靈,退無愧二朝之遇。 召甲卒,分命衆藩,使忠勤申憤,義夫効力,戮此凶醜,謝愆闕廷,則進不負七廟之 臣託體皇基,連暉日月,王室顚墜,咎在微躬,敢忘抵鼠之忌,甘受犯墉之責。 臨表感愧,辭不自宣。 輒

上詔答曰:

遐 匡拯。 耻 昵 衆邪競逐,將恐瞻烏之命,未識所止,搆怨連禍 倫 邇。 讒 以以 ,遠憑高算,共濟艱難。遂登寡闇,嗣奉洪祀,尊戚酬勳,實表 醜 皇帝敬問。朕以不天,招罹屯難,家國阽危,剪焉將及。所以身先八百,雪淸寃 此不識,志在問鼎,凶意將逞,先借附從,扇誘欺熾,成此 不 ,還謀社 而嘉言蔑聞,末德先著,勤王之績未終,毀冕之圖已及。 虞 物 變難籌 稷,雖履霜 ,醜言遂驗,是用悼心失圖,忽忘寢食。 有日,諠議糾紛。 **朕以至道** 孰 知其極。 無私,杜遏疑議,信理推誠,暴於 公明有不 臧質 亂階。 心事,粃政闕職,所願 、嶮躁無行,見棄人 ·照,背· 如 使羣 本崇姦,迷 逆並濟,

列

清江,鳴鑾郢路,投戈襲袞,面禀規勗。有宋不造,家禍仍纏,昔歲事寧,方承遠訓,冀 以虛薄,永弭厥艱。豈謂曾未朞稔,復覩斯釁,二祖之業,將墜于淵,仰瞻鴻基,但深 今便親御六師,廣命羣牧,告靈誓衆,直造柴桑,梟轘元惡,以謝天下。 然後警蹕

太傅江夏王義恭又與義宣書曰:

妄聽邪說,輕造禍難。國靡流言,遽歸愆於二叔,世無量錯,仍襲轍於七藩。棄漢蒼之 運也。吾等荷先帝慈育,得及人羣,思報厚恩,昊天罔極,竭力盡誠,猶懼無補。奈何 盛德,旣已昭著,皇朝欽嘉,又亦優渥。丞相位極人臣,江左罕授,一門兩王,舉世希 有。表倍推誠,彰於見事,出納之宜,唯意所欲。哀升進益,方省後命,一旦棄之,可謂 後賢藩忠構,覩難赴機。未聞聖主御世,百辟順軌,稱兵於言興之初,扶危於旣安之 **令範,遵齊冏之敗跡。** 日,以此取濟,竊爲大弟憂之。昔歲二凶構逆,四海同奮,弟協宣忠孝,奉戴明主,元功 興晉陽之甲,驚愕駭惋,未譬所由。若主幼臣强,政移冢宰,或時昏下縱,在上畏逼,然 頃聞之道路云,二魯背叛,致之有由,謂不然之言,絕於智者之耳。忽見來表,將

往時仲堪假兵靈寶、旋害其族、孝伯授之劉牢、忠誠逝踵。皆曩代之成事、當今之

稷。 强力,圖 亂,吾恐邊鄙皆爲禾黍。宜遠尋高祖創業艱難,近念家國比者禍釁,時息兵戈,共安社 舅,適有密信,誓倒戈。自虜侵境以來,公私彫弊,安以撫之,庶可寧靜,弟復隨而擾 前因護之歸於吾,苦求北出,不樂遠西。近磐桓湖陸,示遣劉雍,其意見可。 爽等均雍齒之封。令據有五州,虎兕出於匣,是須爲劉淵耳。 殷鑒也。 責躬謝過,誅除險佞,追保前勳,傳美竹帛。昔梁孝悔罪,景帝垂恩,阜、質改過, 濟其私。 臧質少無美行,弟所具悉,憑恃末戚,並有微勤,承乏推遷,遂超倫伍 凶謀若果,恐非復池中物。 魯宗父子,世爲國寃,太祖 徐遺寶是垣護之婦弟, 方弘遐略,故 雍是徐冲 著 西楚

肅宗降澤。忠焉之誨,聊希往言,禍福之機,明者是察。

如 忝 權 其遂溺姦說者,天實爲之。 節鉞,總督羣帥,首戒戎先,指晨電舉,式淸南服。 主 上 |神武英斷,羣策如林,忠臣發憤,虎士投袂,雄騎布野,舳艫蓋川。 吾以不才, 臨書慨懣,不識次第。 所以積行緩期,冀弟不遠而悟。

之起 初至江陵,見義宣,旣 得入中 兵 義宣 夏口。 奉 一移檄 順 諸州郡,加進號位。 以第 |義宣二月十一日率衆十萬發自江津,舳艫數百里。是日大風,船垂覆沒,僅 八子慆爲輔國將軍,留鎭江陵。 出 , 拊膺曰:「阿兄誤人事,乃與癡人共作賊,今年敗矣。」 義宣至尋陽, 遣參軍劉諶之、尹周之等率軍下就臧質。雍州刺史朱脩 遣魯秀、朱曇韶萬餘人北 討朱脩之。

列

傳

第

二 十

軍沈 與質 (俱下 慶之送爽首示義宣,幷與書:「僕荷任一方,而釁生所統。 前 至鵲頭,聞徐遺寶敗,魯爽於小峴授首,相視失色。世祖使鎭北大將 近聊率輕師,指往翦撲,軍鋒

上先遺豫州刺史王玄謨舟師頓梁山洲內,東西兩岸爲卻月城,營栅甚固。 義宣屢與玄

裁交,賊爽授首。公情契異常,或欲相見,及其可識,指送相呈。」義宣、質並駭懼

謨書,要令降,玄謨書報曰:

之恩 原轂存輿,無禮必及,竊恐荆郢之士,已當潛貳其懷,非皇都陋臣,秉義不徙。公雖心 擇木之翰,有所不集矣。 有人,豈不惜哉!有臣則欲其忠,誘人而 回,始悟知己之爲難也。 **枉覃書檄,遠示見招。此則丹心微款,未亮於高鑑,赤誠幽志,曰三虛感於平日,環念周** 旦事 今。 理 豈意理數難推,果至於此。昔因幸會,蒙國士之顧,思報厚德, 與願違。公崇長姦回,自放西服,信邪細之說,忘大節之重,溺流狡之志, ,狎玩極寵,越希非覬,祖宗世祀,自圖顚覆,瞑目行事,未有 去年九月,故遣參軍先僧暖修書表心,幷密陳入相之計,欲使周旦之美, 頻奉二誨,伏對戰駭。先在彭、泗,聞諸將皆云必有今日之事,以鄙意量,謂無此 公但念提職在昔,不思善教有本,徒見徐、魯去就,未 夫挑妾者愛其易,求妻則敬 導諸逆,君子忠恕, 头其難。 其如 若承 是乎? 如斯之甚者 命 甘起泉壤, 如 響, 苟不 將 忠恕,則 焉用之。 也,乃復 滅 知仗義 遗謂 復見於 君 親

迷迹往,猶願勉建良圖。 柳撫軍忠壯慷慨、江西乃亮誠有素,新亭之勳,莫與爲等,而妄信

姦虛,坐相貶謗,不亦惑哉。

周旋,授命當仁,理無所讓。 御 : 六師,威靈遐振。 人百其氣,慕義如林,舟騎雲回,赫弈千里。 輒屬鞬秉銳,與執事 幸承人乏,夙誡前驅,精甲已次近路,鎭軍駱驛繼發,太傅、驃騎嗣董元戎,乘輿親 夫君道旣盡,民禮亦絕,執筆裁答,感慨交懷

擊將 利, 義宣 焚其 遇,法起戰大敗,赴水死略盡。二十一 之,衆一 屯蕪湖 舟 軍 撫軍 壘渡就玄謨。 乘, 垣護之、竟陵太守薛安都等出 時 柳元景據姑孰爲大統,偏帥鄭琨、武念戍南浦。質逕入梁山,去玄謨一里許結營, 奔潰 風勢猛盛,烟爓覆江。 五月十九日,西南風猛、江三質乘風順流攻玄謨西壘,冗從僕射胡子友等戰失 質又遣將龐法起數千兵從洲外趨南浦,仍使自後掩玄謨。 義宣時屯西岸,延火燒營殆盡。 **壘奮擊,大敗質軍,軍人一時投水。** 日,義宣至梁山,質上出軍東岸攻玄謨。 諸將乘風火之勢,縱兵攻 護之等因風縱火, 玄謨分遣游 與琨、念相

江陵。 先適 臧 義宣 衆散 質 子 與質相失,各單舸迸走,東人士庶並歸順,西人與義宣相隨者,船舸猶有百餘。 ,過尋陽,入城取女,載以 且盡,左右唯十許人, 脚痛不復能行,就民僦露車自載。 西奔。 至江 夏,聞巴陵有軍, 被抄斷, 無復食,緣道求告。 回入逕口,步向 女 至

列

傳

第

十八八

出。 奴誤我。」始與五妾俱入獄,五妾尋被遣出,義宣號泣語獄吏曰:「常日非苦,今日分別始 地至旦。遣黃門報超民,超民遣故車一乘,載送刺姦。義宣送止獄戶,坐地歎曰。「臧質老 秀所在,未出郭,將士逃散盡,唯餘慆及五妾兩黃門而已。夜還向城,入南郡空廨,無牀,席 步進,「日的超民送城外,更以馬與之,超民因還守城。義宣冀及秀,望諸將送北入虜。旣失 佩刀,攜息慆及所愛妾五人,皆著男子服相隨。城內擾亂,白刃交橫,義宣大懼落馬,仍便 笑。魯秀、竺超民等猶爲之爪牙,欲收合餘燼,更圖一決,而義宣悟墊無復神守,入內不復 甲,更爲後圖,昔漢高百敗,終成大業」。而義宣忘靈寶之言,誤云「項羽千敗」。 江陵郭外,遣人報竺超民,超民具羽儀兵衆迎之。時外猶自如舊,帶甲尙萬餘人。 左右腹心,相率奔叛。魯秀北走,義宣不復自立,欲隨秀去,乃於內戎服,滕囊盛糧,帶 .聽事見客,左右翟靈寶誡使撫慰衆賓,以「臧質違指授之宜,用致失利,今治兵繕 衆咸 掩 義宣旣

釁逼憂深,臣主旰食。 而皇慈逮下,愍其愚迷,抑法申情,屢奏不省,人神悚遑,省心震惕。 大義滅親,古今同准。無將之誅,猶或囚殺,況醜文悖志,宣灼遐邇,鋒指絳闕,兵纏近郊, 大司馬江夏王義恭諸公王八座與荆州刺史朱脩之書曰:「義宣反道叛恩,自陷極逆。 賴朝略震明,祖宗靈慶,罪人斯得,七廟弗際。 義宣自絕於天,理無容 司刑定罰,典辟攸在。

使自 爲 社稷之慮,臣子責深。 所,上全天德,下一洪憲。 便宜專行大戮,以紓國難。 臨書悲慨,不復多云。」書未達,脩之至江陵,已於獄盡焉。 但加諸斧鉞,有傷聖仁,示以弘恩,

時年四十。

世祖聽還葬。

侍 廬 陵 表薦。 簿,時令百官舉才, 脩之所殺。 寶明凡十八人,宣也愷、恢、惔、惇並於江寧墓所賜死,牍、悉達早卒,餘並與義宣俱爲朱 義宣子悰、愷、恢、憬、惔、悞、惇、慆、伯實、業、悉達、法導、僧喜、慧正 主 竺超民,青州刺史竺夔子 義眞讀書,官至彭城王義康 蔡超及諮議參軍顏樂之、徐壽之等諸同惡,並伏誅。超,濟陽考城人。父茂之, 超與前始寧令同 也。 一郡江淳之、前征南參軍會稽賀道養並爲興安侯義賓所 驃騎從事中郎,始興太守。 超少有才學,初爲兗州主 一、慧知、明彌虜、妙

宣爲 郎。 **劭令煥殺恢等。** 荆州 元凶 恢字景度,旣嫡長,少而辯慧,義宣甚愛重之。 煥 密 弑立,恢爲侍中。 常停都邑。 有 歸 煥乃解 順 意,謂恢等日 太祖欲令還西,乃以爲河東 其桎梏,率所領數十人與恢等向廣莫門欲出。 義宣起義,劭收恢及弟愷、惔、悰、憬、悛繫于外,散騎 [三禍 福 與諸郎 同之, 太守, 年十一,拜南譙王世子,除給事 願勿憂。」 加寧朔將軍。 及 臧質 自白下上趨 門者拒 頃之, 之,煥日「臧 徵為黃門侍 郞 廣莫門, 沈 燥防

列

恢藏江寧民陳銑家,有告之者,錄付廷尉。 恢子善藏,與恢俱死。 公已至,凶 州,轉恢侍中,領衞尉。 因以得出。 衞尉之置,自恢始也。轉右衞將軍,侍中如故。 人走矣。 恢至新亭,即除侍中。 此司空諸郎,並能爲諸君得富貴,非徒冤禍而已,勿相留。」亦值質至, 晉氏過江,不置城門校尉及衞尉官,世祖欲重城禁,回己故復置衞尉 俄遷侍中、散騎常侍、西中郎將、湘州刺史。 義宣舉兵反,恢與兄弟姊妹一時逃亡。 義宣幷領湘

義宣 郡太守。遷步兵校尉,轉黃門侍郎,太子中庶子,領長水校尉。元凶以愷爲散騎常侍。世 旭 以爲秘書監。未拜,遷輔國將軍、南彭城下邳二郡太守。其年,轉五兵尙書,進爵爲王。 事覺,收付廷尉,幷翻伏誅。〔三〕[俟封臨武縣侯,〔三〕年十八卒,諡曰悼侯。 憬封祁陽縣侯。 |反問至,愷於尙書寺內,著婦人衣,乘問訊車,投臨汝公孟詡。[1元]翻於妻室內爲地窟藏 愷 字景穆,生而養於宮內,寵均皇子。十歲,封宜陽縣侯。 仍爲建威將軍、南彭城沛二 悰封湘南縣

遷兗州刺史,將軍如故,戍湖陸。 徐遺寶字石傷,高平金鄉人。初以新亭戰功,爲輔國將軍、衞軍司馬、河東太守,不之 封益陽縣侯,食邑二千五百戶。 義宣旣叛,遣使以遺

寶爲征虜將軍、徐州刺史,率軍出瓜步。 遺寶遣長史劉雍之襲彭城,寧朔司馬明胤擊破之。

權率五百人馳往助胤,旣至,擊玄楷斬之,雍之還湖陸。 更遣高平太守王玄楷與雍之復逼彭城。 時徐州刺史蕭思話未之鎭, 遺寶復遣土人檀休祖應玄楷、「三」 因詔安北司馬夏侯祖

聞敗,亦潰散。 遺寶棄城奔魯爽,爽敗,逃東海郡界,土人斬送之,傳首京邑。

夏侯祖權,譙人也。 以功封祁陽縣子,食邑四百戶。大明中,爲建武將軍、兗州刺史,

卒官。諡曰烈子。

難。」夫天倫由子,共氣分形,寵愛之分雖同,富貴之情則異也。追味尚長之言,以爲太息。 史臣曰:襄陽龐公謂劉表曰:「若使周公與管、蔡處茅屋之下,食藜藿之羹,豈有若斯之

校勘記

- 遷使持節都督南徐兗二州揚州之晉陵諸軍事南徐州刺史「遷」字三朝本空白,北監本、毛本、 殿本、局本作「授」、元。二七八作「遷」。 今據元龜補。
- ヘニン 改授都督荆湘雍 梁益寧南北秦八州諸軍事荆州刺史 各本並脱「寧」字,據元龜二七八補。

- \cap = 毎意 有 所 想 各本 並脫「有」字,據元龜二八五補。
- \cap 29 義康 入侍醫藥 各本並脫「入侍」二字、據南史、元龜二八五補。
- 퍜. 而 胤 秀等輒就尙書儀曹索晉咸康末立康帝舊事 「儀曹」各本及通鑑並作「議曹」,據南史改。

按尙 書有儀曹無議曹。

へない 上時未有 所擬 三朝本、北監本、毛本脫「擬」字,殿本、局本有「屬」字,南史、通鑑有「擬」字。今

據南史、通鑑補。

一十 其日刺義康入宿 孫彪宋書考論云:「刺字疑是敕字。」

龍驤參軍巴東扶令育詣闕上表曰 通鑑胡注:「扶,姓

也。」嚴可均云:「巴東郡無巴東縣,亦無扶縣。 廣韻 ,扶,又姓,知姓扶,名令育也。」按魏書島夷

傳、建康實錄、元龜五 四一並作龍驤參軍扶令育。

- へたし 淮南王若道遇疾死 各本並脫「疾」字,據元龜五四一補。
- 闢天人之路 「天人」各本並作「大人」,據元龜 五四一改。
- 或苞惡 而窺國 各本並脫此句,據元龜五四一 補。
- **今** 如 何信疑似之嫌 「疑似之嫌」各本作「疑貌之似」,據通鑑宋元嘉十八年改。
- 便是負初寧陵 各本並脫「是」字,據南史、通鑑宋元嘉十七年、御覽三四四引補。

- 襲殺豫章太守桓隆南昌令諸葛智之 「桓隆」文帝紀作 「桓隆之」。 六朝人人名後之「之」字,有
- 時 可省去。「諸葛智之」胡藩傳作「諸葛和之」。
- 呈 遣中書舍人嚴龍齎藥賜死 「嚴龍」南史作「嚴麝」。
- 二合 使以 公表付外 張元濟、張森楷校勘記云:「使當作便。」
- 仍拜左將軍 三朝本作「左將軍」、北監本、毛本、殿本、局本作「右將軍」。
- 十三年出都督江州豫州之西陽晉熙新蔡三郡諸軍事鎭南將軍江州刺史 後,荆州刺史庾翼表移西陽、新蔡二郡荒民就陂田於尋陽,而江州界內遂有僑立之西陽郡矣。 年度郢州,明帝泰始五年又度豫,後又還郢。 陵」,據錢氏考異說改。廿二史考異云:「西陵蓋西陽之譌。 郡,又分廬江立晉熙郡。 自後西陽與新蔡、汝南、潁川,謂之豫州四郡。 故自義熙十二年迄元嘉之末,除江州督者,必兼督豫州之西陽、新蔡 考漢之西陽,在淮水之南,即今光山縣地。 江州刺史常兼督之。 州郡志,西陽本屬豫州,孝武孝建 義熙土斷,省汝南、潁川 西 陽」各本並作 晉南 砜 渡 元 西
- 二型 師護雖無殊績 各本並脫「師」字,據通鑑宋元嘉二十一年補。 各本並脱「師」字、據元龜一九六、通鑑補 師護、義季小字。
- 復當爲師 護怨 各本 ·並脱「師」字,據元龜一九六補。

汝與

師護年時

輩

晉熙三郡也。」

- 以義宣爲中書監都督揚豫二州丞相錄尙書六條事揚州刺史 各本並脱,據远龜二六八、二七六、二七八、二九四補。 南史有「丞相錄六條事揚州」八字。 「丞相錄尚書六條事揚州」十字,
- (三) 赤誠幽志 「赤誠」各本並作「赤城」,張元濟校勘記、孫彪宋書考論並云赤城疑作赤誠。 按误、
- 柳撫軍忠壯慷慨 「柳」各本並作「抑」、張森楷校勘記、孫彪宋書考論並云抑當作柳。時柳元景

爲撫

軍

一將軍

孫說是,今改正。

- 尹周之攻梁山西壘,陷之。』按長歷,是月丁會朔,三日己亥,八日甲辰,十八日甲寅。朱略於己 五月十九日西南風猛 亥上有甲辰,下有甲寅,然則決非十九日與己亥。 通鑑考異云:「義宣傳:『五月十九日,西南風猛。』宋略曰:『己亥,質遣 或者是己酉與辛亥也。」
- [云] 仍便步進 「步進」各本並作「步地」,據<u>通</u>鑑改。
- 義宣子惊愷恢憬恢悔惛怕實至寶明凡十八人 及弟愷、惔、悰、憬、怅繫於外,是悰、愷皆恢之弟也。 殿本考證云:「下文稱恢爲嫡長,又云劭收恢 病史亦云長子恢,此傳敍恢於悰、愷之後,
- 二元 世祖 投臨汝公孟詡 欲重城禁 世 「孟」各本並作「蓋」,據南史、元龜八〇三改正。 祖」各本並作「孝武」,據藝文類聚四九引改。按宋書史例多稱廟號。 孟詡爲孟昶之孫。孟昶子靈休

恐誤。」

[110] 幷詡伏誅 各本並脫「幷」字,據南史補。

俟封臨武縣侯 「俟」各本並作「恢」, 孫彪宋書考論云:「恢字譌。上云| 快早卒,蓋『俟』字也。

CMIII) 遺寶復遺土人檀休祖應玄楷 「土人」三朝本作「士人」、北監本、毛本、殿本、局本作「使人」。 按

「士人」蓋「土人」之譌。今改正。

宋書卷六十九

列傳第二十九

劉湛 范曄

曹,仍補治中別駕從事史,復爲太尉參軍,世子征虜西中郎主簿。父柳亡於江州,州府送故曹,仍補治中別駕從事史,復爲太尉參軍,世子征虜西中郎主簿。父柳亡於江州,州府送故 年便有宰世情,常自比管夷吾、諸葛亮,不爲文章,不喜談議。 甚豐,一無所受,時論稱之。服終,除祕書丞,出爲相國參軍。 郎,又不拜。 湛 劉湛字弘仁,南陽涅陽人也。 出繼伯父淡,襲封安衆縣五等男。少有局力,不尙浮華。 高祖以爲太尉行參軍,自道遇甚厚。高祖領鎭西將軍、荆州刺史,以湛 祖耽、父柳、並晉左光祿大夫、開府儀同三司 謝晦、王弘並稱其有器幹。 本州辟主簿,不就,除著作佐 博涉史傳,諳前世舊典,弱 為功

守。 義康弱 年未親 政,府州軍事悉委湛。 府進號右將軍,仍隨府轉。 義康以本號徙爲南豫

列傳

第

__ __

+

九

劉湛

高祖入受晉命,以第四子義康爲冠軍將軍、豫州刺史,留鎭壽陽。

以湛爲長史、梁郡太

湛禁之,義眞乃使左右索魚肉珍羞,於齋內別立厨帳。會湛入,因命臑酒炙車鳌,湛正色曰: 州,湛改領歷陽太守。 義眞出爲車騎將軍、南豫州刺史,湛又爲長史,太守如故。 至,湛因起曰:「旣不能以禮自處,又不能以禮處人。」 「公當今不宜有此設。」義眞曰:「旦甚寒,一盌酒亦何傷。長史事同一家,望不爲異。」酒旣 爲人剛嚴用法,姦吏犯贓百錢以上,皆殺之,自下莫不震肅。 義眞時居高祖憂,使帳 下備膳, 廬陵王

字季珪。琰於江陵病卒,湛求自送喪還都,義恭亦爲之陳請,太祖答義恭曰:「吾亦得湛啓 寡,湛實國器,吾乃欲引其令還,直以西夏任重,要且停此事耳。 能不後之,不願外出,是行也,謂爲弘等所斥,意甚不平,常曰:「二王若非代邸之舊,無以至 持節、南蠻校尉、領撫軍長史,行府州事。時王弘輔政,而王華、王曇首任事居中,湛自謂才 中郎將、廣州刺史。嫡母憂去職。服闋、爲侍中。 事,爲之酸懷,乃不欲苟違所請。但汝弱年,新涉庶務,八州殷曠,專斷事重,疇諮委仗,不 此,可謂遭遇風雲。」湛負其志氣,常慕汲黯、崔琰爲人,故名長子曰歸字長孺,第二子曰琰 可不得其人,量算二三,未獲便相順許。今答||湛啓,權停彼葬。頃朝臣零落相係,寄懷轉 景平元年,召入,拜尚書吏部郎,遷右衞將軍。出督廣交二州諸軍事、建威將軍、平越 撫軍將軍江夏王義恭鎭江陵,以湛爲使 汝慶賞黜罰,豫關失得者,

必宜悉相委寄。」

列 傅 第 + 九 劉 湛 如

但當 萬一 遣使 頗 一爾, 宜 有 覺也。 怨 詰 今所專,必是小事耳。 義 讓義恭 恭性甚狷隘,年又漸長,欲專政事,每爲湛所裁,主佐之間,嫌隙遂構。 盡 相彌縫,取其可取,棄其可 汝年已長,漸更事 上友于 ,
弁
使
深 素篤, 加 諧 欲 亦恐量此 緝。義 加 物,且羣情矚望,不 陋 順,乃詔之曰:「事至於此,甚爲可歎。 恭具陳湛無居下之禮,又自以年長,未得行 輕 棄。 重,未必盡得,彼之疑怨,兼或 汝疏云『泯然無際』, 以幼味 相期,何由 如 此 故 甚 由 如十歲時,動 佳 此 當 邪 今乏才, 彼多猜,不可令 意,雖 太祖 奉 聞 止諮問 Ξ ·詔旨, 之,密 委授

相約勒 以回主心,傾黜景仁,獨當時務。 郡漢世功曹耳。」明年,景仁轉尚書僕射,領選護軍將軍,湛代爲領 **父悖耄**, 任,謂爲間己。 詹事,加給事中、本州大中正,與景仁並被任遇。 此。 湛與景仁素欵,又以其建議徵之,甚相感說。及俱被時遇,猜隙漸生,以景仁專管內 先是,王華旣亡,曇首又卒,領軍將軍殷景仁以時賢零落,白太祖 無敢歷殷氏門者。 遂就殷鐵干祿。 時彭城王 一義康 由敬文閣淺, 湛黨劉敬文父成未悟其機,指景仁求郡,敬文遽往謝湛 專秉朝權,而湛昔爲上佐,遂以舊情委心自結,欲因宰相 義康 上負生成,合門慚懼, 屢構之於太祖,其事不行。 湛常云:「今世宰 無地自處。」敬文之姦諂 軍將軍。 相何難,此政可當我南陽 義康僚屬 徵湛。八年,召爲 十二年,又領詹 及湛諸附 無愧 之力 太子 隸 潛

御者 加散騎常侍,詹事如 L 甚 意 重 此 雖內離,而接遇不改。 :便解駕,左右及羽儀隨意分散,不夕不出,以此爲常。 義康擅勢專朝,威傾內外,湛愈推崇之,無復人臣之禮, 日夕引 入,吾亦看日早晚,慮其不去。」湛小字班虎,故云班也。 遷丹陽尹,金紫光祿大夫。 接,恩禮綢繆。 故。 上嘗謂所親曰:「劉班初自西還,吾與語,常看日早晚,慮其當 善論治道,幷諳前世故事,敍致銓理,聽者忘疲。 及至晚節,驅煽義康,凌轢朝廷, 上稍不能平。 湛初入朝,委任 每入雲龍門,

所 親 曰:「今年必敗。 十七年,所生母亡。時上與義康形迹旣乖,釁難將結,湛亦知無復全地。及至丁艱,謂 常日正賴口舌爭之,故得推遷耳。今旣窮毒,無復此望,禍至其能

乎!

革。 達于四海。 爲 靡 心 厭 卽 表 裏,邪 無君 事 自 十月,詔曰:「劉湛階藉門蔭,少叨榮位,往佐歷陽,姦詖夙著。謝晦之難,潛使密告,求 ,,久宜誅屛。朕所以棄罪略瑕,庶收後効,寵秩優忝,踰越倫匹。 邇 以 附者榮曜 之心,觸 來 比年七曜違度、震蝕表災、侵陽之徵、事符幽顯。 ,凌縱滋甚,悖言懟容,罔所顧忌,陰謀潛計,聯睨兩宮。 遇斯發。 九族,秉理者推陷 遂乃合黨連羣,構扇同異,附下蔽上,專弄威權,薦子樹親,互 必至。 旋觀姦慝,爲日已久,猶欲 搢紳含憤,義夫興歎。 묘 而凶忍忌克,剛愎 弘納遵養,冀或 唯彰暴國都,固亦

魯不綱, 禍 傾 的 那國; 昭 宣電斷, 漢祚方延。 便收付廷尉,肅明刑典。」 於獄伏誅, 時年四

十九。

汝邪? 收, 歎曰:「便是亂邪。」仍又曰:「不言無我應亂,殺我自是亂法耳。」入獄見素,曰:「乃復及 子 黯,大將軍從事中郎。 相勸爲惡,惡不可爲;相勸爲善,正見今日。 黯及二弟亮、嚴並從誅。 如何」邁生女輒殺之,爲士流所怪 湛弟素,黄門侍郎,徙廣州 湛 初被

范曄字蔚宗,順陽人,車騎將軍泰少子也。 母如厠產之,額爲塼所傷, 故以博爲小字

出繼從伯弘之,襲封武興縣五等侯。

部 辭 掾,彭城王義康冠軍參軍,隨府轉右軍參軍,入補尚書外兵郎,出爲荆州別駕從事史。 郎 以 秘書丞,父憂去職。服終,爲征南大將軍檀道濟司馬,領新蔡太守。 脚疾,上不許,使由水道統載器仗部伍。 少好學,博涉經史,善爲文章,能隸書,曉音律。年十七,州辟主簿,不就。 軍還,爲司徒從事中郎。 道濟北征,曄憚行, 頃之,遷尚書吏 高祖 相 或

元嘉 九年冬,彭城太妃薨,〔三〕將葬,祖夕,僚故並集東府。 **瞱弟廣淵**,時爲司徒祭酒,

史, 其日在直 長史,領南下邳太守。及濬爲揚州,未親政事,悉以委曄。 及行,又攜妓妾自隨,爲御史中丞劉損所奏,太祖愛其才,不罪也。 曄宣城太守。 加寧朔將軍。 兄暠爲宜都太守,嫡母隨暠在官。十六年,母亡,報之以疾,曄不時 不得志,乃删衆家後漢書爲一家之作。 徒左西屬王深宿廣淵許,夜中酣飲,開 在郡數年, 北牖 尋遷左衞將軍、太子詹 聽挽歌爲樂。 服闋,爲始興王濬後軍 遷長 沙 王義欣鎭軍長 義康 事 大怒,左

曉,終不肯爲上彈。 止 曄 長不滿七尺,肥黑,禿眉鬚。善彈琵琶,能爲新聲,上欲聞之,屢諷以微旨,曄僞若不 上嘗宴飲歡適,謂曄曰:「我欲歌,卿可彈。」曄乃奉旨。 上歌旣畢,曄亦

諸年少 綜, 知 之。 故 敵,前後輸曄物甚多。 得免。 與之結 初, 而熙先 ~, 旣 · 得 調 。 魯國 及義康被黜,熙先密懷報效,欲要朝廷大臣,未知誰可動者,以曄意志不滿,欲引 屢得 厚。 素不 孔熙先博學有縱橫才志,文史星算,無不兼善。爲員外散騎侍郎,不爲時所 物, 熙先藉嶺南 初熙先父默之爲廣州刺史,以贓貨得罪下廷尉,大將軍彭城王義康保持之, 爲曄所重,無因進說。 逐 日夕往來,情意 **嘩旣利其財寶,又愛其文藝。** 遺財,家甚富足,始與綜諸弟共博,故爲拙行, 浴稍款。 曄外甥謝綜,雅爲曄所知,熙先嘗經相識,乃傾身事 綜 乃引熙先與曄爲數,曄又與戲,熙先故爲不 熙先素有詞辯,盡心事之,曄遂相與異 以物輸之。 総 等

故門胄雖華,而國家不與姻娶。 常,申莫逆之好。 人婚,爲是門戶不得邪?人作犬豕相遇,而丈人欲爲之死,不亦惑乎。」曄默然不答,其意 始以微言動曄,曄不回,熙先乃極辭譬說。 熙先因以此激之曰:「丈人若謂朝廷相 **曄素有閨庭論議,朝野所知,** 待厚者,何故不 ·與丈

被引, 乃定。 將軍記室參軍,隨鎭豫章。綜還,申義康意於曄,求解晚隙,復敦往好。 言。 姦 時旨,乃言於上曰:「臣歷觀前史二漢故事,諸蕃王政以訞詛幸災,便正大逆之罰。 心釁跡,彰著遐邇,而至今無恙,臣竊惑焉。且大梗常存,將重階亂,骨肉之際,人所難 臣受恩深重,故冒犯披露。」上不納。 時曄與沈演之並爲上所知待,每被見多同。曄若先至,必待演之俱入,演之先至,嘗獨 · 曄又以此爲怨。 曄累經義康府佐,見待素厚。及宣城之授,意好乖離。 曄旣有逆謀,欲探 綜爲義康 況義康

亦有 去不 有誠,密相結納。 綜父述亦爲義康所遇,綜弟約又是義康女夫,故太祖使綜隨從南上,旣爲熙先所獎說, 酬報之心。 熙先素善天文,云:「太祖必以非道晏駕,當由骨肉相殘。江州應出天子。」以爲義康當 大將軍府史仲承祖,義康舊所信念,屢銜命下都,亦潛結腹心,規有異志。 廣州人周靈甫有家兵部曲,熙先以六十萬錢與之,使於廣州合兵。 丹陽 尹徐湛之,素爲義康所愛,雖爲舅甥,恩過子弟,承祖因此結事湛之, 聞熙先 靈甫一

列傳

告以 密計。 承祖南下,申義康意於蕭思話及曄,云:「本欲與蕭結婚, 恨始意不果。 與范本

情不薄,中間相失,傍人爲之耳。」

先遣 憂兵 乞治、 舊恩 州 故,其亦當解人此旨,故應得健兒數百。質與蕭思話款密,當仗要之,二人並受大將軍眷遇, 熙先慮事 先善於治病, 必 告逆謀,耀許 刺史,熙先 無異同。 力不 」婢採藻隨之,付以牋書,陳說圖讖。 爲 有法 ,規相拯拔,並與熙先往來。 合湯 泄,耽採藻殺之。 略道人,先爲義康所供養,粗被知待,又有王國寺法靜尼亦出入義康家內,皆感激 足,但當 思話三州義故衆力,亦不減質。 左衞 兼能診脉。 爲內應。 一劑,耀疾卽損。 將軍 · 勿失機耳。」 乃略 ,其餘皆有選擬。 豫章胡遵世,藩之子也,與法略甚款,亦密相 法靜尼妹夫許耀,領隊在臺,宿衞殿省。 湛之又謂曄等:「臧質見與異常,歲內當還,已報質,悉攜門生義 耀自往酬謝,因成周旋。 使法略罷道,本姓孫,改名景玄,以爲臧質寧遠參軍。 相署置,湛之爲撫軍將軍、揚州刺史,曄中軍將軍、南徐 法靜還,義康餉熙先銅匕、銅鑷、袍段、棊奩等物。 凡素所不善及不附養康者,又有別簿,並入死目。 郡中文武,及合諸處偵邏,亦當不減千人。不 熙先以耀膽幹可施,深相待結,因 嘗有病,因法靜尼就熙先 ·酬和。 法靜尼南上,熙 熙

熙先使弟休先先爲檄文曰:

夫休否相乘,道無恒泰,狂狡肆逆,明哲是殛。故小白有一匡之勳,重耳有翼戴之

宰,崇樹非類,傾墜皇基。罪百浞、殪,過十玄、漭,開闢以來,未聞斯比。 舛,[E] 致使釁起蕭牆,危禍萃集。 賊臣趙伯符積怨含毒,遂縱姦凶,肆兵犯蹕,禍流儲 萬機,垂心庶務,是以邦內安逸,四海同風。而比年以來,姦豎亂政,刑罰 德。 自景平肇始,皇室多故,大行皇帝天誕英姿,聰明叡哲,拔自藩國,嗣位統天,憂勞 率土叩心。華 乖淫,陰陽違

夷泣血,咸懷亡身之誠,同思糜軀之報。

答天心,下愜民望,正位辰極,非王而誰 化,豈唯 其黨與。 先,忠貫白日。誠著幽顯,義痛其心,事傷其目,投命奮戈,萬殞莫顧,卽日斬怕符首。及 躬,德格天地,勳溢區宇,世路威夷,勿用南服,龍潛鳳栖,于茲六稔,蒼生飢德,億兆渴 湛之、曄與行中領軍蕭思話、行護軍將軍臧質、行左衞將軍孔熙先、建威將軍孔休 「東征有鴟鴞之歌,陝西有勿翦之思哉。 雖犲狼卽戮,王道惟新,而普天無主,羣萌莫係。 靈祇告徵祥之應,讖記表帝者之符,上 彭城王體自高祖,聖明在

萌,令宣示朝賢,共拯危溺,無斷謀事,失於後機,遂使聖躬濫酷,大變奄集,哀恨崩裂, 撫 帥 ,鎭戍有常。 心摧哽,不 今遣行護軍將軍臧質等,齎皇帝璽綬,星馳奉迎。百官備禮,駱驛繼進,並命羣 ·知何 若干撓義徒,有犯無貸。昔年使反,湛之奉賜手勑,逆誡禍亂,預覩斯 地,可以厝身。 輒督厲尫頓,死而後已。

熙先以旣爲大事,宜須義康意旨,曄乃作義康與湛之書,宣示同黨曰:

苞藏逆心,以招灰滅,所以推誠自信,不復防護異同,率意信心,不顧萬物議論,遂致讒 罰所加,同之元惡,傷和枉理,感徹天地 唯知諂進,伺求長短,共造虛說,致令禍陷骨肉,誅戮無辜。凡在過釁,竟有何徵,而刑 巧潛構,衆惡歸集。 於盡心奉上,誠貫幽顯,拳拳謹慎,惟恐不及,乃可恃寵驕盈,實不敢故爲欺罔也。 士類不歸。 吾凡人短才,生長富貴,任情用己,有過不聞,與物無恒,喜怒違實,致使小人多 禍敗已成,猶不覺悟,退加尋省,方知自招,刻肌刻骨,何所復補。 甲姦險好利,負吾事深;乙凶愚不齒,扇長無賴;丙、丁趨走小子, 然至 岩

狂亂 裂逆黨,豈非功均創業,重造宋室乎。 謝罪北闕,就戮有司。苟安社稷,暝目無恨。 白黑懷 崩 瓦 罪 解,必在朝夕。 處分之要,委之羣賢,皆當謹奉朝廷,動 吾雖幽逼日苦,命在漏刻,義慨之士,時有音信。 每知天文人事,及外間物情, 土 義 秉理者,寧可不識時運之會,而坐待橫流邪。 是爲釁起羣賢,濫延國家,夙夜憤踊,心腹交戰。朝之君子及士庶 但兵凶戰危,或致侵濫,若有一豪犯順,誅及 止聞啓。 勉之勉之。 可以吾意宣示衆賢, 若能同 往日嫌怨,一時豁然,然後吾當 除君側之惡,非唯一代,況此等 心奮發,族 九

列傳第二十九 范曄

跡,謹封上呈,凶悖之甚,古今罕比。由臣闇於交士,聞此逆謀,臨啓震惶,荒情無措。」詔 與之鄰省,屢來見說,故漸成周旋。比年以來,意態轉見,傾動險忌,富貴情深,自謂任遇未 曰:「湛之表如此,良可駭惋。」曄素無行檢,少負瑕釁,但以才藝可施,故收其所長,頻加榮 **兼云人情樂亂,機不可失,讖緯天文,並有徵驗。** 庫尋自來,復具陳此,幷說臣論議轉惡,全 合不逞,規有所建。 此之事,已具上簡。 高,遂生怨望。 以其日爲亂,而差互不得發。於十一月,徐湛之上表曰:「臣與范曄,本無素舊,中忝門下, **爵,遂參淸顯。** 身爲難。 二十二年九月,征北將軍衡陽王義季、右將軍南平王鑠出鎭,上於武帳岡祖道,曄等期 卽以啓聞,被敕使相酬引,究其情狀。於是悉出檄書、選事、及同惡人名、手墨翰 非唯攻伐朝士,譏謗聖時,乃上議朝廷,下及藩輔,驅扇同異,恣口肆心,如 而險利之性,有過谿壑,不識恩遇,猶懷怨憤。每存容養,冀能悛革,不謂 以臣昔蒙義康接盼,又去歲羣小爲臣妄生風塵,謂必嫌懼,深見勸誘。 近員外散騎侍郎孔熙先忽令大將軍府吏仲承祖騰曄及謝綜等意,欲收 司

于時 難 厭 滿,正 其 延賢堂,遣使問曄曰:「以卿觕 先呼 是 無 理 | 曄及朝 怨望,驅扇朋黨而已,云何乃有異謀。」曄倉卒怖懼,不卽首款。 臣集華林東閤,止於客省。 有文翰,故相 先已於外收綜及熙先兄弟,並皆款服。 任擢,名爵期懷,於例 非 少。 亦 重遣問 知 卿意

惡

相

濟,狂

悖至此。便可收掩,依

法

公窮 詰。

罪 階 上示 中將 爲。』臣雖 林門外,寧欲面 二卵 重 兩級,自然必至。 以墨迹,曄乃具陳本末,曰「久欲上聞,逆謀未著,又冀其事消弭,故推遷至今。 軍沈邵之曰:「凡諸處分,符檄書疏,皆范曄所造及治定。云何於今方作如 ,分甘誅 與謝綜、徐湛之、孔熙先謀逆,並已答款,猶尚未死,徵據見存, 磐石,蕃嶽張時,設使竊發僥倖,方鎭便來討伐,幾何而不誅夷。 凡下,自朝廷許其觕有所及,以理而察,臣不容有此。」上復遣問曰:「熙先近在華 戮。」 [辨之乎。]|曄辭窮,乃曰:「熙先苟誣引臣,臣當如何。」|熙先聞曄不服,笑謂 如何以滅族易此。 古人云: 『左手據天下之圖, 右手刎 何不依實。」瞱對日 且臣位任過重,一 其喉,愚夫不 此抵 蹋 負 邪 國 殿

款,辭氣 見,不以 負 此 卿 仰也。」 心也。」明日,仗士送曄付廷尉,入獄,問徐丹陽所 自 其夜, 應解。」曄曰:「外人傳庾尚 經意。 不橈,上奇其才,遣 叉 上使尚 詰 責 **今忽受責,方覺爲罪。** 前 .書僕射何尙之視之,問曰:「卿事何得至此。」|曄曰:「君謂是何。」尚之曰: 吏部 尚書何尙之曰:「使孔熙先年將三十作散騎郎 人慰勞之曰:「以卿之才, 書見 憎,計與之無惡。 君 方以道佐世,使天下無冤。 而滯於集書省, 在, 謀逆之事,聞 然後 知 爲湛之所發。 弟就 理應 ,那不作賊。」 孔熙先說此,輕其小 死之後,猶 有異 熙先 志。 望君 此 望 乃 風 我 吐 照

熙先於獄中上書曰:「囚小人猖狂,識無遠概,徒狥意氣之小感,不料逆順之大方。

與

楚。 介之節,猥垂優逮之詔。 第一弟休先首爲姦謀,干犯國憲,整膾脯醢,無補尤戾。 言深切。 囚 究其幽微。 負夙心,貪及視息,少得申暢。 盆之水,理乖收汲。 壁投書之士,其行至賤,其過至微,由識不世之恩,以盡驅命之報,卒能立功齊、魏,致勳 一死之後,或可追存,庶九泉之下,少塞釁責。」所陳並天文占候,讖上有骨肉相殘之禍,其 囚雖身陷禍逆,名節俱喪,然少也慷慨,竊慕烈士之遺風。但墜崖之木,事絕升躋,覆 考論旣往,誠多審驗。 方當身膏鈇鉞、治誠方來、若使魂而有靈、結草無遠。 恩非望始,沒有遺榮,終古以來,未有斯比。 自惟性愛羣書,心解數術,智之所周,力之所至,莫不窮攬, 謹略陳所知,條牒如故別狀,願且勿遺棄,存之中書。 陛下大明含弘, 夫盜馬絕纓之臣,懷 量苞天海,錄其一 然區 區丹抱,不 秦、

言生存 識。 獄 曰:「始被收時,疑誰所告。」綜云:「不知。」曄曰:「乃是徐童。」童,徐湛之小名仙童也。 好 詩 **嘩在獄,與綜及熙先異處,乃稱疾求移考堂,欲近綜等。** 百:「禍 醜 ", 此 共一 路行 丘, 福 本無兆,性命歸 復即 何足異 在 直。 有極。必至定前期,誰能延一息。 造論 東陵上,寧辨首山側。 雖無嵇生琴,庶同夏侯色。 見聽,與綜等果得隔壁。 在生已可知, 來緣 儘 遙問 無

曄本意謂 入 獄 便 死,而上窮治其獄,遂經二旬,曄更有生望。 獄吏因戲之曰:「外傳詹

列

傅

第

+

九

范

瞱

西池 事 情。」|曄曰:「大將言是也。」 ,或當長繫。」曄聞之驚喜,綜、熈先笑之曰:「詹事嘗共疇昔事時,「尽」無不攘袂瞋目。 [圖主,何顏可以生存。] |曄謂衞獄將曰:「惜哉!薶如此人。」將曰:「不忠之人,亦何足 一射堂上,躍馬顧盼,自以爲一世之雄。 而今擾攘紛紜,畏死乃爾。 設令今時賜以性命, 及在

來,勝· 「舅殊 得相 手擊嘩頭及頰,嘩顏色不怍。 罪 何 「此異病篤,何事强飯。」曄家人悉至市,監刑職司問:「須相見不。」曄問綜曰:「家人以來,幸 回 恚我邪。]
高曰:「今日何緣復恚,但父子同死,不能不悲耳。」 曄常謂死者神滅,欲著無鬼論, 駡 關 至 |曄曰:「君不爲百歲阿家,不感天子恩遇,身死固不足塞罪, 奈何枉 見,將不暫別。」爲曰:「別與不別,亦何所存。 而 人,向見道邊親故相瞻望,亦殊勝不見。吾意故欲相見。」於是呼前。 將 人 不同夏侯色。」

| 庫收淚而止。 初無暫止。 出 多 市,曄最在前,於獄門顧謂綜曰:「今日次第,當以位邪。」爲曰:「賊帥爲先。」在道 心。」|曄轉醉,子||藹亦醉,取地土及果皮以擲||曄,呼||曄爲別駕數十聲。 **嘩所生母泣曰:「主上念汝無極,汝曾不能感恩,又不念我老,今日奈** 至市,問綜曰:「時欲至未。」綜曰:「勢不復久。」 曄旣食,又苦勸綜,綜曰: 妻云:「罪人, **綜母以子弟自蹈逆亂,獨不出視。** 阿家莫念。」妹及妓妾來別, **膵**語 曄悲涕流漣,綜曰: 殺子孫。」曄乾笑云 曄妻先下撫其子, 綜 曄問曰:「汝 曰:「姊今不 何ご仍以

薪,弟子冬無被,叔父單布衣。曄及子藹、遙、叔蔞、孔熙先及弟休先、景先、思先、熙先子桂 父已亡者及謝綜弟輝,徙廣州。 |甫、<u>|</u>桂甫子白民、謝綜及弟約、仲承祖、許耀,諸所連及,並伏誅。 若有靈,自當相報。」收職家,樂器服玩,並皆珍麗,妓妾亦盛飾,母住止單陋,唯有一厨盛 至是與徐湛之書,云「當相訟地下」。其謬亂如此。又語人:「寄語何僕射,天下決無佛鬼。
 萬子魯連,吳興昭公主外孫,請全生命,亦得遠徙,世祖
 曄時年四十八。嘩兄弟子 樵

燥」,比何尙之,「詹唐黏濕」,比沈演之,「棗膏昏鈍」,比羊玄保,「甲煎淺俗」,比徐湛之,「甘 序之曰:「麝本多忌,過分必害,沈實易和,盈斤無傷。 松、蘇合」,比慧琳道人,「沈實易和」,以自比也。 於馨烈,乃當彌增於尤疾也。」此序所言,悉以比類朝士:「麝本多忌」,比庾炳之;「零藿 息、鬱金、榛多、和羅之屬,並被珍於外國,無取於中土。 位得還。 曄性 **l精微有思致,觸類多善,衣裳器服,莫不增損制度,世人皆法學之。撰和香方,其** 零藿虛燥,詹唐黏濕。 又棗膏昏鈍, 甲煎淺俗, 甘松、蘇合、安 非唯無助 虚

曄獄中與諸甥姪書以自序曰:

於能不,意中所解,汝等或不悉知。吾少懶學問,晚成人,年三十許,政始有向耳。「型 吾狂釁覆滅,豈復可言,汝等皆當以罪人棄之。 然平生行己任懷,猶應 可 至

文士。 趣,千條百品,屈曲有成理。 主,則其旨必見,以文傳意,則其詞不流。 之於胸懷耳。 尋注 此累,政可類工巧圖績,竟無得也。 自 爾 書,心氣惡,小苦思,便憒悶,口機又不調利,以此無談功。 以 文患其事盡於形,情急於藻,義牽其旨,韻移其意。 來,轉爲心化,推老將至者,亦當未已也。 文章轉進,但才少思難,所以每於操筆,其所成篇,殆無全稱者。 自謂頗識其數,嘗爲人言,多不能賞,意或異故 常謂情志所託,故當以意爲主,以文傳意。 然後抽其芬芳,振其金石耳。 往往有微解,言乃不能自盡。 雖時有能者, 至於所通解處,皆自得 大較 此中情性旨 也 爲性不 以意 多不免 常恥作 爲

也。 根本 遠致,以此爲恨,亦由無意於文名故也。 中來。 吾思乃無定方,特能濟難適輕重,所稟之分,猶當未盡。 性別宮商,識清濁,斯自然也。 言之皆有實證,非爲空談。 觀古今文人,多不全了此處,縱有會此者, 年少中,謝莊最有其分,手筆差易,文不 但多公家之言,少於事外 拘韻 不必從 故

耳。 句。 少可意者。 博贍不可及之,整理未必愧也。 至於循吏以下及六夷諸序論,筆勢縱放,實天下之奇作。其中合者,往往不減過 本未關史書,政恒覺其不可解耳。 班氏最有高 一名,既任情無例,不可甲乙辨。 吾雜 旣造後漢,轉得統緒,詳觀古今著述及評論,殆 傳論,皆有精意深旨,旣有裁味, 後贊於理近無所得,唯志可推 故約其詞

秦篇。 賞音者。 文之傑思,殆無一字空設,奇變不窮,同合異體,乃自不知所以稱之。 不必多,且使見文得盡。又欲因事就卷內發論,以正一代得失,意復未果。 嘗共比方班氏所作,非但不愧之而已。 紀、傳例爲舉其大略耳,諸細意甚多。 欲偏作諸志,前漢所有者悉令備。 自古體大而思精,未有此也。 此書行, 贊自是吾 恐世人 故應有 雖事

亦嘗以授人,士庶中未有一 不成就,每愧此名。 其中體趣,言之不盡,弦外之意,虛響之音,不知所從而來。 吾於音樂,聽功不及自揮,但所精非雅聲,爲可恨。 豪似者。 此永不傳矣。 吾書雖小小有意,筆勢不快,餘竟 然至於一絕處,亦復何異邪。 雖少許處, 而旨態無極。

不能盡之,多貴古賤今,所以稱情狂言耳。

曄自序並實,故存之。

曄少時,兄晏常云:「此兒進利,終破門戶。」終如晏言。 藹幼而整潔,衣服竟歲未嘗有塵點。 死時年二十。

史臣日 . "古之人云"「利令智昏。」甚矣,利害之相傾。 劉湛識用才能,實苞經國之略,豈

與夫推長戟而犯魏闕,亦何以異哉。

不知移弟爲臣,則君臣之道用,變兄成主,則兄弟之義殊乎。 而義康數懷姦計,苟相崇說,

校勘記

- [1] 高祖以爲太尉行參軍 各本並脫「以」字,孫彪宋書考論云:「高祖下當脫以字。」按孫說是,今
- 補正。
- [二]當今乏才「乏」各本並作「之」、據殿本預史改。
- 元嘉九年冬彭城太妃薨 「九年」各本及南史並作「元年」,孫彪宋書考論云:「彭城太妃卒在元
- 嘉九年,此言元年,形近之誤。 南史誤同。」按孫說是。 上文有征南大將軍檀道濟北征,係元嘉
- 七年事,此當在九年。今改正。

潛」。

- 刑罰乖淫陰陽違舛 「刑罰乖淫」文苑英華六四五作「刑法違衷」,文義較勝。「違」文苑英華作
- 臣雖凡下 之譌。」按張校是,今改正 「凡」三朝本、北監本、毛本作「尼」、殿本、局本作「泥」。 張元濟校勘記云:「尼疑凡字
- 詹事嘗共嚋昔事時 「嘗」三朝本、北監本、毛本作「當可」二字,殿本、局本作「當前」二字、南史

鑑補「昔」字。

[1] 政始有向耳 「向」南史作「尚」、文義較勝。

宋書卷七十

列傳第三十

袁淑

西屬。 淑從母兄也,欲其附己,而淑不以爲意,由是大相乖失,以久疾免官。補衡陽王義季右軍主 簿,遷太子洗馬,以脚疾不拜。衞軍臨川王義慶雅好文章,請爲諮議參軍。頃之,遷司徒左 爲章句之學,而博涉多通,好屬文,辭采遒豔,縱橫有才辯。本州命主簿,著作佐郎,太子舍 遷尙書吏部郎。 人,並不就。彭城王義康命爲司徒祭酒。[三]義康不好文學,雖外相禮接,意好甚疎。 袁淑字陽源,陳郡陽夏人,丹陽尹豹少子也。 少有風氣,年數歲,伯父湛謂家人曰:「己「此非凡兒。」至十餘歲,爲姑夫王弘所賞。不 出爲宣城太守,入補中書侍郎,以母憂去職。服闋,爲太子中庶子。元嘉二十六年, 其秋,大舉北伐,淑侍坐從容曰:「今當鳴鑾中岳,席卷趙、魏,檢玉岱宗,今 劉湛,

列傳第三十

袁 淑

其 時 征 也。 北長史、南東海太守。淑始到府,濬引見,謂曰:「不意舅遂垂屈佐。」淑答曰:「朝廷 臣逢千載之會,願上封禪書一篇。」太祖笑曰:「盛德之事,我何足以當之。」出爲始

遣下官,本以光公府望。」還爲御史中丞。

時索虜南侵,遂至瓜步,太祖使百官議防禦之術,淑上議曰:

圍潰之衆,匪寇傾淪,攻制之師,空自班散,濟西勁騎,急戰蹵旅,淮上訓卒,簡備靡旗。 聞已崩殪。 滅。所謂栖烏於烈火之上,養魚於叢棘之中。 動,津陸陷溢,痁禍洊興,蒭藁已單,米粟莫係,水宇衿帶,進必傾實,河隘扁固,退亦墮 里,彌行阻深,表裏躓破,後先介逼。捨陵衍之習,競湍沙之利。今虹見萍生,土膏泉 渭陰之迫,懸烽均咸陽之警。然而切揣虛實,伏匿先彰,校索伎能,譎詭旣顯。 是由綏整寡夷,戎昭多昧,遂使潞子入患,伊川來擾,〔三 紛殄姬風,泯毒禹績,騰書有 不虞於來臨,本無忧於能濟矣。乃者燮定攜遠,阻違授律,由將有弛拙,故士少關志。 臣聞函車之獸,離山必斃;絕波之鱗,岩流則枯。羯寇遺醜,趨致畿甸,蟻萃螽集, 天險巖曠,地限深遐,故全魏戢其圖,盛晉輟其議,情屈力殫,氣挫勇竭,諒 綿地千

要荒,猶弗委割。況聯被京國,咫尺神甸,數州摧掃,列邑殲痍,山淵反覆,草木塗地。 或謂損緩江右,寬繕淮內。竊謂拯扼閩城,舊史爲允,棄遠凉土,前言稱非。 限此

果之士,重幣甘辭,招摧決之將,舉薦板築之下,抽登臺阜之間,賞之以焚書,報之以相 今丘賦千乘,井算萬集,肩摩倍於長安,締袂百於臨淄,什一而籍,實慊氓願,履畝以 稅,旣協農和。戶競戰心,人含銳志,皆欲贏糧請奮,釋緯乘城。 謂宜懸金鑄印,要壯

爵,俄而昭才賀闕,異能間至。

船,遏其還逕,虎部勁卒,梗其歸塗。必剪元雄,懸首麾下,乃將隻輪不反,戰轉無旋矣。 甲,鉗馬銜枚,檜稽而起,晨壓未陣,旌譟亂舉,火鼓四臨,使景不暇移,塵不及起,無不 於是信臣騰威,武士繕力,緹組接陰,鞞柝聯響。 禽鎩獸響,冰解霧散,掃洗噍類,[四] 漂鹵浮山。 戎貪而無謀,肆而不整,迷乎向背之次,謬於合散之宜,犯軍志之極害,觸兵家之 咸畜憤矣,僉策戰矣,稱願影從,謠言緡命。宜選敢悍數千,騖行潛掩,偃旗裹 如有決學漏網,逡窠逗穴,命淮、汝戈

索之枯 流 尉洽荷 電 燭,徐、阜嚴兵,雨湊雲集,蹙亂桑溪之北,搖潰澣海 。摩,阻 若其僞遁瀛漲,至出沒無際,楚言漢旆,顯默如神,固已日月蔽虧,川谷蕩貿。負 ,掠之餘,望吊網悲之鬼。然後天行樞運,焱舉煙升,青蓋西巡,翠華東幸,經啓 ,幾何不蠹。 山燼黨,收險竊命,憑城借一,云則當因威席卷,乘機芟剿。 是由涸澤而漁,焚林而狩,若浚風之舞輕籜,杲日 以南,絕其心根,勿使能植,銜 之拂浮霜 泗、汴秀士,星 旣 而

州野,舉無遺策,守」俾高闕再勒,燕然後銘。 方乃奠山沉河,創禮輯策,闡燿炎、昊之

遺則,貫軼商、夏之舊文。

致禮,均淮陰之授。必有要盟之功,竊符之捷。 升戚舊之右,別其旂章,榮其班祿,出得專譽,使不稟命,降席折節,同廣武之請,設壇 **青蒲而揚謀,上說辰鑒,下弭素言,足以安民紓國,救災恤患。則宜拔過寵貴之上,**褒 苴、起,審邪正順逆之數,達昏明益損之宜,能睽合民心,愚叡物性,登丹墀而敷策,躡 **擐盡幽,斬帶尋遠,設有沉明能照,俊偉自宣,誠感泉雨,流通金石,氣懾飛、賁,知窮** 動,闕閱訓之禮,簡參屬之飾,且亦薦採之法,庸未旣歟。若乃邦造里選,攉論深切,躬 今衆賈拳勇,而將術疎怯,

意者稔泰日積,

承平歲久,

邑無驚赴之急,

家緩饒戰之

銳,振辯則堅圍可解,馳羽而巖邑易傾。必府鬲土崩,枝幹瓦裂,故脈、樂相悔,頂、范 遄會,功終易感。 劫晉在於善覘,全鄭實寄良諜,多縱反問,汨惑心耳,發險易之前,抵 興喪之術,衝其猜伏,拂其嫌嗜,汨以連率之貴,餌以析壤之資,罄筆端之用,展辭鋒之 自及。今淶釋故典,瀍土纓緌,翦焉幽播,折首凶狡。是猶眇者願明,痿之思步,動商 夷裔暴很,內外侮棄,始附之衆,分茷無序,蠱以威利,勢必攜離,首順之徒,靡然

交疑矣。

論 鏃 得出內層禁,游息明代,云澤與身泰,恩隨年行,無以逢迎昌運,潤飾鴻法。今塗有遺 ,屬國之兵謨,終、晁之抗辭,杜、耿之言事,咸云及經之棘,猶闕上算,燭郛之敬,裁 ,蠆未息蜂,敢思涼識,少酬閎施。但坐幕旣乏昭文,免冑不能致果,竊觀都護之邊 或乃言約功深,事邇應廣,齊圉反駕,趙養還君,盡輿誦之道,畢能事之効。 臣幸

收下策。

自恥懦木,智不綜微,敢露昧見,無會昭採。

聞者, 何其 命。 焉。 邑。 欲 以戲溆。 好 唯執 弗圖 裒益之亟 淑憙爲誇誕,每爲時人所潮。 弊邑敬事是遑,無或違貳。 如之何勿疑。 是潔直,以不邪之故, 事 旦夕發咫尺之記,籍左右而請,以爲胥授失旨,爰速先幣。 所 淑與濬書曰:「袁司直之視館,敢寓書於上國之宮尹。 日者猥枉泉賦,降委弊 也。 以圖之。 藉恐二三諸侯, 且亦聞之前志曰、七年之中,一與一奪、義士猶或非之。 而貧聞天下。 懼非郊贈之禮,覲饗之資,不虞君王惠之於是也,是有懵 始興王濬嘗送錢三萬餉淑,一宿復遣追取,謂使人謬誤, 有以觀大國之政。是用敢布心腹。 寧有昧夫嗟金者哉。 不腆供賦,東馬先璧以俟 曾是附庸臣委末學孤 弊室 弱 况密邇旬次, 生,砥節清

信讒, 遷 將見罪廢。 太子 左 衞 率。 內省無過,日不能受枉。 元凶 將爲弑逆,其夜淑在直,二更許,呼淑及蕭斌等流涕謂曰:「主上 明旦便當行大事,望相與勠力。」淑及斌並曰:

列

相續。徐起至車後,砌使登車,又辭不上。 行,自己至四更乃寢。砌將出,已與蕭斌同載,呼淑甚急,淑眠終不起。 **劭愈怒,因問曰:「事當克不。」淑曰:「居不疑之地,何患不克。但旣克之後,爲天地之所不** 如此,輒當竭身奉令。」渺叱之曰:「卿便謂殿下眞有是邪? 四十六。砌即位,追贈太常,賜赗甚厚。 褶,[10]又就主衣取錦,截三尺爲一段,又中破,分賦、淑及左右,使以縛袴。 容,大禍 亦旋至耳。 願急息之。」砌左右引淑〔衣曰:「此是何事,而可言罷。」因賜淑〕等袴 砌因命左右:「與手刃。」見殺於奉化門外,時年 殿下幼時嘗患風,或是疾 **勋停車奉化門,催之** 淑出還省,繞牀 **沙動耳。**」

當要逼之切,意色不橈,厲辭道逆,氣震凶黨。 公。」又詔曰:「袁淑以身殉義,忠烈邈古。遺孤在疾,特所矜懷。 出其右者。興言嗟悼,無廢乎心。宜在加禮,永旌宋有臣焉。可贈侍中、太尉,諡曰忠憲 之至,識正之深者,孰能抗心衞主,遺身固節者哉。故太子左衞率淑,文辯優洽,秉尚貞愨。 及徐湛之、江湛、王僧綽、卜天與四家,於是長給稟祿。文集傳於世。 世祖卽位,使顏延之爲詔曰:「夫輕道重義,亟聞其敎,世弊國危,希遇其人。 虐刃交至,取斃不移。古之懷忠隕難,未云 可厚加賜卹,以慰存亡。」淑 自非達義

子幾、憿、稜、凝、標。 敳,世祖步兵校尉。凝,太宗世御史中丞,出爲晉陵太守。 太宗

任 殉主,世罕其人。 存,百年可保也。 心去留,不以存沒嬰心。徒以靈化悠遠,生不再來,雖天行路嶮,而未之斯遇,謂七尺常 史臣曰:天長地久,人道則異於斯。 所以據洪圖而輕天下, 客寸陰而敗尺壁。 若無陽源之節,丹靑何貴焉爾。 **莾華朝露,未足以言也。其間夭遽,曾何足云。宜** 若乃義重乎生,空炳前誥,投驅

校勘記

- [1] 伯父湛謂家人曰 各本並脱「父」字、據南史補。
- 彭城王義康命爲司徒祭酒 官一而彭城王時爲司徒,據百官志司徒府有祭酒。 「司徒祭酒」各本並作「軍司祭酒」,據南史改。 按時無軍司祭酒之
- 掃洗噍類 遂使潞子入患伊川來擾 「潞子」各本並作「栲潞」、「伊川」各本並作「泉伊」,據元龜四七一改。
- 35. 若其偽遁瀛漲 「噍」各本並作「哨」,據元龜四七一改。 「瀛漲」各本並作「羸張」,今改正。 瀛漲,喻大海。

列

傅 第 三 +

校

勘

記

- 八六 憑城借 「一」各本並作「土」,據元龜四七一改。
- フゼリ 舉無遺策 各本並作「滌一軫策」,據元龜四七一改。
- 游息明代 「息」各本並作「心」,據元龜四七一改。
- 一九し 內省無過 「內省」各本並作「省內」,據通鑑乙正。
- **敬左右引淑衣曰此是何事而可言罷因賜淑等袴褶** 各本並脫「衣曰此是何事而可言罷因賜淑」

十三字,據南史補

- 淑出還省繞牀行 「還」各本作「環」,據南史改。
- 凝太宗世御史中丞出爲晉陵太守太宗初與四方同反 云:「國反當爲同反。」按孫說是,今改正。孫彪又云:「據孔覬傳,則爲晉陵太守與四方同反者乃 「同反」各本並作「國反」,孫虨宋書考論

袁標非凝也。 當有脫文,故世宗、太宗之云多誤。」按孫說是,但「太宗世」本不誤,因下敍袁標

事,史有奪文,故前云「太宗世」,後云「太宗初」,語意不接。

以補劉湛冠軍府主簿 齊書李安民傳,安民宋明帝世爲劉韞冠軍參軍,韞本傳不言有此軍號, 孫彪朱書考論云:「考證云劉湛元嘉十七年誅,太宗時安得爲冠軍。南 蓋略之也。 『湛』字蓋

韞」字之譌。」

宋書卷七十二

列傳第三十一

徐湛之 江湛 王僧綽

荆州。休之遣魯宗之子軌擊破之,於陣見害。追贈中書侍郎。 戚,將大任之,欲先令立功。及討司馬休之,使統軍爲前鋒,配以精兵利器,事剋,當即授 達之,日日尚高祖長女會稽公主,爲振威將軍、彭城沛二郡太守。高祖諸子並幼,以逵之姻 徐湛之字孝源,東海郯人。司徒羡之兄孫,吳郡太守佩之弟子也。祖欽之,祕書監。父

其幼而有識。 食邑五百戶。」年數歲,與弟淳之共車行,牛奔車壞,左右馳來赴之。湛之先令取弟,衆咸歎 門嫡長,回早罹辛苦。外孫湛之,特所鍾愛。且致節之胤,情實兼常。可封枝江縣侯, 湛之幼孤,爲高祖所愛,常與江夏王義恭寢食不離於側。 永初三年,詔曰:「永興公主 及長,頗涉文義,〔三〕善自位待。事祖母及母,並以孝謹聞。

列傳

侍,驍騎如故。 或 二郡,加 一子博士,遷奮威將軍、南彭城沛二郡太守,徙黃門侍郎。祖母年老,辭以朝直,不拜。 元嘉二年,除著作佐郎,員外散騎侍郎,並不就。 輔國將軍,遷祕書監,領右軍將軍,轉侍中, 加驍騎將軍。 六年,東宮始建,起家補太子洗馬,轉 復爲祕書監,加散騎常 復授

哭下牀 内, 軍 汝 連湛之,太祖 節者,可 获,[四 有納 父作 總攝六宮。 會稽公主 拜,又遷太子詹 不復 此 以此衣示之。」湛之爲大將軍彭城王義康所愛,與劉湛等頗相附協。及劉湛)納衣。 ·布衫襖等衣,皆敬皇后手自作,高祖旣貴,以此衣付公主,曰:「後世若 施 大怒,將致大辟。 身居長嫡,爲太祖所禮,家事大小,必咨而後行。 忽有不得意,輒號哭,上甚憚之。 臣妾之禮。 今日 有一 事,尋加侍中。 頓飽食,便欲殘害我兒子!」上亦號哭,湛之由此得全也。 以錦囊盛高祖 湛之憂懼無計,以告公主。 納衣, 擲地以示上曰: 「汝家本貧賤, 初, 高祖 公主卽日入宮,旣 微時,貧陋 西征謝晦, 使公主留止臺 過甚,嘗自 見太祖, 此是我 1往新洲 有 |得罪,事 遷 驕奢不 因 中護 母 爲 號 伐

絕 H 悉以後車載之。 時。 湛之善於尺牘,音辭流暢。 門 生千 餘 人,皆三吳富人之子,姿質端 太祖嫌其侈縱,每以爲言。 貴 、戚豪家,產業甚厚。 妍,衣 時安成公何勗,无忌之子也,臨汝公孟 服 室宇園池,貴遊莫及。 鮮麗。每出入行遊,塗巷盈 伎樂之妙,冠 一滿,泥 靈 萷

飾。」湛之二事之美,兼於何、孟。 勗官至侍中,追諡荒公。 靈休善彈棊,官至秘書監。 京邑爲之語曰:「安成食,臨汝

職, 年,范曄等謀逆,湛之始與之同,後發其事,所陳多不盡,爲曄等款辭所連,乃詣廷尉歸罪, 湛之表啓固辭,又詣廷尉受罪,上詔獄官勿得受,然後就命。固辭常侍,許之。二十二 湛之遷冠軍將軍、丹陽尹,進號征虜將軍,加散騎常侍,以公主憂不拜。 過葬,復授前

慰遣令還郡。湛之上表日

臣糾 有主 信 盡 初,不務指斥,紙翰所載,尤復漫略者,實以凶計旣表,逆事歸露,又仰緣聖慈,不欲窮 見誣謗,承祖 於鞠對。伏尋仲承祖始達熙先等意,便極言姦狀。而臣兒女近情,不識大體,上聞之 意,報示天文。 一,故言勢依違,未敢縷陳。情旨無隱,已昭天鑒。及羣凶收禽,各有所列,曄等 懷 名,所徵之人,又已死沒,首尾乖互,自爲矛楯。 賊臣范曄、孔熙先等,連結謀逆,法靜尼宣分往還,與大將軍臣義康共相脣齒,備 可 覆,復駭其動 並 見怨咎,縱肆狂言, 醜言,紛紜特甚。 末云 熙先縣指必同,以誑 止必啓。 凡諸 必規禍陷。至伏自探省,亦復有由。 乃云臣與義康宿有密契,在省之言,期以爲定, 說妄,還自違伐,多舉事端,不究源統,齎傳 於曄,或以智勇見稱,或以愚懦 即臣誘引 之辭,以爲始 昔義康南出之始, 爲目。 謀 之信,無 П 之證,銜 潛通 旣美 ·辭,多 其 姦

列

敕臣 **窮款,裁以正義,無所逃刑。 束骸北闕,請罪司寇,乾施含宥,未加治考,中旨頻降,制** 往往難測。 通,又昔蒙眷顧,不容自絕,音翰信命,時相往來。 思話,恨婚意未申,謂此僥幸,亦不宜達。 臣利刃,期以際會,臣苦相諫譬,深加距塞。 使還往,仰荷恩私,哀惶失守。 虛妄,思量反覆,實經愚心,非爲納受,曲相蔽匿。 入 至於法靜所傳,及熙先等謀,知實不早,見關之日,便卽以聞。 、相伴慰,晨夕觀對,經踰旬日。 臣每懼異聞,皆略而不答,惟心無邪悖,故不稍以自嫌。 逆圖成謀,雖無顯然,懟容異意,頗形言旨。 陛下敦惜天倫,彰於四海,藩禁優簡,親理咸 以爲怨憤所至,不足爲慮,便以關啓,懼成 或言少意多,旨深文淺,辭色之間, 又令申情范曄,釋中間之憾,致懷蕭 ' 慺慺丹實,具如此 雖晨光幽燭,曲昭 遺

屬於禍萌,士類未明其心,**羣**庶謂之同惡,朝野側目,衆議沸騰,專信讎隙之辭,不復稍 款,儻或昭然,雖復身膏草土,九泉無恨。顯居官次,垢穢朝班,厚顏何地,可以自處。 相申體。臣雖駑下,情非木石。 乞蒙隳放,伏待鈇鑕。 (非苟客微命,假延漏刻。 誠以負戾灰滅,貽惡方來,貪及視息,少自披訴。 冀幽誠丹 臣殃積罪深,丁罹酷罰,久應屏棄,永謝人理。況姦謀所染,忠孝頓闕,智防愚淺, 豈不知醜點難嬰,**伏劍爲易。而**靦然視息,忍此餘生,

上優韶不許。

遠圖,特所獎納,不敢苟申私怨。乞屛居田里,不許。 與皇太子分守石頭。二十八年春,魯爽兄弟率部曲歸順,爽等,魯軌子也。湛之以爲廟算 門釋惠休,善屬文,辭采綺豔,湛之與之甚厚。 風亭、月觀,吹臺、琴室,果竹繁茂,花藥成行,招集文士,盡遊玩之適,一時之盛也。 惠並行。 二十六年,復入爲丹陽尹,領太子詹事,將軍如故。二十七年,索虜至瓜步,湛之領兵置佐, 一十四年,服闋,轉中書令,領太子詹事。 廣陵城舊有高樓,湛之更加修整,南望鍾山。 世祖命使還俗。本姓陽,位至揚州從事史。 出為前軍將軍、南兗州刺史。善於爲政,威 城北有陂澤,水物豐盛。湛之更起 ' 時有沙

當,而互相推委,糾之是也。然故事殘舛,所以致茲疑執,特無所問,時詳正之。」乃使湛之 之、庾炳之、范曄等,後又有江湛、何瑀之,「KJ 曄誅,炳之免,演之、瑀之並卒,至是江湛爲吏 與尚之並受辭訴。尚之雖爲令,而朝事悉歸湛之。初,劉湛伏誅,殷景仁卒,太祖委任沈演 諸辭訴,一不料省。

湛之亦以職官記及令文,尚書令敷奏出內,事無不總,令缺則僕射總 部尚書,與湛之並居權要,世謂之江、徐焉。 又以事歸尚之,互相推委。御史中丞袁淑並奏免官,詔曰:「令僕治務所寄,不共求體 轉尙書僕射,領護軍將軍。時尙書令何尙之以湛之國戚,任遇隆重,欲以朝政推之。凡

贈司空,加散騎常侍,本官如故,諡曰忠烈公。又詔曰「徐湛之、江湛、王僧綽門戶茶酷,遺 湛之屏人語,至曉猶未滅燭。湛之驚起趣北戶,未及開,見害。時年四十四。世祖卽位,追 論,或連日累夕。每夜常使湛之自秉燭,繞壁檢行,慮有竊聽者。一劭入弑之旦,其夕,上與 末,徵鑠自壽陽入朝,旣至,又失旨,欲立宏,嫌其非次,是以議久不決。與湛之屛人共言 出 孤流寓,言念旣往,感痛兼深。可令歸居本宅,厚加恤賜。」於是三家長給廩。 .外蕃,不得停京輦。 上每 有疾,湛之輒入侍醫藥。 南平王鑠、建平王宏並爲上所愛,而鑠妃卽湛妹,勸上立之。元嘉 二凶巫蠱事發,上欲廢劭,賜濬死。 而世祖不見寵,故累

之子孝嗣紹封,齊受禪,國除。 三子:津之、謙之,爲元凶所殺。恒之嗣侯,尙太祖第十五女南陽公主,蚤卒,無子。津

義康欲引與日夕,湛固求外出,乃以爲武陵內史,還爲司徒從事中郎,遷太子中庶子,尚書 主簿,太子中舍人。司空檀道濟爲子求湛妹婚,不許。義康有命,又不從。時人重其立志。 明算術。 江湛字徽淵,濟陽考城人,湘州刺史夷子也。居喪以孝聞。愛好文義,喜彈棊鼓琴,兼 初爲著作佐郎,遷彭城王義康司徒行參軍,南譙王義宣左軍功曹,復爲義康司徒

隨王誕爲北中郎將、南徐州刺史,以湛爲長史、南東海太守,政事悉委之。「引

不營財利,餉饋盈門,一無所受,無兼衣餘食。 尉 論者以此 江夏王義恭領國子祭酒,湛及侍中何攸之領博士。二十七年,轉吏部尙書。 牛餓,馭人求草,湛良久曰:「可與飲。」在選職,頗有刻覈之譏,而公平無私,不受請謁 元嘉二十五年,徵爲侍中,任以機密,領本州大中正,遷左衞將軍。 稱焉 **嘗爲上所召,值濣衣,稱疾經日,衣成然後** 時改選學職,以太 家甚貧約,

伽使班劍及左右推之,殆將側倒。
伽又謂上曰:「北伐敗辱,數州淪破,獨有斬江湛,可以謝 湛兼領軍,軍事處分,一以委焉。 虜遣使求婚,上召太子劭以下集議,衆並謂宜許,湛曰: 宜親也。」上乃爲劭長子偉之娉湛第三女,欲以和之。 天下。」上曰:「北伐自我意,江湛但不異耳。」劭後燕集,未嘗命湛。常謂上曰:「江湛佞人,不 「戎狄無信,許之無益。」別怒,謂湛曰:「今三王在阨,詎宜苟執異議。」聲色甚厲。坐散俱出, 上大舉北伐,舉朝爲不可,唯湛贊成之。 索虜至瓜步,領軍將軍劉遵考率軍出江上,以

五子恁、恕、憼、愻、法壽,皆見殺。初,湛家數見怪異,未敗少日,所眠牀忽有數升血。 之,舍吏紿云:「不在此。」兵士卽殺舍吏,乃得湛。 湛據窗受害,意色不撓。 時年四十六。湛 上將廢砌,使湛具詔草。砌之入弑也,湛直上省,聞叫譟之聲,乃匿傍小屋中。 砂 遣 收

列傳

卽位,追贈左光祿大夫、開府儀同三司,加散騎常侍,本官如故,諡曰忠簡公。 長子恁,尚太祖第九女淮陽長公主,爲著作佐郎。

是,父曇首與王華並爲太祖所任,華子嗣人才旣劣,位遇亦輕。 拔 徒左長史,太子中庶子。 縣侯,日司尚太祖長女東陽獻公主。 學有理 曰:「弟名位應與新建齊,超至今日,蓋由姻戚所致也。」新建者,嗣之封也。 一十九。 才舉能,咸得其分。 王僧綽,琅邪臨沂人,左光祿大夫曇首子也。幼有大成之度,弱年衆以國器許之。 思,公 始興王濬嘗問其年,僧綽自嫌蚤達,逡巡良久乃答,其謙虛自退若此。 練悉朝典。年十三,太祖引見,下拜便流涕哽咽,上亦悲不自勝。 二十八年,遷侍中,任以機密。 元嘉二十六年, 徙尙書吏部郎, 參掌大選。究識流品, 諳悉人物, 初爲江夏王義恭司徒參軍,轉始興王文學,祕書丞,司 僧綽沈深有局度,不以才能高人。 僧綽嘗謂 中書侍郎蔡興宗 及爲侍中,時年 襲封豫寧 先 好

微,四清介 元嘉末, 士 太祖頗以後事爲念, 一也,懼其太盛,勸令損抑。 以其 八年少, 僧綽 方欲 乃求吳郡及廣州,上並不許。 大相付託,朝政小大, 皆與參焉。

會二凶巫蠱事泄,上獨先召僧綽具言之。 及將廢立,使尋求前朝舊典。
劭於東宮夜饗

隨王 士,僧綽密以啓聞,上又令撰漢魏以來廢諸王故事。 誕,江湛欲立南平王鑅,太祖欲立建平王宏,議久不決。 撰畢,送與江湛、徐湛之。 誕妃卽湛之女,鑠妃卽湛妹 湛之欲立

坐,出閣,謂僧綽曰:「卿向言,將不太傷切直。」僧綽曰:「弟亦恨君不直。」 復慈愛之道。」僧綽曰:「臣恐千載之後,言陛下唯能裁弟,不能裁兒。」上默然。 取笑千載。」上曰:「卿可謂能斷大事。此事重,不可不殷勤三思。且庶人始亡,人將謂 無煩疑論。 唯宜速斷,不可稽緩。當斷不斷,反受其亂。願以義割恩,略小不忍,不爾便應坦 太祖謂僧綽曰:「諸人各爲身計,便無與國家同憂者。」僧綽曰:「建立之事,仰由聖懷。 淮南云:『以石投水,吳越之善沒取之。』事機雖密,易致宣廣,不可使難生慮表, 江湛同侍 懷 如初刻 臣謂 我無

紫光祿大夫,諡曰愍侯。 諸王事,乃收害焉,時年三十一。因此陷北第諸王侯,以爲與僧綽有異志,并殺僧綽門客 尚書,委以事任,事在二凶傳。頃之,劭料檢太祖巾箱及江湛家書疏,得僧綽所啓饗士幷廢 太學博士賈匪之、奉朝請司馬文穎、建平國常侍司馬仲秀等。世祖卽位,追贈散騎常侍、金 及劭弑逆,江湛在尚書上省,聞變,歎曰:「不用僧綽言,以至於此。」劭旣立,轉爲 **減更部**

宅,又爲章武王司馬秀宅,皆以凶終。後給臧燾,[1] 亦頗遇喪禍,故世稱爲凶地。 初,太社西空地一區,吳時丁奉宅,孫晧流徙其家。江左初爲周顗、蘇峻宅,其後爲袁悅 僧綽常

列

以正達自居,謂宅無吉凶,請以爲第。始就造築,未及居而敗。

子儉嗣,昇明末,爲齊國尙書右僕射。

守器以長,命不待賢,則密禍自銷,危機可免。聖哲之訓,豈欺我哉。昔山濤舉羊祜爲太子 太傅,蓋欲以後事委之,而羊公短世。僧綽綢繆主心,將任以國重,而宮車晏駕。二臣並以 年輕躁,夙無朝寵,累任邊外,未嘗居中。當壁之重,將由愛立,臣主回疑,事無蚤斷。若使 內兆,邪蠱外興,天性旣離,愛敬同盡,探雀請熊,非無前釁,猜防之道,有未足乎。 道德謙沖,名高兩代。胙未中年,功謝成日。惜矣哉! 史臣曰:甚矣宋氏之家難也,讎釁所鍾,親地兼極,雖復傾天滅道,迹非嫌路,而災隙 世祖弱

校勘記

- C1 又達之 「達之」各本並作「達之」,據南史及本書武帝紀改。下出「達之」,並改。
- 永興公主一門嫡長 上云會稽公主,此云永興公主,疑永興爲會稽公主始封之縣。
- 頗涉文義 「文義」各本並作「大義」,據南史、元龜三〇四、御覽一五三引改。

- 29 嘗自往新洲伐荻 各本並脫「往」字,據經覽一五三引補。
- 〔五〕必規禍陷 「規」各本並作「見」,據元龜二○九改。
- へない 後又有江湛何瑀之 本書前廢帝何皇后傳:「父瑀字稺玉。」此作何瑀之,蓋六朝人名後之「之」

又通鑑宋文帝元嘉二十八年胡三省注曰:「何瑀之恐當作何尚之。」蓋以何瑀

雖官歷淸顯,未嘗管機密,不如何尙之之當要任。

字,有時可省去。

- [P] 政事悉委之 各本並脫「悉」字,據元龜七一六補。
- 「八」好學有理思 「理思」通鑑宋元嘉二十八年作「思理」。
- へたし 襲封豫寧縣侯 地理志有豫章 縣無豫寧縣、宋書州郡志有豫寧縣無豫章縣。 「豫寧」各本並作「豫章」,據南史及本書王曇首傳、御覽一五三引改。 僧綽襲封在宋世、當作豫寧 按晉書
- 從兄微 「微」各本並作「徽」, 據南史、御覽七三 四引改。 殿本考證云:「徽字卽微字之譌。」按

王微本書有傳。

作燾。」

後給臧燾 「燾」各本並作「壽」,據南史、建康實錄、 御覽一八〇引改。 孫彪宋書考論云:「壽當

列傳第三十一 校勘

記

宋書卷七十二

列傳第三十二

文九王

南平穆王鑠 建平宣簡王宏 晉熙王昶 始安王休仁

鄱陽哀王休業 臨慶沖王休倩

晉平剌王休祐

新野懷王夷父 巴陵哀王休若

晉熙王昶,江修儀生武昌王渾,沈婕妤生明帝,楊修儀生建安王休仁,邢美人生晉平王休 生廬陵昭王紹,殷修華生竟陵王誕,曹婕妤生建平宣簡王宏,陳修容生東海王禕,謝容華生 文帝十九男。元皇后生劭,潘淑妃生濬,路淑媛生孝武帝,吳淑儀生南平王鑠, 高修儀

滿,蔡美人生海陵王休茂,董美人生鄱陽哀王休業,顏美人生臨慶沖王休倩,陳美人生新野

有傳。

紹出繼廬陵孝獻王義眞。

懷王夷父,荀美人生桂陽王休範,羅美人生巴陵哀王休若。

八五六

南平穆王鑠字休玄,文帝第四子也。

四十餘日 遂登屍以陵城,短兵相接,

憲銳氣愈奮,戰士無不一當百,殺傷萬計, 以應之。 圍之,憲且守且戰,矢石無時不交。虜多作高樓,施弩以射城內,飛矢雨下,城中負戶以汲。 遷使持節、都督南豫豫同瘫秦幷六州諸軍事、南豫州刺史。 又毁佛浮圖,取金像以爲大鉤,施之衝車端,以牽樓堞。 壽陽,即以鱳爲豫州刺史,尋領安蠻校尉,給鼓吹一 索虜大帥託跋燾南侵陳、潁,遂圍汝南懸瓠城。行汝南太守陳憲保城 元嘉十七年,都督湘州諸軍事、冠軍將軍、湘州刺史,不之鎭,領石頭戍事。 賊多作蝦蟆車以塡塹,肉薄攻城,憲督厲將士,固女牆 司馬劉康祖與寧朔將軍臧質救之,虜燒攻具走。 部。 城內有一沙門,頗有機思, 二十六年,進號平西將軍,讓不拜。 時太祖方事外略, 而 二戰,賊之死者,屍與城等, 汝水爲之不流。 自固, 乃罷南豫併 二十二年, 賊晝夜攻 輒設奇

二十七年,大舉北伐,諸蕃並出師。 **鑠遣中兵參軍胡盛之出汝南,到坦之出上蔡,**[1]

馬劉 和 史僕蘭 向 各起義以應坦之,三人僕蘭奔虎牢。 長社,長社戍主魯爽委城奔走。 ,回康祖 康 祖 於大索率步騎二千攻陽兒,陽兒擊大破之。 繼坦之。 廣永昌王宜勤庫仁眞救虎牢, [三] 坦之敗走。 財進脅壽陽,因東過與燾會於江上。 旣克長社, 遺幢主王陽兒、張略等進據小索。 會王陽兒等至,卽據大索,因向虎牢,鑠叉遣安蠻 到坦之等進向大索,滎陽民鄭德玄、張 虜乘勝逕進, 於尉氏津 偽豫州 逢 刺 司

薨,鑠歸京師,葬畢,還攝 旣 上以一克土彫荒,罷南克併南徐州,當別置淮南都督住盱眙,開創屯田,應接遠近,欲以授鱳。 改授散騎常侍、撫軍將軍,領兵戍石頭 一十八年夏,虜荆州 本任。時江夏王義恭領南兗州 刺史魯爽及弟秀等,率部曲詣鱳歸順。 刺 ·史,鎭盱眙。<a>(至) 丁母憂,還京 其年七月, 鑠所生吳淑儀

康祖

戰敗見殺。

迎鑠 世 **饑守東府,以腹心防之。 進授侍中、驃騎將軍** 南兗州刺史,行常侍如故。 |劭還立||南虎,以||鑠爲使持節、都督||南虎||徐||虎|||夷||幽六州諸軍事、征北將軍、開府儀 入營。 年諱,厭祝祈請,假授位號,使鱳造策文。及義軍入宮,鱳與濬俱歸世祖 元凶弑立,以爲中軍將軍,護軍、常侍如故。[K] 世祖入討,劭屯兵京邑,使鱳巡行撫勞。 當時倉卒失國璽,事寧,更鑄給之。進侍中、司空,領兵置佐,以國哀未闋, 柳元景至新亭,砌親自攻之,挾鱳 ·、錄尙書事,餘如 故。 自隨。 砂迎蔣侯 江夏王義恭南奔,使 ,濬卽伏法,上 神於宮內,疏 同 三司

侍中。

鑠素不推事世祖,又爲元凶所任,上乃以藥內食中毒殺之,時年二十三, 追贈侍中、

司徒。

第二子伯玉爲南平王繼鱳,後官至給事中。昇明二年,謀反誅,國除。 休祐第七子宣曜爲南平王繼鑠。 休祐死,宣曜被廢還本。 後廢帝元徽元年,立衡陽恭王嶷 封孝武帝第十八子臨賀王子產字孝仁爲南平王,繼鑠後,未拜,被殺。泰始五年,立晉平王 其夕廢帝亦殞。太宗卽位,追贈敬猷侍中,諡曰懷王。追贈敬淵黃門侍郎,諡曰悼侯。改 曰:「若不從,當殺汝三子。」江氏猶不肯。於是遣使於第殺敬猷、敬淵、敬先,鞭江氏一百。 敬先繼廬陵王紹。前廢帝景和末,召鑠妃江氏入宮,使左右於前逼迫之,江氏不受命。謂 三子:敬猷、敬淵、敬先。 敬猷嗣,官至黃門郎。 敬淵初封南安縣侯,官至後軍將軍。

建平宣簡王宏字休度,文帝第七子也。早喪母。

常,爲立第於鷄籠山,盡山水之美。建平國職,高他國一階。二十四年,爲中護軍,領石頭 元嘉二十一年,年十一,封建平王,食邑二千戶。少而閑素,篤好文籍。 太祖 寵愛殊

戍事。 嘗以一手板與宏,宏遣左右親信周法道齎手板詣世祖。 左將軍、丹陽尹。 出為征虜將軍、江州刺史。二十八年,徵爲中書令,領驍騎將軍。 又以爲散騎常侍、鎭軍將軍、江州刺史。 事平,以爲尚書左僕射, 世祖入討,劭錄宏殿內。 元凶弑立,以宏爲 使奉迎太 世 祖先

爲人謙儉周愼,禮賢接士,明曉政事,上甚信仗之。時普責百官讜言,宏議曰:

后,還加中軍將軍,云中書監,僕射如故。臧質爲逆,宏以仗士五十人入六門。

儒 賞,撤天膳而重農食,禁貴遊而弛榷酤,通山澤而易關梁,固已海內仰道,天下知德。 置陳如左。辭理違謬,伏用震聾。 今復開不諱之塗,獎直辭之路,四海希風,普天幸甚。 舉蒙採問,敢不悉心,謹條鄙見, 共 .禮而崇寬敎,哀獄法而黜嚴刑,表忠行而舉貞節,辟處士而求賢異,修廢官而出滯 則。秦、殷之敗,語戮刺亡,周、漢之盛,謗升箴顯。 臣聞建國之道咸殊,興王之政不一。至於開諫致寧,防口取禍,固前王同軌,後主 陛下以至德神臨,垂精思治,進

常謂 ,多非其才,或以資厚素加,或以祿薄帶帖,或寵由權門,恩自私假,旣無將領,虛 夫用兵之道,自古所慎。 頃干戈未戢,戰備宜修,而卒不素練,兵非夙習。 且戎衞 至於邊城舉燧,羽驛交馳,而望其擐甲推鋒,立功閫外,譬緣木求魚,不可得 臨難 命師,皆出倉卒,驅烏合之衆,隸造次之主,貌疎情乖,有若問、越,豈能

列

傳

第

Ξ

綿,實增 設,一旦 益諸弟國各千戶,先薨者不在其例,唯宏追益 跳 至, 故。 使其 宏 轉尙書令,加散騎常侍,將軍如故,給鼓吹一部,尋進號衞將軍,中書監、尙書令 不由恩著者士輕其生,令明者卒畢其力。 外。孫子 五 以 年 每朔望輒出 未拜 一申,以 少 配 未 永 痛 給 m 同 切。 謝,驚惋 及壯,願言兼 ,其年薨,時年二十五。 ,領、護二軍,爲其總統。 力,拔危濟難,故奔北相望,覆敗繼有。今欲改選將校,皆得其人,分臺見將,各 多病,大明二年疾動,求解尚書令,以本號開府儀同三司, 曰:「視卒如赤子,故可與之共死。」所以張弮効爭先之心,吮癰致必盡之命,豈 齊其心,使動止應規,進退中律,然後畜銳觀釁,因時而動,摧敵陷堅,折衝于 卿情均休戚,重以周旋, 臨 提慟,五內交殞。 靈, 申。 自爲墓誌銘弁序。 謂天道 追贈侍 可倚,輔仁無妄, 平生未遠,舉目 令撫養士卒, 使恩信先加, 農隙校獵, 以習其事, 三令 ,

乖拆少時,

奄成今古,

聞問傷惋,

當何可言。」

五年, 中、司徒, 與 東揚州 考心迹事,如或 如 雖 刺 中書監 作,而 寢 史顏竣詔曰:「宏夙 患淹時, 如故,給班劍二十人。 賞對遊娛, 有在,妄陳膚 慮不 加散騎常侍, 至禍。 緬 情業尚, 同千載, 知,追懼 世 圖 裒 中書 乖謬。 祐 素 上痛 如 酷纏 善 故。 己 虚 令 悼 監

績

甚

如

子景素,少愛文義,有父風。 大明四年,爲寧朔將軍、南濟陰太守,徙歷陽、南譙二郡太

荆湘 吳興 太宗 守, 將 太守 雍益 初, 軍 太子 如故。 ,使持節、監湘州 梁寧南北秦 中 庶 中書侍郎,不 子,領步 八州諸 諸 兵校尉,太子左衞率,加給 軍 軍 ·拜。 事 事 、左將軍、荆州刺史, 湘 監南豫豫二州諸軍事、 州 刺 史, 將軍 並 事 一如故。 持節如故。 中,冠軍將軍 輔國將軍、 進號· 左將軍 徵爲散騎常侍、 、南兗 南豫州刺史, o 州刺史, 泰始六年,都督 後將軍 丹陽 叉不 尹 拜

爲逆,景素 授 使持節 雖纂集 都督南徐南克茂徐青冀六州諸軍事、鎭軍將軍、 兵 衆 ,以赴朝廷爲名,而陰懷 兩端。 及 事 平,進號鎭 南徐州刺史。 北將 軍。 桂陽王休 齊王爲 南克 範

州,景素

解都

督

一、未拜

貪幼 道,內 將 書籍,招 景素旨 軍 袁粲 於梁州, 少 時 外 太祖 以 ,怨恨, 皆謂景素 集才義之士,傾身禮 以 人人其 諸子盡殂,衆孫唯景素爲長,建安王休祐諸子並廢徙, 下 又奪景素鎭 權 並 因 保持 單騎奔京邑,告運長、佃夫云「景素 宜 慮景素立,不見容於長主 當 之,謂爲 一神器, 北將 接,以 唯 軍 不 廢帝 然也。 、開府儀同三司。云 收名譽, 所生 景素 陳 一,深 氏 由 亦 親 是 相 馳 戚 朝 遣 忌 疾忌 憚。 野 世 欲 翕 子 反」。運長等便欲遣 之, 然, 元徽 延齡還 而楊 莫不屬 三年,景素防閣 都, 運長、阮佃夫並 意 無在朝者。 具自申 焉。 軍討之,齊王 而 理 後 將 運 廢帝狂 景素好文章 軍王季符 太宗 長等乃徙 舊隸 及 凶 失 失 衞

列

傅

第

與司 自是廢帝狂悖日甚,朝野並屬心景素,陳氏及運長等彌相猜疑。 馬廬江 何季穆、錄事參軍陳郡殷濔、記室參軍濟陽蔡履、中兵參軍 景素因 略陽垣慶延、 此稍爲自防之 左

計, 爲參軍。 右賀文超等謀之。 景素遺豫之、潭、文超等去來京邑,多與金帛,要結才力之士。 以參軍沈顒、毌丘文子、左暄、州西曹王潭等爲爪牙。 季穆薦從弟豫 由是冠軍將軍黃 之

慶、輔國將軍曹欣之、前軍韓道淸、長水校尉郭蘭之、羽林監垣祗祖,並皆

響附,其餘武人失職不得志者,莫不歸之。

回、游擊將軍高道

儢 軍、南豫州刺史段佛榮爲都統,其餘衆軍 軍將軍任農夫、黃回、左軍將軍李安民 至者數千人。 四 者 回 有異圖,故使安民、佛榮俱行 年七月,垣祗 人周天賜 圖 之。 時廢帝 候廢帝出行, 偽投景素,勸爲異計,景素知爲運長所遣,卽斬之,遣司馬孫謙 單馬獨出,遊走郊野, 運長等常疑景素有異志,及聞 祖率數百人奔景素,云京邑已潰亂,勸令速入。 因衆作難, 以防之。 曹欣之謀據石頭,韓道淸、郭蘭之欲說齊王使同,若不回 事克奉景素。 各領 相繼進。 少軍 祗 祖叛 景素 冠軍將軍齊王世子鎮東府城。 右軍 走, 每禁駐之,未欲忽忽舉動。 便纂嚴: 將軍張保率水 備辨。 景素信之,即便 軍, 齊王 並 送首還臺。 出 北 屯 玄 舉兵,負戈 齊王 運長 一武湖, 冠軍 元 知黄 密 冠

景素欲斷據竹里,以拒臺軍。 垣慶延、祗祖、沈顒等曰:「今天時旱熱,臺軍遠來疲困,

道慶等,齊王撫之如舊。景素子延齡及二少子,並從誅。 餘皆逃亡,值赦得免。景素旣敗,曹欣之反告韓道淸、郭蘭之之謀,道淸等並誅。 京口。垣慶延、祗祖、左暄、賀文超並伏誅,殷濔、蔡履徙梁州,何季穆先遷官,故不 散。 爲臺軍所破。臺軍旣薄城池,顯先衆叛走,垣祗祖次之,其餘諸軍相係奔敗。 引之使至,以逸待勞,可一戰而克也。」殷濔等固爭不能得。[10]農夫等旣至,放火燒市邑,而 左右勇士數十人,並荆楚快手,自相要結,擊水軍,應時摧陷,斬張保, 膽力,欲爲景素盡節,而所配兵力甚弱,猶力戰不退,於萬歲樓下橫射臺軍,不能禁,然後退 垣慶延等各相顧望,並無關志。 三子恬爲秭歸縣侯,食邑千戶,繼宏後,順帝昇明二年卒,國除。張倪奴以禽景素功,封筑 右衞殿中將軍張倪奴、前軍將軍周盤龍攻陷京城,倪奴禽景素斬之,時年二十五,卽葬 景素本乏威略,惟擾不知所爲。時張保水軍泊西渚,景素 其年冬,封長沙成王義欣子賜第 而諸將不相應赴,復 左暄驍果有 黄回、高 及禍,其

景素敗後,故記室參軍王螭、故主簿何昌寓並上書訟景素之寃。齊受禪,建元初,故景

素秀才劉璡又上書曰:

陽縣侯,食邑千戶。

必可恃。 臣聞曾子孝於其親而沈乎水,介生忠於其主而焚於火,何則。仁也不必可依,信 昔者墨翟議雲梯於荆臺之下,宋人逐之,夷叔爲衞軍隱難於晉,公子殪

宥,死寃必申。 臣每惟故舉將宋建平王之禍,悲徹骨髓,氣凝霜霰。今琁鼎啓運,人神改物,生罪尚 之行,骨肉離絕,疑似一至,君臣易心,此中山所以歔欷奏樂,孟博所以慷慨囊頭者也。 危行不容於衰世,孤立聚尤於衆人,加讒諂蛆蠱其中,謗隙蜂飛而至故也。臣聞浸潤 事主,漢靈不明其忠,卒被刑戮。彼數子者,皆身栖青雲之上,而困於泥塵之裏,誠以 之,李牧北逝强胡之旗,南拒全秦之卒,趙王不圖其功,賜以利劍,陳蕃白首固義,忘生 臣誠不忍王之負謗而不雪,故敢明言其理。

投箸輟 爲傅也。 不忠者乎? 臣聞孝悌爲志者,不以犯上,曾子不逆薪而爨,知其不爲暴也,秦仁獲麑,知其可 飯。 臣聞王之事獻太妃也,朝夕不違養,甘苦不見色。 其可明一也。 太妃起居有不安,王傍行蓬髮。 臣聞求忠臣者於孝子之門,安有孝如王而 帳下進珍饌,太妃未食,王

朝,必俛拜陵所。王尚不棄先君,豈背今君乎。其可明二也。 當泰始、元徽中,王公貴人無謁景寧陵者,王獨抗情而行,不以趨時捨義,出鎭入

挈以升之。王虚己以厚天下之士,尚不欲傷一人之心,何乃親戚圖相菹膾乎。其可明 惡,掩而誨之。 王博聞而容衆,與諫而愛士,與人言呴呴若有傷。 李蔚之,蓬廬之寒素也,王枉駕而 訊之,何季穆等,宣簡王之舊也,王提 聞人之善,譽而進之,見人之

乏。 時見夏伯以童子縲縶,王愴然改貌,用不加刑。 蠲理冤疑,咸息繇務,所在皆有愛於民。 臣聞善人,國之紀也,安有仁於民庶,而 臣昔以法曹參軍,奉訊於聽朝之末。 王每斷獄,降聲辭,和顏色,以待士女之訟。 徐州嘗歲飢,王散秩栗俸帛,以繼民之

虐其宗國者乎?其可明四也。

身食不踰一肉,器用瓦素,時有獻鏤玉器,王顧謂何昌寓曰:「我持此安所用哉。」乃謝 衛不繁,第宅無改。荆州高齋,刻楹柏構,王廢而不處。昔朝廷欲賜王東陵甲第,又辭 而反之。王恭己蹈義若此。其可明五也。 而不當。 王修身潔行,言無近雜,內去聲酌之娛,外無田弋之好。每所臨踐,不加穿築,直 兩宮所遺珍玩,塵於笥篋。無它嬖私,不耽內寵,姬嬙數人,皆詔令所賜。 王

孝。」於是棄西州之重,而匍伏北闕。王若志欲倔强,便應高枕江漢,何爲屈折而受制 於人乎。其可明六也。 爲太常,楚下人士並勸勿下,王謂:「爲臣而距先皇之命,不忠;爲子不奉親之窀穸,不 王之在荆州也,時獻太妃初薨,宋明帝新棄天下,京畿諸王又相繼非命,王乃徵入

王名高海內,義重泰山,耆幼懷仁,士庶慕德。故從昏者忌明,同枉者毁正,搦弦

鴟梟奮翼。 王雖遘愍離凶,而誠分彌款,散情中孚,揮斥滿素。 勤,備留聖聽。王若侜張跋扈,何事若斯?其可明七也。 **犬質京邑,續解徐州,請身東第,後求會稽,降階外撫。** 爲鉤,張一作百,行坐欬嚏,皆盛風塵。會王季符負罪流謗,事會讒人之心,權醜相扇, 虞玩、殷煥實爲詮譯,誠心殷 虞玩之銜使歸旋,世子

時長王並見誅鋤,公卿如蹈虎尾,衆人翕翕,莫不注仰於王。 廂閤諸人,同謀異志,王 擬 心不從利,忠不背本,執周天賜而斬之,以距王宜與等,遣司馬孫謙歸款朝廷。王若欲 (非覬,寧當如此乎? 其可明八也。 自是以後,日同殊論,蒼梧之衰德旣彰,羣小之姦慝彌廣,下盈其毒,上不可依。

釁作。 構其 也。 聞京都變亂,始乃鳩兵簡甲耳。 恐遲後。 已閉,殊不 且臺以六月晦夜無何呼北兵已至,皆登陴抽刃,而朱方七月朝猶緩帶從容,其晚 事,武人獎亂,更相恐脅。至六月而京師徵賦車徒,將講衆北壘,都鄙疑駭,僉言 又是年五月以後,道路皆謂阮佃夫等欲潛圖宮禁,因兵北襲,而黃回、高道慶等傅 垣祗祖因民情囂蕩,揚聲北奔,紿辭惑衆,窮亂極禍。會州人自都還,說:「掖門 何圖兵以順出,翻爲逆動乎。夫往來之人,諠譁幻惑,皆出輦轂,非從徐州起 知臺中安不。」王旣素籍異論,謂爲信然,收率疲弱,志在投散,冰炭在懷,但 王豈先造禍哉!其可明九也。

而嘆曰:「吾恐三才於斯絕矣。」茲豈不誠在本朝,以天下爲憂乎。 王聞京室有難,坐不安,食不甘,言及太后,未嘗不交巾掩泣。 自非深忠遠概,孰能 又臨危之際,撫檻

身滅之不恤,獨眷眷國家安危哉?其可明十也。

討之何辜? 王豈不知君親之無將乎? 顧以救火之家,豈遑先白丈人, 非不恭也, 徒以 運屬陵喪,智力無所用之,蹉跌傾覆,此乃時也,豈謂反乎。果然今日王亡,明日宋亡, 治亂云何?楊運長、阮佃夫爲有罪邪?爲無罪邪?若其無罪,何故爲戮?若其有罪, 王何負於社稷,何愧於天下哉! 夫王起兵之日,止在匡**救昏難,放殛姦盗,非它故也。請較言之。當時君臣之道**,

世之異議,以掩賢人之名哉。若王之中外不明,終始慆德,臣懼方今之人,不復爲善 光於萬葉,君子榮其輝,小人服其義。今陛下尊英雄之高軌,振逸世之奇聲,何至仍衰 制,昭功誠,蕩嫌怨,清議以天下之善也。或殊世而相明,故四賢咸濟其令問,三后馳 無忌,魏之疑臣也,樂毅,燕之逃將也,彥雲,齊之賊而晉害也。適逢聖明之君,革運創 之配,存望諸之裔,晉世受命,亦追王凌之冤,而詔其孫爲郎。夫比干,殷辛之罪人也, 且世之興衰,何代無有,今齊苗裔萬世之後,其能無汚隆乎。 苟前良可廢,何以勸 臣聞武王克商,未及下車,而封王子之墓,漢高定天下,過大梁,躡燕、代,修信陵

刐

傳

第三十

後之能者。 伏願上同周、漢、西晉之如彼,下爲來胤垂範之如此。 儻能 降明詔, 箋枉

鸛鳴臯垤,則降陰吐雨,騰蛇聳躍,而沈雲鬱冥。 但傷臣言輕落毛,身如橫芥,神高聽 道,使往王得洗謗議,拯冥魂,賜以王禮反葬,則民之從義,猶若回風之卷草也。 臣聞

邈,終焉莫省,直欲內不負心,庶將來知王之意耳。

原心有本。 又不省。至今上即位,乃下詔曰:「宋建平王劉景素,名父之子,少敦清尙。雖末路失圖,而 年流運改,宜弘優澤,可聽以王禮還葬舊墓。」

晉熙王昶字休道,文帝第九子也。

稽、東陽、臨海、永嘉、新安五郡諸軍事。 故,進號後將軍。 郡太守。 二十二年,年十歲,封義陽王,食邑二千戶。二十七年,爲輔國將軍、南彭城下邳 元凶弑立,加散騎常侍。世祖踐祚,遷太常,出爲東中郎將、會稽太守, 大明元年,徵爲秘書監,領驍騎將軍,加散騎常侍,遷中軍將軍、南彭 孝建元年,立東揚州,拜昶 爲刺史、自己東中郎將 尋監 城 如

邳二郡太守。

三年,徵爲護軍將軍,給鼓吹一部,增邑千戶。

轉中書令,中軍將軍,尋以本號開府儀

前將軍、江州

刺

又出爲都督江州郢州之西陽豫州之新蔡晉熙三郡諸軍事、

即位,出爲使持節、都督徐兗南兗靑冀幽六州豫州之梁郡諸軍事、征北將軍、徐州刺史,加 同三司,加散騎常侍,太常。 從世祖南巡,坐斥皇太后龍舟,免開府, 尋又以加授。 前廢帝

散騎常侍,開府如

故

邑邑。」江夏王義恭誅後,昶表入朝,遣典籤籧法生銜使, | 昶使。將佐文武,悉懷異心。| 昶知其不捷,乃夜與數十騎開門北奔索虜,棄母妻,唯攜愛妾 走還彭城。帝因此北討,親率衆過江。法生旣至,昶卽聚衆起兵。統內諸郡,並不受命,斬 和中,此聲轉甚。 小者曰懷遠,尋並卒。追封懷遠爲池陽縣侯,食邑千戶。 反,自己我正欲討之,今知求還,甚善。」又屢詰問法生:「義陽謀反,何故不啓。」法生懼禍,叛 一人,作丈夫服,亦騎馬自隨。,昶家還都,二妾各生一子。時太宗已卽位,名長者曰思遠, 廢帝旣誅羣公,彌縱狂悖,常語左右曰:「我卽大位來,遂未嘗戒嚴,使人 帝謂法生曰:「義陽與太宰謀 水光、景

類,尙均羣品,況在人倫,可忘天屬。晉熙太妃謝氏,沈刻無親,物理罕比,征北公雖孝道無 泰始六年,以第六皇子燮字仲綏繼昶,改昶封爲晉熙王。 燮襲爵,食邑三千戶。 太宗旣以燮繼昶,乃下詔曰「夫虎狼護子,猴猨負孫,毒性薄情,亦有仁愛,故識念氣

列

別駕 熙國 州 諸 義 斷 軍 陽 「便可還其本家,削絕蕃秩。」先是改謝氏爲射氏。 刺 與變俱下。 史桂 太妃。 事 程罕之居守,開門詣景祖降。 時 郡 主 撫 动 諸 陽 軍將 時艱,宗室寡弱。元徽元年,變年四歲,以爲使持節、監郢州豫州之西陽司州之 四年,又進變鎭西將軍,加鼓吹一部。 王休範舉兵逼朝廷,變遣中兵參軍馮景祖襲尋陽,休範留中兵參軍毛惠連、州 軍事、征虜將軍、郢州 軍、揚州刺史。 會荆州刺史沈攸之舉兵反,世子因奉變鎭尋陽之盆城,據中流,爲內外形 先是,齊世子爲變安西長史,行府州事,時亦被徵 刺史,以黃門郎王奐爲長史,總府州之任。明年,太尉、江 進變號安西將軍,加督江州 順帝即位,徵爲 諸軍事,復昶所 使持節、都 督揚 生謝氏爲晉 爲 南 左 徐 衞 州 將

軍、開府儀同三司,遷司徒。 攸之平,變還京邑。 齊王爲南徐州,變解督南徐,進督南豫、江州諸軍事,進號 齊受禪, 解司徒, 降封陰安縣侯,口己食邑千五百戶。 中 軍將

賜死。

始安王休仁,文帝第十二子也。

蔡郢 護軍 節 爲護軍 年,出爲湘州刺 尋都督南兗徐二州諸軍事、冠軍將軍、南兗州刺史。大明元年,入爲侍中,領右軍 、都督雍梁南北秦四州諸軍事 州之西陽三郡 將軍、三三叉加 元嘉二十九年,年十歲,立爲建安王,食邑二千戶。孝建三年,爲秘書監,領步兵校尉 將軍,常侍如故。 史,加散騎常侍,加號 、特進、左光祿大夫,給鼓 諸軍事、安南將軍、江州 前廢帝 、安西將軍 永光元年, 平南將軍。八年,遷使持節、督江州南豫州之晉熙新 刺史。 吹一 、寧蠻校尉、雍州刺史,未之任,留爲散騎常侍、 遷領軍將軍,常侍如故。 部。 未拜,徙爲散騎常侍、太常, 景和元年,又遷使持 叉不拜。 ·將軍。 四 仍

宗、 山陽王休 時廢 帝 狂 祐 悖 無 形 體 道,誅害羣公,忌憚諸父,並囚之殿內,毆捶凌曳,無復 並 一肥壯, 帝乃以竹籠盛而稱之,以太宗尤肥,號爲「猪王」,號休仁爲 人理。休仁及太

帝曰:「猪今日未應死。」帝問其故,休仁曰:「待皇太子生,殺猪取其肝肺。」帝意乃解,曰: 歡以奉旨,盡諸醜狀。 常於休仁前使左右淫逼休仁所生楊太妃,左右並不得已順命,以至右衞將軍劉道隆,道隆 爲歡笑。 令和合,掘地爲坑穽,實之以泥水,裸太宗內坑中,和槽食置前,令太宗以口就槽中食,用之 劣、號爲「驢王」,桂陽王休範、巴陵王休若年少,故並得從容。 嘗忤旨,帝怒,乃倮之,縛其手脚,以杖貫手脚內,使人檐付太官,曰:「卽日屠豬。」休仁笑謂 「殺王」,休祐爲「賊王」。 「且付廷尉。」一 欲害太宗及休仁、休祐前後以十數,休仁多計數,每以笑調佞諛悅之,故得推遷。 宿出之。 時廷尉劉矇妾孕,[1三]臨月,迎入後宮,冀其生男,欲立爲太子。 以三王年長,尤所畏憚,故常錄以自近,不離左右。 當以木槽盛飯,內諸雜食,攪 東海王禕凡

猶 卽 日 殯殮 推崇太宗,便執 帝 將南遊荆、湘二州、明旦欲殺諸父便發。其夕、太宗克定禍難、殞帝於華林園。休仁 ,休仁、休祐同載臨之,開帷歡笑,奏鼓吹往反,時人咸 臣禮。 明旦,休仁出住 東府。時南平、廬陵敬先兄弟,爲廢帝所害,口於 非焉

節 時劉道隆爲護軍,休仁請求解職,曰「臣不得與此人同朝。」上乃賜道隆死。 、侍中 先是,廢帝進休仁爲驃騎大將軍、開府儀同三司,常侍 、都督揚南徐二州諸軍事、司徒、尚書令、揚州 刺史,加班 如故。 劍二十人,給三望十五乘。 未拜,太宗令書以爲使持

殷琰 及事 流 太傅,總統諸軍,隨宜應接。 雖 據 平 ·平,太宗與休仁書曰:「此段殊得蘇侯兄弟力。」增休仁邑四千戶,固辭,乃受千戶。 上 尋諸方逆命,休仁都督征討諸軍事,增班劍三十人。 壽陽, ·,薛安都據彭城,招引索虜,復都督北討諸軍事,又增邑三千戶,不受。 未平。 晉平王休祐先督征討諸軍事,休祐出領江陵,休仁代督西討諸軍事。 中流平定,休仁之力也。 初行,與蘇侯神結爲兄弟,以求神助。 出據虎檻,進據赭圻。 時豫州刺史 尋領太子

五年,進都督豫

司二州。

屬意 憂 力。 上旣 長 固 山 方,莫不 化 讓 ·早來。」其夜,遣人齎藥賜休仁死,時年三十九。

三〇 叉 泰始 宿 慮帝宴駕後,休仁一旦居周公之地,其輩不得秉權,彌贊成之。 叉 於休仁,主書以下,皆往東府詣休仁所親信,曰以豫自結納, 休仁年與太宗隣亞,俱好文籍,素相愛友。及廢帝世,同經危難,太宗又資其權譎之 彌 懷 切。 ·輻湊。 加 初, 此意,至是又聞物情向之, 漆輪車 其 四方逆命,兵至近畿,休仁親當矢石,大勳克建,任總百揆,親寄甚隆。 年,上疾篤,與楊運長等爲身後之計,慮諸弟强盛, 上漸不悅。 剣履。 太宗末年多忌諱,猜害稍甚,休仁轉不自安。 休仁悟其旨,其冬,表解揚州,見許。 乃召 休仁入見。 既而又謂曰:「夕可停尚書下省宿,明 其或直不得出者, 六年, 進位太尉, 領司徒, 太子幼弱, 上疾嘗暴甚,內外莫不 及殺晉平王休祐, 將來不安。 皆恐懼 朝野四 運

矜悼。 誅,諒惟通典,知咎自引,實有偏介。 法,申詔誥礪,辨覈事原。 不能弘贊國猷,裨宣政道,而自處相任,妄生猜嫌, 迹,無事陽愚。 上寢 可宥其二子,幷全封爵。 疾久,內外隔絕,慮人情有同異,自力乘譽出端門。 因近疾患沉篤,內外憂悚,休仁規逼禁兵,謀爲亂逆。 休仁慚恩懼罪,遽自引決。 但家國多虞,釁起台輔,永尋旣往,感慨追深。」 劉休仁地屬密親,位居台重,朕友寄特深, 側納羣小之說, 追尋悲痛,情不 休仁死後,乃詔 內懷不逞之志, 自勝,思屈 **股曲推天倫**, 曰:「夫無將之 [法科,以申 籠秩兼茂 未 晦景蔽 忍 明

休仁位居朝右,任遇優崇,必能爲己力援,故深相黨結。 含弘,未明正憲。。亟與休仁論其愆迹,辭意旣密,不宜傳廣,遂飾容旨,反相 覽萬機,百司有紀,官方無越,而休仁矜勳怙貴,自謂應總朝權,遂妄生疑難,深自猜外。 膝之間,必論朝政,遂無日不俱行,無時不同宿,聲酣聚集,密語淸閑。休仁含姦扇惑,善於 司空晉平剌王休祐,少無令業,長滋貪暴,莅任陝荆,毒流西夏,編戶嗟散,列邑彫虚,聖澤 親攝,仰遵廟略,俯藉衆効,屬承泰運,竊附成勳,而亟叨天功,多自臧伐。 自以屬居戚近,早延恩睦,異禮殊義,望越常均。 出 稱 過,來言之罰,克入致動。 有 司奏曰:「臣聞明罰無親,情屈於司綱,國典有經,威申於義滅。 謹案劉休仁苞蓄禍迹,事蔽於天明,竄匿沉姦,情宜於民聽。 往歲授鉞南討,本非才命,啓行濃湖,特以 休祐於是輸金薦寶, 是以梁、趙之誅,跣 旣聖明御宇,躬 ,承顏接意, 勸激。 休祐以 故 造

不足 自引 祐 棄 詛。 祐 懼 計 致殞 一內協 您謀 惡 與計。 休仁因 流 厥 說休祐使外託專愼之法,密行貪詐之心,謂朝廷不覺。 命。 始露,亦宜 釁,懲懼亂臣者 倉卒,江亞實維天誅,而晉平國太妃妾邢不能追慚子惡,上感曲恩,更懷不逞,巫蠱 禍 心,旣得贊激,凶慝轉熾,與休仁共爲姦謀,潛伺機隙, .聖 休仁知釁自引,情有追傷,可特爲降始安 天慈矜厚,減法崇恩,賜全二息,及其爵封,斯誠弘風曠德, 一躬不 一裁黜,徙削之科,一 和,猥謀姦逆,滅道反常,莫斯爲甚,殛肆朝市,庶申國刑, 也。 臣等參議,謂宜追降休仁爲庶人,絕其屬籍,見息悉徙遠郡。 同舊準。 收邢付獄, 、縣王,食邑千戶,幷停伯融等流徙,聽 依法窮治。」詔曰:「邢匹婦狂愚, 人莫之悟。 圖造釁變,規肆凶狡。 貫絕通古,然非所 休祐遂乃外積 而 法 網未 加 休 以 祝 休 怨

上旣殺休仁,慮人情驚動,與諸方鎭及諸大臣詔曰:

休仁致殞,卿未

具悉,事之始末,今疏以相示

伯猷先紹江夏國,令還本,賜爵鄉

侯。」

襲封餌。

耳。 休祐 況休祐 貪 吞嚼聚斂,爲西數州之蝗,取與鄙 政, 法網之所不 容。 昔漢梁孝王、淮南 虐, 無復 人情。 厲王無它纍悖,正以越漢 屢得 王景文、 褚淵 沈 制 攸 度

親見休祐 之等啓,陳其罪惡 屯苦之時,始得寬寧,彌不忍問。所以改授徐州,冀其去朝廷近,必應能自慘 ,轉不 可容。 **吾篤兄弟之恩,不欲致之以法,** 且每恨 大明 兄弟 、情薄,

革。 向 知言語漏泄幷具之由,彌日懊惋,心神萎孰。|休仁又說|休祐云:「汝但作佞,此法自足 與休仁,少小異常,唯虛心信之,初不措疑。 宿,行必共車。休仁性軟,易感說,遂成繾綣,共爲一家,是吾所吐密言,一時倒寫。吾 爲吾所親,必應知吾意,又云休仁言對,能爲損益。遂多與財賂,深相結事,乃寢必同 有知解,兼爲宰相,又吾與其兄弟情昵,特復異常,頗與休仁論休滿釁狀。 · 休祐推情, 戒訓嚴切, 休祐更不復致疑。 我常秉許爲家,從來頗得此力。但試用,看有驗不。」休祐從之,於是大有獻奉,言 及拜徐州,未及之任,便徵動萬端,暴濁愈甚,旣每爲民蠹,不可復全。 ·實,積惡旣不可恕。 体祐死後,吾將其內外左右,問以情狀,方 雖爾猶慮淸閑之時,非意脫有聞者。吾近 休祐以休仁 休仁身粗

不疑覺。從休酤死後,吾再幸休仁第,飲噉極日,排閤入內,初無猜防,休仁坐生嫌畏。 狀意,甚與常異。旣至省,楊太妃驟遣監子去來參察。從此日生嫌懼,而吾之推情,初 不行。吾所以爲設方便,呼入在省。而休仁得吾召入,大自驚疑,遂入辭楊太妃,顏色 相 有間。一体祐貪愚,爲天下所疾,致殞之本,爲民除患,兄弟無復多人,彌應思弔不咸,益 親信。休祐平生,狼抗無賴,吾慮休仁往哭,或生祟禍。且吾爾日本辦仗往哭,晚定 自休祐殞亡之始,休仁款曲共知。休仁旣無罪釁,主相本若一體,吾之推意,初無

列 倳 第 三 + 文 九 王 欲

聞

知

方

便

,使曇度道人及勞彥遠屢求啓,闞覘吾起居。

何

過, 知朝 題。」休仁乃令左右先飮竟,猶不甚信,乃僶俛噬之,裁進一合許。妄生嫌貳, 絡,擬以載之。 雉 煩 飲 王車皆停在朱雀門裏,日旣暝,不暇遠呼車,吾衣書車近在離門裏,敕呼來,下油幢 無不 由 ,始從維場出,休仁從騎在右,伏野中,吾遣人召之,稱云:「腹痛,不堪騎馬。」**爾時** 休仁 將 以賜之。|休仁得飲,忽大驚,告左右稱:「敗今日了。」左右答曰:「此飮是御師名封 《夕見底,若一旦死去作鬼,亦不取汝,取汝正足亂人耳。」休滿死時,日已三晡,吾 由 每值宵,休仁輒語左右云:「我已復得今一日。」及在房內見諸妓妾,恒語:「我去不 諸 來。」吾虛 來自營府 來十日五 日,吾春中多期射雉,每休仁清閑,多往雉場中,或敕使陪輦,及不行日,多不見 和 相 旣 顏 識 經 厚相撫 將 南討 吾由來諳悉其體有冷患,聞腹痛,知必是冷,乃敕太醫上省送供御高 帥,都不交言。 心如舊,不復見信,旣懷不安,大自嫌恐,惟以情理,不容復 國興生文書,二月中,史承祖齎文書呈之,忽語承祖云:「我得成許那, 日,一就問太妃。自休祐死後,每吾詔,必先至楊太妃問,如分別狀。 ,與宿衞 勞。 爾 將帥 時吾旣甚惡,意不欲見外 及吾前者積日失適,休仁出入殿省,諸衞主 經習狎共 事相 識者,布滿 人,悠悠所傳,互言差劇。 外內。 常日出 入, 於廂下經 有善心。 帥 事事如 休仁 裁 相 悉 梁 規

射

及其所啓,皆非急事

·,吾意亦

辭,不得不云有兵謀,非事實也。故相報卿知。 趣,人莫能測,事不獲已,反覆思惟,不得不有近日處分。夫於兄弟之情,不能無厚薄。 不輕,小人無知,亦多挾背向,旣生猜貳,不復自寧。 不厝疑。 心。事之細碎,旣不可曲載詔文,恐物不必卽解,兼欲存其兒子,不欲窮法。爲詔之 日,每共契闊。休仁南討爲都統,旣有勳績,狀之於心,亦何極已。但休仁於吾,望旣 吾與休仁,親情實異,年少以來,恒相追隨,情向大趣,亦往往多同,難否之 夫禍難之由,皆意所不悟,如其意

鄰,少便狎從。景和、泰始之間,勳誠實重。事計交切,不得不相除。痛念之至,不能自已。 今有一事不如與諸侯共說,歡適之方,於今盡矣。」因流涕不自勝。 上與休仁素厚,至於相害,慮在後嗣不安。休仁旣死,痛悼甚至,謂人曰「我與建安年時相

伯猷,初出繼江夏愍王伯禽,封江夏王,邑二千戶。休仁死後還本,與伯融俱徙丹楊縣。後 寧朔將軍,廣州刺史,不之職。廢徙丹楊縣。後廢帝元徽元年,還京邑,襲封始興王。[110]弟 疾,翻入視脈,說之,遂通好。事泄,遣還家賜死。伯融歷南豫州刺史,琅邪、臨淮二郡太守, 子伯融,妃殷氏所生。殷氏,吳興太守沖女也。范陽祖翻有醫術,姿貌又美,殷氏有

廢帝元徽元年,賜爵都鄕侯。建平王景素爲逆,楊運長等畏忌宗室,稱詔賜伯融等死。伯

晉平刺王休祐,文帝第十三子也。

散騎常侍、鎭軍大將軍、開府儀同三司。 邑千戶。遷侍中,又遷左中郎將,都官尚書,又爲祕書監,領驍騎將軍,出爲使持節、都督豫 專遷東揚州刺史。未拜,徙湘州刺史,加號征虜將軍。四年,還爲秘書監,領右軍將軍,增 |州南豫州之梁郡諸軍事、右將軍、豫州刺史。 景和元年,入朝,進號鎭西大將軍,仍遷 孝建二年,江三五年十一,封山陽王,食邑二千戶。 大明元年,為散騎常侍,領長水校尉,

史,持節、常侍、將軍、開府並如故,增封二千戶,受五百戶。以山陽荒敝,改封晉平王。 等討琰,琰未平,勔築長圍守之。休祐復徙都督荆湘雍益梁寧南北秦八州諸軍事、荆州刺 刺史,改都督豫江司三州、豫州刺史。時豫州刺史殷琰據壽陽反叛,休祐出鎭歷陽,督劉 史,開府、常侍如故。又改都督江郢雍湘五州、江州刺史,江三又改都督江南豫司州、南豫 休祐素無才能,强梁自用,大明之世,年尚少,未得自專,至是貪淫,好財色。 太宗定亂,以爲使持節、都督荆湘雍益梁寧南北秦八州諸軍事、驃騎大將軍、 在荆州, 荆州刺 州 勔

傳

Ξ

+=

文九王

悉删 裒 中 姓 ·,持節、將軍如故。 上以

休

庙

貪

虐

不

可

伝

民

,

留

之

京

邑

,

遺

上

佐

行

府

州

事

。 刻 嗷然,不復堪命。 簡 所在,多營財貨。 不受。 民間糴此米,一升一百。至時又不受米,評米責錢。凡諸求利,皆悉如此,百 泰始六年,徵爲都督南徐南兗徐兗靑冀六州諸軍事、南徐州刺史,加侍 以短錢一百賦民,田登,就求白米一斛,米粒皆令徹白,若有破折者,

除之。 祐 旣 遣 持 醫 雉 卽 馬驚,觸松樹墮地,落硎中,時頓悶,不識人,故馳報弟。」其年五月,追兔休祛爲庶人。 信 共殿 還,前 節 絡 相及 勿 報 Ŀ 休祐 休若 驛相 、侍中、都督、刺 歸。」休祐時從在黃麾內,左右從者並在部伍後,休祐便馳去,上遣左右數 拉 怒,詰責之曰:「汝剛戾如此,豈爲下之義」」積不能平。且慮休祐將來難制 七年二月,車駕於巖山射雉,有一雉不肯入場,日暮將反,令休祐射之。語云:「不得 逼 驅 殺 係。 佷 曰:「 吾 令墜馬。 清道,休祐人從悉分散,不復相得,上因遺壽寂之等諸將追之。 之。 [戾强梁,前後忤上非一。在|荆州時,左右苑景達善彈棊,□□□上召之,休酤留不 頃之,休祐左右人至, 外已絕。 乃遣人馳白上,行唱:「 與驃騎南 体

林

素

勇

壯

有

氣

力

,

奮

拳 史如 故,給班劍二十人,三望車一乘。 山射 雉,驃騎馬驚,與直閣夏文秀馬相蹹,文秀墮地, .驃騎落馬。」上曰:「驃騎體 左右排擊,莫得近。 去車脚,輿以還第,時年二十七。 時巴陵王休若在江陵,其日 有一人後引陰,因頓地, 大,落馬殊不易。」即遣御 日已欲闇,與休 人隨之。上 驃騎 追 贈司空, 欲方便 失鞚, 即馳

則,次宣直,次宣季,凡十三子,並徙晉平郡。太宗尋病,見休祐爲祟,乃遣前中書舍人劉休 次宣諒。次宣曜,出繼南平穆王鑠封,被廢還本。次宣景,次宣梵,次宣覺,次宣受,次宣 陽哀王休業,襲封,被廢還本。次宣彦,封原豐縣侯,爲寧朔將軍、彭城太守,未拜,免廢。 至晉平撫慰宣翊等,上遂崩。後廢帝元徽元年,聽宣翊等還都。 長子士薈,早卒。次子宣翊爲世子,爲寧朔將軍、湘州刺史,未拜,免廢。 順帝昇明三年,謀反,並 次士弘,繼鄱

鄱陽哀王休業,文帝第十五子也。

賜死。

体
林亦子士弘嗣封。被廢還本,國除。 孝建二年,年十一,封鄱陽王,食邑二千戶。三年,薨,追贈太常。 大明六年,以山陽王

臨慶沖王休倩,文帝第十六子也。

孝建元 年,年九歲,疾篤,封東平王,食邑二千戶,未拜,薨。

列傳第三十二 文九王

一八八二

慶國,立第八皇子躋爲臨慶王,食邑二千戶,繼休倩後。 年,以第五皇子智井爲東平王,繼休倩,未拜薨。其年,追改休倩爲臨慶王,以臨賀郡爲臨 大明七年,立第二十七皇子子嗣爲東平王,紹休倩後。太宗泰始二年還本,國絕。 明年,還本國。 休倩,太祖所爱,故

前後屢加紹門嗣。

新野懷王夷父,文帝第十七子也。

元嘉二十九年,薨,時年六歲。 太宗泰始五年,追加封諡。

巴陵哀王休若,文帝第十九子也。

軍如故,增督豫州之梁郡,增邑千戶。 太守、徙南彭城、下邳二郡太守,將軍如故。 爲散騎常侍、太常。 孝建三年,年九歲,封巴陵王,食邑二千戶。大明二年,爲冠軍將軍、南琅邪臨淮二郡 未拜,前廢帝永光元年,遷左衞將軍。 明年,徵爲散騎常侍、左中郎將、吳興太守。日三復徵 四年,出爲都督徐州諸軍事、徐州刺 太宗泰始元年,遷散騎常侍、中 史,〔三》將

都督湘 休若內甚憂懼 刺 事 送,而寶期 永嘉 書令 號 軍。 知 賄 侍 進 沈居 史,持 賂。 加 左 、將軍如故,增邑二千戶,受三百戶。 前在會稽,錄事參軍陳郡謝沈以諂佞事休若,多受 將 典籤 散 ,領衞尉。 七 臨 號 年 州 喪,嘗自稱孤子,衆乃駭愕。 年,遷雍梁南北秦四州郢州之竟陵隨二郡諸軍事、寧蠻校尉、雍州 |騎常侍,進號衞將軍,給鼓吹一部。 又進督晉安□□二郡諸軍 軍 時 海 節 征 諸軍 '內外戒嚴,普著袴褶,沈居母喪,被起,聲樂酣飲,不異吉人, 衣冠旣無 夏寶期事休若無禮,繋獄,啓太宗殺 新安五郡諸軍事、領安東將軍、會稽太守,率衆東討。 已死。 晉平王休祐 南 如 貶使持節都督爲監,行雍州刺史,使寧蠻校尉,削封 故。 將軍 事 未拜,復爲左衞將軍,常侍、衞尉如故。又未拜,出爲使持節、都督會稽東陽 行湘州 會被徵,代休祐爲都督南徐南克徐克青冀六州諸軍 湘州刺史。 尋加散 上大怒,與休若書曰 被殺,建安王休仁見疑, 騎常侍,又進號 刺史,將軍 仍為 都督荆湘 如故。[[刊]六年,荆州刺 休若坐與沈褻黷,致有姦私,降號鎭西將軍。 · 「|孝建、大明中,汝敢行此邪。」|休若母加杖三百,降 征 西 雍益 大 之,慮不被許,啓未報,輙於獄行刑,信反果錮 京邑譌言休若有 將軍、開府儀同 梁寧南北 史晉平王休祐 秦八州諸 至貴 五百戶。 進督吳、吳興、晉陵三郡。 司。 事、征北大將軍、南徐 之表,太宗以言報之, 事。 軍事、征 入,以 刺史,三台持節、常 四年,遷使持節、 西將軍 休若監荆州 (殊異) 並不 叉進衞 、荆州 將

<u> 蔡晉熙湘州之始興四郡諸軍事、車騎大將軍、江州刺史,持節、常侍、開府如故。</u> 休若至京口,建安王休仁又見害,益懷危慮。 州 欲遣使殺之。 陳不宜入,勸割據荆楚以距朝廷,休若僞許之。 手書殷勤,使赴七月七日,卽於第賜死,時年二十四。贈侍中、司空,持節、都督、刺史如故, 刺 `史,持節、常侍、開府如故。 慮不奉詔,徵入朝,又恐猜駭,乃僞遷休若爲都督江郢司廣交豫州之西陽新 休若腹心將佐咸謂還朝必有大禍,中兵參軍京兆王敬先固 上以休若和善,能諧緝物情,慮將來傾幼主, 敬先旣出,執錄,馳使白太宗,敬先坐誅死。 徵還召拜,

休若旣死,上與驃騎大將軍桂陽王休範書曰:

給班劍二十人,三望車一乘。

道巴陵王應作天子,汝使巴陵王密知之。」於是師便訪覔休若左右人,不能得。東宮典 書姓何者相識,數去來,師解神語,東宮典書具道神語,東宮典書答云:「我識巴陵間一 不可全信,然前後相准,略亦不無髣髴。且帖肆間,自大明以來有「若好」之謠,于今未 巴陵具知,云莫聲但聽。」又頃者史官奏天文占候,頗云休若應挾異端。神道芒昧,乃 左右,當爲汝向道。」數日,東宮典書復來語師云:「我已爲汝語巴陵左右,道因達巴陵, 止。詔若百重章句,皆配以美辭美事,諸不逞之徒,咸云必是休若。休若且知道路有 外間有一師,姓徐名紹之,狀如狂病,自云爲塗步郎所使。去三月中,忽云:「神語

|若彌不自安,又左右多是不相當負罪之徒,恒說以道路之言叩動之,相與唱云:「萬民 異音、里巷有「若好」之謠,在西已奇懼,致王敬先吐猖狂之言。近休祐、休仁被誅,休

之心,屬在休若」,感激其意。

作 祖答云:「劉輔國蒙朝廷生成之恩,豈容有此理。」推此已是有奇意。 吾使諸王在蕃,正 故,差得於其名位及見子悉得全也。休若旣是汝弟,使其狼心得申者,汝得守冶城邊 何 爲賊,罪應萬死,休苦至西,大信遇之,乃潛將往不啓京。吾知汝意謂休若處奉因事事 令優游而已,本不以武事,而休若在西,廣召弓馬健兒,都不啓聞。又戾道明等,昔親 東行是一段功,在郡橫爲羣小輩過失,大被貶降,我實憤怨,不解劉輔國何意不作。」次 東縱恣羣下無本末,還朝被貶,爵位小退,次祖被亮使歸,過問訊,大泣,語次祖云:「我 太尉公邪?非但事關計,亦於汝甚切,汝可密白荀太妃令知。 如,心迹旣不復可測,因其還朝在第與書,事事詰誚於內,許密自引分,狀如暴疾致 尋休若從來心迹,殊有可嫌。劉亮問高次祖,汝一應識此人,當給休若。 休若在

廬江王褘昔在西州,故上云冶城邊也。

休若子冲始襲封。順帝昇明三年薨,會齊受禪,國除。

爲善。將遠有以乎。 加,先自至戚。晉刺以擴暴摧軀,巴哀由和良酖體,保身之路,未知攸適。昔之戒子,愼勿 史臣曰:詩云:「不自我先,不自我後。」古人畏亂世也。 太宗晚途,疑隙內成,尋斧所

校勘記

- (二) 到坦之出上蔡 四字。」今補 南,梁坦出上蔡,向長社。』,考異曰:『鑠傳作到坦之,今從宋略。』據此則汝南下當有『到坦之出』 各本並脱「到坦之出」四字。孫彪宋書考論云:「通鑑作『中兵參軍胡盛之出汝
- 滎陽民鄭德玄張和各起義以應坦之 「滎陽民」各本並作「勞楊氏」。 譌。按孫說是,今據改。 勞郡,楊氏雖漢縣名,又屬鉅鹿,不在河南」,而鄭又爲榮陽著姓,因疑「勞楊氏」爲「滎陽民」之 孫彪宋書考論謂「自昔無
- <u>=</u> 又見索廣傳,亦卽特勤之異譯。「庫仁眞」各本並作「仁庫眞」,據索虜傳改正。 **虜永昌王宜勤庫仁眞救虎牢** 「宜勤」疑卽「直勤」之誤。索虜傳又誤作「宜勒」。直勤或作直懃,
- 29 於尉氏津逢康祖 「尉氏」疑當改從索虜傳及通鑑宋元嘉二十七年作「尉武」。通鑑考異云:「宋

略及南平王鑠傳皆作尉氏。 按康祖傳云去壽陽裁數十里, 然則非尉氏也。 今從康祖傳及索廣

}傳 作尉武。」

爪玉 時江夏王義恭領南兗州刺史鎭盱眙 各本並脱「南」字。 按州郡志, 元嘉二十八年,南兗州徙

治盱眙,是脱「南」字,今據補。

ベリ 護軍常侍如故 上云爲撫軍將軍,不云爲護軍,蓋護軍爲撫軍之譌。

(4) 軍」各本並作「征虜將軍」,若稱征虜,則爲降號。 以鑠爲使持節都督南兗徐兗青冀幽六州諸軍事征北將軍開府儀同三司南兗州刺史 征 北將

今據二凶傳改正。

號,宏前已爲鎭軍,中鎭撫

三號比

還加中軍 鎭,由鎭軍加號爲中軍,資序正 將軍 「中軍」各本作「冠軍」 據南史改。 冠軍、小

合。

四

. ታኄ ኒፈ 又奪景素鎭北將軍開 府儀同三司 塡 北 各本並作 「征北」。 按上云「進號鎭北將軍」,則此

征北」亦當作「鎭北」,今改正。

殷獮 等固 爭不 能得 各本並 脫「得」字,據通鑑補。

拜昶 爲 刺 史 拜」各本並作「郡」、據元龜二七八改。

義 陽 與太宰謀反 各本 並 脱 與」字,據魏書劉昶傳、 南史、通鑑宋泰始 元年 補

降 封 陰 安 (縣侯 _ 陰安」各本並作「隆安」,據南史改。 按時無隆安縣。 宋僑置陰安於 今安徽桐

列

倳

第

=

+

校

勘

記

城縣東南。宋書州郡志,南豫州晉熙郡領陰安縣。

留為散騎常侍護軍將軍 各本並脱「爲」字,據元龜二七九補

時廷尉劉 蒙妾孕 通鑑考異云:「宋書帝紀作少府劉勝,始安王休仁傳作廷尉劉矇,

宋路、

少帝紀作少府劉矇,休仁傳作廷尉劉蒙。」

二台 献兄弟爲廢帝所害」,亦有誤。 廬陵二王,則當如南史云 時南平廬陵敬先兄弟爲廢帝所害 侯,三子敬先,出嗣廬陵王紹。 「南平王敬猷、廬陵王敬先兄弟」。今廬陵舉名, 按南平王鑠三子,長子敬猷,嗣封南平王, 若三子並言封爵,則當云「南平、南安、廬陵兄弟」。 三朝本、北監本、毛本、局本並如此,殿本作「時南平廬陵敬 南平不舉名,又奪南 次子敬淵, 若但舉南平、 封南 安縣

[14] 皆往東府詣休仁所親信 各本並脫「詣」字,據南史補。安侯敬淵,疑文有脫譌。

時年三十九 孫彪宋書考論 云:「當作二十九。」按明帝是休仁之兄,同年明帝卒,年三十四,則

休仁是弟不得是三十九,疑作二十九是。

休祐 下 云「晉平國太妃妾邢不能追慚子惡」,邢太妃生晉平王休祐,則作休祐是,今改正 致殞 倉卒 「休祐」各本並作「休仁」,張森楷校勘記、孫彪宋書考論並云休仁當作休祐。 按

襲封始興王 張森楷校勘記云:「始興當作始安,休仁降封始安縣王,非始興也。」按州郡志,湘

- 孝建二年 「二年」各本並作「三年」,據本書孝武帝紀、南史、元龜二六四改。
- 又改都督江郢雍湘五州江州刺史 五州止四州,奪去一州。或「五」是「四」之誤。
- 左右苑景達善彈棊 「苑景達」南史、元龜二九七、二九九作「范景達」。
- 四年出為都督徐州諸軍事徐州刺史 各本並脫「徐州刺史」之「徐州」二字。 孫彪宋書考論云:

「脫徐州二字。」按前未言休若任刺史,孫說是,今補正。

- () 三 「當是左中郎將。」按孫說是,今改正。 明年徵為散騎常侍左中郎將吳興太守 「左中郎將」各本並作「左右郎將」,孫彪宋書考論云:
- 遷雍梁南北秦四州郢州之竟陵隨二郡諸軍事寧蠻校尉雍州刺史 自荆州度屬郢州、孫說是、今改正。 「制州當是郢州。」按州郡志、孝武孝建元年立郢州、時荆州之竟陵、隨郡二郡即 「郢州」各本並作「荆州」。孫
- 全艺 將軍如故 孫說是,今訂補 各本並脫「將軍」二字,孫彪宋書考論云:謂仍爲左將軍如故也。 脫將軍二字。」按

